



清代傳記叢刊·綜錄類⑦  
周 駿 富 輯

國朝耆獻類徵初編  
(三)

卷一九七至  
卷二〇五



明文書局印行



國朝耆獻類徵初編卷百九十七目錄

疆臣四十九

趙慎畛

韓克均

吳光悅

楊健

祁墳

陳桂生

瑚松額

嚴烺

補錄

趙慎畛



圖書分類法

--	--	--	--	--	--	--	--	--	--

國朝耆獻類徵初編卷百九十七

通奉大夫前署江西巡撫江西布政使司布政使湘陰李桓輯  
疆臣四十九

趙慎畛

趙慎畛湖南武陵人嘉慶元年進士改庶吉士四年散館授編修  
五年充順天鄉試同考官六年復充順天鄉試同考官七年改山  
東道監察御史十年三月充會試同考官七月轉掌京畿道八月  
奏上年因災蠲緩過多各省買米籌補以致糧價增昂計見運抵  
通者已百餘萬石較蠲緩原數有盈無絀聞湖南尚議採買爲數  
有限無裨倉儲徒增市價 諭曰前據阿林保奏請於湖南秋成

後探買米五萬石撥交糧船搭運業經交部覆議今該御史稱探  
買之數覈計俸甲米檔僅足敷五六日之用而旗丁搭運轉未能  
攜帶貨物藉需餘潤且年歲豐歉不齊糧價貴賤無定若不通盤  
覈計恐致有妨民食著交戶部妥議看來阿林保奏探買之處格  
礙難行卽行議駁可也尋 命巡視通州漕務十一年六月劾楊  
村通判廖雯菁昏慣不職縱令胥役家人勒索糧船起剝規費鞫  
實褫職十月遷刑科給事中十二年六月充江南鄉試副考官八  
月丁母憂十四年服闋十五年補禮科給事中十六年奏參湖南  
學政徐松乘轎入櫺星門每試各屬發交詩文苛派重價需索紅  
案陋規縱容家丁凌辱士子所出題目割裂聖經各款 上命工

部左侍郎初彭齡會同巡撫廣厚訊明褫松職遣戍烏魯木齊十七年三月兩廣總督蔣攸銛奏慎畛品識兼優才可大用請特發粵省八月授廣東惠潮嘉道十九年遷廣西按察使二十年遷廣東布政使二十三年擢廣西巡撫二十四年劾桂林府大墟同知趙椿刑訊婦女致傷自縊論如律先是兩廣總督蔣攸銛廣西巡撫慶復以賀縣界連粵東湖南水陸交錯盜賊出沒於二十年奏准暫添兵弁分駐各卡五年後察看情形酌撤二十五年九月慎畛奏盜匪根株未淨弁兵不宜遽撤仍請畱緝以靖地方十月已革隆林營千總全玉挾該管官遊擊曾勝揭革之嫌謀殺其父曾謙審明請卽行正法均從之代理土田州州同郁獻琛將行



竊未成賊犯濫刑致斃奏請革職嚴審 上命查此外有無任性苛酷之處因訊出代理遷江縣時刑責婦人以致羞忿自盡郁獻琛遣戍新疆道光元年四月奏獲宜山縣聚眾結會匪犯廖五桂藍耀青等宜山有新舊二墟藍耀青居新墟結添弟會惑眾斂財屢擾舊墟廖五桂規奪其利劫龍虎會設平治大元帥通議司名目私雕假印編造逆示令富戶借給銀米與新墟角慎吟親往督辦悉伏誅時粵西各州縣匪徒結添弟會者甚夥慎吟飭屬嚴捕先後獲趙興奇蔣五益唐之莪姚廣王亞喜鄧望受趙宗義劉玉隴等寘之法 上以直省攤捐易滋流弊 命各督撫清查革除五月奏言粵西地瘠民貧州縣辦公經費不敷不能不酌議幫貼

至窮員苦差共相仗助亦所不免均視缺分之大小廉俸之多寡  
分別定數尙無虧那情弊但各官養廉無多攤捐不宜常有減官  
吏一分之浮費卽畱百姓一分之實惠報 聞粵西營汛墩房每  
屆修理向於各州縣養廉內攤扣積款旣多不免各圖省費遷延  
不報慎畛奏查各營房共一千二百四十二所坍塌者七百有四  
酌中估修需價三萬七千餘兩請動支庫存文職空缺歸公養廉  
一項停止攤捐下部議行六月劾代理全州州同王任遠濫刑斃  
命論如律二年擢閩浙總督三年二月兼署福建巡撫延平建甯  
邵武汀州四府山深地僻路徑紛歧漳泉江廣人租山蓋廠不下  
十餘萬奸民溷迹其中勾黨結會又有擔匪丐匪各種或受雇挑

貨中道竊逃或假名求乞曠野肆搶甚至糾集眾多擄人勒贖商民咸受其害先經總督慶保奏准於海洋緝匪經費內撥銀六千兩爲陸路捕盜之用而州縣慮報銷駁減動致賠累均觀望不敢請領捕務日形廢弛四月慎畛奏緝拏匪犯按名懸賞購線以及兵役飯食委員薪水需用浩繁所撥銀數本屬不敷請仍歸海洋原款別於灑帑餘息內每年一萬兩由督撫覈給並免報部覈銷得旨允行繇是陸續奏獲首匪關春喬大飯甌等分別正法尋勅浙江提督沈添華縱逸乖張難勝總統之任命浙江巡撫帥承瀛鞠實褫其職九月奏浙江雨水過多糧價增長閩省早收豐稔臺灣餘米可以出糶請暫停海禁兼免徵稅從之旋以朝鮮



國遭風難夷赴京未經派員護送下部議處四年正月以噶瑪蘭處臺灣極北負山臨海地勢險要奏改艚船營遊擊爲水師參將兼轄噶瑪蘭添設都司千總各一員外委二員撥臺灣城守嘉義艚船三營兵三百駐防七月以閩安縣之琅琦島爲福州門戶島長三十餘里居民二千餘家奸徒私設牙行招引商船接贓濟匪奏移閩安協都司千總各一員兵二百巡察十月奏臺灣水陸官兵令臺灣道會同總兵管轄均如所請十一月奏閩省承造金州戰船天津剝船例價不敷每歲各道府州縣攤墊銀五千餘兩請於灑帑內撥六萬兩生息以資津貼免其派捐 允之十二月奏彰化縣所轄水裏埔裏兩社係在生番界內地土膏腴生番不諳



耕作又無農具招熟番往墾因而民人共生覬覦查生番地界向以堆築土牛爲限民人樵採例禁侵越雖熟番氣類相同而近來漢民與熟番交契結媼者頗多恐藉此展轉勾引溷雜難稽或因生番懦弱逞強欺占固非體恤番黎之道且生番野性難馴動輒爭鬪或致釀成巨案尤不可不防其漸見令各社屯弁將熟番槩行召回請於集鋪內木柵二處設專汛巡防毋許番民擅自出入從之五年正月奏明臣黃道周應從祀 聖廟兩廡下部議行九月調雲貴總督六年五月奏貴州古州鎮總兵馮聯科輕率任意降補都司貴州郎岱同知司爲善侵用官帑償鋪戶積欠旋因虧空被參以債主偏那稟請追辦經貴陽府知府色卜星額照例

追項入官巡撫蘇明阿劾以徇庇妄爲褫職 上命慎畛覆鞫色  
卜星額並無驚擾市肆滋累無辜情事復其官是月卒 諭曰雲  
貴總督趙慎畛持躬清介辦事勤慎由翰林科道出任監司前在  
嘉慶年間蒙 皇考仁宗睿皇帝擢授巡撫朕御極後簡用總督  
旋由閩浙調任雲貴方以邊陲劇要特資倚畀遠聞溘逝殊深軫  
惜趙慎畛著加贈太子少保銜照例賜卹任內一切處分悉予開  
復應得卹典該部察例具奏伊子戶部候補主事趙敦詩著加恩  
於服闋後仍以戶部主事遇缺卽補尋 賜祭葬 予謚文恪入  
祀名宦鄉賢祠子敦詩二品廕生官陝西道監察御史降七品京  
官敦訓山西黎城縣知縣敦詒鄆縣教諭

右 國史館本傳

武陵趙氏系出宋宗室朝散郎不攸居歙之巖鎮元末東山先生  
沆爲詩古文尤精春秋明崇禎時有光道者以理學高節著稱其  
孫元裕康熙中遷湖南始爲武陵人子允芝蚤卒遺孤宗海善治  
生贅於王氏族黨依以食者常百數收葬亡匱甚眾中歲卒有二  
子其伯公也少敦敏好學長益端謹淵宏乾隆己酉選拔學使昆  
明錢公澧異之曰生人英也嘉慶元年進士選庶吉士授編修充  
國史館纂修庚申辛酉兩爲順天鄉試同考官七年 上親考  
御史取第一補山東道監察御史奏川楚善後事宜 上偉之十  
年充會試同考官巡北城掌福建道轉京畿道巡通州漕裁革陋



規十一年五月奏糧船起剝事發諸積弊漕竣轉刑科給事中稽  
內倉丁卯鄉試爲江南副考官榜發聞母訃卽日奔歸十五年起  
補禮科給事中充會典館纂修辛未會試監試內簾湖南學使父  
干試事公奏論之十七年授惠潮嘉道宣布教化優禮諸生清理  
獄訟海陽普甯民械鬪擄掠聚眾久官不能治公自馳往捕誅之  
沿海島嶼民多寮居藏匪消賊公悉編入保甲毀其棚寮水陸獲  
盜無數十九年遷廣西按察使莠民假天地會結眾斂錢每破一  
案邑里騷然公飭府縣實圖不軌或搶劫及首斂錢者按如律入  
會保家者杖而釋之自首免罪復爲條約諭民間廣種植浚塘堰  
嚴守望堵嚴峒摘律例中易犯者五十餘事刊示之廣東洋匪投

誠後漸入廣西爲盜公行守令以捕盜多寡定其舉廢水路設巡船商民停泊有定所衛之以兵舊例州縣送囚至省役與犯並繫名曰連手讞定多瘕斃公稽司府首縣三監重囚皆常數百人額設禁卒四十八名不足鈐束增八十名役食之費有案州縣捐之連手遂革又送囚遠者距省幾二千里近亦五六百里每一囚往返費六七十金州縣苦之多匿案不舉公議不通舟六府囚免發回五名以下者失事官具費五名以上計程遠近給公費三分之一緝捕乃力 上諭查廣西狼兵之制公覆曰狼兵初制無考惟明史兵志有廣西東蘭那地南丹歸順諸狼兵宣力最多之語其來已久檢司案自乾隆八年清查二十一年諸府州報兵田自狼

兵外又有土兵土勇隘卒堡卒耕兵撫兵諸名其承耕田畝多寡不同而分防調遣與狼兵無異當時議有田諸兵食地另立田名戶名惟本地狼獠得充不許外售至州縣土兵歷來以田賦兵無缺凡食田兵其日訓練府州縣官會營歲一閱之不給田之狼堡免差操三十二年宋前撫奏給田兵九千五百人半習鳥槍四十二年停之時計狼堡兵五千四百八十五名均有田足資歲食惟守隘防汛走遞文書設狼總堡長農隙時官一閱之柳城雒容天河上林諸縣仍習鳥槍相安已久請循其舊明年實覈諸土司有田土兵三千六百五十五名無田土兵四千四百九十四名督撫據以覆奏二十年三月遷廣東布政使州縣解司及領司銀舊皆



有費或未領解則交後人代之展轉虛抵積數十萬交代每數年  
案不能結公設局句稽未領解者各爲一冊行覈無譌卽由司劃  
抵免其費公之初至也司庫貯四百萬再逾年五百三十萬款清  
而庫以實廣西雲貴湖南諸水由西北二江匯注大水分流廣州  
入海濱河民築圍隄自衛南海桑園圍九千五百餘丈險要石工  
一百五十七丈里民歲修數決石亦剝落嘉慶末西水漲決借帑  
修築而水患無時公上言民力已困請以藩庫沙坦花息及糧道  
庫息銀八萬發商年得息銀九千六百兩以五千還帑四千六百  
存縣歲修責成紳士以爲永利東省屯田五千三百餘頃自雍正  
三年裁衛所歸州縣上則畝徵米五斗中則二斗七八升加一六

耗羨另科丁銀十倍民田歉歲多鬻子女棄家室者嘉慶五年前  
司常明奏丁有逋荒官多賠墊部議令別覓曠土墾之卒無報墾  
者二十年督撫奏令瘠地量減科則荒蕪題豁以見勘之沙田花  
息撥補公議曰通省屯米九萬二千九百餘石可徵輸者十裁五  
六餘均當減則沙田花息僅足補衝崩無著之數而減則無可撥  
補查有乾隆中舊墾沙坦六千餘頃科則極輕畝徵銀四釐六毫  
四絲不徵色米較上則民田尤饒沙民稅輕而利厚頃南海番禺  
諸縣補請升科照番禺上則田畝徵銀三分五釐八毫今請沙坦  
田准此升科原徵額賦外盡抵屯糧減則之數督撫如議奏行先  
是海寇未平夷商詭譎濱海控制事宜數改蔣公以新安之大嶼



山香山之澳門東莞之虎門鎮遠南山諸礮臺今昔情形不同行  
司議公曰大嶼山孤懸海外夷船所經山中東浦大澳二口居民  
尤密舊於雞翼礮臺設千總防兵去二口遠請二口各築垛牆四  
十丈增設兵數澳門舊築六礮臺已爲得勢惟在稽察之嚴請責  
成同知副將隨時監察演礮以重聲威虎門爲中路門戶水師提  
督駐紮控馭各島原建南山橫當二礮臺近復建鎮遠一臺惟虎  
門砦距校椅灣海口尙二十餘里鎮遠南山聲勢未能聯絡請於  
曠闊處建土城督提二標兵輪替駐防遊擊或都司一人率之他  
如番禺之獵德汛當黃浦夷船運貨入省之衝請設一礮臺扼之  
舊制東莞新安香山三縣海洋香山副將大鵬遊擊各巡半年今

澳門大嶼山皆緊要二將未可遠離請歸提督統巡議上蔣公採行之公以廣東風俗奢靡官民不知務本重刻陳文恭從政訓俗二種遵規通頒之躬先率以勤儉惟公事無吝連山縣新裁改入理猺同知修城工銀未及入奏公以己資廉爲之或曰子產之輿可勝濟乎公曰濟所可濟何能盡亦安能恕也二十三年擢廣西巡撫十二月至桂林習知地勢建瓴旬月不雨卽旱竭至則以農功水利爲亟宣諭守令平疇修陂塘設龍骨車以挽水山田開蔭井設井筒架以汲水作式使民倣之公爲臬司時嘗以會匪被脅准自首其後州縣多勸使首公曰如此則奸人倖免轉以自首爲計失吾意矣令辨其願從被脅分別治之於是破獲數十案論如

律者四百餘人桂林梧州鬱林南甯諸府州界湖南廣東柳州慶遠思恩泗城諸府界雲貴羣盜倚之出沒公咨會四省搜捕不分疆域腹內州縣查保甲置望樓練民壯互相守望保甲不能編者建卡房縣或十座二十座府各以官會營巡緝柳州至省千里河道紛歧舊設水汛有相去數十里者增腰卡四十三所守以提標五營兵每卡一小哨船有盜則卡兵登船舉礮攻捕各村望樓團練咸出堵擒公率司道以下捐其費前後獲盜一千七百餘人公以外盜十居七八欲清其源使挾貲貿易挈眷耕種者爲客民立客長籍之單身流蕩者爲游民查籍遞回山僻草寮盡毀礦廠窯榨傭丁皆立冊有保者留否則逐刊爲省例西省營汛工程例無



支款乾隆中奏令州縣歲捐養廉扣存備修久之州縣捐款日多  
工程延廢公稽司庫有文職空缺養廉貯銀二十四萬奏請動支  
以爲例停止扣廉又有酌提籌補之款巡撫以下年捐養廉一成  
補州縣無著虧空公以州縣疲乏酌減其額惟院司道府如故西  
撫歲支養廉銀一萬楷潯二關准巡撫得用羨餘公歎曰吾家賴  
慈母悌弟經營先人餘業子孫衣食物足矣身爲大臣復取盈焉  
將安用之吾不能裨益百姓第視所能者爲 聖主宣布仁澤耳  
西省額設倉穀未買補者數十萬趨買之吏多病民公劾預備倉  
捐銀一萬二千令桂林府買穀積貯以千金發典生息爲倉歲費  
曰後有君子擴此意爲之及諸郡邑今特其權輿也康熙中陳文

簡公撫粵西設愛日書院久廢公修之復建培風書院課民間童子柳州思恩慶遠三府縣向無書院是歲鄉試三屬生員少應者公憫之發銀二千給右江道勸捐興建於是象州羅城天河武緣雒容興業皆請刵建道光二年入覲今上於乾清宮諭曰卿誠實不欺故皇考簡用貽朕勉之公泣謝至昌陵行禮而還四月回桂林八月授閩浙總督十二月入京召見嘉以公正忠誠三年二月至閩時將懦兵驕公治軍嚴重申明條約徧給諸鎮營汛身自考校備弁無虛日參將某驕蹇浙提玩洋務皆奏劾之兩省肅然手札司道諸鎮令所屬文武密陳優劣驗之以事信賞必罰故所用得人上游四府地僻山深多漳泉江廣人相山立廠

爲業十餘萬眾游民混迹句結土民擄劫於是會匪擔匪勾匪羣聚爲害公令諸村廠就地勢所便自相聯絡造冊報官以時抽查有盜鳴鑼逐捕復舉誠實曉事者爲廠首約束之閩省舊於海洋緝匪費內歲撥銀六千爲陸路捕盜用而州縣長報銷累莫敢請領公奏別於灑帑餘息內年以一萬爲率由督撫視捕盜多寡輕重覈給之毋報銷乃遣文武督兵赴諸山谷搜捕著名匪首黨羽皆獲上游遂靖浙洋商艘報劫大率捕鯨漁戶失利者爲之公旣嚴責水師復與兩撫議立海口漁船出入章程水陸合捕商舟漸謐福州閩安鎮外有琅琦島居民二千餘戶多爲奸利濟匪公訪聞擒治移駐水師建礮臺望樓省城門戶益重泉漳二府械鬪之



風未已刊故教諭謝金鑾治法論頒守令行之大要以重土親民  
爲本漳州府周鎬賢守也以老乞去公手書勉畱使署汀漳龍道  
尤以臺灣爲慮盡選賢能以往未幾鳳山逆民楊良弼作亂巡道  
孔昭虔知府方傳穰不一月平定鳳山縣城毀於蔡牽之亂遷治  
埤頭屢議建城未果傳穰東渡公以十事屬之鳳山城工噶瑪蘭  
積案尤其巨者傳穰勘埤頭無險可憑請還舊治勸捐築城復與  
淡水同知李慎彝建築廳城山前諸城乃備噶瑪蘭積案者嘉慶  
十五年蘭地入籍冊始善後事十年未竣以賦則不定諸案皆稽  
原奏民田一甲當內地十一畝有奇請徵穀六石園一甲徵穀四  
石戶部議令如臺灣叛產上等田徵穀三十二石中等穀二十六

石下等穀二十石上等園如中田中等園如下田下等園徵穀十八石往反數駁又原奏限墾田園七千餘甲及墾成實止五千餘甲戶部執原奏公歎曰彈丸之區民力竭矣奏請賦則仍如原奏甲數以墾成爲準其制乃定蘭民入山伐木歲供道廠軍工船料四載行十年矣軍工匠首科斂無已道光三年山匠林泳春遂爲變水師提督巡臺公飛檄捕誅之既平博採輿論更定採料章程蘭人乃服公按蘭廳在臺灣極北山後去郡城千里舊設守備千總各一把總三兵二百人頗形單弱其南境蘇澳外接生番與北境之三貂嶺澳皆東面大洋時有匪船藏泊艤舢遊擊駐淡水道遠權輕不足控馭奏改爲水師參將兼轄蘭境水陸事更於臺灣



城守嘉義船舫三營撥兵三百入蘭營增設都司千總各一駐防  
始密臺灣十三營戍兵一萬四千皆自內地五十三營更替例由  
廈門提督點驗分汛其歸也亦如之而臺北至郡千餘里廈門至  
延建汀邵諸營又千餘里班滿出營候商船配渡每需旬月弁兵  
苦之公檄臺鎮知府更議上游諸府兵配臺北諸營者自八里岔  
登舟入五虎門福州城守協點驗泉漳二府兵配臺灣中路諸營  
者自鹿仔港登舟入蚶江陸路提督點驗臺灣府城南路諸營均  
自鹿耳門登舟入廈門水師提督點驗其往臺亦如之戍兵之困  
以蘇臺灣歲運穀十萬給福州漳泉三府兵食以商船配載嘉慶  
後商船壞者民不能複製運穀日艱而鹿仔港口門漸淤商舟益

不便公奏開五條港通商濟運港在嘉義彰化二邑閒固偷渡私口也臺本產穀之區福泉漳三府民食仰之商民販運歲常百萬江浙天津亦至焉臺人不知蓋藏生齒日繁米價增貴稍歉卽思爲亂公飭道府議令民間常留餘勿任空虛傳稊請稽出口米船月報實數酌年豐歉以定限制三年五月浙江二十四州縣水災公與帥公奏發帑撫卹復捐廉倡勸紳商得穀六千米一萬七百銀七十萬五千正賑畢續放災區安定流民就食者公令所至州縣詢男婦名數給滾單撫卹是秋浙中米貴帥公欲碾閩省倉穀運濟公曰閩倉買補未足不可且碾運折耗委員運費異時買補皆費周章惟臺灣歲豐乃與閩撫奏弛海禁招商販臺米濟浙

浙人之私墾南田也帥公持封禁之議公初赴閩浙時上命察之公以民生日繁南田山內浙臬司朱桂楨勘墾田萬畝聚丁六千正可爲海畔窮民裕生計未至杭州帥公奏禁人盡驅回田亦犁毀恐民復墾引海水灌浸之公不得已據情覆奏居常惜之彰化縣有生番地名埔裏社頗膏腴民數覬覦社番懼引熟番自衛孫公巡臺有請開墾者孫公納之以語公公曰此界外番地有主與南田曠土不同儻番人慕化如噶瑪蘭故事則可否則爲開邊者口實矣臺府議至亦以勿開便孫公乃復申越界之禁閩鹽不銷官商久困公以南靖長泰二縣最累而額銷引鹽四萬二千臺灣一府年止銷鹽十三萬奏減二縣引鹽一萬二千入臺額以蘇



官困諸商帶完積年欠課亦停徵兩年以紓商力前明之季鼓山  
劉忠介公漳浦黃忠端公理學大節最著忠介公已從祀 聖廟  
西廡道光四年 奏請忠端從祀東廡列羅文莊之次侯官已故  
安溪訓導謝金鑾德化已故泉州教授鄭兼才學行爲士所服所  
至敦崇名節公敬異之令本縣學舉報鄉賢五年九月調雲貴總  
督六年正月至滇貴州土瘠民貧惟黎平府產杉木松桃廳產茶  
桐獲利資生餘則彌望皆童山也近歲大吏勸民種樟樹放蠶收  
繭織紬甚有效而守令或以爲迂公過諸府州縣多未行者復手  
教勸之且捐給工本滇省荒遠以靖撫邊夷督運銅鹽爲大政公  
奏陳銅礦情形其略曰滇省應運京銅六百五十餘萬帶補歷年

沈失三十餘萬本省局鑄六十餘萬各省採買二百七十餘萬凡用銅千數十萬斤昔時銅旺有盈存貯瀘店謂之底銅諸廠或一時未措輒借兌運京嗣礦生漸微歷請封閉減額銅二百餘萬近歲愈縮年常不敷一二百萬嘉慶二十二年底銅已盡適四川烏坡銅廠驟旺由滇委員買補至道光五年瀘店收銅八百一萬道光三年甯臺廠應運京銅改撥各省採買以瀘店撥補京運今存底銅二百七十餘萬而已本年諸廠報獲及已發在途已買未運之烏坡銅四百數十萬尚可濟乙酉年京運至本省局鑄與各省採買皆未能裕由諸廠攻採年久銅深礦薄產銅日絀而炭山漸遠運脚加增窳戶砂丁工本價外餘潤無幾故採銅日少欲覓子

廠須預費工本民皆乏貲廠官借發恐無成效遂至虧賠此滇銅疲滯之情形也惟有慎選幹員經理調劑攻採飭令各屬廣覓子廠嚴緝私鑄設法整頓期有起色又奏鹽務曰滇中舊制昭通東川二府食川鹽廣南行粵鹽開化府沿邊井遠民夷私食交鹽餘皆食本省井鹽嘉慶八年改定民運民銷亦無分地聽商販赴井納課領引配鹽運銷井官收課報解年徵課銀三十七萬二千餘兩其後奏銷漸絀年欠課至十數萬詳察其故由八年改定時諸小井雖出滷淡薄而黑白安甯石羔諸大井產鹽尙旺且有溢銷可撥補迨後大井滷亦漸絀薪艱費鉅溢銷不足補缺黑鹽諸井水數淹虧課不得已開子井滷稍厚因新例不分地界濫價爭售



侵占他井銷路是以課額日絀目前要策先擇誠實諸習井務之員堵緝私販就近稽涵防範於竈戶未煎之先然後按諸井出鹽多寡分地行銷以杜濫價越占之弊損益變通惟在行之有效公以古人防邊之計無逾屯田日與撫軍考地圖訪形勢經營屯田安撫土司建設礮堡練丁防守諸制未成疾作五月一日薨贈太子少保謚文恪賜祭一壇葬於郡城北陽山之西麓公少從舅氏王春坐遊教以勵行克己後益博覽儒先格言史傳雜記凡有切身心可致用者無不潛心體驗交遊儕會中間嘉言善行則惕然若有所動通籍後用力尤勤每日言行及讀書接物時自省察甲子後日記之易簣乃已生平於人財物無所愛而未嘗責人

所難深知州縣之困體恤甚至而不可干以私接見屬吏自道府以下懇切訓誡如師弟是非賢劣喜怒不藏曰吾於人無私愛憎何必使之妄相揣度耶有所詰責其人能以理自申者必賞異之卒從所請曰理識足而後氣壯此非庸人所能也嘗顏其室曰省譽佩一玉章曰養心戒性年位愈進用功益密嗚呼昆明錢公所謂人英者公豈有愧哉公諱慎畛字遵路號遂樓晚號莖生乾隆二十七年十月七日生薨年六十五三代考皆 贈榮祿大夫如公官階妣皆 贈一品夫人娶同邑處士吳天雲女 封一品夫人子二敦詩郡廩膳生戶部山東司主事轉貴州司員外敦詒郡廩膳生道光乙酉科選拔貢生候選訓導側室龍氏一子敦訓道



光辛巳舉人景山官學教習公詩文雅則薨後諸子與門人輯之  
凡奏疏八卷從政錄八卷載筆錄四卷榆巢雜識二卷省僑室續  
筆一卷讀書日記四卷惜日筆記二十卷雜文三卷詩三卷

右行狀姚瑩撰

韓克均

韓克均山西汾陽人嘉慶元年進士改翰林院庶吉士四年散館授檢討五年充貴州鄉試正考官七年充會試同考官九年二月上幸翰林院與諸臣倣柏梁體聯句克均與焉禮成賞味餘書屋全集文綺箋硯等物五月擢湖廣道監察御史六月奏言各部院衙門事件應遵定例辦理其例有未備者方以舊案比照而成案日積日多辦理不無參差吏胥意爲援引得以高下其手請敕下各部院堂官揀派司員詳校例案遇有例意未盡昭晰者詳細註明其前後兩歧之案酌中參覈不可遵行者槩行刪去庶足以杜弊端而歸畫一疏入 上是之十年三月充會試同考官

七月調協理京畿道監察御史十一年轉掌京畿道監察御史尋  
奏充 實錄館提調十二年九月遷工科給事中十二月 高宗  
純皇帝實錄告成 命以四品京堂升用十三年正月巡視通州  
漕務四月奏請定豫東漕船行走次序略言予漕冬兌冬開東漕  
春兌春開向來豫省幫船行抵德州必須守候二十餘日俟德州  
正幫兌竣開行後始令豫省漕船跟接前進而該二省隨後各幫  
又復彼此參錯行走動輒停畱守候稽遲時日幫丁舵人既賠累  
不支押運員弁復顧此失彼應請嗣後豫省各幫船一抵德州卽  
上緊挽運毋許停畱其東省全幫亦可挨次緊接行走庶全漕豫  
順諸事從容得 旨允行旋以天津北運河水勢微弱糧艘淺阻

克均等未經奏明傳 旨申飭並 命馳赴北運河勘明挑濬十  
四年京察一等引 見記名以道府用尋授浙江溫處道十九年  
升河南按察使尋調雲南按察使二十一年升安徽布政使二十  
四年四月擢貴州巡撫九月調福建巡撫二十五年十月以建陽  
縣米價增昂奏請動碾倉穀減價平糶又奏玩視盜案之署嘉義  
縣知縣鹿澤長請褫職十二月奏參漳州鎮總兵蘇勒芳阿性耽  
翹彙難期振作請勒令休致均 從之是月調雲南巡撫道光元  
年二月以題本內擡寫錯誤下部嚴議部議奪職 上加恩改爲  
革職留任尋奏漢民典買夷地酌量變通章程先是永北廳夷匪  
因漢民典買夷地起釁借端滋擾事平後凡典買夷地議令依限



取贖逾限者仍歸漢民執業復據御史張聖愉奏以漢民重利盤剝準折夷地必致積怨成讐請將逾限不贖之地或剖半均分或給還十分之三疏入上命詳覈查辦至是奏言夷匪甫經懲創不可不抑其逞殘圖占之心是以原議章程予限令贖爲因時制宜起見業經出示曉諭未便朝令暮更應俟限滿不贖之時於原定章程量爲變通除查明杜買無庸議外其平價典押並盤剝準折確有證據者覈計漢民所出本息分與應得地畝餘地給還夷民耕種固不可使漢民剝削夷民亦不可使夷民以焚掠爲得計長其搆亂之心至此後漢民典押夷地尤當嚴查禁止以期永靖邊圉得旨允行十二月奏劍川州山水衝坍沙石淤壓田房鶴

慶州秋收歉薄請緩其賦又奏東川府會澤縣小江地方向有大橋爲運銅要道歷年衝刷傾圮勢難修復請改設渡船以濟輓運允之三年九月偕總督明山奏請嚴禁商銅改鑄鑼鍋及無票之銅私行出廠並通飭經過地方文武員弁於關津渡口嚴行盤驗以防走漏得旨認真查辦不可有名無實十一月奏請修葺海口略言昆陽州境海口爲洩水之區歲久未經疏修山水時發沙石淤積滇池宣洩不及寢多水患請於河工積餘銀兩存項內動支修理築壩挑挖以利農田如所請行四年署雲貴總督五年調福建巡撫仍暫署雲貴總督六年二月奏開化鎮所屬地方與越南國三面接壤前因夷匪不靖添設防兵士練駐守馬達等處

以資控馭茲以越南境內匪徒業經剪除淨盡邊界靜謐請全行  
裁撤以節糜費如所請行五月赴福建巡撫任十二月以閩省上  
年歉收糧價昂貴奏請暫弛海禁准令浙省商船販米赴閩以濟  
民食如所請行七年五月以莆田縣木蘭坡地方灌溉民田四十  
萬畝舊築石隄一千一百餘丈以禦海潮歲久傾圮奏請修復  
上以所辦有益 嘉之閏五月奏參巡海將弁緝捕懈弛請將海  
壇右營遊擊許連生摘去頂帶把總潘秉明外委李萬春等褫職  
勒限嚴緝 上是之十年閩縣知縣張騰以侵虧官銀被劾列款  
稟訐 命禮部尚書湯金釗刑部侍郎鍾昌往按其事張騰坐誣  
訐論如律克均於司庫盈餘銀兩未經報部復失察家丁收受門

包降二級畱任十一年京察屆期 諭曰福建巡撫韓克均辦事  
遲緩尙無劣蹟可指著以原品休致二十年卒年七十五子一工  
部郎中

右 國史館本傳



國朝通志卷之四十一

三

吳光悅

吳光悅江蘇陽湖人嘉慶元年進士以內閣中書用二年補官三年充順天鄉試同考官四年充軍機章京六年充山西鄉試副考官七年議敘以主事用十二月川陝楚邪匪底定以繕寫 諭旨與有勤勞 予軍機章京優敘光悅與焉八年補吏部主事九年遷員外郎十年 記名以御史用尋充會試同考官十二年補浙江道監察御史十四年巡視中城十五年轉掌廣東道監察御史十七年十月調京畿道十二月因飭禁庶民呈遞封章刑部議奏條例內有令本人將呈遞事件開具節略一併進呈一條光悅以奸民巧詐百出所開節略未必皆與封詞符合接收官無從查考

轉致事無巨細俱以上聞應請嗣後凡涉封章無論有無節略  
槩不准擅行投遞上以刑部所議本未允協諭嗣後如有呈  
遞封章接收之員一面將所遞封章具奏一面將該犯先交刑部  
押禁附於摺內呈明所有開呈節略一條著卽刪除十八年授安  
徽甯國府知府十九年桐城縣民汪儉萬毆斃徐仲書賄囑王松  
禮頂認正兇光悅承審未能究出實情降二級調用二十年捐復  
原官選授福建福甯府知府尋以親老告近二十一年授浙江處  
州府知府二十四年署嘉興府二十五年丁母憂回籍道光三年  
服闋補直隸保定府知府四年擢河南河北道五年遷湖南按察  
使七年閏五月升湖北布政使十月召來京授都察院左副都

御史九年擢江西巡撫十年三月以江西各屬倉穀虧短奏請先行勒限買補再行抽查又各幫重運漕船借領天津道庫銀兩應於各丁新領之項扣還但儘數坐扣丁力未免拮据奏懇借項墊解於各丁名下分作二年扣還歸款俱允之四月奏南贛等處常有會匪劫搶先後拏獲四百餘人請酌加一等定擬以示懲儆七月拏獲雩都會昌安遠等縣會匪劉學洙等四十三名八月又於萬安等處拏獲朱光聞等九十餘名均治如律是年秋連旬大雨江水漲發南昌等縣民房被衝奏請借項修補次年帶徵歸款如所請行十二月高安貢生江方城赴京呈稱宜春縣吳家尖茶蘭巖等山產有銅苗情願自備貲本開採納課事下巡撫議奏光



悅以此山曾經勘議封禁並無銅苗且開山採礦易致藏奸并於田廬有礙應請官爲封禁飭宜春縣添設卡房撥兵巡查以杜奸民覬覦十一年二月奏南昌等縣圩隄去年被水衝坍請借項修築均從之先是御史周作楫奏江西會匪每多挾嫌誣指該省皆聚族而居請飭族長出具甘結是月光悅覆奏查乾隆年間撫臣陳宏謀設立族正之法令合族公保一人族中如有乖戾之徒小則處以家法重則送官究治與此奏本自相符惟遴選不得其人易滋流弊應飭屬選舉公正族長照所議辦理其獲案實係無辜許其出結保領隨時訊釋疏入報 聞三月遵 旨覆奏萬安縣查鹽快船藉端滋擾因該處船戶貪載私鹽巡兵向查多有搜

出私載送及禁煙以致翻箱倒篋擾害行旅節經分別辦理惟是  
販私不可不禁滋擾尤宜預防應飭南贛地方凡雇船者責成船  
行查明並無私鹽方許攬載並將船戶姓名於船旁首尾大書刊  
刻查船之兵各穿號衣書寫姓名俾被累者易於指明並諭商民  
如受擾害准其呈控疏入 諭以該撫仍委員隨時查訪以重緝  
私而安行旅五月連旬大雨江水泛漲南昌等三十一廳州縣圩  
隄田產盡被淹決奏請分別賑恤仍請借款修築圩隄并懇動項  
赴川買米以資接濟復於南昌九江地方設廠放粥自十一月至  
十二月需米八萬餘石援照成案請截留漕米備用嗣因設廠後  
饑民雲集隨議給資遣回又因景德鎮工匠如林被水後客米到

鎮稀少民食維艱請於鄰邑借給常平倉穀減價平糶又江西辦理漕運全仗屯糧并帶徵餘糧以應支放是年屯田被淹餘糧亦在緩徵之例請於藩庫借銀十萬兩以資辦公而肅漕運先後疏入 上俱從之十二月卒

右 國史館本傳

公諱光悅原名廷燮殿試時有同姓名者 純皇帝親更焉字星一號見樓曾祖爾常始由欽遷常州陽湖縣居邑城東北內祖延昭父題雁仍世隱德皆以公貴 贈榮祿大夫妣皆 封夫人少食貧砥志勵學早擅文譽乾隆甲寅舉順天鄉試嘉慶元年丙辰成進士官內閣中書己未入直軍機房壬戌川陝軍功告成敘勞



遷吏部主事癸亥補文選司主事甲子京察一等遷文選員外郎  
公幹力強正辨於古今政治得失之本而得其遷變開塞旋轉之  
機當代憲典時世情狀又悉綜練所擬批荅諭旨恆稱 上意機  
廷委重時時從重臣讞獄瀋陽湖北山東沈心端度慎察本末與  
輕重比無有枉撓恬和無鋒鏑而日迴霜肅莫干以私乙丑保送  
御史戊辰補浙江道監察御史己巳巡視中城庚午轉廣東道御  
史壬申調掌京畿道公內直久外省大吏陳奏利病異狀風俗異  
宜刑法異尙旣盡知之故在諫院所建白務權濟緩急求其切於  
施行者疏多畱中未嘗別一事擊一人以自爲名癸酉以京察選  
授甯國府知府是時兩江總督百齡前爲湖廣總督公讞獄時所



鑄級者也銜前事以承審部控案有所平反深文持之以不實劾  
奏禡公職甲戌援例開復乙亥選福建福甯府以親老告近改浙  
江處州府旋署杭州嘉興等府所至治辦道光元年辛巳丁太夫  
人憂癸未服闋補直隸保定府畿輔郡綰轂天下劇勩稱最公張  
綱挈目不勞而理甲申授河南河北道分守漳衛懷三府兼管黃  
河北岸黃沁衛糧祥河下北曹考五廳隄埽工程儲菱相榷屬役  
賦丈身駐工所晝夜巡視所督上下三省交汛五百餘里里有分  
巡立簿帳總之汛弁勤惰兵役聚散水勢漲涸隄形安危晷刻畢  
輅以相檢稽瞭若示掌莫遁銖黍河帥下其法以爲各道式乙酉  
升湖南按察使丁亥升湖北布政使甫三月奉 召授都察院左

副都御史蓋有聞之者言其老憊故也既 廷見奏對壯敏 上  
意益嚮用之己丑正月簡放江西巡撫江西毗連閩粵贛州南安  
尤錯山谿險民鬪悍時煽聚攻剽病商旅或掠人口質以求贖劫  
殺之獄日上公至則請慎擇長吏寬其考成措置經費以裕其用  
明賞罰以作吏氣而重購募以絕匪從量撫綏以開其悔悟且請  
照廣東福建劫質加等之例犯從重比以杜其萌 上皆從之由  
是量能授任幹吏爭奮士無匿奸民知向方時 朝議鹽法日刻  
做由奸私當減官價以敵之緝私梟以杜之公奏曰官鹽有價有  
課有費私梟止有價而已卽多減勢不敵緝梟急懼轉而爲盜鹽  
之於民猶布帛菽粟茶煙竹木也聽其買賣任其流通關津徵稅

遠近利賴若設官徵課於場竈民運販者既出稅課卽任其所之則私梟皆良商國課裕而民食便 上然其言下其議直省督撫議寬格辛卯五月積雨大潦郡邑多罹其災公既請發帑以賑又捐俸貶食勸分以濟之輸滯聚平市糶所以綏輯之者無不曲至奏截畱漕米八萬石以裕民食民以忘其災而公遂積勞邁疾以十二月十三日薨於位年七十有三公面豐皙少鬢髯言語蘊藉雖抗論時務有所糾正未嘗疾言厲色恬素無嗜好粗衣惡食窮達同趨行已修潔絕去依傍而未嘗以矯介鳴節計平生服官在軍機諫院稍久數歷於外所至無三年淹而因民量地導宜去泰咸著成績施於家惟孝惟友事太夫人終身色養數日曠定省輒



皇皇如有求有弟負文望早逝恤其嫠以子嗣之室如一焉配陸氏繼配張氏皆前卒皆 贈夫人再繼配楊氏子四履仁候選鹽庫大使早卒文嘉四川候補通判署敘州馬邊同知觀山東候補鹽大使出爲叔父後咸監生女六石埭陳楷同邑管通羣侯官陳功山陰陳樾光山黎學淵皆其壻也孫八人兆洛少時辱文字交又與公弟同筆硯比居京師公方直樞廷不獲朝夕其後予客授揚州而公適主安定書院時從容遊從每宴語而退私心充然謂天下事有任之者而愧不能知公之深也文嘉將以某年月日葬公於豐南鄉東原來請銘其何宜辭銘曰

皇司亮天懋翼鄰哉寅蓋勤宣庶明焉資磊磊猗公始終不訾器



國朝正史卷之二十一  
三三  
以道冒方圓具宜邛敕庸瘳臣堪匪辭內勸密勿外綬暎攜惇  
周行未爲無施施所未竟噫盡我思存無藏力歿無遺貲不激不  
隨式寮窳師揭揭綢練洋洋表旂我辭質幽陵谷貞之

右墓誌銘李兆洛撰

楊健

楊健湖南清泉人嘉慶元年進士以部屬用分戶部學習五年補江西司主事六年充四川副考官八年遷廣西司員外郎九年升陝西司郎中十年改山東道監察御史十二年疏陳州縣於尋常詞訟逮問無辜宜嚴禁羈押以除民累各省塘汛所以緝奸宜加整飭毋令傾圮廢弛 上爲飭各督撫如所請又言外官幕友請令按年造冊報部以備稽查外任漢員親屬隨任請酌定人數諭曰二條均屬難行幕友與官設胥吏不同如本官勤慎奉公則幕友不過供指臂之使設有作奸犯科者原可執法懲辦若但將姓名造冊報部無論自督撫以至州縣所延幕友人數眾多且隨

時更換所報亦未必盡實而部中但據一姓名冊籍亦無由知其  
幕友之優劣不過多一具文外省清廉官吏刻苦自持且有不攜  
眷屬赴任者亦有親屬眾多不能不量爲周卹者然其吏事之修  
廢則並不繫此如該員守潔才明於親屬隨任但贍其衣食而不  
使干預公事或擇其中賢能幫辦署務自不致滋生弊端若不自  
振作委用非人卽一二人亦足僨事又豈限以人數卽能杜弊乎  
國家爲民擇吏簡賢黜否卽爲致治之原多設科條轉非執簡御  
繁之道也十三年轉掌山東道監察御史十四年八月調掌京畿  
道監察御史十一月奏請肅清郵政略言各省督撫往往藉查地  
方公務擾累驛站嗣後督撫因公出外將隨帶人等先期行知臬

司各站按例覈給事後申報儻有違例支應卽令臬司糾參如扶同徇隱別經發覺除將浮索上司與濫應州縣懲治外並將臬司參處 從之十五年引 見記名以繁缺知府用十六年奏言雲南銅本銀每年撥交一百萬兩原屬寬爲籌備除歷年例支工本運腳外存項自應不少日久易啟朦混虧那之弊請 敕該省督撫將見存銀數奏報以重帑項得 旨允行十七年五月奏言雲貴解京銅鉛全數交局者少沿途沈溺者多嗣後銅船過境遇有運員稟報沈溺卽應派委大員往勘如有捏飾立卽奏參仍將歷年沈溺銅鉛勒限打撈各員應賠撈費一併追繳 上是之六月授廣東廉州府知府十九年調廣州府知府二十年擢雷瓊道二



十一一年丁母憂二十三年服闋補山東濟東泰武臨道二十四年  
因挽運回空糧船勤奮出力奉 旨交部議敘二十五年升兩淮  
鹽運使道光二年擢山東按察使九月升山東布政使十二月護  
理山東巡撫時臨清等州縣衛兩岸民隄爲盛漲衝決奏請借項  
興修得 旨允行三年調甘肅布政使六年擢湖北巡撫暫畱甘  
肅布政使之任辦理軍需七年赴湖北巡撫任十月陝甘總督鄂  
山以前西路兵興健於甘肅藩司任內襄辦軍需搏節慎重奏請  
鼓勵 加恩賞戴花翎十月偕總督嵩孚奏言江陵監利二縣被  
水請賑撫災民 許之八年以荊州府湖隄漫潰請借項興修分  
限徵還以紓民力又奏各衛軍戶隄工向歸各衛守備管理每年

秋後應修之際正值新漕交兌之時守備等日在漕船無暇督辦以致工程不堅請將軍戶應修之隄悉歸州縣管理與民隄同時興工均從之十一月給事中張鑑劾奏健偕總督嵩孚請以黃州府通判周存義升補荆門直隸州知州摺內但稱該員曾經緣事革職未將案由聲敘有心含混命交軍機大臣查覆得實下部嚴議部議降三級調用上加恩改爲革職畱任十年六月奏言湖北襄陽地方民情強悍盜匪最易潛蹤請將寶武局存貯之錢發典生息爲緝捕經費十月又言襄陽每有奸民誘賣婦女之案每經獲訊婦女已輾轉嫁賣恃無質證稽延狡展請酌定章程無庸被賣之人到案據供定讞卽治以應得之罪庶奸徒不致幸

脫人證亦免拖累均如所議行十一月 諭曰楊健在湖北巡撫任內辦理地方公事隨聲附和且年力就衰不勝巡撫之任著降為三品頂帶休致二十二年以捐輸海疆經費 賞加五級二十三年卒年七十有九子鼎舉人候選員外郎孫江寶慶府學訓導

右 國史館本傳

楊健字剛亭湖南清泉人父維辰母羅氏生健時戶外聞阿殿聲人咸異焉嘉慶丙辰進士籤分戶部主事補江西司辛酉典試四川得士陳伊言及卓秉情等六十人累遷陝西司郎中改山東道監察御史轉掌京鼓道器戶科給事中健久任叵曹凡錢法銅務旗相皆能鈎考釐剔而於塘汛郵傳積弊及州縣濫押無辜之害



尤所洞悉既在言路先後陳奏多見之於行壬申授廉州知府調  
廣州舊有府署巡船若干派費擾民下車卽撤之善決疑獄順德  
縣民婦羅馬氏控妾杜謀毒其子其夫左袒妾前官皆藉口欲全  
夫婦誼讞三年莫能定健康得其實竟論如律南海縣民一家四  
人被盜殺惟妻無恙官疑有私掠治慘酷則誣其表兄某論死健  
察其無兇狡狀緩之旋訪得羅浮山有新挾重貨爲僧者一鞠而  
服蓋殺人取財並及子女傭工以滅口特畱婦者示人疑也會欽  
差查辦富商盧文錦爲父貧緣請祀鄉賢一案文錦行賄有實迹  
上下幾徧獨健無所染督撫文章以廉謹薦丙子升雷瓊道甫三  
月以母喪歸服闋補濟東道署鹽運使道光元年授兩淮運使二



年按察山東六月署布政使代文闈鄉試監臨九月實授布政使尋護理巡撫明年調甘肅布政使所在有勳績官濟東道時親駐臨清河干督護漕艘終健任糧艘無逗留騷擾者以東藩護撫篆籌修衛河隄互三百餘里在甘肅先後四年適有回疆張格爾之變總督楊遇春統兵西征每一兵借給銀數兩咄嗟立辦時靜甯州告饑捐廉貸振以靖內亂通省常平倉穀缺額至四百餘萬石撥款買補爲未雨綢繆計而司庫出納例有平餘則峻卻之六年補湖北巡撫入 覲七年到任敘甘肅籌餉功 賞戴花翎湖北諸隄惟江夏武昌咸甯嘉魚蒲圻五縣由官給值估修餘皆恃民力捐辦連歲災歉集費倍艱健旣偕總督嵩孚會疏請振並請於

司庫借給工費分限徵還得旨報可荊州城外大隄舊係同知承修時潰漫六百餘丈立劾同知某及稽延要工者數人褫其職嚴督各道府限日分修境內隄堰於是監利縣朱家灣袁吳灣京山縣王家營隄皆次第竣工漢川地勢最窪上游沔陽應城天門潛江各州縣水皆匯一汜濫則漂沒數百里初議開消渦涇由橫湖以達襄江瀕湖居民沮其事健確勘形勢先開通草橋口使橫湖水出有路然後開消渦涇所毀之地僅數十畝按畝償值所涸復各州縣田地凡二萬頃鍾祥縣之柴壩工尤巨例於各官養廉銀內扣捐健首出千金爲眾倡鍾祥人名其隄曰楊公隄建牛祠焉八年言官劾嵩孚保薦非人健坐依違不先發覺部議降調

特恩改革職畱任繼又有媒孽者奉旨以三品服休致居鄉杜門卻軌絕不與公事然地方利病所在言之必盡卒年七十有九以從子肅嗣道光甲午舉人候選員外郎

右傳李元度撰

祁墳

公諱墳字竹軒一字寄庵系祁氏高平縣孝義里人曾祖斯滄國  
學生祖果工部員外郎父汝熒嘉慶庚申科舉人中書科中書公  
年十四補縣學生員時學使者戈仙舟太僕教士嚴稍扞格輒眾  
辱之試高平得公卷則大驚謂不可伍於眾獨揭一榜標異之贈  
以詩如曲江之遇鄴侯也嘉慶元年年二十成進士改刑部主事  
展轉郎官越三十年至道光四年乃外授河南糧道五年擢浙江  
按察使六年擢貴州布政使九年拜刑部右侍郎尋授廣西巡撫  
十三年調廣東十八年拜刑部尙書二十年逆夷犯廣東明年五  
月大兵會剿公奉命往辦糧臺事務塗次改授兩廣總督防夷



籌海歐血酸辛又越三年公不還矣公自主事升員外郎郎中皆  
坐辦秋審處開館增纂則例爲纂修官每持一議廉平周浹老於  
文法者不能奪兩逢京察列上考皆奏留不使去嘉慶十八年承  
辦教匪逆案凡數十百起 特旨獎賜大緞嘗隨祿齋那公仙舟  
帥公果亭成公文文敬公數讞獄山西直隸湖南廣西諸省道光  
五年武康徐蔡氏獄屢經勘治未結正臬司至自引決 上以公  
代徃鞠之遲又久端題開豁得其旁證寃乃雪其 內召爲侍郎  
也有挾怨燒殺一家數命者司員以誤遺火種風烈延燒爲詞公  
不荅徐取日記小冊示之曰某日之夕星斗燦明無風君爲囚地  
獨不爲一家數命地邪卒擬抵其不爲世俗之仁又如此公爲人

循循姁姁若不敢稍縱而旄節所莅輒能得其邦之魁才賢士以爲己用而比有功江華徭叛蒼梧徭應之由大貴山龍井邨出道石墟謀奔江華公旣豫調軍將塞與長塘接壤之姑婆桂嶺諸山口用舉人陸錫璞吳元德策先撫其徭之良者授同知易中孚兵俾便宜從事中孚聞叛徭已出道石窮追及之芳林渡相持一晝夜痛剿之擒殺殆盡公用是晉太子少保銜潮州普甯縣爛匪聚眾肆劫莫敢誰何公用同知姚柬之策出不意進圍塗洋賊巢立縛其渠正法擒黨羽四百數十人行旅以安在總督任用學正曾釗策設險師子洋北遏夷舶闖入用監生樊封策屯田虎門海壩百六十餘頃逆酋百麥擾三元里民怒磔之公因用訓導黃培芳

拔貢余廷槐策檄諭屬縣團練南海番禺順德東莞花縣龍門從  
化清遠土著足爲七社不費官帑一錢而輸戍虎門諸臺二千人  
有奇聽調五萬人有奇建倉儲穀十萬私有奇公自通籍後一典  
廣西學政一充順天鄉試同考官所拔士多通達治體以吏績著  
稱晚更患難益知惟才爲足恃因上變通考試遴選真才之疏大  
意欲放唐宋制科爲五目曰博通史鑑曰精熟鞞鈴曰製器通算  
曰洞知陰陽占候曰熟諳輿圖情形不分文武已未仕及攻舉業  
與不舉屬通才皆許以名上 開詳試錄用其鄉會試第三場亦  
放此五目略如元人經疑之式設問破格收之議復不行二十三  
年冬病劇次年正月得 告因候代未卽行五月二十八日薨年

六十有八遺疏入 命照尙書例賜卹諡恭恪 諭祭葬子之銓  
之鏐以本官儘先選用配楊夫人生子五之鈺辛卯科舉人福建  
沙縣知縣後公八月卒之銓戶部員外郎之鐔國學生塲之鏐候  
選直隸州知州之鏐癸卯科舉人女二適乙未科舉人刑部員外  
郎張楫陝西邠州知州韓鈺孫男九惇惇愷懌寶書遐齡長齡鳳  
鳴太平二十六年十月初二日之銓等將扶公柩安厝祖原之次  
謂公同榜進士今獨邦慶一人存耳因以詔幽之詞相屬是無可  
讓也詔曰

公才精練少而卓然雪沈啟竇定讞若神星輅往來楚粵晉燕仲  
山將明 恩意廣宣遂以明刑受 兩朝知拔之郎署置之監司



開府粵嶠跨越東西妖巢墮落絕其枕梯際會多難有枋斧柯側  
身兩闔印天奈何敵情叵測民情悅和民情則和公髮日皤匪惟  
髮皤歐血云多變生何常得才則平公履所交豪雋心傾垂歿一  
疏彪彪丹青大星宵竇萬土吞聲我詔公藏言薤其織龍鸞鳳屈  
豐碑其瞻泣水泐泐縣壺嶼嶼鐫詞遠室證史何慙

右墓誌銘吳邦慶撰

## 陳桂生

陳桂生浙江錢塘人由優貢生考取教習期滿引見以知縣用嘉慶元年三月揀發湖北時值川陝楚三省教匪不靖桂生隨廣州將軍明亮軍營辦事七月孝感縣賊匪魯惟志等哨聚胡家砦乘間滋擾明亮率兵往剿全數殲滅以桂生管理文報出力奏入命以應升之缺卽行升補二年川省賊匪齊王氏等由巴東竄至歸州之白馬灘歸坪黑石板涼風埡等處蔓延二十餘里桂生帶領鄉勇八百名於黑石板涼風埡適中之地設伏時官兵三路並進賊眾分頭迎拒我師盡力勦捕適有涼風埡援賊由王家山接應桂生率領鄉勇從山頂林內突出壓勦矢石俱下殲擒甚眾

將軍明亮上其功 賞戴藍翎四年題署大冶縣知縣六年六月  
實授九月升安陸府同知七年九月湖廣總督吳熊光以桂生隨  
營日久見又承辦善後事宜奏請以應升之缺升用並請先換頂  
帶 從之十二月以川陝楚三省漸次肅清 賞換花翎八年升  
安陸府知府九年丁母憂時以搜捕餘匪經湖北巡撫章煦奏留  
軍營辦事十一年服闋例應回籍領咨復以軍需續案報銷需員  
經理經總督全保奏留湖北以資委辦十二年軍需續案報銷完  
竣桂生在局出力 賞加道銜十三年五月補荊州府知府十二  
月升荆宜施道十四年十月擢甘肅按察使十二月調山西按察  
使十五年山西巡撫銜齡懇將原任蒲州府知府承炷等就近捐

復原官以資差委冒昧入奏桂生會同藩司素納率行具詳 飭  
之十六年三月以錯擬秋審情實人犯望吏議降一級畱任四月  
升山西布政使十八年調江甯布政使十九年二月以前在山西  
臬司任內失察靈邱縣知縣湯日濩承審民人張錦玉習教一案  
刑偏取供提訊後未經究出實情輒據原供入奏部議降二級調  
用 上加恩改爲降二級畱任時以豫東等省經費浩繁桂生曾  
經捐廉以備公需 賞加一級七月調福建布政使時各屬被旱  
總督百齡請畱江省籌辦災務清查庫款九月署巡撫初彭齡疏  
劾桂生承催上忙錢糧不力 諭曰藩司專司錢穀杜絕那移見  
當清釐倉庫之時江甯藩司於本年上忙銀兩承催不力又不據



實揭參實屬玩縱陳桂生著革職畱於該省戴罪督催如能埽數  
完解該督撫奏明另行賞給差使儻逾限不完卽奏請嚴議分別  
著賠十二月又劾桂生於飭查藩庫銀兩稟覆含混及冊報所屬  
溧水縣虧短銀兩多寡懸殊意存隱匿 命大學士托津戶部尙  
書景安按治之二十年正月托津等查明桂生並無含混隱匿等  
情奏入 諭曰陳桂生先後稟詳各案並無含混隱匿情弊其所  
催上忙錢糧亦已完報七分有餘陳桂生著來京以從四品京堂  
補用旋授甘肅布政使二月調江甯布政使九月總督百齡以訪  
獲逆犯方榮升一案桂生督審嚴密究出夥黨多名奏入得 旨  
藩司陳桂生督率委員研鞫周詳著加恩賞還花翎十一月以前

在山西藩司任內題升朔州知州明祥保薦不實部議降一級調用 上加恩改爲降一級畱任二十一年補江蘇布政使二十二  
年九月護理江蘇巡撫十月擢江蘇巡撫十一月偕總督孫玉庭  
奏參江都縣交代續虧請將歷任知縣革職逮問奏入 上甚是  
之 諭曰各直省庫項惟江蘇最爲做壞該督撫能如此大破情  
面實力整頓可期漸就清楚二十三年六月 命署蘇州織造兼  
濟墅關稅務九月奏出運糧船例應趕兌隨兌隨開本年二  
月間嚴飭運弁上緊兌開不拘幫次統俟償渡大江於河面寬闊  
之處停待敘次跟幫前進較爲妥速應請此後永遠照辦庶免弁  
丁遲延需索 從之二十四年正月奏言蕭縣境內礮石河係宜

洩欄石湖之水入三仙臺等湖歐邵河係宣洩三仙臺岱山湖之  
水入新衝支河至宿州界尤家廟歸洪澤湖前此邵工漫溢黃流  
下注兼因疏導已隔年久以致河底淤墊積滂難消農田被淹情  
實堪憫請借項修挑分年攤徵還款並可使附近災黎趁工謀食  
得旨允行是年上六旬萬壽廣施闔澤普免天下民欠七  
月桂生奏言曠典殊施務期實惠及民欲杜官吏捏欠影混必  
當悉心稽覈請將嘉慶元年日起至二十二年止確查實屬民欠開  
單入奏至扣蠲截數例以已入奏銷爲準而奏銷之期例限不同  
查二十二年漕項奏銷尙在二十四年今旣奉旨蠲免若因未  
屆奏銷仍在民欠數內催徵恐糧戶輸將不前辦理殊多窒礙懇



請一併蠲免 從之又以積欠案內查出官墊民欠一項歷年奏銷雖報已完而其實仍欠在民此時民欠既已免徵州縣那項墊解尙出因公若按名參辦則官非一任事越多年輾轉咨追難免延宕奏請將各屬墊完民欠在見任州縣內分限十年攤賠歸款下部議行九月兼署兩江總督十月 萬壽聖節桂生於署兩江總督任內未另進慶賀本吏部照違制例議以降五級調用上加恩改爲降五級畱任十一月淮安揚州兩府屬九州縣因洪湖盛漲啟放各壩洩水下注低田被淹請緩其賦又請將江蘇省駐劄款收地方各營借支錢糧分季扣還以卹兵力俱得 旨允行二十五年二月以徒陽河挑工完竣奏請鼓勵得 旨徒陽運河



每歲俱有挑工督催辦理如期完竣乃地方官應辦之事何所用其鼓勵所奏不准行仍傳旨申飭四月以疏濬吳松江工竣陳奏督辦情形略曰吳松江爲上海南匯川沙三廳縣漕船轉運所經因偏近海口日久淤墊漕船改道黃浦泖湖難免風波之險前經查驗河身受墊之由將淺阻處逢灣取直使上游湖水暢注刷沙有功確切估計銀數於得霑水利之長洲等十六州縣分年攤捐於捐足之年興辦見已屆期驗收復相度情形江水勝於海潮自無淤滯從此糧艘得免涉險之虞奏入 上覽其言十一月 召來京道光元年 命以三品京堂候補三年得 旨陳桂生著以原品休致二十年卒子通曾兵部主事憲曾翰林院侍讀學士

右 國史館本傳

國史館本傳  
卷之七十一 疆臣四十九

三

國史書局發行  
名目ナリ

三三

瑚松額

瑚松額巴岳武氏滿洲正黃旗人西安駐防由前鋒於嘉慶元年隨將軍宗室恆瑞剿湖北教匪四年隨欽差大臣那彥成等擊賊於土地堡等處疊有斬獲五年授筆帖式六年升驍騎校七年仍在湖北軍營擊賊於東嶽寨等處以功 賞荷囊玉韞各件十一年五月升防禦八月隨欽差大臣德楞泰剿平陝西甯陝叛兵十三年升佐領十七年升協領十八年河南教匪李文成等滋事踞滑縣城並分屯道口桃源等處瑚松額奉檄帶領馬隊赴剿以道口賊出巢焚掠隨副都統富僧德迎擊敗之賊回巢拒守並於附近設伏復隨富僧德與大軍分路抄截克其巢遂抵滑城桃源賊



屢圍入城接應城內賊亦疊出拒戰均經官兵擊敗瑚松額隨富僧德由東門與大軍并力攻克滑縣城奏入 賞戴花翎二十三年三月由兵部帶領引 見得 旨交軍機處記名十二月升福建福州副都統二十四年署福州將軍道光三年 召來京尋授察哈爾都統五年擢四川成都將軍六年遵 旨查覈德爾格忒土司與西甯玉舒巴彥囊謙千戶控案先是玉舒巴彥囊謙千戶於乾隆年間經西甯辦事大臣斷令分三百戶與其弟索諾木旺爾吉爲小囊謙原係德爾格忒土司之祖爲之調處嗣因索諾木旺爾吉之子諾爾布不能服其所屬奔大囊謙大囊謙意圖兼併小囊謙家屬及所屬番目因投訴於德爾格忒土司大囊謙復

以德爾格忒土司有欺凌小囊謙情事遂互控涉訟至是訊明奏請仍如原斷使大小囊謙各循其舊嗣後玉舒巴彥囊謙不得覬覦小囊謙戶口德爾格忒土司亦不得再預鄰封事以息爭端而綏邊境如所議行七年六月署四川總督七月以越巂廳屬夷人有潛至邊界搶擄漢民婦女情事派員帶兵按捕擒獲夷匪並漢奸各犯分別懲辦追出被擄難民男婦妥爲安撫奏入以辦理迅速得旨嘉獎八年賜紫禁城騎馬九年三月調吉林將軍八月上東巡迎駕於山海關扈蹕前往以射布靶中三矢賞穿黃馬褂九月復以隨扈賞加一級賜蟒服緞匹十二月以甯古塔三姓地方禾稼歉收奏請將旗民兵壯應納地丁倉穀

分別緩徵 允之十年正月丁母憂回駐防旗 命於陝西藩庫  
給銀二百兩資其喪葬三月署盛京將軍十一月查出邊外守卡  
官防禦烏雲保擅離卡倫率卡兵入邊居住奏請奪烏雲保職卡  
兵分別褫責失察各官下部議處均如所請十一年四月奏籌整  
飭戎政章程疏言八旗官兵輪替操演應令城守尉等各於所屬  
加意遴選冊送將軍衙門分季校閱以重武備又旗員挑缺請寬  
其公過以廣選用管理地方旗員應令迴避本城以杜流弊俱  
允之九月以誤准發遣宗室祥佑告假回京並給發路引鑄一級  
留任十二月入 覲 上以其年屆六旬 御書福壽字並如意  
朝珠文綺等件 賜之十二年三月復 召來京以湖南永州道

猺趙金隴聚眾肆擾 命偕御前大臣宗室禧恩爲欽差大臣馳  
往督勦行抵衡州府趙逆已就殲戮其黨趙仔青復糾合二千餘  
匪由粵東竄擾楚境瑚松額等督兵勦滅之遂偕宗室禧恩湖廣  
總督盧坤湖南巡撫吳榮光等條陳善後事宜一等撫卹逆黨滋  
擾地方被難民猺照水旱偏災例一律撫卹一重官守舊設永州  
府理猺同知衙署傾圮應於江華永明兩縣適中扼要之地興建  
駐紮其相距較遠之甯遠新田藍山等處猺戶於三縣適中處所  
改駐通判分理均改爲邊疆要缺並改江華縣爲繁缺添建藍山  
縣大橋司巡檢衙署一勤巡哨各猺境塘汛皆在深山應於湖南  
省內地各標營撥兵百名增入錦田大橋等汛令將備汛弁各按



季月巡哨一清叛產逆產入官清查田地頃畝及高下等則招良  
徭佃種以租入十分之二賞徭總等其餘以養徭人之孤寡殘廢  
又設義學義倉統歸理徭廳督同地方官隨時措置並禁民人入  
徭寨貿易放債一嚴保甲於衛永一帶民徭雜處之所按戶查明  
姓名年貌人數藝業載入門牌十家設一總牌並取具連環保結  
備覈一察徭俗徭人所居衝寨峒源向有徭總徭目等管攝應循  
其舊加以勸懲儻有倡邪逞兇等事責令報官拏究容隱扶匿者  
連坐如能辦公妥協管教有方期滿三年給以花紅並酌賞外委  
頂帶示獎一懲奸棍徭人笨拙易爲奸民欺壓應飭不時嚴拏懲  
辦一收火器徭人素以鳥槍打牲應飭徭總查禁槩令繳官並禁

織工製造內地出產硝磺嚴禁私販一獎義烈逆裔滋擾士民有  
捐資倡義擊賊陣亡及婦女被擄守節捐軀者均確查請獎疏入  
下部議行時與東連山排裔亦恢復遵 旨借宗室廕恩率提督  
余步雲等赴勦連戰輒勝擒首逆鄧三盤文理等羣裔震懾奏入  
賜玉鞞翎管黃辮大小荷包並下部議敘旋以裔眾投誠縛獻逆  
首裔山全境肅清馳奏復 諭曰瑚松額前派查辦湖南江華逆  
裔悍勦廣東鼠楚裔匪甚爲得力及往贛東於事閱半載未辦之  
裔甫抵連州一月卽能大加懲創以振國威各裔投誠乞命辦理  
實爲迅速著賞換雙眼花翎並一等輕車都尉世職因復借宗室  
廕恩等奏陳善後八條一連山綏裔同知應擇幹員照湖南理裔

同知改爲邊疆要缺一三江扼要處責成副將率備弁隨時與連界之湖南廣西各專汛會哨一民獠貿易准自立獠墟與民集互市其應徵獠糧令獠長率該戶赴廳交納一各獠有出山擾民者責令獠長交出毋許徇庇一獠產祇准與獠人售賣不准民人交涉違者產歸獠人不追原價一嚴禁獠人私藏鳥槍火藥一獠山居民一律賜恤禁止報復及土匪搶掠一獠人大排內設立獠長外每排添設獠練十人管領小衝獠戶統歸連山廳把總管轄均得旨議行十一月回京命往署福州將軍旋以臺灣匪徒張丙陳辦等滋事復命爲欽差大臣偕參贊大臣哈朗阿迅往勦辦瀕行賞銀二百兩並黃面貂馬褂黑狐裘等件十二月馳抵

福建時巡撫魏元烺先已徵提督馬濟勝將兵二千赴剿連戰皆  
大捷逆首張丙陳辦詹通陳連並先後應賊之北路彰化人黃城  
南路鳳山人許成等以次擒獲臺境略平十三年正月 命仍渡  
臺督同馬濟勝等按捕餘黨二月抵臺出示諭民令緝送賊徒脅  
從者勿治擒大股首匪及賊目王章孫惡赫定等二十八人賊黨  
二百六十九人北路彰化匪徒五十餘人分別寘之法並遵 旨  
將張丙陳辦詹通陳連械送京師四月復調成都將軍五月以大  
功告厥全臺肅清奏 聞 諭曰瑚松額渡臺督同馬濟勝等按  
捕餘匪散其脅從又擒獲大股首匪賊目多名全臺安堵迅速厥  
功實堪嘉尚著賞加太子少保銜仍交部從優議敘十月抵成都



將軍任十四年四川戡邊馬邊兩廳屬雅扎等支夷句結滋事出巢焚掠經提督楊芳殲斃夷目瑚松額卽偕楊芳以諸夷肅清入奏旣而雅扎等支夷復滋擾瑚松額以楊芳辦理未善奏劾之下楊芳嚴議部議瑚松額降二級畱任 上以其據實奏參改爲鑄一級十五年正月授陝甘總督二月以前剿匪臺灣將襄辦軍務之幕友陳時等五人含混保請議敘鑄一級畱任九月以甘肅官茶壅滯奏請將未完課銀分五年帶徵十一月以河州皋蘭等二十八州縣被災歉收奏請緩徵額賦俱 允之十二月奏陳兵丁驕縱應加意訓練安爲駕馭又密陳吏治情形設法整頓均奉 俞旨十六年四月以題補陝西靖遠協都司劉奇引 見時箭不

到朝鑄一級畱任十月以呈遞賀表擅用六百里復鑄一級十七年正月京察屆期 上以瑚松額不露鋒銜細心任事下部議敘三月西藏堪布入貢行抵岐米加納托遜訥爾等處爲四川格爾次及果洛克各番匪所劫瑚松額派員往緝殲獲賊番數十人並起獲原贓因奏請前後藏堪布進京改由柴達木行走屆時由青海大臣就近派兵百名護送進口六月又以野馬川地方與大通河迤南邊外野番較近防守宜嚴遵 旨偕提督周悅勝會議奏請於河北坡岸立柵山巖築設墩卡派撥弁兵防守並將提標中左右三營前後二營廠馬各歸併一處使其互相通融庶兵力較厚防緝亦易得力疏入均得 旨允行十一月以陝省秋審各案

經刑部由緩改實者六起坐率行會銜鑄一級畱任十八年正月  
以洮州岷州地震災奏請緩徵額賦八月四川總督寶興奏銀價  
日昂由奸商以錢票輾轉磨兌並無見錢交易所致請 敕查嚴  
禁 上命各督撫查議瑚松額奏言甘省民間銀錢交易俱係見  
錢間有出票仍卽於本號取錢從無磨兌之事且錢與票同一價  
值其用票者取其便於攜帶並非鋪戶取巧應請無庸禁革俱  
允之十九年五月以甘州西甯肅州提鎮各標馬廠孳息日多廠  
牧擁擠奏請循照成案將老瘠不堪畱牧者變價充公並減撤牧  
兵歸伍下部議行八月御史焦友麟奏州縣官訟獄催科日不限  
給請以稽查邪匪任之教官擇生員分司其事 上命各督撫會

同學政妥議瑚松額偕陝西巡撫富呢揚阿陝甘學政孫瑞珍疏  
言州縣親民責兼教養教官課士禁預地方一旦任以勸諭稽查  
非惟呼應不靈尤恐藉端多事況教官額俸無多查訪所需力難  
自備非索州縣卽擾閭閻至生員出入衙署必非安分之徒若令  
分任稽查將挾嫌妄訐藉端訛詐弊不勝言總之有治人無治法  
州縣官果力行保甲遇事勸懲自足正人心而勵風俗如令人分  
任其勞徒啟諉卸之漸所奏窒礙難行 上覽之二十年六月調熱河  
都統旋復 命署陝甘總督十一月以河州皋蘭等十九州縣水  
旱雹災奏請緩徵額賦十二月以安西州屬馬蓮井金廠日久砂  
微課金短絀奏請將額募人夫五百名酌減二百名作爲定額俱



如所請二十一年因病陳請開缺得旨准其回西安駐防安心調理一俟病痊卽來京聽候賞給差使二十二年以任陝甘總督時於應擬軍罪人犯失入擬絞鑄一級二十三年以病久未痊懇請休致允之並賞食全俸二十七年卒諭曰前任熱河都統瑚松額歷任將軍總督屢經帶兵出師宣力有年勤勞素著前因患病乞休准回陝西駐防調理並賞給全俸茲聞溘逝殊堪軫惜著贈太子太傅銜照總督例賜卹任內一切處分悉予開復應得卹典該衙門察刑具奏尋賜祭葬子諡果毅子伊金布刑部額外主事襲一等輕車都尉世職

右 國史館本傳

嚴烺

嚴烺浙江仁和人由監生捐納主簿嘉慶二年分發南河尋捐升  
通判需工委用十三年四月署邳北通判五月丁父憂十六年服  
滿仍赴南河十七年補外河北岸通判十八年以河歸故道要工  
告成河道總督黎世序上其防守出力功 賞加同知銜六月升  
襄河同知旋以全漕渡黃催趨出力下部議敘十九年九月以湖  
河修防一律平穩 賞加知府升銜十二月擢徐州道二十年以  
伏秋盛漲防守險要下部議敘二十三年丁母憂道光元年二月  
服闋授河南河北道七月 命以三品頂帶署理河東河道總督  
時運河汶水漫決奔流橫洩有礙湖漕 詔烺督飭運河道迅速

堵合八月工竣復奏言運河北路以蓄汶敵衛爲最要機宜必使汶水層層擡高然後衛水不致捫口今臨清口之板閘雖已加高而甄閘尙仍其舊卑矮不敷蓄水請加高二層並接長東岸閘尾以資收蓄而利運行 上允之九月奏報安瀾得 旨嘉勞十一月入 覲時兩江總督孫玉庭南河總督黎世序會奏江境河工兼用碎石菁有成效請 敕東河督臣倣照辦理 諭曰該署督曾任南河熟悉此事情形豫省黃河應否倣照江境辦理之處確切體察詳細訪問或酌量試辦是否有效先行據實奏明二年正月覆奏東河採石難易及需石緩急與南河情形不同惟北岸馬營挑壩一道爲攔沁歸黃最要關鍵若倣照南河拋護碎石可期

歷久堅固 諭曰此事朕本無成見惟期於工程實有裨益著嚴  
煇督同藩司程含章履勘情形通盤籌畫務使一勞永逸不可稍  
爲遷就二月偕程含章奏言馬營工挑壩在在迎溜著重今欲固  
守壩身以資攔沁入黃必須拋護碎石始於險工有益自壩頭南  
面至壩身西面埽外閒段估拋碎石七段約需石一萬二千餘方  
其接連之西壩尾各隄工應選取純淤幫寬築堰計土石兩項共  
需銀十萬兩得 旨照議興辦嗣以程含章奏挑壩非專爲攔沁  
而設沁水力弱亦不致遽壞隄根且壩當河水之衝碎石亦恐不  
能持久 命再行悉心妥議三月復偕程含章奏言沁水沿隄東  
走衝齧隄根使黃沁衝糧一帶在在危險今欲保北岸之隄工必



先除沿隄之沁水欲除沿隄之沁水必先挑壩以攔截之挑壩初非爲攔沁而設而因時利用取其所宜壩身鑲以柴土易於朽壞不若拋護碎石可期經久會河南巡撫姚祖同奏馬營大隄放淤將竣當任其刷塌俾汎水暢行若加拋碎石遏其奔衝殊非順水之性 諭煇詳細籌度再行覆勘尋以時屆大汎防守爲先請俟霜降後察看河流形勢再行詳慎定議得 旨俞允並 諭以和衷商榷籌畫萬全六月奏馬營放淤告竣險工穩固 嘉之九月以報秋汎安瀾實授河東河道總督十一月奏言親赴馬營工次上下履勘本年壩頭塌短盤鑲裹護均經平穩與上年所見壩前漲勢迥不相同請將壩頭停辦惟西壩尾有舊河形一道爲沁水

灌注之處請仍拋護碎石以免吸溜刷通之患如所請行三年山東滕縣衍聖公府啟事官李印輔以微山湖蓄水過深不能宣洩致糧地久淹等情赴京呈控得旨著交嚴烺琦善查勘妥議務期足資濟運無礙民田尋覆奏微山湖上承南陽收蓄曹單等處之水爲南路濟運之源李印輔呈請減水二尺誠恐有誤漕行惟事關民瘼亟應籌計請於重運過菱湖口閘下板收水之時以消存一丈一尺爲度如來源過旺卽啟板宣洩無使漲滿並修築十五孔橋石壩俾下游去路可以相機啟閉應時暢消如此辦理洵於濟運衛民兩無妨礙如所議行九月疏報安瀾下部議敘四年二月奏查明微山湖滕嶧二汛有坐灣犯風隄工六段請於臨湖

一面添砌碎石坦坡并曝汛十一號石後土截均應增培高厚以重蓄蓄而利緯挽 從之十一月南河堰盱失事要工潰決 詔煨爲江南河道總督會同大學士文孚禮部尙書汪廷珍前往查辦五年正月京察屆期 上以煨前在東河宣防盡力歲慶安瀾下部優敘尋會奏江南河務以蓄清敵黃爲第一關鍵顧蓄清全賴湖隄湖隄既潰清水洩枯重運經臨無以資其浮送擬遵古人成法借黃濟運所慮運河窄小黃流湍悍多則不能容納少則必致膠淺議先於禦黃壩外建壩三道鉗束黃流俾入運有所節制又於禦黃壩內外添築緯道以資束水行緯襄揚兩廳長河應挑挖淤濇壩培隄身並豫貯料物隨時築壩偪濇刷淤其禦黃壩未



啟則先挑高堰引河以導清水入運禦黃壩將啟則嚴堵束清以杜黃水入湖至修復湖隄必乘天寒水涸取土較易見擬就近採料限大汛前砌高十層以備湖水漸長總計引黃濟運修復湖隄共需帑銀三百萬兩疏入得旨照議辦理會侍郎朱士彥條陳南河事宜命偕文孚等詳細議奏五年正月奏檢查檔案體察情形就原奏各條分晰妥議一原奏高堰石工必先圈禁越壩厚水見底方可興工又從前議用坦坡之法於堰外拋砌碎石因河臣屢易事遂中止此次應估計興修查修砌石工凡拆修到底者估築越壩俾石根顯露驗明估修其拆砌層數出於水面者均不築壩見在工作方興必須嚴立章程以免工員草率並請於石隄



外用碎石拋成坦坡則堰旣石隄永無塌卸之虞一原奏高堰之內向有二隄近已殘缺應行培補查二隄係靳輔築作未完之工較大隄矮至二丈必須培增與大隄相平始足資重門保障計需銀二百餘萬兩而大隄歲修仍不能免若但酌量培補實屬無益應請緩辦一原奏黃河盛漲之時務當兩岸分洩查黃河兩岸俱有宣洩之地南岸所洩之水遠近不一皆匯入洪湖北岸惟王營減壩減漲較爲得力擬將該壩內鹽河隄埽勘估加築以備大汛時啟放俾不致偏注南岸一原奏山旣廳屬五壩原以備減洩湖水立有水誌以時宣洩前因五壩開遲以致水逾常格請嗣後謹守向章查仁義禮三壩自嘉慶年開移建蔣家壩迤南地勢高亢

引河淺窄智信二壩又經擡高壩底洩水不能暢達應於仁義禮  
舊壩處所添建石滾壩一座以防異漲一原奏黃河下游無隄之  
處接長新灘河流散漫不能東注將有下壅上潰之懼查海口並  
無疏濬之法惟有束水攻沙使之全力歸海自應於新隄之尾相  
機接築俟來年重運渡黃後再行勘明奏辦如所議行尋 命偕  
兩江總督孫玉庭等會辦重運五月會奏襄河淤塞酌議盤壩接  
運需銀一百二十萬兩請就近撥發 從之旋以河道淺滯在後  
幫船不能挽抵前議之高坂頭等處就近盤壩 上以玉庭等未  
能通盤籌辦有誤漕行下部議處議上 諭曰嚴烜職司河務此  
次漕運遲延非盡關河工辦理未妥尚可稍從未減加恩改爲降

三級畱任七月奏言堰盱失事以後清水不能外出河身日見淤塞隄身卑矮防守爲難請於外南等廳幫加子堰以資捍禦如所請行尋命周勘湖河各工復諭曰嚴烜身任河督河務是其專責者卽詳細履勘就見在情形是否可將清水收足以資敵黃濟運抑或另行設法籌辦務期來年漕糧全數抵通八月覆奏來年雖議海運而海運不及全漕之半欲全數抵通仍非收足湖水以敵黃濟運不可惟洪湖上承七十二山溪之水匯爲四百里巨浸一遇西北風起浪若排山迴非人力所能救護從前黃河底深湖水收至數尺卽可外注故隄身不甚喫重今則湖水必蓄至二丈始可建瓴而刷黃以四百里浩瀚之湖恃一線單隄以爲之護



西風衝擊勢必潰決擬倣照成法於隄外築碎石坦坡護隄既固則湖水可蓄疏入 嘉之九月奏滯漕盤壩完竣全數北上復報秋汛安瀾下部議敘十一月奏請於洪湖石工外斜砌碎石坦坡保護隄根得 旨再行詳細履勘旋因東河閘官應如枻捏報到任率行出結並違例保題降三級畱任六年二月 詔河東河道總督張井會議河工久遠大局議上 諭曰張井會勘南河情形悉心講求不分畛域甚屬急公於河務亦頗有識見著調補江南河道總督嚴烜調任南河正當湖河交病之時一籌莫展禦黃壩至今不能啟放實屬辦理不善姑念其前在東河任內修防尙無貽誤著降三品頂帶署理河東河道總督以觀後效四月 命以



副都御史銜署理原任先是張井奏陳豫東黃河淤墊日高隄身益形卑矮請將隄頂所存土牛一律攤築子堰得旨交辦至是覆奏子堰實係要工惟土牛不如灘土之堅實省費亦屬無多且土牛仍取灘土補還培積亦難迅速應請選淤加築子堰仍畱隄頂土牛備防險工又以微山湖水勢短絀請挑挖河渠以資收蓄六月奏言東省闡河全資汶泗兩河收納諸泉匯流入運請乘時挑濬並酌議添築衛河及上河下河草壩二道俾漕行得資淨送皆從之八月以臨清塘河西岸土山逼近河身恐致塌卸阻運請將岸頭落低砌寬放坦并抽挑土道俾免墊塌而利緯挽旋劾睢甯協守備喬作棟辦工未符章程兵丁不能約束請撤任降補

得旨所參是該署河督嗣後於此等陽奉陰違之員總當破除情面力挽頹風無負委任九月報秋汛安瀾下部議敘十月奏甄別河員分別降革有差上是之十一月請估修蜀山湖碎石隄工七年三月奏豫省蘭陽柴壩南北頂衝埽段險要前經拋護碎石已著成效惟前項工程係在春間估定若遇伏秋汛漲埽段仍形喫重急應幫寬坦坡五月以黃河本年底水較大下游未能通暢上游逐漸淤高請將西岸隄堰加高并加築子堰以期有備無患均如所請行九月奏報秋汛安瀾並以本年黃水陡長惟於兩岸險要處預行培築並將隄堰普律加高各工悉臻穩固上覽奏欣慰賞還二品頂帶實授河東河道總督八年奏請續拋下

北蘭儀兩廳碎石並請於中河祥河最險之工酌辦碎石備防又以豫省黃河向無閘壩分洩全賴隄工高鞏以禦盛漲本年來源水旺節次普漫兩岸隄壩堰戩俱形卑矮殘缺請酌修以資捍禦得旨照議興辦九年正月奏請估修衛河埽壩及培築曹河中汛隄工七月請添防禦銀三十萬兩另款存庫以備工緊用迫咨行撥發皆允之九月以微山湖碎石坦坡著有成效惟靠隄水深日久次第坍塌以致坡面高窪不平坡頂亦多殘缺請於底土堅實之處添築五尺填補平整可期一勞永逸十年五月以微山湖爲東境八閘及江境邳宿河濟運水堰本年湖水不敷儲備請仍於韓莊閘上估築攔河土隄一道以資儲蓄九月報秋汛安瀾

下部議敘十月請將豫省下南下北兩廳十七堡險要各工酌辦  
碎石又勘估僭挑上捕運泐四廳沙淺工段均照議辦理十一年  
命吏部左侍郎鍾昌等赴東河抽查料垛查出祥河曹考兩廳  
料垛虛鬆半係殘朽 上責煇未能查出弊竇降三品頂帶仍降  
四級畱任旋奏參守備吳景元約束兵丁稽查竊匪不能振作應  
請降調 上是之十月報秋汛安瀾得 旨甄敘尋以舊疾增劇  
懇請開缺 諭曰嚴煇自簡任河道總督以來十有餘年諸事畱  
心於修防要務督率工員隨時辦理均合機宜是以東河連年迭  
慶安瀾茲據奏舊疾增劇一時難以就痊籲懇開缺著加恩准其  
開缺回籍調理一俟全愈卽行來京另候簡用十三年五月病痊



到京時浙省海塘潰近年坍塌尤多先後興修未經告竣至是煇  
奏言東防廳本年請修塘工一千二百餘丈外尙有應修者三千  
餘丈西防廳亦有險要之處備陳利害請 飭籌辦 上令浙江  
巡撫富呢揚阿等議十四年四月 命偕刑部右侍郎趙盛奎馳  
往查勘六月疏言另建新工緩不濟急請按潮頭之輕重分工程  
之緩急酌議添築盤頭改修柴埽以護塘根又以海塘歲修本無  
定額請於浙省捐監項下每年提銀五萬兩存貯藩庫以備歲修  
從之七月 命盛京工部侍郎烏爾恭額前往會辦九月烏爾  
恭額以塘工改用柴埽需費繁多入告 上復令左都御史敬徵  
戶部右侍郎吳椿會同詳加履勘尋得 旨吳椿著畱浙會同烏

爾恭額辦理嚴烜毋庸在工督辦十一月因病乞歸許之十五年河東河道總督吳邦慶劾烜有虛拋碎石收受紅封盤費各款命大學士文孚偕山東巡撫鍾祥查辦尋訊明嚴烜並無收受盤費等情惟違例改撥河員亦屬朦混請下部議處議降三級調用加恩改爲降二級調用不准抵銷尋得旨嚴烜著以運同借補仍帶所降之級二十年三月卒子達見官刑部郎中遜前任岳州府同知裁缺候補同知

右 國史館本傳

157-114

1111

國朝耆獻類徵初編卷百九十七補錄

疆臣四十九

趙慎畛

趙慎畛字邃樓生有異稟風度端凝甫冠補郡庠生督學錢澧一見奇之取充拔貢生嘉慶丙辰成進士改庶吉士散館授編修充國史館纂修兩爲順天鄉試同考官改山東道監察御史適川楚教匪初平慎畛奏屯田保甲事宜累數千言轉掌福建道已命巡視通州漕廉得楊村通判科索起剝費奏褫其職轉刑科給事中副典江南鄉試既事丁母憂歸服除補禮科給事中湖南督學某以矜愍失士心欲附慎畛自固按試常列慎畛諸子優等慎畛



不顧奏劾之遣戍伊犁襄平蔣相國薦慎畛才可大用 特授廣東惠潮嘉道至則因俗爲治嚴治主謀械鬪者又擒豪暴爲民惡者三十餘人誅之復檄南澳澄海潮陽雇商船時巡海口於內河亦增設舫船獲盜尤眾三郡以甯踰年擢廣西按察使其地山曠多土著民不知樹藝四方流庸多租墾其閒其不逞者造爲添弟會結黨斂錢以圖緣閒階亂並脅有貨者入名其中慎畛惟嚴罪戎首被脅者皆不坐會洋盜蔓入其境尤注意緝捕保薦梧州藤岑捕盜最力者其馬平忻城諸令不力者則黜之初重囚招解至省慮其逸繫一役眠食與俱名曰連手往往痠斃慎畛裁革之又念泗城太平南甯鎮安慶遠思安距省遠犯往返費煩鉅吏因諱

盜不舉改令審錄後卽畱監省中緝捕乃力尋授廣東布政使時  
州縣多積欠展轉相承慎眡悉心勾稽之款目一清皆措解無積  
時越年司庫所貯銀倍於舊額三之一南海高要均濱河多循川  
植防歲久數傾民苦水禍慎眡請撥款發商以其息資歲修遂爲  
永利又慮此邦華夷雜處相互市久必生釁請於大嶼澳門虎門  
鎮遠要綰地增建礮臺控扼之旋 命巡撫廣西習知粵西地勢  
如建瓴旬日不雨卽旱竭亟導民修陂塘造龍骨車開蔭井設井  
筒架悉頒式使倣行之又以慶遠地介滇黔爲羣盜出沒藪親馳  
至其地捕劇盜寘於法並編甲戶使無所隱宿境內咸宴眠粵西  
撫例用權關羨餘慎眡言身爲大臣受 國俸賜厚復取盈焉其

謂之何遂以其羨餘完城浚河建廟垣增學舍廣置栖流所不以  
殖其私道光改元授閩浙總督嚴飭水師緝海盜盜多就擒又遣  
兵赴永定山谷中搜獲盜魁殲之上游以靖所用將吏悉能別識  
勇怯材鄙逆民楊良斌作亂鳳山巡道孔昭虔不一月平賊未遣  
一卒渡海噶瑪蘭入籍後部議更賦則視淡水廳有加慎畛曰彈  
丸之區民力竭矣請仍原則便蘭地之初闢也軍氓歲供軍工采  
料役匠首科斂無已山匠林泳春遂煽眾爲變慎畛飛調水師捕  
誅之又改臺灣戍兵更替制使免配渡之苦特旌慈谿義士鄭珪  
門奏請有明漳浦黃忠端公從祀東廡並祠侯官謝金鑾德化鄭  
兼才於鄉賢以振風教尋擢雲貴總督滇夙多疫俗忌傳染雖所



親多去側死則暴其尸穢氣傳蒸疫行轉甚慎眇飭吏殮之滇例  
運京銅後鑛產日微鹽課亦多絀皆變通成法行之漸有效又謂  
防邊莫善屯田方攷地圖訪形勢經營之未成疾作亟拜疏劾貪  
黷不職者數十人越一日遂薨 上聞震悼 賜卹一如故事加  
贈太子少保 予諡文恪慎眇性純孝其母好施與當迎養都中  
時值雨雪嚴寒輒攜錢出散給凍餒者以爲其母歡往歲常郡饑  
其母謂慎眇曰吾家粗自給視此轉溝壑者竟無術拯之心滋疚  
矣汝後有力當圖之後慎眇撫粵西遂建義倉於桂林市穀數萬  
餘石以備糶振於里中亦市穀三千石建社倉貯之復設敬節堂  
置三千金爲舉本歲以子錢贍嫠婦之賢且窶者嘗名其室曰省



嘗及服官每舉陳文恭公以自律重刊從政訓俗兩遺規以身率  
先之保薦賢能常不使人知飭戒屬吏如師之訓弟子或陳事不  
許而復言當則卒從其請是非喜怒不藏於心曰吾於人無私愛  
憎何必使妄相揣度哉所著有奏疏八卷載筆錄四卷榆巢雜識  
二卷省嘗室續筆一卷讀書日記四卷惜日筆記二十卷雜文三  
卷

按文恪鬱負時望其名績實著粵閩閒所措注惟緝寇盜嚴海  
防先事折其亂萌俾蹙不得逞使繼之者能循是爲理當不至  
有後四十餘年方州糜沸之禍

右傳楊彝珍撰

國朝耆獻類徵初編卷百九十八目錄

疆臣五十

程國仁

陸言

盧坤

黃鳴傑

程祖洛

補錄

盧坤

國朝耆獻類徵初編卷百九十八疆臣五十目錄

--	--	--	--	--	--	--	--	--	--

國朝書獻類徵初編卷百九十八

通奉大夫前署江西巡撫江西布政使司布政使湘陰李桓輯  
疆臣五十

程國仁

程國仁河南商城人嘉慶四年二甲一名進士改庶吉士六年散館授編修八年大考四等罰俸三年九年充四川鄉試副考官十年改福建道監察御史十二年充陝西鄉試正考官十四年巡視南漕奏旗丁勒索幫費每歲遞增因官弁勒索陋規裁革未盡宜再加釐剔 命將所奏各條交有漕督撫漕運總督會場侍郎分別查照妥議辦理十五年提督廣東學政十八年任滿回京十九



年二月升光祿寺少卿五月授山東按察使二十一年擢甘肅布政使二十三年遷浙江巡撫二十四年三月調山東巡撫閏四月奏酌定整飭山東事宜一嚴覈交代以重查盤遇有州縣交卸飭令接手之員凡短一款及發一案其匿報與侵那者認真覈辦一務崇教化以清邪慝地方官下鄉時畱心教導飭各學教官每月親至鄉堡宣讀 聖諭廣訓一搜查積窩以清盜藪東省向多積匪通飭各州縣以捕務之勤惰分別功過獎勵參劾並飭東西大路添設窩鋪協同汛兵巡查一嚴拏訟棍以清訟源查有積慣訟師指名拏究並將主唆訟棍枷號示眾滿日發遣一先立治源以回風氣山東之弊在於屬員不畏上司百姓不畏州縣欲使州縣

畏上司在有以服其心百姓畏州縣在有以達其情奏入 上嘉之八月按察使溫承惠自以曾任總督不甘居人下又設立發審專司調派見任州縣久住省垣時值黃河北岸隄工漫溢國仁委令查辦抗不前往據實劾之得 旨革承惠職二十五年三月因病開缺四月補刑部右侍郎五月山東巡撫錢臻奏已革教諭李訓赴巡撫衙門投遞紅稟及手摺刻本指控多款 上命那彥寶審訊旋以李訓咆哮不服奏入 諭曰此案自上年八月交該撫審辦乃數月未經審結殊屬遲延又不將該革員摘去頂帶嚴行管押此與未經革職者何異是該革員之敢於當堂咆哮不服審訊皆程國仁因循軟弱縱之使然程國仁豈能復勝侍郎之任著

國朝通志卷之九十一  
以六部郎中降補道光元年二月補刑部郎中六月授廣東布政使二年三月調江甯布政使七月擢陝西巡撫九月補刑部右侍郎三年正月轉左侍郎二月授貴州巡撫四年因患病未痊請開缺調理得旨俞允尋卒子家督廣西右江道

右 國史館本傳

道光乙酉冬十一月鮑覺生爲事語用光曰余己未同歲生多高才碩學爲顯官而與余相知深則鶴樵中丞爲之最今鶴樵卒矣其孤以狀乞銘於余余實病不能食且寐每握筆屬文則心忡痛念無以慰亡友於地下乞君代爲之以塞其孤之請語之再曰君卽自爲之以明余所託之得人也用光於中丞固嘗以後進禮謁



見辱相知者而詹事於用光期待尤厚曷敢以不文辭按狀公姓  
程氏諱國仁字濟棠號鶴樵先世歛人也自公之祖占籍河南商  
城遂世爲商城人曾祖焯祖塢父字瓊皆以公貴 誥贈如其官  
皆晉 贈榮祿大夫刑部右侍郎曾祖妣黃汪祖妣葉黃母曹王  
皆 誥贈夫人晉 贈一品夫人公王太夫人出也庶弟五人公  
爲嫡長少而力學食貧益勵登庠食餼試輒冠曹偶甲寅領鄉薦  
己未成進士以二甲第一名改庶吉士散館授職與纂 實錄使  
於蜀秦得人稱選旋以福建道監察御史巡漕江淮糧艘之運速  
於去來有所陳奏輒蒙報 可舟楫通潞吏畏丁懷及役竣而奉  
督學廣東之 命蓋不由考差得之而御史俸滿例可出守公屆



其時 睿皇帝特命部更其例使凡任學政者歲滿注選其端亦發於公皆異數也在廣東破除舊習士風文體羣頌丕變歲滿還朝越次擢補光祿寺少卿甫三月擢山東按察使時搜緝亂民林清餘黨多株連公別白而貰釋之令有不察其誣而杖斃數人者公芟治之並劾其上官之不舉劾者及虧空案發州縣吏多罹法公列款件系言於撫軍人得寬其死又立分年追繳之限則國帑亦無虧焉在山左年餘讞定積牘凡六十餘而越訴之風因是稍沮 睿皇帝嘗褒嘉之而予以加級也擢甘肅布政使意無偏倚吏泯傾軋公正廉明 上亟稱之甘肅兵糧歲資採買公於豐年預買其贏八十萬石上請既得軍糧不乏擢浙江巡撫甫三

月調山東巡撫時 恩詔豁免天下民欠而山東所奏不實公在  
浙所辦實惠及民故 特詔調治公於是再至山東矣處勢旣便  
意得展布室竇蹈瑕威怵惠陶官民戒惕思變厥習會考城河決  
淫及曹單濮范公親往履勘兼施撫卹往返河次凡八閱月以風  
疾乞去官得 旨俞允還 朝未至擢刑部右侍郎仍 予假養  
疾緣事左遷 今上登極補刑部山西司郎中旋擢廣東布政使  
公於是再至廣東矣理財軌以法用人軌以誠市舶無擾民夷稱  
便擢陝西巡撫旣至京改授刑部右侍郎克武會試正考官轉左  
侍郎旋出爲貴州巡撫生苗紅苗相讐殺有欲爲復讐計者或謂  
宜以兵懲之公曰綏靖邊陲但使各相安耳無事草薶禽獮也旣

嚴示以義不可私報復復緝其爲亂之渠魁罪人旣得苗眾悅服  
公旋患病又少腹病疽縣愷日甚陳請開缺得旨俞允治裝回  
籍出黔二百里公薨時道光甲申十二月初二日也享年六十有  
一公始娶鄧夫人癸未 覃恩贈一品夫人繼娶洪夫人 誥封  
一品夫人子五人長家督鄧夫人出嘉慶乙丑進士改翰林院編  
修擢贊善出爲廣西右江道次家相早卒次家頴嘉慶癸酉舉人  
候補內閣中書次家穎早卒皆洪夫人出公自祖父好行其  
德始以業贏中落其產及公旣貴推其孝友以惠族人商城與歛  
義田祀田捐俸以營嫁娶有資喪葬有助條理秩秩而自奉特儉  
嘗痛其親之不逮養通籍後屏酒肉者十餘年其內行又如是是

於法宜銘銘曰

以儒起家究吏業擇義而趨仁與挾受 兩朝知輿頌浹康侯蕃  
錫輝寶笈公貌恂恂夙嘗接承公友命詞許攝銘列懿行示來牒  
右墓誌銘陳用光撰



日本書紀卷之八

三

陸言

陸言浙江錢塘人嘉慶四年進士改庶吉士六年散館授編修九年充順天鄉試同考官十一年改山西道監察御史十二年疏請考試各學漢教習以三年爲定期於正科會試後合進士舉人貢生局間考試下部議行十三年九月疏陳吏部銓選之法單雙月分例有一定班次不容那前移後致滋弊端本年八月內廣西蒼梧道鶴綸參革遺缺刑部議覆咨文遲至截缺以後經吏部奏請議處而此缺仍歸下月銓選未免遷就且積壓之端一開則賣缺擇缺弊竇叢生於銓政大有關礙 上嘉之又言各省道府員缺分別班次定例綦嚴至請 旨之缺由吏部開單恭候 簡放丸

所以昭慎重乃近來各督撫遇請 旨缺出輒以捐納候補人員  
自行開列陳請既與定例不符且恐啟營求請託之弊應請仍由  
部臣查明此項員缺進單請 旨以符定制而重地方下部議行  
十二月疏言各省丁憂人員奉 旨嚴禁在省稽留乃近來積習  
相沿往往以河務需人奏留差委并有因籌辦水利查勘河道奪  
情者在督撫祇以其趨走承順小有才能希圖見好市恩未必全  
爲要工起見 聖朝賢才蔚起效力者正不乏人何必藉留丁憂  
人員方能集事且該員等薄於父母奔走上官卽屬自昧天良斷  
難望其實心報效 諭曰近來丁憂人員夤緣請託以及督撫等  
市恩取巧奏留者甚多實屬違例試思此等人員若係督撫勉強

竊西則該員等遭父母之事方寸已亂焉能照常辦理若係該員等自願畱省便於鑽營是其於父母喪葬等事且置之不顧此等忘本之人又安望其移孝作忠爲國宣力乎嗣後督撫等槩不得再以河工及地方工程爲詞將丁憂各員違例奏畱十四年八月劾奏浙江學政劉鳳誥考試不公情性乖張終日酣飲并於上年代辦鄉試監臨親往號舍爲熟識士子改竄文字以致眾議沸騰又將舉人章堃竹園闌入署內建造住房 命戶部侍郎托津刑部侍郎周兆基光祿寺少卿盧蔭溥往按究出鳳誥聽受請託代士子徐步鏊印用聯號其將章堃竹園闌入署內亦查勘得實上禱鳳誥職謫戍黑龍江十五年二月京察一等三月遷禮科給



事申十二月左副都御史誠安奏都察院保題轉掌工科給事中  
一缺左都御史王集欲將賀賢志擬正陸言擬陪未爲平允 諭  
曰陸言屢次條奏允行者多且又京察一等較賀賢志爲優將來  
具題時朕亦必將陸言補授掌科著卽將陸言擬正十六年奏請  
嚴禁非刑及斷罪應照本律不得於法外從重加等 諭曰問刑  
衙門遇有應加刑鞫之處本有一定制度若私造非刑任意殘酷  
必至損折肢體戕害性命殊失國家欽恤之意著各該省督撫嚴  
行飭禁至於定擬罪名前降旨禁用不足蔽辜及從重字樣近來  
問刑各衙門又漸有用未便僅照本律致滋輕縱請照某律定擬  
者是於本律之外抑揚其詞深文曲筆又何以昭刑法之平亦宜

永遠禁止十七年授山東運河道十八年二月因稟請開放蘇家  
山開藉裕湖水東河總督李亨特劾其冒昧命來京以員外郎  
用十九年補刑部員外郎二十一年充江南鄉試副考官二十三  
年升郎中二十四年二月京察一等四月授福建漳州府知府二  
十五年遷山東濟東泰武臨道道光元年八月調河南糧鹽道十  
二月升湖北按察使二年五月升山東布政使九月調直隸布政  
使三年調四川布政使五年擢左副都御史七年授河南布政使  
八年丁母憂回籍十年服闋來京授江甯布政使十一年復調河  
南布政使十二年卒

右 國史館本傳

按公遺著有政學錄  
門人鄒鳴鶴為刊行

--	--	--	--	--	--	--	--	--	--	--

盧坤

盧坤順天涿州人嘉慶四年進士改翰林院庶吉士六年散館改主事分兵部九年補官十四年升員外郎十六年扈蹕木蘭校射中三矢賞戴花翎十七年升郎中十八年二月京察一等記名以道府用十月擢湖南糧儲道十九年丁本生母憂二十一年服闋授廣東惠潮嘉道尋丁本生父憂二十四年服闋授山東兗沂曹濟道二十五年十一月升湖北按察使十二月升甘肅布政使道光元年護理陝西巡撫二年八月遷廣西巡撫九月調陝西巡撫十一月奏查南山情形包穀漸次成熟山內廂廠照常工作惟被水各廳州縣貧民乏食請賑卹並請將坍塌民房給費興修



從之三年正月入 覲二月抵任五月奏甄別試用各員略言  
親民之官責任綦重不獨貪廉爲小民身家所係卽勤惰明昧寬  
嚴之別亦小民休戚所關 上韙其言七月奏鄜州倉廩被水衝  
塌借項興修十一月奏榆林綏德二府州屬常平倉穀缺額籌款  
買補十二月奏漢中興安榆林三府屬尋常遺犯及命案徒犯俱  
歸巡道勘轉悉如所請四年正月奏勸捐社倉事宜 諭曰必應  
辦理之事貴在詳慎妥實勉爲之二月奏鄜州倉穀被水漂失請  
將支贖兵糧撥補常平倉缺額四月會議營制請以鎮安營守備  
改爲千總撥經制外委一員抽撥漢中西安二鎮馬步兵一百一  
十八名移隸商州何家巖汛把總一員移駐略陽撥略陽營外委

一員移駐何家巖舊汛陽平關守備一員外委一員額外外委一員西鄉營把總一員陽平關營馬步兵一百六十名移駐佛坪並請裁陽平關營參將改設都司一員又奏陣亡鄉勇按名入祀昭忠祠並停止未發賞卹銀兩以杜浮冒又奏勘估南山各屬應修城工及漢江石泉城南一帶江岸修隄築壩挑淤引流以資捍衛五月奏蓋屋洋縣適中之佛坪地方爲南山要隘請添設撫民同知一員巡檢兼司獄一員裁郿陽縣縣丞一員並改蓋屋縣丞爲鎮平縣丞鎮平巡檢爲袁家莊巡檢均如所請行五年正月奏修復咸甯長安涇陽蓋屋郿縣岐山寶雞華州榆林等處河渠水利因勢利導一律深通疏請鼓勵出力各員 允之四月以湖南糧

道任內失察書差私雕假印冒領庫項降三級留任尋丁母憂六年七月因逆回張格爾入卡滋擾犯喀什噶爾諸城 諭曰前任陝西巡撫盧坤見有交辦事件並非奪情起用著卽行令來京陛見毋稍遲緩尋入 覲復 諭曰新疆逆回滋事業經調派大兵剋日勦辦一切應用軍需糧餉駝載事宜最關緊要前任陝西巡撫盧坤熟悉陝甘情形著卽馳驛前往甘肅會同鄂山總理一切應如何派員籌辦及口內口外如何分段經理之處督率總局司道會同妥議具奏一面督飭該委員及地方官隨時妥速籌備務期源源接濟無得短絀遲誤九月馳抵甘肅 命駐肅州扼要之地督辦轉運事宜得 旨鄂山等務於大兵雲集之前籌貯三月



之糧豫備支放將來大兵進剿各路軍需之費如稍有短絀遲誤  
惟鄂山盧坤是問尋會奏軍行以糧餉爲重請於山西買駝六千  
隻陝西買駝二千隻迅解肅州以備急需會阿拉善王進駝一千  
隻烏里雅蘇臺調撥官駝四千隻先後奏入 諭曰山西省採買  
駝六千隻見有烏里雅蘇臺所撥及阿拉善所進者果能迅速解  
往原可稍從節省惟恐道路遙遠不能如期全解仍著福縣豫爲  
購辦斷不可拘泥遷延轉滋貽誤其陝西省採買駝二千隻亦應  
酌量購備聽候鄂山等知會與各處所備車駝通盤覈計務期足  
用無致浮多十月偕鄂山奏籌解備用軍餉並調撥四川西安官  
兵進剿情形得 旨所奏均悉汝二人係朕特簡之人朕亦深知



汝二人公誠可靠是以授此重任務要和衷共濟成此大勦一切  
出納實心經理斷不可存避嫌遠謗之心勉之七年二月奏大兵  
進發請催各處糧餉迅速運供以資接濟又奏托克遜爲烏魯木  
齊糧運首站請以臬司方載豫前往督辦均 允之先是條奏籌  
辦軍需章程臚陳十一事一大營軍糧寬爲籌備一兵丁口糧量  
予加增一籌給出口駝馬料草以資飽騰一買補缺額營馬以備  
續調一監造軍火器械以期堅實一撥運陝省制錢以平市價一  
添設臺站夫馬以速軍報一雇用車輛給發例價以供運送一請  
雇募護臺民夫以資防護一請賞出口征兵皮衣皮帽以禦嚴寒  
一請後路糧臺酌駐官兵防守以昭慎重疏 聞議行其三仍

諭體察情形妥酌辦理至是覈實覆奏 上以此次回疆用兵遠在口外一切軍行駝載供支等事原與腹地不同悉如所議行七月服闋授山東巡撫 命軍需事竣再赴新任尋克復四城敘轉餉功 賞加太子少保銜仍下部優敘八月調山西巡撫十月請撤肅州軍需局以節糜費 上是之八年正月首逆張格爾就擒大功告戢 賞給頭品頂帶三月入 覲四月抵任七月奏以軍火利器爲行陣最要請派陝西撫標弁兵來晉教演速戰陣法八月奏復設岢嵐州考棚俾生童就近應試以免勞費均得 旨允行尋調廣東巡撫十月奏請復設陽曲縣主簿裁甘桃驛驛丞歸柏井驛驛丞兼管十二月以省標教演速戰陣法漸臻純熟請飭

弁兵赴大同太原二鎮一體訓練所需擡礮火藥鉛丸等項請於辦銅幣項款內提借發商生息歸於藥鉛項下支用又奏晉省撫標兵丁養贍不足請將岢嵐州等屬額徵餘糧撥給省標三營支放本色以示體恤並請於河東道庫所存生息餘贖項下提借銀三萬四千兩發商生息俾資運費均如其議是月入 覲九年三月抵粵六月奏各倉屯羨穀石存積過久請出糶充餉七月勘明被水南海等州縣請緩其賦九月奏請豁免仁化縣歷年未完屯羨穀石及變價充公銀兩以除積累 上皆從之十年八月以寶廣局鼓鑄錢文向有餘息嗣因滇省辦銅轉運稽遲停鑄七年有餘息銀短絀請免在外籌補以結塵案下部議行九月調江蘇巡



撫十一月擢湖廣總督時以兩湖鹺務狃於封輪之例以致引滯商疲疏請循前散輪之法於漢岸建倉起存俾江船及早回空源源攬載後鹽以便民食有旨勸勉十一年二月奏請籌銷楚岸積鹽並查出重斤罰令量減售價又奏荆門營地方歉收請借倉穀以濟兵食四月奏請借項修築襄江南岸緊要隄工又奏湖南永興縣例食粵鹽粵商於所開子店多設熬鍋浸灌准網請定額以杜侵越又奏楚岸准引滯銷由於內私外私之充斥請於江船聚集之塘角設立總卡並派丁役梭織巡邏保甲按船編號以嚴稽察悉荷允行又偕巡撫楊懌曾奏地方大槩情形疏言圖治之要一在弭盜一在隄防得旨卿與楊懌曾均朕特簡之人昇



以封疆重任務要和衷共濟爲國宣猷慎勉以副朕望六月以湖北省夏秋汛漲收成歉薄民鮮蓋藏鄰省售賣米船請循例免稅以資民食八月奏請酌借司庫銀十萬兩遴員經理發商分赴川省購買米石酌減平糶九月覆勘天門縣沈湖等垸被淹地畝難資耕種請減徵以紓民困十月以河道湮塞擇要疏濬請以原署兩淮鹽運使王鳳生來楚綜理水利事宜悉允所請尋因陝西巡撫任內失察西安府同知衙門濫給效力把總委牌降二級畱任十二年正月奏以荊州府萬城隄工請歸知府辦理以專責成從之會湖南江華縣逆搖趙金隴糾眾滋事並句結粵東散搖互爲接應拒傷兵役多人總兵鮑友智先行率師進討攻賊於長

塘寨續經巡撫吳榮光檄提督海凌阿率師會剿時坤聞報馳往查辦與湖北提督羅思舉行抵永州賊勢益起偵知海凌阿及副將馬韜遊擊王國華守備吳鑑力戰死新田令王鼎銘亦同時陣亡坤以徵調官兵未能卽至賊北竄九疑南奔兩粵聚則易殲散則難撲當於大兵未集之先過其四出方可一鼓成擒檄弁兵分道防堵趙逆復至新田之楊家鋪其黨趙文鳳糾眾二千餘附之屢犯桂陽意在北竄坤令眾兵四面嚴防提督羅思舉合力進攻敗之於羊泉總兵霍隆武副將祥福參將王錫朋分道夾擊焚其巢殪賊三千餘人生擒賊子趙幅金趙幅銀賊弟趙金旺賊目唐發林趙文鳳李德明等及逆黨五十餘人捷入得 旨褒嘉下部

議敘並邀 賞賚時提督余步雲奉 旨統領黔兵一千前來會  
剿搜逐餘黨埽數盪平五月凱旋 諭曰此次逆搖趙金隴聚眾  
滋事傷及大員官兵深堪痛恨茲據奏賊匪全殲當就生擒各犯  
及趙金隴子弟詳加訊問據稱該犯死於羊泉街內其爲趙金隴  
被殲尙屬可信該犯罪大惡極必應生擒解京盡法懲治方足以  
彰國憲而快人心今據稱殲斃未能生擒不滿朕望惟盧坤等此  
次剿辦一切機宜俱臻妥速且調度有方深堪嘉尙盧坤著賞戴  
雙眼花翎並賞一等輕車都尉世職尋廣東搖匪趙仔青糾合餘  
黨二千餘人復來滋擾坤會同提督余步雲總兵曾勝率領弁兵  
兜剿敗之於濠江生擒賊目趙仔青磔於市會廣西逆搖盤均華



亦犯楚境我兵敗之於芳林渡殲其渠獲逆黨多名置之法方趙  
金隴之煽亂也 上命尙書禧恩將軍瑚松額來楚視師七月偕  
禧恩瑚松額會議江華善後事宜臚陳九條一籌撫卹一重官守  
一勤巡哨一清叛產一嚴保甲一察徭俗一懲奸棍一收火器一  
獎義勇如所請行先是 上命疆臣裁汰文職閒員至是坤奏請  
酌裁施南府通判一員保康縣訓導一員 允之九月奏改駐員  
并添設兵丁以資捍衛請將理徭同知改隸錦田移提標右營守  
備駐錦田作爲遊擊中軍移提標前營把總一員駐大橋協同外  
委巡防改隸永州遊擊管轄永明中軍守備改爲分防城汛仍歸  
遊擊管轄酌裁馬四百一十匹所餘乾餉撥給增設步守兵四百



名江華嶺東營守備改爲題缺改隸永州遊擊管轄辰州分防浦市汛守備改爲部推卽抵嶺東營守備缺又奏湖南各標營兵均資堵剿請免按額裁減均如所請是月調兩廣總督請將練習速戰之員弁由楚赴粵教演擡礮 允之尋以保奏都司郭宏升請升三江協副將與例不符下部議處閏九月會籌連州排猺善後章程臚款具奏 諭曰此次因趙金隴句煽匪徒蔓延滋事官兵大加勦辦旣懾猺膽而張國威惟戢匪雖在一時而弭患當謀久遠所有善後章程自應准如所請惟在各地地方官實力奉行以安民謠而收成效不得視爲具文尋以任湖廣總督時失察趙金隴逆案鑄二級畱任是月兼署廣東巡撫十月奏請酌裁廉州府同

知一員肇慶府通判一員高州廉州二府司獄各一員南海縣河  
泊所六使一員長甯縣訓導一員始興縣訓導一員十一月奏廣  
西猺匪邊平請分別撤留防兵又請調楚省將弁數員赴粵訓練  
營伍皆從之十三年正月奏籌堵夷船章程請責成水師提督  
嚴督舟師官兵實力巡查堵截得旨此次明定章程該督等嚴  
飭將弁實力奉行儻水師官兵巡防稍有未周洋行各商貿易稍  
有不公在關經胥稅費稍有濫取卽行革究以示懲警尋以湖廣  
總督任內於湖北襄陽令阮克峻審辦積案奏請獎勵未將確數  
覈明遽行入告下部議鑄級二月奏廣東高州府屬信宜縣金垌  
墟地方移駐莊垌汛把總一員分兵十六名作爲專汛以資防禦

連平州城移駐和平營外委一員作爲城守協防如所請行三月  
奏於夷洋狗頭山地而生擒越南巨盜陳加海並餘匪多名按治  
如律 上以辦理妥速 嘉之七月復兼署廣東巡撫九月奏改  
連山廳司獄一員宜善司巡檢一員爲邊疆佐雜要缺裁連山廳  
訓導一員專設教諭一員改爲要缺部議以連山廳司獄缺應歸  
部選餘悉議行十月越南國內訌飭屬慎固邊防密陳籌拒該國  
請兵事宜 上嘉其深識大體又奏拏獲香山縣積盜侯幅滿等  
八十餘人問擬如律十四年正月奏獲廉州滋事生黎符小二等  
並漢奸多名黎境悉臻綏靖得 旨勛獎三月奏粵省鐵器請由  
內地輸餉開鑪鑄造農器鐵鍋者悉從民便下部議行又以濫保



襄辦文案幕友候選州同宋緒請 賞五品職銜經御史尙開模  
劾其違例濫保坤復援例覆陳 上以曉曉請甚屬非是 飭  
之八月英吉利國夷目律勞畢來粵聲稱貿易輒令兵船二隻乘  
潮水漲發擅入海口弁兵開礮轟擊該夷船隨拒隨行仍停泊黃  
浦河面地方奏入 諭曰兩廣總督盧坤稱於六月間咨商防堵  
並非措手不及事出意外者可比自應遴派得力將弁嚴行防堵  
何致任令該夷船駛入內河不能防阻是該督無謀無勇咎無可  
辭有損國威深負委任著革去太子少保銜拔去雙眼花翎先行  
革職仍畱兩廣總督之任帶罪督辦如果辦理迅速尙可稍從末  
減儻因循貽誤致滋後患定當以軍法從事決不寬貸懍之慎之



尋調兵建閘堵其進出之路夷兵震懾軍威惶恐悔罪飭員押逐出口據實疏陳 諭曰當該夷進退兩難之際何難立行勦滅但此等外夷不諳例禁之處不值與之深較玩則懲之服則舍之該督等始雖失於防範終能辦理妥善不失國體而免釁端朕頗嘉悅盧坤著加恩賞還太子少保銜並雙眼花翎其前次疏防亦難辭咎著帶革職留任又奏獲興販鴉片煙李亞祖等並節次查辦情形有 旨嘉勉旋以濫保千總金振聲下部議鑄級十五年正月奏校閱營伍請將訓練懈弛之員弁分別降革勒休 上是之四月奏請添鑄礮位酌派各臺應用其施放之法自南山至大虎分爲三段與沙角大角信礮聲勢聯絡並請於省東中流沙地方

建設礮臺以資保障六月條奏廣東南韶惠廉瓊五府州屬水陸營汛分別移改增設以歸周密一永靖營遊擊改爲南韶連鎮遊擊移駐始興縣城並添設外委把總各一員額外外委五員兵丁三百五十名四會營都司改爲永靖營都司遷駐石碁原駐南村之永靖營守備作爲四會營守備其南村汛酌撥永靖營千總一員駐守一南韶連鎮標中營千總遷駐平石帶兵三十名作爲平石營專防樂昌縣協防外委一員移駐三鞏橋帶兵二十名作爲平石汛協防一永安營守備移駐連平州城作爲連平營守備連平原設之千總移駐惠化銀梅二岡適中之地作爲分防千總惠來營精海所汛把總一員移駐連平州之中村作爲中村汛專防

惠州協分防老虎坳把總移駐鐵籠嶂并酌撥外委一員移駐老虎坳欽州那陳司巡檢移駐連平州作爲上坪巡檢那陳原村莊歸長墩巡檢兼管一龍門營水師副將海洋是其專責應將冠頭嶺礮臺歸龍門協管轄原設冠頭嶺千總與三汊附近應兼管三汊汛卽將原設三汊汛千總一員兵七十二名移駐冠頭嶺臺汛並將冠頭嶺臺汛餘兵二十三名廉州營存城兵抽撥十二名東路公館汛兵抽撥十五名改撥靈山縣城守兵二十四名廣平植墟那隆太平四墟各設卡兵五名陸屋墟添兵六名分段巡防一水師各營移撥千把總各一員兵二百名作爲儋州水師新英港等處三臺兩汛併歸儋州水師管轄并請於海口海安龍安三營



抽撥撈督船四隻以資巡緝閏六月疏言防黎善後章程一查峯漢奸以絕煽惑一設立墟場以通有無一嚴禁越境以杜句串一講求水利以免荒旱一籌撥經費以備緩急俱荷 允行八月以濫保千總游光順下部議鑄級是月卒遺疏入 諭曰兩廣總督盧坤老成練達明敏有爲敷歷有年久著勞績前派辦回疆軍需告蕝後賞加太子少保銜嗣因首逆就擒賞加頭品頂帶續於湖廣總督任內因勦辦湖南猺匪調度有方盪平迅速復賞戴雙眼花翎並世襲一等輕車都尉世職自調任兩廣總督以來辦事認真結實可靠朕方資倚畀茲聞溘逝殊堪軫惜盧坤著晉贈太子太師銜兵部尚書照尚書例賜卹任內一切處分悉予開復應得



典該部察例具奏伊子戶部候補員外郎盧端黼俟服闋後以  
該部員外郎遇缺卽補尋 賜祭葬 子諡敏肅子端黼襲輕車  
都尉世職廣東雷州府知府

右 國史館本傳

黃鳴傑

黃鳴傑安徽合肥人嘉慶四年進士改翰林院庶吉士六年散館改主事分禮部八年補官十三年升員外郎十七年二月升郎中十二月遷湖廣道監察御史十八年五月疏陳京僚公讌演戲或巧立善會之名優人具帖輾轉邀請羣聚一堂褻體曠官有乖職守奏請永行禁止 允之尋署兵科給事中七月疏請釐積弊以清訟獄 諭曰近日地方奸徒往往藉一事爲由牽涉多人或挾嫌報復快其私忿或乘機詐索利其資財地方官率據呈詞茫無區別一經傳案質訊胥吏等因得倚勢橫行百端需索不遂則又非刑拷打肆意凌虐以致案外毫無干涉之人一遭拘繫楚毒備

嘗甚或拖斃罔圖卽幸邀前雪而室家蕩析生計蕭然實堪憫惻  
至於白役濫差訟師包攬尤屬奸僞百出不特命盜案件架詞拖  
累見當查拏逆案之際設逞其誣罔羅織株連無辜小民其何以  
堪著通諭步軍統領順天府五城及直省督撫各飭所屬凡遇詞  
訟到官除原被告及緊要證佐外毋得率據所控徧行提質儻有  
奸得蠹役私拷橫索藐法殃民立即懲辦尤當嚴拏訟棍寘之重  
典俾奸頑無可施其伎倆良善各得保其身家則民生日遂吏治  
日興矣十九年二月轉京畿道九月 命巡視淮安漕務二十二  
年授直隸大名府知府二十四年調保定府二十五年升霸昌道  
道光二年遷廣東按察使尋調湖北按察使三年升浙江布政使

四年 命署浙江巡撫並兼兵部侍郎銜時仁和等縣屬上塘河  
歲久淤塞鹽米商人以農田灌溉所資呈請捐銀六萬兩修濬先  
於運司公費項下借款興工陸續歸繳並將省河一律疏治經鳴  
傑入奏得 旨允行五年正月以杭嘉湖三府屬疏濬河道勘明  
工段共需銀十五萬七千餘兩又修築烏程長興二邑塘閘橋壩  
工料銀九千餘兩奏於藩庫借款興工由該府縣屬分年攤徵歸  
款其漲灘成田應行剷除處所如已升科並請豁免毋庸給予產  
價 允之時南河高堰漫口有請增各省鹽價以濟工用者鳴傑  
遵 旨議覆兩浙近年額引未能暢行若再加價愈形壅滯並奏  
浙商願公捐銀二百萬兩以濟工需得 旨鹽斤加價著毋庸議



其按引攤輸銀兩亦 諭卻之五月以糧艘水手械鬪未經親往  
督辦御史錢儀吉奏劾部議革職嗣復以失察德清縣徐倪氏謀  
命賄息重案經欽差大臣王鼎等訊辦屬實 命回籍聽候部議  
尋議降三級調用二十一年卒

右 國史館本傳

程祖洛

程祖洛安徽歙縣人嘉慶四年進士以主事用籤分刑部十二年補官十三年升員外郎十四年十月升郎中十二月以承辦秋審黃冊黏貼錯誤部議降三級畱任奉 旨實降一級畱部以員外郎補用旋補官十五年充湖南鄉試正考官十六年升郎中十八年正月京察一等以道府用六月俸滿截取記名以繁缺知府用十九年充會試同考官二十年選甘肅平涼府知府刑部堂官以祖洛總辦秋審並承審逆案奏請畱部 諭曰刑部郎中程祖洛在部年久於刑名尙稱熟悉朕所素知是以於該員記名道府後未經簡放茲吏部以該員擬選甘肅平涼府知府刑部以程祖洛

總辦秋審逆案未便遽易生手奏請兩部扣選並聲明業經截缺  
例不准見缺保留等語刑部如因程祖洛在部得力何以不早行  
奏明扣選乃於該員既選平涼府之後始行保留顯係因甘肅地  
瘠缺苦始爲此奏若係美缺未必保留矣刑部堂官俱著交部議  
處所有程祖洛京察截取記名以道府用之處俱著註銷仍著罰  
刑部郎中任辦理部務永不外用如果始終奮勉酌量施恩而已  
二十一年充廣西鄉試正考官二十四年升內閣侍讀學士旋授  
江西按察使二十五年擢湖南布政使道光元年調山東布政使  
二年五月擢陝西巡撫七月調河南巡撫御史程喬采奏河南教  
匪朱麻子等由新蔡竄入安徽阜陽縣 上以皖豫毘連地方餘

匪易於潛匿 命祖洛及兩江總督孫玉庭安徽巡撫孫爾準按名掩捕九月祖洛奏朱麻子就獲並獲夥黨四十餘名按律定擬並言皖豫兩省匪黨不止二百餘人若不搜捕淨盡稍畱餘孽復恐煽結滋事卽今辦法不在急治見獲之犯而在窮究未獲之人奉 硃批汝能如此存心再能認真辦理使積年教匪不動聲色漸就殲除地方獲保安謐則是莫大之功也總在實心經理亦不責成近效相機而行汝自爲之日後自有明驗十二月籌議緝捕經費奏言豫省內黃考城一帶與直隸山東邊界毘連爲盜賊出沒之所又南汝光及陳州各屬與安徽之阜陽縣暨湖北之襄陽等縣犬牙相錯向多紅鬍捻匪地方官遇有盜案非不懸賞勒緝



而用項繁多勢不能從優給賞往往兵役購綫獲盜得賞不償所費難期鼓勵議於司庫扣存歲料市平銀兩及入官地租項下動撥銀五萬兩交各典生息每歲可得息銀六千兩以二千五百兩解交司庫歸還原本以三千五百兩作爲緝捕經費從之又勘明安陽縣之馮宿村漫水情形疏言漳河北徙舊河高於平地斷難復令南趨馮宿村口門之水由北入衛已成河形議請毋庸將漫口堵築卽就新河量爲疏濬以輕水患上以漳河爲直隸河南二省民田運道所關命大學士戴均元赴豫會勘妥議並命祖洛於漳水經流之處周歷履勘三年正月偕戴均元奏勘明見在形勢與上年冬令不同請仍挑築舊河復歸故道如所議行

十月偕戴均元奏報勘辦安陽縣樊馬坊漫水略言治水之道合則爲患分則安流自乾隆五十九年漳水南徙合洹以來衛水爲所頂阻每致潰溢今河勢旣分萬不可使之再合合則并力爲患議於田市地方就高灘挑挖引溝使北岸漫水放入南岸正河再於田家營環水各村莊編列柴壩以護民居至樊馬坊上下距洹河甚近擬添築土堰一道其南岸衝刷溝槽建築土壩以禦之俾水各分流而漫溢之患可冀輕減十一月以定擬秋審失入部議降一級調用上加恩改爲降二級畱任是年上臨雍頒賞王大臣臨雍御論幸萬壽山賞御製宴十五老臣詩墨刻又賜欽定大清會典養正書屋全集祖洛皆與焉四年二月奏

田市積水消涸露出地形北面漫水與南首溝工隔斷不能引歸  
正河惟田市以上之龍家莊水勢北高於南議卽就涸出窪形之  
處節節抽溝相機勘辦近南漫水不能全行掣消而消涸一分卽  
收一分之效又奏龍家莊抽溝啟放之後水勢暢順而北面之水  
仍未見消又加詳度惟內黃縣之馬家窪水面北高於南距正河  
亦祇一二百丈議於此處再挑引溝以消漫水五月奏馬家窪新  
挑溝口暢順已將漫水全行掣歸正河復請於田家營添築大柴  
壩使溜勢盡走南流並言三十年來漳水挾洹奪衛爲患滋深此  
時漳洹分流縱遇盛漲較之從前漳洹衛三河合併爲患之勢不  
啻霄壤後此相機利導似易爲力先後疏入俱如所請行七月奏



准汝甯光州二屬尋常遣軍流徒各犯就近由該管道審轉以免  
稽延其人命案內罪應斬絞及一切由死罪減爲軍流之犯均照  
舊解司勘轉以昭慎重而符定制九月以歸德府屬之永城縣汝  
甯府光州所屬之新蔡縣息縣界連山東江蘇安徽向多盜匪奏  
請以歸德府通判移駐永城縣之薛家湖集於新息接壤之黃湖  
店添設新息分防通判一員永城營添設守備一員山城集經制  
外委一員又奏裕州屬之小史店南陽縣之賒旗店皆易藏奸應  
各於本營派撥弁兵設立專汛均從之十一月奏豫省東南歸  
德府屬之虞城夏邑永城等縣地勢低窪西北開封府等屬夏秋  
被水多匯注於此向賴虞城縣之橫河惠民溝夏邑縣之巴清河



永城縣之減水溝爲之宣洩南有申公隄一道東水歸槽經江蘇  
碭山縣蕭縣以達洪湖爲豫省東南洩水要道迭經黃水漫溢各  
溝河全行淤塞致虞夏永三縣並江蘇蕭碭二縣之濱河村莊連  
歲被淹農田失業請分別撥項卽時挑濬 上以事關兩省水利  
民生 命實心經理以收實效是年江南高堰湖隄漫口 命尙  
書文孚等馳往勘辦並降 旨動撥帑銀酌畱漕米十二月祖洛  
奏豫省附近大河各州縣計可撥米十萬石並委員預購稽麻三  
百萬斤籌撥庫銀約計四十萬兩 上以其盡心國事不分畛域  
嘉之初皖豫撫臣以懲創捻匪奏准豫省之南汝光陳皖省之  
潁州等屬遇有兇徒結夥在三人以上持兇器傷人之犯除實犯

死罪外其餘不分首從發極邊煙瘴充軍如十人以上無論曾否傷人發新疆給官兵爲奴纂輯爲例嗣經刑部修改南陽等屬鬪毆至三人十人以上必須豫謀結夥逞兇者方照例分別嚴擬若衅起一時僅止爭毆仍各按其本罪定擬不得牽引舊例亦著爲令五年祖洛以南陽等屬匪徒結捻一人倡劫黨眾不呼而集其豫謀逞兇早在結捻之時不待臨時商約新例以是否豫謀分別罪名輕重辦理諸多窒礙疏請 敕下刑部改復舊例刪去豫謀等字俾外吏得以覈實辦理並酌議匪徒拒捕暨捕人治罪各條下部議行六年正月奏歸德府前明刑部侍郎呂坤忠言讜論正色立朝其平居講學不語精微不談高遠惟以躬行實踐爲本在

明季最爲醇正應請從祀 文廟下禮部議行七年十月請寬免  
南汝光陳等屬失察匪徒處分疏言匪徒擾害閭閻至獲犯後究  
出舊案追溯從前失察處分恐瞻顧同官多所迴護請遵照嘉慶  
年間 聖諭實力剪除不復咎其既往俾承緝各官無所瞻顧以  
期有犯必獲有獲必懲得 旨允行旋丁母憂回籍九年服闋十  
年閏四月署工部左侍郎六月授湖南巡撫十二年二月擢閩浙  
總督四月奏審明峻訟擾害糾眾拒捕之武進縣已革生員莊午  
可依律處斬並聲明此案牽涉人犯眾多先因莊午可行蹤詭祕  
購緝拏迨至莊午可就獲各緝目均散歸農恐伊等報復私怨  
妄自誣擊業經嚴飭府縣掣銷差票曉諭居民暫行停緝餘黨以



免擾累 上是之先是有人奏浙江紹興已革庫書潘鳴皋徐燮堂等詐贓營私及在籍臬司李澧干與公事各款 命祖洛會同浙江學政何凌漢按其事九月祖洛偕何凌漢奏審明分別定擬李澧訊無交結情事惟在外聽曲宴飲出入衙門有玷官箴請旨褫職十月 上以浙省鹽務日敝庫款虛懸 命祖洛於赴閩時路經浙江體察情形奏明覈辦尋奏請援照前浙江撫臣帥承瀛清釐鹽務成案辛卯秋冬壬辰春夏四季正引并綱統銷以紓商力而裕庫款並嚴定裁汰浮費章程下部議行是月臺灣府閩粵莊民因事起衅奸民張丙陳辦等乘機糾眾戕知府呂志恆知縣邵用之官兵禦賊於斗六門縣丞方振聲千總馬步衢等死之



上命祖洛確探情形酌辦旋命署福州將軍瑚松額爲欽差大臣督兵渡臺勦辦而以後路糧餉軍火等事專責祖洛尋兼署福州將軍十三年正月首逆張丙陳辦詹通陳連等就獲奏聞尋遵旨赴臺妥籌善後事宜三月上命祖洛查辦應參應獎之員諭曰朕用人行政惟知一公字程祖洛膺茲重任爲國宣勤彰善癉惡亦當守一公字無恤其他尋偕瑚松額奏審明戰守無方之都司周進龍革職遣戍守備陳福隴外委黃廷鳳等均革職七月偕瑚松額奏臺灣逆匪蕩平將張丙陳辦詹通陳連四犯解京見在官兵陸續凱撤各莊仍復舊業全臺安堵上以祖洛等迅速戴功降旨嘉獎賞戴花翎仍下部優敘又奏福建金

門廈門一帶沿海奸民私造小船一名白底船一名草烏船藏有  
礮位軍械沿海伺劫並有闖入粵浙洋面之事 上責祖洛及福  
建水師提督陳化成等實力堵拏八月奏請將臺灣北路左營改  
爲嘉義營添設參將駐紮嘉義歸臺灣鎮總兵統轄其原設北路  
營都司改爲斗六門營都司移駐斗六門歸嘉義營參將兼轄原  
設斗六門汛守備移駐嘉義作爲嘉義營參將中軍守備專管兵  
馬錢糧其北路協副將專管北路左右二營又臺灣鎮標原設左  
中右三營遊擊道光七年改右營遊擊爲北路右營遊擊歸北路  
協副將兼轄而以鎮標右營事裁歸左營兼管今議仍設鎮標右  
營遊擊俾資調遣如所請行十二月以浙江温州鎮總兵李恩元

捕務廢弛奏請革職畱緝 上是之又劾福建海壇鎮總兵萬超  
諸事不能振作請 旨革職枷號示懲先是有人奏汀州等府書  
差滋事擾害閩閩 上以祖洛新任閩督無所用其迴護 命悉  
心訪察十四年六月祖洛遵 旨查覆因奏陳閩省吏治民風略  
言安民莫先於懲蠹懲蠹無他術惟在就事據實懲辦不可以私  
心迴護不可以瞻顧處分而曲縱奸惡閩省吏治既無子惠之政  
又務寬大之名其始也實因官之庸劣致成頑梗之風至於今日  
則又因民之譸張遂有疲難之勢官曰民刁民曰吏虐互相傳播  
漸失其真此奉 旨飭查各款中之實有其事而與原奏略有異  
同必應設法整頓者也已往者無可追求以後當隨時查察就案



懲辦總之閩省大弊在於官不執法幕不守法因而愚民犯法書  
役非法訟棍玩法必得將不肖執法之官嚴懲一二使有所儆各  
知治其犯法弄法玩法之人則法立令行而閭閻庶可安枕矣得  
旨所論周詳至當務要以次認真整頓方爲不負委任之意也  
勉之又勉七月奏浙省二十餘年來海洋安謐久已文恬武嬉上  
年沿海地方多有失事獲犯至二百餘名承審府縣化劫爲搶以  
首盜爲被脅致令武職藉口情緝請將知縣陳文治交部嚴議嗣  
後如有似此不肖認真獄者卽隨時參革不敢瞻顧嫌怨 諭  
曰此等惡習已非一日朕早有所聞因無實據難以懲辦卿能奮  
勉整飭可嘉之至務當一力勉之十月己革縣丞秦師韓控提督



馬濟勝膜奏邀功並訐祖洛偏袒欺蒙各款 命侍郎趙盛奎赴  
閩會同學政張麟按治之尋盛奎等奏查詢明確所控多屬虛妄  
其列控祖洛各款亦皆空言 上以師韓逞刁妄訐遣戍新疆復  
以各省督撫幕友例不准邀議敘祖洛將幕友陳時等五人率行  
保列下部議處十二月偕福建巡撫魏元烺奏捐廉倡辦義倉以  
資糶濟略言閩省內地各郡瀕海多斥鹵之區負山鮮膏腴之壤  
產穀不敷民食必須妥籌備糶之資臣捐廉銀三萬兩於省城內  
修建義倉買穀二萬石以爲之倡示諭紳民有願捐者各聽量力  
出輸以期接濟得 旨嘉獎十五年三月奏撥赴臺灣換防弁兵  
申明定例槩用水師營哨船渡載不准勒坐商船以杜擾累而資

習練如所議行十月奏修建沿海最要塞城礮臺綜覈閩海大勢當以漳州府屬之南澳銅山爲藩籬泉州府屬之廈門金門爲門戶福州府興化府所屬之海壇爲省城右翼扼要閩安爲省會咽喉福甯府屬之銅山爲後戶巡緝守禦全資塞城礮臺確勘形勢分別緩急其最要者共四十四處估需工料銀兩已經官民捐辦毋庸動項得 旨迅速興辦先是祖洛奏福建在籍藩司梁章鉅捐辦義倉進京後其子逢辰接辦勸捐請 旨獎勵經御史鄂爾端奏參逢辰上年隨父入都祖洛前奏不實 命明白回奏十六年覆奏梁章鉅奉 旨進京義倉未葺之事逢辰接手辦理旋即事竣隨同伊父入都 上以其入奏時未能明晰聲敘下部議處

旋丁父憂回籍十八年服闋以舊疾未痊奏懇 賞假調理 允  
之二十九年卒遺疏入 諭曰原任閩浙總督程祖洛歷任封圻  
勤勞素著前因患病乞休准其回籍調理茲聞溘逝殊堪軫惜著  
加恩晉贈太子太保銜照總督例賜卹任內一切處分悉予開復  
應得卹典該衙門查例具奏前任太常寺博士程枚功俟服闋後  
著吏部帶領引見尋 賜祭葬如例 予諡簡敬子枚功太常寺  
博士榮功校功梯功俱舉人

右 國史館本傳

程祖洛歙縣人道光庚寅任湖南布政使興學課士清釐獄城兩  
書院膏火食米積弊逾年任湖南巡撫力除漕弊諸所興革風行

雷厲吏役無敢作奸月餘去任

右傳李元度撰



西和知正員美杜末赤  
■先定ウサハニ

三

國朝書獻類徵初編卷百九十八補錄

疆臣五十

盧坤

道光十五年秋九月兵部尙書兩廣總督一等輕車都尉涿州盧公卒於位既聞 皇帝震悼 贈太子太師易名敏肅卹如禮明年夏公子戶部員外郎端黼以公喪至自廣州某月日葬於州之賜阡如禮體仁閣大學士阮元作而歎曰若盧公可謂勞臣也已公通籍 唐皇帝朝 今皇帝御極一紀有餘寰海內外若西若東若南若北小大之事苟異日宜書者公罔不在公所在事西東北南 上罔不委任 上委之矣公罔不得取力得於上又得於

衆功罔不成功成矣厥後罔不善 上以責任公以實應微獨

上信公若京朝官若外吏若僚佐若遊士賓客若伍若民莫不曰  
今皇帝御極一紀有餘小大之事未有歷試歷效始卒俯恩禮如  
盧大人者也卒之日訃至之日遠近失色嗚呼可謂勞臣也已曾  
祖振奇祖某考士夔妣氏某本生考某妣氏某公諱坤字靜之卒  
年六十有四配氏某先公卒阮元乃銘公之神道銘曰

涿郡之盧熠自東漢時惟范陽代有偉者允文允武大熾於唐汴  
宋以降盧少替夷俟公而光五歲瀕棄神嫗活之憑讖告祥卒如  
神言轍滿天下名德浩滂起家文辭觀政於曹翠翎英英出治南  
服又歷試旃以知宣房 龍飛自天浹旬三遷電發雲驤初撫關

中師彼周雅乃積乃倉乃興水田以實雍州西陲用兵西陲用兵  
將相雲會公職轉饒轉饒如何十萬西師勲命一方犁牛三萬役  
夫又萬執祿庚庚祿定檄飛自送大軍夜出燉煌 帝甄西功公  
不博賊公乃綱綱既甄既葳休公于晉羽毛回翔西事再訂公請  
復西 帝還其疆 帝命作督于江漢澣江漢湯湯沱潛爲田龍  
魚失居乃怒而張奪此波黎于彼龍魚以奠荆襄有現有猺負峒  
阻礪不服而讓公曰火攻扈扈虎虎緋旂赤常 帝曰起之炎靈  
速之既犁既康使者汗矣 帝問南矣公偃在牀逸遷而南移節  
遷旂嶺海洋洋獠獠所蔓小冲大排弭首如牂乃問鹽鐵鹽官告  
羸鐵官告良嶺雲白矣海氛墨矣嶺櫟夜狂吁嗟嶺海大寶大痔



海人來商不日驅之揖而嫗之追咎有明瑰麗淫葩巧工所都誘  
我龍筐遂瘠東南喪金萬萬食妖大行經海之南有越南國翳古  
越裳維海之西有英吉利隆鼻高眶環伺嶼門以窺禹服什伍其  
檣鼉鳴地中長鯨和之孽波浪浪澎湃百年自互市始大原我詳  
公姑仍之又姑持之亦持亦創仍之如何以嶼居夷勿汝磔攘持  
之如何自誅食妖以肅津梁創之如何樓船礮臺虎門中央窺公  
之心信公之意公實茹藏罷關絕市粵乃大治異日其颺天不俟  
公不蘇東南公也暴亡凡公所莅 聖清所覆禹蹟芒芒我書公  
勞什不六七塞滿九閭後有式者天祿辟邪鬻蠶飛揚

右神道碑銘龔自珍代阮元撰

國朝耆獻類徵初編卷百九十九目錄

疆臣五十一

朱桂楨

吳榮光

繼昌

鄧廷楨

陳中孚

楊惲曾

國朝通志卷之九十五

一

國朝耆獻類徵初編卷百九十九

通奉大夫前署江西巡撫江西布政使司布政使湘陰李桓輯

職臣五十一

朱桂楨

公諱桂楨字幹臣號樸庵江蘇上元人也忠介剛實毅然以古人  
自勵於外物無所動虛己愛物聞人一善或用心民事者雖所嫌  
怨輒翻然帥事之爲童子時金陵遇饑歲公啟其祖安齋公請毀  
產贖鄉里安齋公喜亦以古人期之乾隆戊申舉順天鄉試卽度  
舉業究古名臣言行及宋明人治心諸書曰吾他日用而求之不  
莽莽乎己未成進士由吏部稽勳司主事累轉至文選司郎中遷



監察御史出爲貴州鎮遠府知府所至之處獨立無所踟躕同儕見之格格若不可親然無不心折者旣治郡專志民務儕身上下悉不從常吏宿習郡屢饑民將流孳思惟盡出庫藏爲可濟時公父芝岡公迎養在署公叩頭父前求自今無更念己色甚戚父愕然詰其所謂竟許之乃集士民託他日代奉甘旨事士民愕然不解所謂姑應之公乃行其願欲攜印謁大府就臬司獄士民惘然曰吾輩噉太守膺求活乎誓共理賑約無得受府庫物郡境千里無一人僞仆者黃平州盜發告變公曰數人鼓衆非真亂動兵則衆駭事起單騎入卽呼其衆縛首者出不戮一人興義苗關告變大府已勒兵公曰苗爲民欺忿耳願以身保萬衆使開諭之果服

其銳身爲民謀者類如此山箐俗惑怪魅公擇一二事釋衆懼今其地所傳誅木妖焚其血致甘雨事是也民以是明本務居業少鬪訟大府甚重之故所至能無屈其氣 天子尤深鑒之庚辰擢陝西潼商道壬午擢浙江按察使又遷甘肅布政使旋調山東明年巡撫山西丁芝園公艱服闋赴京署禮部右侍郎丁亥授倉場侍郎己丑總督漕運每歷一官必有數事卓卓皆古名臣所深籌而必爲者士人慕效多誌之漕運爲 國家倉儲首務歷二百載吏丁積弊尤遂公曲計諸習所由始自收徵兌運夫役河壩閘壩倉胥諸竇皆潛正之而人轉悅蓋層遞交接無所侮故廉入而用裕至今愉頌際數千里時公已有疾或喘息不食數日形骨立扶

掖奔走人憂致劇而竟無恙人問所藥曰我不知疾惟見官事當  
了人問官事何能必了曰我先治我亦不知爲治官事也庚寅巡  
撫廣東旋兼署總督地接外洋俗玩禁令乃申法制釐海舶抑外  
班攘斥夷館凡治一弊不動聲色率官弁曰往某處莫知其事至  
則談笑去其奸故公在粵而西洋諸國皆畏法民習喜關屢興重  
獄飭吏事白兔濫始有馮某者逆搖趙金隴殲其家族而囚其父  
子未殺亂定在囚俘中公一見曰此冤民也得實釋之凡治獄類  
如此癸巳夏病屢告得 俞旨諭疾可速來百姓送者空一城每  
任一官所餘俸去時必畱備荒款故瞻身之事有妻人所不堪者  
居家六年自號覺修日與鄉里學者考論行誥孝弟嫻睦補助皆

身先之而平日在官或民事不得終治者如浙江海田廣東械鬪之類時耿耿常懸諸口 天子垂詢冀其疾愈士民望復起如占歲已亥十一月病革某日卒年七十有三 天子褒惜照總督例贈卹 賜祭葬 予諡莊恪 賞六歲子鎮舉人及歲會試皆異數也天下思之公祖諱某某官父諱某某官兄弟三人公長次某某官取某夫人生子某先公歿以公姪壬之子嗣次子鎮方六歲 恩賜舉人以某年月日葬公於某山之陽銘曰 公志恢恢以道自矜用之弗違謀 國則肥使養民不飢公生有涯百姓所悲而後世以思義岡晨陽奠斯宅斯子子孫孫惟前哲是儀



國朝書目考卷一百一十一

右墓誌銘潘諮撰

三

吳榮光

吳榮光廣東南海人嘉慶四年進士改庶吉士六年散館授編修八年三月大考二等記名升用九年充順天鄉試同考官是年京察一等十年三月授江南道監察御史十一年二月轉河南道監察御史十二年充浙江鄉試副考官十三年九月巡視天津漕務十四年五月奏言例載沿途重載糧船顆粒不許上岸條禁甚嚴但恐日久視爲具文見當嚴剔倉漕積弊之際儻有盜賣則米石必致虧短交卸時攬灰使水等弊由此而起請旨飭交山東通州巡漕御史一律稽查以清積弊再臣風聞南糧抵通每幫有驗費有窩子錢起卸之時除照例筒兒錢外復有後手錢每幫每項

約制錢一百串或數十串不等皆幫丁湊斂坐糧廳號房及書役經紀得受該經紀等既得陋規遂與旗丁通同舞弊與其事後勒令賠補何如先事預防請 敕下倉場侍郎設法嚴密稽查 上如所議行八月通州中西二倉廩短白米倉書高添鳳等使水漲米私出斛面黑檔事覺榮光坐失察黑檔至二千石以上革職十五年捐復員外郎十七年選授刑部江西司員外郎二十一年三月京察一等記名以道府用四月升安徽司郎中九月充軍機章京二十三年授陝西陝安道二十五年調福建鹽法道道光元年擢福建按察使二年調浙江按察使三年九月復授湖北按察使十月擢貴州布政使四年護理貴州巡撫五年九月奏請給假省

親得 旨准其開缺賞假四箇月回籍省親六年八月授福建布政使八年丁父憂十年服闋十一年二月授湖南布政使八月擢湖南巡撫十二年正月江華逆獠趙金隴聚眾劫掠據長塘夾衝榮光率兵馳赴永州督辦 上命俟總督盧坤至軍卽回省彈壓策應趙金隴故粵之過山獠也始居江華長塘距錦田鄉四十五里與粵之八排獠爲媯姪賊初劫黃竹寨官兵次錦田賊不能進欲竄粵與八排獠合又不克遂至藍山之五水獠山裏脅民獠數千人欲入九疑山都司成喜以百人駐將軍坪眾寡不敌退屯大橋賊遂劫甯遠之黃河魯觀洞榮光先至永州以輕進疏防劾永州鎮總兵鮑友智永州府知府李銘紳等皆鑄職仍令隨營效力



撫諭各屬猺寨使皆安堵添調桂陽鎮軍等營兵二千名并咨鄰省一體堵截無使滋蔓二月提督海凌阿副將馬韜戰賊至池塘墟陷伏被害會總督盧坤遵 諭調提督羅思舉帶兵一千及守備仇懷瑛等以擡礮五十尊噴筒三百桿赴營尋盧坤至永州榮光回省奏設局派知府以下十一員辦理軍需並請於鄰省藩庫酌撥銀兩及揀發同知知縣以資差委得 旨逆猺烏合成羣一俟兵力齊集不難剋期竣事卽公局需員不過數人足資差遣似此濫派多員無非張大其詞爲該員將來議敘地步事竣後卽劾章入奏亦不能俯允所請餘飭部臣如所奏行榮光復會同總督盧坤奏言從前勦辦苗匪用餉過多請將可以節省者槩行刪除

其必不可刪者五事一馬步守兵借給減半行裝銀兩一官兵鄉  
勇支給鹽菜口糧一江華等處糧臺雇用站夫酌給安家路費銀  
兩一隨營長夫有宅溝填濠樵汲諸役酌予工價口糧一江華等  
處被擾難民給予撫卹皆因時制宜應請量爲變通疏入得旨  
允准四月提督羅思舉殲賊於羊泉鎮湖南猺平八月盧坤調兩  
廣總督榮光兼署湖廣總督九月盧坤與榮光會奏查江華縣界  
連兩粵爲楚南極邊縣屬錦田鄉距城百八十里外近粵東八排  
內偏九衝山崗東距藍山大橋五十餘里西距本縣錦岡一百餘  
里猺山錯雜箐密林深爲衡永兩郡屏蔽大橋爲廣東連州門戶  
均關緊要錦田大橋向僅設巡檢千總外委各一員不足以資彈

壓請將該府同知遊擊移駐錦田增設防兵四百名以提標右營  
守備移駐作爲錦田遊擊中軍再於提標額設把總內酌撥一員  
駐大橋協同外委巡防大橋向隸臨武營應改隸永左營湖南地  
方類多山谿之險各營無須多馬計通省標營共馬兵二千二百  
餘名酌裁馬四百匹以所除餉乾撥給增兵月餉不惟一隅藉資  
捍衛卽全省南面亦昭慎重所有善後事宜由臣榮光分別題奏  
下部議行是月榮光遵 旨酌議裁汰冗員請將岳州府同知常  
德府通判郴州州判道州州判沅江桂東通道石門慈利嘉禾各  
縣訓導共六缺邵陽東安永明邵陽黔陽桂陽通道各縣所屬巡  
檢共七缺一併裁撤 從之十一月奏移永州府同知駐江華之



銅田改爲江藍理猺督捕同知改永州府通判爲永桂理猺通判  
駐楊家鋪加銜永郴桂道兵備銜節制都司以下又撫恤被難民  
猺二千五百餘戶修已燬民房六千六百餘間收繳槍械三千餘  
件次第奏 聞十月榮光奏言寶慶府屬桃花坪爲武岡城步新  
甯三州縣水陸必經之地山重水複最易藏奸見訪有痞首等六  
十八名爲害商旅委員查辦請將寶慶府通判移駐就近撫馭稽  
查得 旨允行十三年四月奏續訪寶慶府屬沿途水路有舉人  
毛蔚武舉劉岳爲首私設水卡阻米索錢適御史亦有以寶慶土  
匪私卡通同縣差門丁爲言者榮光先後拏獲各犯悉治如律復  
查辦不法長隨胡滿等及各屬包串生事丁書差役一百餘人並



奏陳懲創先由近始已將本衙門承差等查明嚴辦得旨嘉勉  
十六年二月以湖南學政龔維琳被劾榮光先未據實陳奏命  
降爲四品卿來京候補未行值武岡州逆匪藍正樽滋事榮光亟  
率軍駐寶慶又鎮筸兵譚榮光並奏聞得旨留於湖南會同  
總督訥爾經額勦辦藍正樽黨旋潰散生擒其主謀張和尚陳仲  
潮等及其家屬首逆尙未就獲以撤兵仍命來京十七年三月  
授福建布政使二十年四月召入以年力就衰原品休致二  
十三年閏七月卒於家

右 國史館本傳

嘉慶二年丁巳公二十五歲入學戊午鄉試中式舉人已未成進

士選庶吉士辛酉散館改主事奉 旨仍授職編修乙丑補御史  
丁卯充浙江鄉試副考官己巳巡漕失察落職是年以御史對品  
捐復員外郎辛未選刑部員外郎甲戌隨同成公格往山西審案  
丙子升郎中補軍機章京戊寅補授陝安道道光元年辛巳擢福  
建按察使癸未擢貴州布政使戊子丁外艱辛卯正月入都 召  
見九月補授湖南巡撫壬辰署湖廣總督丙申以年終密考學政  
自占地步降四品京堂丁酉補授福建布政使庚子二月奉 旨  
以年力就衰原品休致十月抵家壬寅往桂林就醫癸卯八月初  
四日卒於桂林寓所年七十一子二人尙忠江蘇通判尙志工部  
主事

國朝文獻通考卷一百一十一

右松心文鈔張維屏撰

繼昌

繼昌拜都氏滿洲正白旗人嘉慶五年舉人捐納主事籤分戶部  
八年補官九年升員外郎十一年京察一等授翰林院侍講尋轉  
侍讀十三年上巡幸淀津回 鑾後廷臣呈進詩冊 上親閱  
擇工雅者加以 獎賚繼昌與焉十四年授浙江督糧道旋署金  
衢嚴道兼署布政使十六年調江南江安督糧道十八年七月擢  
陝西按察使十一月岐山縣三才峽木廂工人因饑煽亂擾掠寶  
雞諸縣進兵勦辦十九年正月總督長齡奏令赴漢中軍營總理糧  
餉二月長齡奏臬司繼昌自派赴漢中後大兵往來悉在漢中所  
屬督辦糧儲軍械毫無遺誤且親赴寨峒安撫居民捐募壯丁搜



捕賊匪執賊首吳喜余九餘匪拏獲無算尋凱撤復派辦理善後事宜均臻妥協經長齡保奏 賞戴花翎仍下部議敘二十一年二月以秋審失出部議降調 上從寬改爲畱任三月升雲南布政使十二月調江南布政使二十三年五月丁父憂回旗旋授大理寺卿十月署廣西布政使二十四年護理廣西巡撫二十五年服闋補廣西布政使道光元年丁母憂回旗 命以三品京堂用三年授馬蘭鎮總兵兼管內務府大臣五年授湖南布政使調江蘇布政使旋調浙江布政使六年二月 召來京五月授江西布政使八年九月以 寶華峪地宮侵水逮問在事諸臣均下部議處尋議上 上以繼目前在馬蘭鎮總兵任內有兼辦工程之責

乃不能商同安辦照議降三級調用九年卒弟鍾昌刑部右侍郎  
子宗康候選筆帖式

右 國史館本傳

--	--	--	--	--	--	--	--	--	--

157-210

T

鄧廷楨

鄧廷楨江蘇江甯人嘉慶六年進士改庶吉士七年散館授編修十年充會試同考官十三年三月充會試同考官八月充順天鄉試同考官是年春上巡幸淀津及十四年五旬萬壽廷楨進呈詩冊俱蒙賞賚十五年二月京察一等五月授福建臺灣遺缺知府經浙江巡撫蔣攸銛奏請畱浙補用十一月補甯波府十七年丁母憂十九年六月服闋八月授陝西西安遺缺知府二十一年正月補延安府六月調榆林府二十二年調西安府二十五年超遷湖北按察使道光元年升江西布政使二年以前在西安知府任內承審渭陽民柳全璧案謬誤經欽差刑部尙書那彥成覆



審奏入奉 旨革職三年六月 賞給七品職銜交直隸總督蔣  
攸銛差委十二月授通永道四年擢陝西按察使五年五月遷布  
政使七月護理巡撫以綏德等處雹災奏請優卹 允之十二月  
奏嘉慶年間三省賊匪滋事蓋屋一縣殉難者四千七百餘人請  
建祠旌獎下部議行六年授安徽巡撫廷楨奏明祖籍壽州 諭  
以遷居江甯業經五代毋庸迴避七年四月奏鳳潁泗等府州民  
情熾悍動輒械鬪經前撫臣陶澍奏明收繳兵器曾於公費內撥  
銀二千分給各屬爲呈繳器械價值今查私藏者尙多地保分屬  
各鄉無不深悉應責成給限搜淨如限外不繳及有私造者嚴行  
究辦地保分別治罪閏五月奏安省界連吳楚長江六百餘里往

來商旅必須嚴密巡防前以上下江面分爲六段每段委佐雜千把各二人按地分巡并專委縣丞一員會同該管遊擊副將每月督巡一二次每年提銀六千兩以爲經費嗣又加委丞倅一員各分三段責成督巡并添備坐船給予盤費臣查江面巡防原宜周密惟向來所委文職俱係兩岸各有分轄之員派委巡查轉致曠廢本任請無庸另派亦不必給發盤費仍飭該員等與沿江本汛武職按段巡緝其武職應照舊派委但向係三月更換請每月調委以專責成至鳳陽靈璧二縣途衝地瘠缺苦差繁幫貼不敷卽將酌裁巡江之費餘銀五千兩再給鳳陽三千靈璧二千藉資辦公又奏無爲州黃琦灘江埂衝潰添築月隄一道所有乞廢田畝

請豁免銀米俱得 旨允行九年六月以修安徽省志告成交部  
議敘十月添建壽州考棚並於安豐塘古芍坡設立水門二十八  
座十年疏濬鳳陽縣沫河口增築隄閘十一年五月以安徽過境  
糧船最多湖廣江西三省夾帶蘆淮私鹽皆有棍徒陸續收囤奏  
請認真查拏 諭以按律懲辦十二年二月拏獲江蘇武進要犯  
莊午可得 旨嘉獎下部議敘八月因前奉 諭旨酌裁冗員請  
將徽州府通判蕪湖縣縣丞二缺裁撤十二月奏穎州府距省八  
百餘里向無驛站發遞公文動形遲緩請添設驛站籌備夫馬均  
下部議行舊例穎州府屬兇徒結夥三人以上持兇器傷人者不  
分首從發極邊煙瘴充軍兪妻發配是年廷楨奏言該府民俗強

但非此不足示懲至僉妻發配例內似無深意此等婦人本係無  
罪之人一經隨夫僉發長途摧挫難堪兵役玷污可慮或本犯病  
故則異鄉殘婦飄泊無依或本婦身亡則失恃孤嬰死生莫保況  
該屬婦女頗頹名節聞夫犯罪例應僉配或自殘以求免或自盡  
以全身在本犯肆爲兇暴法網固所難寬而本婦無故牽連苦衷  
亦所宜恤奏入下刑部議准停止僉妻發配之例十三年十月掣  
獲江蘇桃南廳掘隄要犯陳端得 旨嘉獎十五年正月奏裁符  
離稅口如所請行八月擢兩廣總督十六年正月英吉利夷人製  
造煙船能行逆風欲進口傳遞書信廷楨令洋商轉飭禁止 諭  
曰外夷傳遞書信向有章程何可以詭異不經之船擅入海口英



夷素性詭詐雖見據查明煙船並無滋事情形惟既飭諭不准進口乃仍欲駛入內洋竇屬藐玩著鄧廷楨嚴行禁阻驅逐回國如不遵法度竟肆桀驁立即懾之以威俾知警懼時粵省在籍刑部郎中盧應翔唆訟一案經欽差大臣賽尚阿查辦復爲言官所劾上命廷楨密查奏請添派大員會審 特命恩銘趙盛奎往訊嗣因承審失實得 旨恩銘趙盛奎鄧廷楨於盧應翔干預訟事未能審出實情請開復原官以致該革員瀆控不休實屬錯誤部議降三級畱任尙覺過輕著改爲革職畱任六年無過方准開復三月奏普甯縣屬大壩與橫山等鄉械鬪斃命又塗洋鄉匪徒恃眾抗拒傷斃兵勇飭委弁兵往緝獲犯三百餘名又奏整頓潮屬

械關事宜各條奉 旨所見是所議妥實力行之久而毋懈四月  
奏防守礮臺增兵操演請籌備經費 允之初御史沈鏞奏請將  
外省行用洋錢量爲裁制九月廷楨等奏洋錢流布東南驟難禁  
止其弊在於以枚計值不論分兩之重輕不較成色之高低應請  
敕下沿海行使洋錢各省必以成色分兩爲憑不得計枚定價  
止准洋錢補紋銀之水不准紋銀轉補洋錢之水則予以限制成  
色分兩均有權衡而事旣通行居奇無自其價可冀胥平奏入  
諭認真查察以平市價而杜弊端是月御史黃仲容奏廣東潮州  
一帶海船到日攜有外國景興光中二種錢文質薄小始則攬雜  
制錢並用今則專用夷錢並有將制錢銷燬私鑄者 上命廷楨

嚴查計值收買十一月以虎門新鑄大礮試演炸裂奏請另鑄以  
重軍需 諭曰礮位原爲武備要需從容試演已至炸裂安望禦  
侮耶經此次賠造後儻再試演無准惟鄧廷楨關天培是問懷之  
十二月擊獲蟹艇出洋紋銀二萬兩於大嶼山口又獲二萬八千  
餘兩於急水洋奉 旨將所獲之銀全數充賞因奏言鴉片流傳  
內地以致紋銀日耗今欲杜絕紋銀出洋宜於從出之地必出之  
途實力稽查俾漢奸夷人兩無所施其伎倆自可漸塞漏卮 諭  
曰該督能見及此著卽同心協力認真巡察以懲漢奸之句串杜  
夷商之貪婪總期行之有效無得徒託空言十七年覆奏廣東積  
弊十條一兇盜充斥一營務廢弛一諱盜作竊一紋銀出洋不下



千萬一衙役小縣數百大縣千餘一差役濫押無辜一海濱沙灘  
開墾有礙水道一奸徒放火一盜發墳墓一習尚侈靡有業經懲  
辦者有見在查拏者 上以所議尚屬周妥惟紋銀出洋見在查  
拏認真暫爲斂迹須乘此稍有頭緒之時加意整頓十八年七月  
奏拏獲興販鴉片窰口四座 上命實力查辦以清其源不准一  
日疎懈尋以查閱水陸各營官兵奏入 諭曰海疆重地各國夷  
船絡繹不絕武備必當精益求精將弁兵丁內有吸食鴉片者尤  
當隨時懲治萬勿姑息勉之時有英夷巡船駛至銅鼓洋夷目馬  
他倫帶有番梢五百餘名并攜夷婦赴澳門夷館與該夷領事義  
律居住欲求呈遞書件廷楨以來書不遵舊式卽向擲還并飭員



弁諭斥回國奏入 諭曰夷船駛泊外洋仍當不時偵察時屆北風卽飭令迅回本國不可任其北駛或竟藉端停畱自當加以兵威嚴行驅逐并停止該國買賣用昭懲創著鄧廷楨相機籌辦總宜外示靜鎮內謹修防以戢夷匪而靖閭閻先是御史周頊奏請酌定茶葉大黃價值祇准外夷以紋銀交易八月廷楨以交易必須紋銀彼轉得藉詞於置貨之外餘銀攜帶出洋是從前猶爲巧取此後竟屬公行奏寢其議十一月請將韶州府屬三羣橋增設外委移駐清水江作爲汛防三羣橋仍畱下座樂昌縣屬神頭嶺乳源縣屬古松亭各添卡一座以重巡防部議如所請 上以鴉片傳染日深 特命湖廣總督林則徐爲欽差大臣赴粵查辦

諭曰鄧廷楨統轄兩省地方事務殷繁若專責以查辦鴉片恐顧此失彼見派林則徐專辦此事鄧廷楨自當益矢勤奮應分辦者各盡己責應商辦者會銜奏聞趁此可乘之機力救前此之失十九年正月廷楨奏請於虎門海口拊造木排鐵鍊添置礮臺礮位並籌議經費二月奏粵洋向分中東西三路中路自老萬山以內如伶仃等洋皆各夷來粵貿易之所若西路之高廉雷瓊東路之潮州南澳皆夷船例不應到之區今因中路堵截南澳長山尾洋先後有夷船八隻駛來拋泊經巡洋鎮將調集師船圍逼始行遁去 諭曰夷情叵測所載煙泥何肯甘心拋棄必逞其鬼蜮伎倆著各海口嚴密查辦三月偕林則徐查辦躉船二十二隻起獲煙

土二萬二百八十三箱請酌給茶葉大黃以示體卹 上嘉之嗣  
夷船在粵遷延不肯出具甘結又有毆斃民人命案抗不交兇遂  
議禁絕柴米食物無許接濟提督關天培率領師船於沙嘴洋防  
堵七月英逆義律率夷船五隻以索食爲名突向我師開礮參將  
賴恩爵督率將弁拒戰於九龍山擊碎夷人雙桅大船俄夷船蜂  
集礮彈如雨我兵以網紗等物障船仍從空處施放大礮轟斃夷  
人多名是日接仗五時之久夷人受傷甚眾旋卽遁去 諭曰旣  
有此番舉動若再示以柔弱則大不可朕不慮卿之孟浪但誠卿  
等不可畏蕙先威後德控制之良法也相機悉心籌度勉之慎之  
八月守備黃琮在潭仔洋面用火斗火罐擊碎夷船一隻義律因



求西洋夷人代遞說帖稟請具結聽候逐船搜查九月洋夷兵船復乘間滋擾我兵水陸疊擊驅出外洋查看該夷甘結與新例不符得旨夷情叵測不必取具甘結著卽停止貿易所有夷船盡行驅逐出口時廣東省城傳播歌謠廷楨奏言臣自查緝鴉片三載於茲豪猾之徒本厚利豐一經訪拏已獲者刑僇及身未獲者遁逃亡命身家既失怨讟遂興始而風影譎傳旣而歌詞遠播以查拏爲希旨以掩捕爲貪功以偵緝爲詭謀以推鞠爲酷罰甚至經以納賄目爲營私譏建議爲急於理財嘗新例爲輕於改律種種狂悖無非爲煙匪洩忿諭曰林則徐鄧廷楨皆朕親信大臣畀以重任見在查辦喫緊之際斷不可因羣言淆惑稍形懈弛務



國朝通志卷之二  
名臣列傳  
二  
當協力同心勉益加勉并嚴拏編造歌謠之人從重治罪十二月  
調兩江總督旋調雲貴總督復調閩浙總督卽購夷礮十四門由  
海道運赴閩省二十年三月夷船四隻寄泊梅林洋經署水師提  
督程恩高陸路提督余步雲分投夾攻毀其篷索擊斃匪目夷船  
始遁廷楨以閩省所建礮臺大不過十餘丈所安礮四五位重不  
過千斤難資捍禦且閩洋無內港可守礮臺必須建於海灘沙性  
浮鬆根基不固爰易礮臺爲礮墩用麻布袋實以沙土層層堆積  
沙墩外側豎舊小漁船牢固拴縛以爲保護先是御史杜彥士條  
奏閩省諸弊 上命侍郎祁寯藻黃爵滋查辦來閩偕廷楨覆奏  
據稱漳泉重地請以巡撫暫駐查巡撫事務殷繁宜責成總督前

往督辦光中夷錢充斥自宜設局繳銷戰船敝壞居多自宜責令  
賠造奸民私行勾結者自宜設法勦除洋盜未經拏獲者自宜勒  
限嚴緝至文武需索陋規夷人擄掠民婦有業已懲辦者有並無  
其事者又議整頓漳泉械鬪六條一選擇賢吏力圖撫輯一查拏  
匪犯無得輕易會營一選舉鄉族各長以專責成一嚴拏鬪匪以  
絕根株一收繳火器以息兇燄一整飭倫紀以重教化先後俱奉  
俞旨又奏海防專汛責在陸路洋面機宜責在水師其關津丁  
役人等應由福州將軍專管並令臬司於定案時查明案犯經過  
地方關津有無賄縱切實根究以清弊源至民船出口商船則令  
州縣於給照時親詣察看漁船則令指定埠頭編立字號按日稽

查其漢奸巢穴見已訪聞晉江惠安等縣確有主名當設法嚴拏期於必獲 諭曰漢奸一日不除則夷船一日不絕總宜猛以濟寬禁絕根株爲要六月夷匪連踪入浙浙之舟山孤懸海外兵力本單逆夷遂陷定海 命率領舟師星馳赴浙會剿廷楨卽帶兵前往行次清風嶺復奉 上諭閩省海口歧出處處均關緊要無庸赴浙七月駐兵泉州招募練勇九月 上以鴉片未盡根株夷人在各海口滋事 諭曰前因鴉片流毒海內特派林則徐馳往廣東會同鄧廷楨查辦原期肅清內地斷絕來源乃自查辦以來內而奸民犯法不能淨盡外而與販來源並未斷絕甚至本年英夷船隻沿海游奕各省紛紛徵調糜餉勞師此皆林則徐鄧廷楨



辦理不善之所致鄧廷楨著交部嚴加議處此次英夷各處投遞稟帖訴稱冤抑朕洞悉各情斷不爲其所動惟該督等以特派會辦大員辦理總無實濟轉致別滋事端誤國病民莫此爲甚是以特加懲處非因該夷稟訴遽予嚴議也部議革任奉旨革職迅速前赴廣東以備查問差委二十一年諭曰國家設立兵丁勤加訓練所以嚴武備而戒不虞總督有統轄之責必應於平時認真督率將備加意練習使之有勇知方一旦猝遇外侮何患不敵敵摧堅立功奏凱前任兩廣總督鄧廷楨履任多年懈惰因循不加整頓所設排鍊空費錢糧全無實用以致該省兵丁柔懦無能諸多畏葸虎門之役竟有爲夷匪買通者思之殊堪痛恨著從重



發往伊犁效力贖罪以爲廢弛營務者戒二十三年七月奉旨  
釋回十二月 賞三品頂帶授甘肅布政使二十四年二月戶部  
以甘肅荒地未經墾復者七千五百餘頃奏請覈查旋據陝甘總  
督富呢揚阿覆奏請專辦招墾立限升科六月 上特派廷楨查  
辦廷楨先由銀州一帶勘明招墾查出卽行升科與分限升科地  
畝各半復東盡洮隴西極酒泉共查荒熟地一萬九千四百餘頃  
又番貢地以段折畝一千五百餘頃甯夏馬廠歸公地一百餘頃  
次第奏報十二月事竣 諭曰前因甘肅荒地較多特降旨令鄧  
廷楨親歷周勘設法招墾茲據奏稱各屬履勘完竣分別差等酌  
量升科該藩司奉派專辦所到之處勸諭詳明妥速蕙事甚屬可

嘉著加恩賞換二品頂帶并交部議敘尋 賞加二級准其隨帶  
二十五年二月擢陝西巡撫四月署陝甘總督八月回陝西巡撫  
任二十六年卒子爾恆官雲南府知府爾頤官山西吉州知州

右 國史館本傳

公諱廷楨字嶰筠先世居洞庭山明徙壽春六世祖元旭官檢討  
始居江甯曾祖重祖鎮考巨源皆諸生及曾祖妣陳氏徐氏祖妣  
彭氏妣陳氏皆得一品 封贈公嘉慶六年進士官編修乙丑會  
試戊辰會試鄉試同考官十五年出爲甯波府知府母憂服闋補  
延安府歷守榆林西安府南鄭韓城有死囚皆受誣公反其獄及  
全同州養母子事陝民歌頌由是譽流京師道光元年超擢湖北

按察使權布政使請免田入江而稅銀在民者十餘萬兩遷江西  
布政使權江西巡撫以守西安失察屬吏事罷歸里旋 命以七  
品銜赴保定起爲直隸通永道陝西布政使權陝西巡撫六年遂  
授安徽巡撫自嘉慶時安徽多大獄信臣覆按官吏多得罪而獄  
歷久愈疑其鳳嶺俗尤悍驕常以兵定變而公至比大水親乘舟  
振災又精察吏才鄙強怯付民地所宜悍民畏威精民亦息意不  
敢幻訟在安徽十年俗以大安所舉任後多至大吏十五年授兩  
廣總督時方議鴉片煙禁公奏議以爲法行於豪貴則小民易從  
令嚴於中士則夷貨自絀未幾而林公則徐以欽差大臣至廣東  
英夷遂輸煙入官甚悔罪已而中變以兵船回泊尖沙嘴進至穿



與公飭將士迎擊大接戰夷皆傷退訖公任不得入虎門林公既改兩廣總督而兩廣外夷易犯者莫如閩故改公兩江及雲貴總督皆未行而遂卒投公閩浙二十年四月夷船泊穿山洋及梅嶺廈門擊之皆走援定海至清風嶺得旨卻回蓋夷方銳欲入閩而閩之海防地道多兵力散公往來泉州廈門暑行星征籌應捷出晝吏夜牘且詢且披無一夕得安寢而以前兩廣兵吏捕煙黨不力效力廣東戍伊犁二十三年 召回復起爲甘肅布政使二十五年再授爲陝西巡撫而番賊於是時擾蒙古游牧公先權陝甘總督卽邀擊於硫磺溝得前所失馬牛羊以萬計八月至陝時公已勞績久時時欲乞休以前後受 恩重未敢也二十六年三



月二十日薨於位年七十二其年十月初三日歸葬上元縣靈山下配張夫人繼配何夫人側室吳恭人祔子爾恆編修官長州府知府爾頤雲南趙州知州爾咸國學生爾晉府學生爾異尚幼二女十二孫而爾頤爲弟廷梁後公機神高朗外容異量而制行內嚴遇事不求奇功而深慮宿禍自侍從歷封疆四十年雖屢起屢躓上亦諒其素而終任之亦自無得失意見於顏狀有及見公年少者皆曰如諸生時過學人文士薦寵講論不倦於詩及古音韻學所得尤深至世俗好尚亦不綴意嘗閱兵過當塗或問令曰廚傳費幾何曰二十千聞者以爲難銘曰

公以文達乃握政經活囚西安民歡吏驚越等之晉惟 天子聖

放稅蘇枯江漢思詠及撫安徽爲民擇吏鉏荒息瘞十載無事開  
府七州神旗雕戈超然一翁常度委蛇夷事之殷馳驅孔亟南海  
天山萬里一息 帝念勞臣舊恩載新光榮始終被此後人子誌  
余墓公昔命我我詞無慚元宅攸妥

右墓誌銘梅曾亮撰

卷之三十三

三十三

陳中孚

陳中孚湖北武昌人嘉慶六年進士改翰林院庶吉士七年散館授編修十三年授山西道監察御史十四年五月奏稱戶工兩部各庫向派兵丁巡邏值宿以重庫藏其該班之筆帖式庫使等員在庫值宿立法本爲周密無如日久弊生屢經審辦偷竊案件總由該班各員品秩較卑易與兵丁串通滋弊實非詳慎辦公之道請令該庫郎中員外司庫各員按日值宿所有在庫兵丁由該員等實力查察以杜包班頂替之弊 上允之七月奏言捐納人員各上司往往濫行薦舉如侵蝕賑銀之革員單福昌謀毒職官之革員王仲漢及已革知府王毅皆由捐納佐雜出身遞遞薦拔該



員等不識詩書罔知大義不過以股削民膏鑽營上官爲事請嗣  
後將濫行保薦之該管各上司照常例加倍嚴議 諭曰國家登  
進用人原不能盡拘資格各直省州縣中由捐納出身者固有不  
肖之徒卽正途出身各員其簠簋不飭逢迎大吏者亦不能保其  
必無全在該管各上司平日畱心訪察秉公覈實必係循聲確著  
之員方予保薦庶可遴拔真才若將資緣鑽刺之劣員濫邀薦舉  
一經發覺該上司處分定例綦嚴卽如王穀王仲漢單福昌等之  
殘忍貪婪見俱已審明定讞其該管各上司重者已革職遣戍輕  
者降黜示懲並未稍從寬假若因此追溯從前濫保之各上司查  
明加倍嚴議則未免過甚嗣後各督撫於薦舉各員惟當倍加慎

重以保薦王仲漢等劣員爲戒儆再有似此濫保致干憲典者必將該上司從重懲治亦不在多設科條也八月轉掌山東道十二月疏言科場防弊各條一試差進呈名單宜禁止洩漏一各省鄉試調派內簾宜加慎重一禁止闈員餽送士子以防傳遞之弊一隨帶家人書吏代爲士子夾帶宜嚴加搜檢一各省士子交通賸錄宜行申禁請飭令各督撫嚴禁並責成賸錄所官實力究懲諭曰每次考差外聞卽有如此傳聞及加以根究又不能確爲指實將憑何辦理嗣後閱卷大臣惟當守口如瓶各知愧勵倍加慎重以息物議有則痛改無則加勉以全朕用人之苦衷至於外省調派內簾應用科甲出身人員聞各省士子往往有豫先拜謁交

通關節之事該督撫等尤應慎選素行端方學問優長方行檄派  
毋得濫行調取致啟鑽營之端此外如鄉會試入闈各員於熟識  
士子致送薪水食物親至號口接談代改詩文查取題目及隨帶  
家人書吏代爲夾帶交通謄錄找尋試卷諸弊皆應嚴行查禁嗣  
後著派出之知貢舉監臨及各省督撫等實力稽查有犯必懲以  
期仰副甄拔賢才之至意十五年遷兵科掌印給事中十八年授  
山西河東道二十年丁父憂二十二年服闋補浙江甯紹台道道  
光元年四月調福建臺灣道六月擢四川按察使十月調廣東按  
察使二年閏三月遷布政使六月調河南布政使十二月擢廣東  
巡撫三年因秋審人犯原擬情實經刑部改緩部議降一級調用

上加恩改爲降二級畱任五年八月授漕運總督十一月奏言各省漕糧令旗丁由水次長運抵通溯自會通河成以後迄今數百年來凡河治之時漕無不治上年堰旰掣隄洪湖潴蓄殆盡清口淤塞本年漕糧見雖悉數抵通實已大費周章所有來歲新漕除試行海運一百五十萬石外尙有二百四十餘萬石仍由河運前經兩江督臣琦善會同江南河臣嚴烺暨前署漕臣穆彰阿酌定提用本年首二進空船接運盤壩章程奏蒙 允准臣思海運僅可暫試盤壩亦屬權宜誠不若專循舊制設法蓄清敵黃俾禦黃壩早開庶幾道通而漕可無阻抑臣更有請者漕宜速而先在恤丁力本年運河淺滯旗丁之例貨折本矣盤壩拋散旗丁之耗



米無餘矣重空住守多日見又不能歸次旗丁食用一切無不浩繁矣臣愚以爲方今時事之艱鉅莫有大於此者必應通籌大局未可稍存遷就一時之見蓋治河非專爲利運而利運則必須治河年來堅守禦黃壩專爲治河而設然但議隄防未求疏濬通計全河利害口門不能宣暢恐致他虞已屬可暫而不可久卽以漕務一端而論堅守禦黃壩在來年春夏之交則可儻秋開則漕務種種掣肘丁力日疲糜費滋甚實屬無從經理再查本年山東微湖啟放過多見僅存底水八尺餘寸該湖向來存水六尺卽難外注以二尺餘寸之水濟運二百四五十萬石之糧其艱鉅情形不問可知亦宜先期籌備設法瀦蓄 諭曰來歲新漕除海運外尙

有二百四十餘萬石提用首二進軍船接運此係一時權宜自不  
如仍循蓄清敵黃舊章俾禦壩早開全漕無阻至堅守禦黃壩原  
爲治河前旨降旨令琦善等會籌疏濬若但議隄防不求刷滌口  
門不能宣暢必致他虞著陳中孚商同琦善嚴煥趁此水落歸槽  
迅速相度機宜悉心妥議應如何設法疏濬俾河流通暢清水得  
以蓄足刷黃治河利漕漸復舊規該漕督等於艱阻之候力求救  
弊之方務須和衷商推計出萬全方爲不負委任六年七月調署  
山東巡撫十一月卒 諭曰署理山東巡撫漕運總督陳中孚嘉  
慶年間由翰林科道外用道員經朕擢授巡撫漕督並命署理山  
東巡撫辦事實心克勤厥職伊年力尙強方資倚畀茲因病溘逝

殊堪軫惜著照例賜卹所有任內一切處分悉予開復應得卹典該部察例具奏尋 賜祭葬

右 國史館本傳

楊懌曾

楊懌曾安徽六安州人嘉慶六年進士改庶吉士七年散館授編修九年二月上幸翰林院分韻賦詩懌曾與焉八月充順天鄉試同考官十三年三月充會試同考官十二月丁母憂十六年服闕改江西道監察御史九月命巡視南城奏言向例各省蠲免以奉旨日爲始其已輸在官者准作次年正賦乃不肖州縣於部文未到前催比更急爲肥己地且有奸猾書吏藉名墊納加倍索價等情見在直隸江南浙江河南已奉恩旨施行請敕各督撫申明曉諭俾小民知蠲免分數則官吏無從欺隱諭各督撫嚴查飭令各州縣遇恩旨頒到之日徧行曉諭十月奏言向來



揀發人員督撫不得指名奏請近日兩江總督百齡指名奏請道府揀發河工已蒙 恩准自因河工緊要是以俯允所請臣恐此風一開各省紛紛效尤於銓選分發各例多有窒礙而私競夤緣之習因此而起請嗣後督撫及河工差委乏員不得指名奏請上是之十七年正月轉掌湖廣道監察御史四月奏言京師爲首善之區商賈雲集列肆貿易宜肅清街道無許侵占軌轍以便往來 命步軍統領及督理街道衙門隨時查辦七月奏各館書帙告成奏請議敘恩獎本屬從優甄敘不容過濫前恭纂 高宗純皇帝實錄告成奉 旨飭部妥議一准公平近日會典館議敘較之 實錄館更屬從優爲從來各館所未有請下部悉心妥議以

昭畫一奉 諭曰所奏甚是近日諸大臣市恩者多任怨者少旌  
政治大有關礙著王大臣會同吏部駁改原奏詳定章程具奏十  
八年四月遷工科給事中九月河南滑縣教匪滋事官兵進剿懌  
曾奏言向來辦理兵差不能不藉民力見在各處官兵前赴軍營  
需用車馬皆由地方官辦理稍不慎重往往騷擾閭閻至兵丁過  
境均於店鋪買食約束不嚴最易滋擾請 敕地方官及帶兵大  
臣加倍慎重俾閭閻安堵民不知兵則人心安而弊端絕矣又奏  
賊匪騷擾毗連三省河南報捷於前山東報捷於後直隸又報捷  
於後揣其情勢是賊趨河南則河南進兵賊趨山東則山東進兵  
三省並無會剿之事臣思賊勢多延一日卽良民多一日之害飢

餓者受其驅使素封者遭其焚掠官兵多駐一日卽糧餉多一日之費見在已涉虛糜將來更易開浮冒如必俟欽差大臣齊集會勦則各省弁兵究屬何用請 敕下三省督撫及領兵大員迅速進兵四面圍勦際此天寒氣冷賊勢日蹙無難一鼓殲盡也至軍需一項最易冒開向來各省多借軍需開銷以爲彌補虧空之計請 敕下各大員先爲清查虧空務令各款項俱有指實以杜將來冒銷之弊均 從之又奏稱本年江南鄉試辦理不善遲至初九日巳刻始行封門並聞士子有擁擠受傷之人 命江蘇巡撫朱理明白回奏旋奏雖無擁擠受傷之人而封門遲延究屬辦理不善監臨提調等官一併下部議處十二月奏稱安徽穎毫等處

毗連河南陳汝一帶居民多聚眾燒香越省赴會此等劣習不惟  
愚民耗財且傳聞惑眾卽恐流於邪教請 敕兩省巡撫嚴行禁  
止 諭曰此等風氣不獨潁亳爲然亟應申禁著各督撫嚴行出  
示曉諭以端風俗而正人心十九年三月充會試同考官轉戶科  
掌印給事中八月奏言本年安徽省缺少雨澤糧價增昂聞廬州  
六安等處多米商囤積賤買貴賣請 敕巡撫委員查明該商所  
積糧石定價平糶 上從之二十年升內閣侍讀學士九月奏稱  
訪聞安徽潁州河南陳汝一帶有著名積匪劉鬼子蔡保等朋比  
爲奸擾害地方 命交兩江總督百齡等查辦俱得實二十一年  
升太常寺少卿二十二年正月孟春時享讀祝錯誤懌曾以不諳



清語得 旨免議六月升大理寺少卿二十四年二月會議四川  
李何氏拒姦殺死圖姦之周得信一案刑部照絞候擬覆懌曾籤  
商應據婦女悔過拒姦例比照減等酌改會奏 上甚是之懌曾  
以首先看出 賞加紀錄三次九月 命提督湖北學政道光元  
年五月奏當陽縣西北五里爲 關帝陵相距數丈卽係沮漳匯  
流處請 敕督撫委員查勘捍以石隄以資保護又請撥襄陽府  
舊存入官租銀准作襄鄖兩府書院膏火均如所請行十月升光  
祿寺卿二年差滿旋京四年升大理寺卿八年擢都察院左副都  
御史九年四月升禮部右侍郎九月充武會試副考官十年四月  
雲南騰越廳生員黃廷琮以父廩生黃金輅被廩生何自凱謀殺

具控 上命懌會偕侍郎鍾昌往鞠究出黃金輅失跌受傷自戕  
身死將黃廷琮照例坐罪御史宋邵穀奏貴州幕友劣蹟及稅務  
科場供給各情形交懌會等查辦又 命鞠貴州荔波縣書役陳  
履安等浮收舞弊拖斃六命河南鎮平縣民人王飛熊謀殺誣姦  
湖北保康縣民婦王程氏夫死圖詐未遂羅織多人各案分別訊  
實定擬如律十一月授湖北巡撫兼署兩湖總督十一年五月湖  
北省雨水過多江河並漲武昌漢陽黃州安陸德安荊州各府並  
荊門州屬各州縣多被淹浸客販稀少經 懌會會同總督盧坤奏  
請免納客稅並酌借司庫銀遴員率商分赴產米價平處購買米  
石酌減平糶其紳商富戶情願捐資以備賑恤俟事竣後再請獎

勵得 旨允行十二年正月奏稱荊州府濱江有萬城隄爲闔郡保障向歸水利同知專管近年江底淤墊一經水勢盛漲在在險要以致歲修土方逐年加增該同知不司民事呼應不靈辦理實屬掣肘請改歸知府辦理以專責成三月又奏稱湖北省上年被水較重之江夏等十六州縣前請於加賑後設廠煮粥至本年二月止第入春以來天氣凝寒麥發稍遲若將粥廠停止貧黎無以資生應請寬限至三月底爲止七月又奏稱湖北入夏以來江水復漲沿江州縣文稟淹最據天門縣稟稱被水較重見飭藩司馳往督同府縣妥爲撫卹此外公安石首等縣亦經委員勘報如需藩司督辦亦卽飭令馳往妥爲督辦奏入 上均從之十二月給

事中瞿溶以接據假名已參恩施縣知縣左章昞列款致書具奏  
上命工部尙書穆彰阿前往會同總督訥爾經額查辦尋奏嚴  
訊左章昞實無其事 諭曰此案以無根之詞誣訐巡撫大員及  
地方官至十餘員之多仍復隱匿姓名詭託他人致書其鬼蜮伎  
倆較之尋常匿名揭帖尤爲可惡著訥爾經額隨事隨時畱心察  
訪並密向被誣之員詳細推求再根查筆蹟一得端倪卽行密速  
緝拏從嚴奏辦無使此等奸詭險詐之徒倖逃法網十三年卒子  
用漪廣西鎮安府通判

右 國史館本傳





國朝耆獻類徵初編卷二百目錄

疆臣五十二

張井

栗毓美

吳廷琛

申啟賢

四庫全書  
目錄  
卷之二

國朝耆獻類徵初編卷二百

通奉大夫前署江西巡撫江西布政使司布政使湘陰李桓輯  
疆臣五十二

張井

張井陘西府施人嘉慶六年進士以內閣中書用十一年呈請改  
歸知縣原班銓選十四年六月選授廣東樂會縣知縣引見

命調補河南正陽縣知縣二十一年九月緝獲紅鬃匪犯張四馬  
猴等七十餘名經巡撫阮元上其功賞加知州銜十月卓異引

見得旨准加一級回任候升十二月調祥符縣知縣二十三  
年升許州直隸州知州二十五年馬營壩大工合龍井以襄辦迅



速 賞加知府銜道光三年五月升汝甯府知府四年九月擢河南開歸陳許道十一月 賞三品頂帶署理河東河道總督五年三月奏豫東兩省黃河南北岸隄工亟須增高培厚以資捍禦請動項辦理復以豫省蘭陽汛柴壩迎溜緊要之處請拋護碎石四月勘估東境泉河等廳屬各汛土石隄壩均有坍塌奏請趕緊修築以資挽運均如所請行七月奏豫省武陟縣攔黃民堰對岸驟長新灘挑溜北注以致刷灘偏堰旋經搶鑲新埽八段河勢改向南岸行走大溜立見外開官工民堰化險爲平 上覽奏欣悅又奏各湖宜濟收蓄事宜嚴啟閉以節虛消勤疏濬以利收蓄並斗門引渠淤塞處請早挑挖八月奏汶上汛永定單閘引渠迭經汶

河漲水收納微湖挾帶泥沙淤墊最甚應估挑深通以利運行均從之九月秋汛安瀾實授河東河道總督十月熟籌河工久遠大局疏云黃河自昔屢治屢壞原無上策凡事理宜探本原圖功當計久遠今日之黃河有防無治歷年伏秋大汛司河各官率皆奔走搶救其竭蹶情形直有惟日不足之勢及至水落霜清則以見在可保無虞而不復再求疏濬河身之策漸致河底墊高清水不能暢出並誤漕運又增盤壩起剝及海運等費皆數十年來僅斤斤於築隄鑲埽以防爲治而未深求治之之要有以致之也當此河底未能疏濬之時惟仍守舊規以隄束水而水不能攻沙河身日形淤墊必得有刷深之方始可遂就下之性上以所言切

中時弊 命會同兩江總督琦善南河總督嚴烺河南巡撫程祖  
洛籌議旋請赴江省會同勘議全河大局十二月奏言捕河廳屬  
陽谷等汛長河紆灣曲折易致淤淺應將灘工舊存河形改挑南  
北直河又運河汶上等汛泃河廳屬沛汛均多停淤亟須挑挖深  
通以期來春重運及守凍空船過行無阻得 旨允行旋因東河  
在城閘官應汝柎捏報到任率行出結並違例保題降三級留任  
六年三月奏言黃河病在中滿淤墊過甚自應因勢利導擬照前  
任大學士阿桂改河避險之法導使繞避高淤卽由安東縣東門  
北面另築新隄以北隄改作南隄中間抽挑引河由傍舊河行走  
至絲網濱以下仍歸海口又無淤灘阻隔似可暢順東趨去路既



暢土必掣深得黃與清平立啟禦黃壩挑漚清水暢出刷黃滌淤  
自有建瓴之勢此時剋期趕辦秋初即可開新河啟禦黃壩軍船  
依次南旋來春漕糧照常行走 上嘉其於河務頗有識見如所  
請行調江南河道總督旋以豫省南岸蘭儀北岸曹考兩處河底  
增淤奏請疏濬並將隄頂所存土件一律築攔子堰以期有備無  
患 上令著河東河道總督嚴烜照議妥辦五月偕兩江總督琦  
善副總河潘錫恩議以改河避淤口門有碎石阻遏諸多窒礙奏  
請開放王營減壩可期減落黃水刷滌河身得 旨照議辦理六  
月奏河湖長水較驟見在嚴守黃河隄埽籌減洪湖漲水並請將  
高堰石工膨裂處一律加鑲圈越埽壩抵護外分別拋添碎石



從之旋奏河湖漲減工程平穩 上嘉其籌畫有方七月給事中  
楊煊奏以啟放減壩黃流湍急鹽河勢難容納疏入 詔并詳慎  
妥議尋覆奏該給事中原係稽考成案於今昔情形似未周知查  
前次開壩漫口時在五月本年啟放定在霜後來源斷無續漲惟  
見據委員稟稱去路未見通暢是該給事中所奏亦不爲無見因  
思減壩放時水勢或可暢達堵合後全河仍必擡高恐徒深四邑  
之災無補全河之病請仍改河避淤 諭曰改河避淤原係張井  
始爲此奏迨調任南河與琦善等會議則以改河諸多窒礙請放  
減壩見已勘估興辦而復請改河似此游移豈大臣事君之道該  
督等惟當遵照辦理減黃出清俾河湖不致有意外之虞八月奏

報開放減壩黃水涌注溜勢極爲暢達卽可剋期堵合得 旨嘉  
勉十月以黃運湖河安瀾下部議敘七年三月會奏減壩合龍穩  
固全河挽歸故道 上嘉之尋以桃汛經臨黃水續長倒濼仍係  
黃高於清禦壩驟難啟放擬將漕船倒塘灌運并辦理失宜自請  
議處 上以興辦大工不能掣水通漕數百萬帑金竟成虛擲  
命降三品頂帶戴罪自贖四月欽差大學士蔣攸銛工部尙書穆  
彰阿勘查黃河下游砌灘阻遏情形旋值黃水落低啟放禦壩以  
重運軍船全數渡黃入奏五月蔣攸銛等查明覆奏 上以張井  
等急於奏功泥於師古咎無可辭仍下部嚴議議奪職 命革去  
頂帶仍畱河督任以觀後效六月奏春間啟放新河附近關孟灘

一帶所墊皆係浮沙嗣經拉濬日久刷出河流大溜奔湍直瀉全  
河溜勢迅駛長水尙能容納又奏源源疊次報長豫籌宣洩上  
令加意防範務保妥貼九月報秋汛安瀾得旨張井從前挑河  
辦理不善功過僅能相抵無庸議敘十一月中河廳屬鹽閘上游  
漲發跌成深塘有礙啟閉請改建雙孔石閘以資經久從之八  
年正月疏陳應辦要工四條一黃河尙須接築海口長隄並於下  
游多作埽壩以資掣刷一洪澤湖宜添建滾壩將堰盱湖隄幫寬  
一南運河宜將昭關壩擇基移建加幫東西兩岸絳隄一北運河  
宜修復運河廳之劉老澗石滾壩補還中河廳之南岸絳隄命  
熱河都統英和往南河會同蔣攸銛勘查應否興辦尋以河庫積



年墊款並各員欠繳銀兩奏請設局清釐二月奏江境黃河宿桃  
以下各廳隄工單薄請撥銀趕辦均 允行三月英和等查明添  
作埽壩不能疏通積淤毋庸置議其海口築隄可從緩辦餘俱應  
辦要工疏入照所議行四月奏全漕渡黃完竣 上嘉其辦理妥  
速 賞三品頂帶七月奏洪湖水勢接漲不消值西北風暴堰盱  
湖隄開有掣壩邵伯一帶隄工漫水已啟智壩稍資減洩請集料  
接護以保目前添發防料以備將來 允之九月秋汛安瀾得  
旨嘉獎 賞還二品頂帶並 諭相機辦理以冀河湖漸復舊制  
十二月奏南河利害全係清江必清水暢出助黃刷淤則河務漕  
行兩有裨益惟黃水積年淤墊卽相機啟放禦壩亦僅能通漕不



足刷黃必清高於黃數尺又必啟壩時多閉壩時少乃能暢出滌  
刷見在縱遇清水能出僅能免於倒灌不誤漕行殊未易收刷滌  
之效 上諭以當激發天良力圖補救九年正月以清高黃水尺  
餘淤沙稍資刷滌奏請開放禦壩 允之八月會奏王營減壩挑  
河案內關孟兩灘砌灘銀兩可否比照漫工之例分別著賠得  
旨實屬辦理錯誤與疏防漫工者不同著琦善張井潘錫恩攤賠  
以示懲儆十年奏報秋汛安瀾黃河兩岸險要處砌灘取直築作  
石壩其長河溜勢極暢各工修防平穩 上覽奏欣慰下部議敘  
十一年正月戶部侍郎寶興江蘇學政白鎔赴南河抽查料垛旋  
經查明覆奏各廳見儲之料尙無虛鬆情弊惟料垛尙未到齊與

該河督勒限年前全數到工之語已屬不符其揚河應繕道工程率用尙未驗收之料揚河廳舊料大半色黑質朽實屬辦理不善

上責張井未能查出弊竇下部嚴議三月部議降三級調用

命改爲三品頂帶仍降四級畱任六月洪澤湖水異漲堰盱隄工危險奏請開放林家西滾壩並擬接放高郵四壩方可減湖漲而保運隄惟下游州縣不免被淹旋以馬棚灣十四堡揚河廳永安汛掣壩漫口卽令趕放以平水勢疏入 命與兩江總督陶澍商辦並急籌撫恤災黎七月 上以高郵湖河漫口倉猝失事井身任河督咎無可辭下部議處旋報伏汛安瀾洪湖水勢遞消提工平穩九月奏永安汛合龍旋報秋汛安瀾下部議敘十二月兼署

漕運總督十二年二月以山盱信壩跌塘過深礙難修復奏請移  
建信新壩一座九月桃源縣奸民聚眾偷挖龍窩汛官隄掣動全  
黃大溜奏入 上責張井不能先事豫防 命摘去頂帶仍戴罪  
在工效力下部嚴議議奪職 命暫留本任閏九月御史鮑文瀛  
宗人府府丞潘錫恩俱以黃水入湖恐妨運道奏請豫籌疏濬  
命偕工部尙書穆彰阿兩江總督陶澍會勘籌議尋覆奏黃水入  
湖卽由吳城七堡仍入黃河其靠隄受淤處並非湖身旣不能入  
東清壩不能灌入運口又何能淤及淮安等處見在湖水已消二  
尺俟再稍落卽堵閉山盱各壩湖水專力刷黃以收蕩滌之效其  
潘錫恩所奏全黃入湖爲從來未有之事將來堵合復故勢必全



湖俱成平陸查河南儀封及桃源司家莊各漫口均與兒在情形  
相同並未淤成平陸該二員所奏應毋庸議並以見在正河乾涸  
請將桃南桃北兩廳之間大加挑濬除去中滿之患俾禦壩以上  
漸就底平實係一舉兩得 從之 命陶澍張井相機妥辦十月  
奏黃運兩河水勢稍落並堰圩埽石穩固得 旨獎慰十三年正  
月會奏桃南廳于家灣合龍 上以張井若無頂帶不足以資彈  
壓 賞四品頂帶仍載革職畱任八年無過方准開復三月奏革  
員賠修壩工請借項趕辦 上以其不能秉公持正一味見好屬  
員 嚴飭之尋因病陳請開缺 允之以新任河督麟慶丁憂  
命井署理原缺六月借陶澍奏請裁減錢家集都司一員把總外



委各二員兵一百四十名移駐洪澤湖以資巡防下部議行八月  
諭曰麟慶已百日孝滿著卽前往張井俟麟慶到任再行回籍  
調理九月報秋汛安瀾下部議敘十五年卒子漢南河候補同知

右 國史館本傳

栗毓美

栗毓美山西渾源人嘉慶六年拔貢七年朝考二等以知縣用分發河南二十年署甯陵縣知縣二十一年丁父憂二十四年服闋仍赴河南道光元年二月署武陟縣知縣十月河東河道總督嚴烺上其防汛出力功得旨以同知直隸州知州儘先升用先換頂帶二年六月以購辦稽料稽遲褫升銜頂帶停升尋以辦理堵合妥速得旨開復三年正月實授十月遷光州直隸州知州四年升汝甯府知府五年調開封府知府九年正月擢糧鹽道十月調開歸陳許道十年授湖北按察使十二年升河南布政使十四年七月以捐資助賑下部優敘尋護理巡撫九月奏桐柏縣查鹽

公廠二處實屬虛糜請卽裁撤 從之十五年五月擢河東河道  
總督七月奏原陽支河情形略曰北岸黃沁衛糧二廳黃水漫灘  
而黃沁原武七堡一帶尤爲喫緊河勢北臥漲水蓋灘而來原武  
七堡以下進水更形湍急下達衛糧境陽武汛內隄工亦爲喫重  
除慎守大隄別無良策其切近順隄河之處自原武十五堡至陽  
武十七堡多有迎潮頂衝形勢見先搶辦隄南靠壩又於隄北及  
原武隄北幫戩並該汛及原武隄南估築土壩十八道俾免順隄  
鑿埽險而多費兩汛向無埽工應卽收買堆貯備防總之兩廳灘  
水串溝久爲隱患蓋因地居上流青峰廣武兩山遙峙對東出山  
之水勢最猛驟而原武之河灘皆係坡形故一遇盛漲最低處所

遂卽刷成溝漕串至順隄河內險無定所卽上流武陟滎澤各路無不匯注合流是以溝形浩瀚竟同河形見在晝夜督辦已堵斷合流並繪圖貼說以進八月奏言連日水勢僅長尺餘而王屋莊進水之口較前更寬百餘丈總由中泓大灘益向南淤溜卽南緩而北緊南股正河成爲迂道北股之溜勢轉建瓴至大河中泓淤灘之故由廣武山前老灘塌去一千餘丈河溜先向山根裏臥爲山所遏折回東北中泓遂挺生淤灘此河勢之變遷皆由出山處所先有變遷之原委也前奏應辦物料係就近頂衝迎溜處所爲急則治標之計今水口旣日見刷寬又何敢但求搏節貽誤事機通籌籌畫從省估計約需銀十餘萬兩請將兩岸各廳應估來年



土工稍可緩者酌量裁減先儘黃衛兩廳估辦其稽料麻土夫工  
稍可通融者亦挹彼注茲以免專案請帑至原陽兩岸隄工已被  
水漫嗣因沿陂試拋甄塊深資保護月石壩堵合加高幫寬迤下  
楊村封邱二汛灘水均已停淤壩下七十餘處村莊居民亦得安  
堵惟串溝分溜關繫北岸全局斷不能緩至來年興工見已借撥  
銀八萬兩仍俟霜降後於請撥各廳土工銀內如數劃還則錢糧  
並無加增而要工得免貽誤如所請行尋以支河危險用甄拋護  
化險爲平入告 上嘉其辦理妥速仍 命詳細籌畫尋偕河南  
巡撫桂良會勘以支河分溜已至六分甄工各壩未可深恃請款  
貯料備防 從之十六年四月以甄工試有成效請照時價覈明

報銷下部議行十月奏運河廳所屬魚臺汎河道八十餘里兩岸  
官隄日形殘缺間有民堰亦甚卑薄夏秋盛漲河湖相連糧船不  
能通緯挽遲延請將民堰改歸運河廳於一年內借款修竣復  
以各員承修閘座保固僅限三年故敢於輕率從事請於例限之  
外再令保固三年均從之十七年三月奏稱前在豫護撫篆時  
見速戰陣法聲勢聯絡洵稱勁旅濟城界接兗曹宵小易於出沒  
從前金鄉曹縣匪徒滋事濟城有兵力防護得以安堵地方既關  
緊要操防尤宜講求請以實在城兵一千一百餘名內挑選六百  
三十六名分別各隊操演兼習速戰陣法並咨取熟諳武弁教習  
上嘉之十八年七月奏請多備土工以固根本略言豫東黃河

地居上游向無閘壩分洩全賴隄工高厚方資抵禦本年大汛沁黃洛河接時並漲今雖已設法疏防而隄壩實形卑薄亟應分別估辦以爲來年修守之資今擇其首要工段萬不可緩者豫省十三廳東省兩廳估需銀兩請卽於兩省藩庫撥給以便交春興工其次要工段歸來年估辦者亦賴先事豫籌請於來年二月興工時再由藩庫借銀十萬兩務使一律完竣以防大汛如所請行時因雨澤偶稀漕艘輒阻嚴飭毓美於回空後實力籌辦尋疏陳瀦蓄濟運事宜六條一責成州縣疏濬泉源遴委幹員估挑河渠一濬各湖進水渠道一徵湖水短應由江南駱馬諸湖導引以歸樽節一徵湖節水應遲啟湖口雙閘以免消耗一臨風輒板二閘



應嚴板少啟以節汶流而速漕運一曹州濟甯應擇要估濬河渠以暢來源得 旨籌議尙屬周妥飭屬照辦十九年二月奏豫籌微湖收納運水請於重運過竣後不必拘定例消存丈尺之數但計水存一丈三尺以內卽築壩收水又以汶河淤墊旁洩過多請酌量加高戴村壩以期攔蓄得力均如所請行先是毓美奏甄工屢著成效請設窯燒造得 旨允行御史李純疏其不便 上命偕工部尙書敬徵往勘至是會奏請改辦碎石停止置窯三月毓美復奏言自來言治河者謂明險易治暗險難防暗險者卽隄前之串溝最爲可慮者也豫省歷次失事皆在無工處所實因兩岸隄長千里未能處處籌備一旦河勢變遷兼以風馳雨驟輒蒼黃



失措幸而搶護平穩而埽工非數萬金十數萬金不能濟事古人鑲埽亦不得已而用之耳蓋鑲埽引溜生工久爲河工所戒在明白工程者原不冝輕率從事而昧於機宜者遂謂非此別無良策伏查北岸爲運道所關往者原陽分溜幾至掣動全河若非用輒拋護費何可以數計今祥符下汛並陳畱一汛灘水串注隄根察其形勢正與北岸相同濱河士民多有呈請用輒者蓋有見於輒工之得力涸復農田不下萬頃其爲保衛田廬情至切也夫事之有利於民者斷無不利於國特事近於勑難免浮言前南河用石之始眾議紛如良由工程平穩用料減少販戶不能居奇而游客幕友見工簡務間不能幫辦謀生是以妄生浮議並稱東河漫

決皆由不用碎石之故賴 聖明獨斷 敕下東河試辦至今永慶平成惟自拋用碎石後請銀幾七十餘萬兩後將每年添料改辦六成碎石雖未專案請銀然因購石不易埽段愈添愈多經費仍未能節省自試辦甄壩以來三年未生一新工較十一年至十四年共節省銀三十六萬兩蓋由豫省情形與江南不同產石之地祇有濟源鞏縣必須春末夏初方能運到工次甄則沿河州縣每處民窯不下數十座隨地隨時皆能應手可以無誤事機且石性滑入水易於流轉甄性澀入土卽黏卸成坦坡自能挑遠溜勢至每方甄塊各廳均係價銀六兩石價則自五六兩至十餘兩不等方價既大小懸殊而碎石大小不一堆垛玲瓏半屬空虛尺甄

一千塊爲一方平鋪計數堆塚均實石每方重五六千斤甄每方重九千餘斤是一方碎石之價可購兩方之甄而拋一方之甄又可當兩方碎石之用也咨調南河弁兵來豫帶同查驗甄工僉稱與南河土壩包口無二而甄壩不更堅於土壩乎或謂甄可以治將生未生之工不可治已生已成之險不知杜一將生未生之工卽少一已生已成之險或謂甄塊入土易於損裂不知拋成甄壩一經泥淤卽已凝結嘗見井中之甄因得水而更堅見在收買民甄多有淤入泥土者皆完整如故或謂拋築甄壩近於與水爭地不知隄前之地尺寸在所必爭自來鑲壩之法隄前必先築土壩數十丈然後用埽鑲護甄壩則無須乎埽師土壩之意不泥其法



拋作坦坡大濶自然外移未有可築土壩而不可築甌壩者又所占河面無幾安得有與水爭地之患夫隄前水深則險水淺則平水近則險水遠則平自拋築甌壩凡隄前水之深且近者莫不淺且遠前尙書敬徵來豫據道廳密稟謂用甌辦險工究未可以深信亦因連年水小未敢自謂必可施行今道光十八年盛漲較之二年及十二年尤爲猛迅甌壩均屹立不移並未出險生工可知雖遇大水亦能抵禦得力且上年春間儀睢廳秋間中河廳河水下卸塌灘匯壩搶鑿埽段旋即走失用甌拋護均能穩定是用甌搶辦險工較鑿埽更爲便捷今兩岸文武員弁均已深信不疑而急公之員尙有自行捐辦者天下事可與樂成難於圖始大抵皆



然竊聞衛工之失事也因灘面不能鑲埽及塌至隄根而已不可治馬工之失事也因串溝塌過隄水其始僅涓涓細流求碎石不可得率成口岸惜未籌及於甄可代石也見在各廳有工之處皆易爲力惟無工之處串溝隱患必應未雨綢繆今若於黃沁下南豫貯甄塊則可有備無患至於應貯之甄無論新舊仍令向民間採買不必廳員燒造此外亦別無流弊疏入 諭曰甄工得力省費搶辦險工較鑲埽更爲便捷且較石價多寡懸殊又所占河面無幾不至與水爭地該河督旣確有把握朕卽責成辦理總期行之無弊方爲不負委任八月奏本年黃河異漲大隄急應加高請借土工銀十八萬兩經部議駁尋復奏言土工爲修防根本前者

等議辦甄減壩卽請以減辦埽工之銀爲添辦土工之用誠欲隄  
工增高培厚異漲永不爲患始可爲經久不敝之基本年正月查  
工因見水漲較早又由道庫墊發銀十萬兩將庚子土工豫竣迨  
立秋前後歷經異漲向非早爲籌備已不免泛溢爲災是豫補庚  
子年之工已亥年先收實效來年汛期大小無定何可不先事籌  
防惟部臣所駁爲按年報銷起見所請分年帶銷自應遵照停止  
今請於豫省藩庫提借土工銀十二萬兩其不敷六萬兩卽由道  
庫籌墊俟來年估辦辛丑年土工分別陳請撥還則於錢糧並未  
增添於款目毫無轉轄於要工得資備防 特旨允行十月請將  
添購四成防料銀五萬五千餘兩改辦甄塊復附奏曰考治河諸

書從前係用捲埽之法並有竹絡木困輒石柳葦自用料鑲埽則以稽料爲正宗而險無定所亦無一勞永逸之計緣鑲埽陡立易於激水之怒其始水深不過數尺鑲埽亦不過數段迨至引溜愈淘愈深動輒數丈無工變爲險工於是溜勢上提必須添鑲溜勢下坐必須接鑲久之而片段愈長防守愈難爲力豫東土性浮鬆水及隄身不能不用料鑲護新工既生日久亦形勞費近來錢糧按年比較不敢過於增多而埽工無法減少不得已而減土工少購碎石皆爲苟且因循之計於修守更無實濟自試拋輒壩或用以杜新工或用以護舊工無不著有成效本年三月爲籌防黃河下南廳串溝復請購買輒塊故雖伏秋異漲爲數十年所未有而

化險爲平固賴隄身加高亦由兩岸各廳無塌灘潰隄出險生工之處則輒工之力也不特可資經久與稽料大相徑庭而堆貯之處並無風火堪虞是兩岸兵民共知其見儻從此工固濶安亦復培增土工專用力於根本之地則既可以免漫溢之患亦保無衝決之虞矣 允之二十年正月計典甄敘 上以毓美慎厥修防安濶奏績下部議敘尋 命尙書恩桂等赴豫查驗料塚查出曹河廳料塚丈尺斤秤墊耗短少請將毓美交部議處部議降二級 畱任二月卒 諭曰河東河道總督粟毓美慎厥修防安濶奏績本年京察特予交部議敘河工劇要倚畀方深遽聞溘逝殊深悼惜著加恩賞加太子太保銜照總督例賜卹任內一切處分悉予



開復應得卹典該衙門察例具奏伊次子栗燿著加恩賞給進士  
服闋後一體殿試尋 賜祭葬如例諡恭勤二十一年入祀名宦  
祠子烜見官安徽廬州府知府燿候選內閣中書

右 國史館本傳

栗公諱毓美字含暉號箕山又號樸園山西大同府渾源州人家  
世業儒公六歲就外傳對句輒驚塾師九歲學爲文落筆灑灑若  
宿構嘉慶辛酉科試受知學使莫寶齋先生取充拔貢朝考入選  
以知縣分發河南往謁寶齋欲呈請改就教職先生慰之曰君誠  
異才然縣令雖卑稱職亦大不易果能視民事如己事以學術爲  
治術其功其名不更在甲乙科上耶公始決意赴豫或告居官必

有先容勸乞朝貴札以往公曰人貴自立所知所行皆先容也乙丑署溫縣事遇事從容坐理聽斷公平頌聲大作時河內武陟兩縣歲比不登公奉委查賑井井有條差旋以溫邑毗連災區詳請發倉穀賑濟上官某借懷慶知府張親來查勘偶拂某公意遂將批准穀數撥給孟縣五百石公請見不得乃懷印謁知府曰上官當廉明公正以察吏安民果溫縣濫支倉穀孟縣所報災戶有遺漏皆應嚴參豈可挹此注彼以調停中立了事耶若得罪上官乃知縣之過於民何罪公爲郡守能據理力爭甚善否則吾不愛此官也卽取印置案頭而去知府壯其言爲某公陳之乃止弗撥公躬親施放全活甚眾己巳署安陽縣興利除弊一切皆得其宜癸

西奉委至滑縣查辦災賑公素聞民間習教者多而匪徒復乘荒肆掠料其必將滋事勸知縣強公克捷嚴密防範並往白太守太守不以爲然嗣奉檄代理西華而滑縣果亂公知縣民素習邪教卽團練鄉勇操演民壯力行保甲以大義法律曉諭鄉民宵小斂迹閭里安堵乙亥冬補甯陵知縣旋丁父艱歸里服闋署淇縣事適馬營工決口儀封被災公奉委查辦災賑旋管理儀封工總局道光元年奏補武陟縣知縣因協辦馬營壩放淤工程並幫同搶險經東河總督密保奉 旨以同知直隸州儘先升用癸未五月署理光州旋補寶州界連皖楚匪徒聚眾結黨包送私梟且好訟公謂捻匪由於官役之縱庇健訟由於受人之愚弄乃訪查訟師



以清其源嚴考代書以正其本懲治誣告以儆其刁詐訟風漸息  
並嚴查保甲獲捻匪著名者懲辦之匪徒斂迹甲申夏領咨入都  
引 見撫臣密奏公才堪大用卽 特旨補授汝甯府知府乙酉  
十一月調開封清釐積案晝夜審理建設義學數十百處勅設司  
備倉以裕民食重修號舍以惠士子捐置義地以掩埋暴骸善政  
累累己丑署糧儲鹽法道押運北上事畢回任上疏清濟運之議  
而不能用識者惜之十月調補開歸陳許兵備道公素知以稽鑲  
埽易朽腐而糜費因前在武陟工次挑挖城壕有遠年塌卸城甃  
經泥沙浸灌凝結堅不能入斧鑿卽有以甃代埽可期固工節用  
之議至是捐廉購備碎甃於次年春先令儀睢廳試辦尙未拋成



旋奉 旨補授湖北按察使辛卯署藩篆是年苦雨連縣江水異常漲發郡縣被災者多窮黎乏食者眾欲辦煮賑地方官以煮粥舞弊滋事請散放錢米公謂散放錢米則次貧者亦可冒領煮粥則非饑民不肖就食嚴查煮粥夫頭弊自可除而亦不必滋事也乃捐發千金勸諭士商軍民一體捐賑共捐銀三十餘萬兩覈計時價穀一石可動倉穀二石施粥之期可展數月卽以捐項貯庫按各屬捐助銀數詳請先動倉穀俟豐年再行買補手定災賑煮粥規條頒發各屬督各官實力稽查冬復散給棉衣草衣全活無數壬辰三月奉 旨補授河南布政使八月黃河南岸下南廳屬之祥符汛三十六堡隄根串水匯注隄身塌損衝開決口六十餘

丈廳汎蒼黃趕由黑坨工轉運料塚公以黑坨相距遼遠緩不濟急卽相度形勢欲於上游十二堡灣隄先築柳壩以殺溜勢工員以爲無濟於事徒多糜費公曰凡事宜先盡人力譬如人有危疾應用瀉蓄須由遠處購求將先投別藥以救之乎抑坐以待之乎見在工險異常柳壩如能搶護平穩可省數百萬金可先存一無法可施之心待不能應手之稽料以聽潰敗耶卒指示趕築柳壩至七十餘丈溝水立即斷流公親詣口門向往來過船詢問知灘莊袁坊等處有通河溝漕二道委員購買大柳倒垂填塞溝漕決口得以堵合而黑坨轉運料迄未至乙未四月奉 旨署理河東河道總督五月實授公以河工修守最重機宜審度機宜在平素

留心察看素知黃河北岸串溝久爲隱患上自黃沁廳縷隄二堡下至衛糧廳封邱汛九堡互長二百餘里每當伏秋盛漲形同巨浸屢飭廳員認真防守七月衛糧廳稟月石壩迤上灘水由陽武十七堡南張庵地方新刷溝漕循順隄河形直達封邱汛西園堰前歸河黃沁廳稟原武七堡小張莊新刷溝漕分溜甚大公親往查勘工員有以溝口出水甚利河分爲二亦可稍緩水勢者公曰借水刷沙正河原喜暢利遇有串溝應築土格跨壓預防分溜若溝口出水過利必至引溜成爲支河危險將不可問亟乘小舟親勘見原武九堡王屋莊串溝下注將灘層刷塌三百餘丈串注順隄河下達陽武張庵仍歸大河至八月南股正河行溜六分北股



分溜四分已成支河加以沁河灘水匯入原武奔騰浩瀚不特無高崖可生根築壩抑且無土可取時近水溝口已寬至二百餘丈儻繞遠圜築所費不貲欲鑲埽則兩汛長隄節節危險斷無沿隄鑲埽之理因思輒與石相倣卽委員購買民輒先於陽武十堡挽高出水面漸成壩形拋至十數丈溜亦外移十數丈輒壩上下露出淤灘隄免汕刷復於原武廳拋辦亦得力竭四十晝夜之力督飭拋成土壩六十餘道溜勢外移十數丈至數十丈不等七十餘村莊得以無虞十一月遵 旨入覲上問河工利弊甚悉追詢及河營弁兵公奏河營兵官多係防汛兵丁出身久歷河干歷年河勢如何遷徙並各河臣道廳辦理之善不善皆所目擊爲河臣



者但肯逐處虛心訪問彙全局於胸中再參入近日情勢斟酌辦理以身先之自可集思廣益不至遺誤公事上首肯者久之九月奉旨與巡撫會勘支河而陽武三堡迤下支河又分爲兩股南股由李家莊行走北股由河莊坐灣東趨形同入袖原武十二堡支河亦有分岔幸李莊淤墊處尙可疏濬卽倣照堵築口岸之法以南股爲引河先於原陽越隄拋築挑水輒壩一道擡高水勢二丈五尺一面由南股抽溝一面由北股對岸拋築對頭迎水輒壩如人字形及溝口收至五六丈溜勢過高輒石不能穩定鑲埽亦卽走失咸以爲無法可施公飭員趕辦柳株撥大船二隻倒排口門借舵作樁先繞竹纜數疋將大柳倒挂纜上以殺溜勢柳葉倒

垂性澀挂淤然後分路進甄跟澆後戩立時堵合甄縫仍復過水  
又於上首圈作柴堰壩外用淤土澆戩涓滴不漏竭二十餘晝夜  
之力北股分溜仍復歸南八月因甄工試有成效不至如鑲埽之  
引溜生工較碎石採運甚易方價亦可從省始奏請以甄一千塊  
爲一方每一方定價銀六兩下部議行又以原武支河係新生巨  
險幸用甄塊搶護得保無虞儀睢廳隄工土性虛鬆睢上汎河勢  
屈旋險要甲於通工自拋用甄壩亦保無虞統計各廳甄石土壩  
工程實較往歲加增而所用錢糧非豫先支借於應領項下撥還  
卽係權其緩急挹彼注此從未專案請銀且甄工歷久彌堅實於  
節帑固工兩有裨益奏請將豫東兩省應辦來年六成碎石項下

撥銀六萬九千五百兩改辦甄塊並恐民間存甄漸少請於豫省  
應領來歲例撥銀內預提銀十萬兩乘農隙設窯燒造大甄復得  
旨允行當公任河南藩司時知全省攤款甚多州縣辦公不敷  
易致那缺卽商同撫臬力裁上司供應以爲彌補暨爲河督尤力  
裁供張浮費河工積習弊端剷除幾盡至初用甄工廳員以事屬  
剗行恐有貽誤咸以爲不可輕試浮議紛紜公不避嫌怨一意孤  
行冀奏長久之策而御史已有聞而奏參者因改將所提之銀備  
辦碎石然儀睢等廳遇有險工公仍飭購甄拋護並隨時據實奏  
聞己亥三月復奏請於下南黃沁兩廳各備甄塊五千方其略曰  
治河者稱暗險難防暗險者卽隄前之串溝也北岸自黃沁廳之



武陟汎至衛糧廳之封邱汎互長二百餘里地勢低窪隄前串溝寬廣最爲隱患臣到任查工見隄身卑矮加高培厚稍爲放心惟自滎澤汎挺生淤灘愈墊愈寬河勢日形北臥由秦家溝一帶汎濫橫流溝漕錯雜串水匯注馬營滎原兩隄實爲暗險堪虞南岸下南廳自祥符汎至陳畱汎十七堡地勢過低隄工積水至八九尺串水涌注偪刷大隄尤爲險要連年於隄前估築土格土壩跨壓溝形抵禦灘水必須堅守方資保衛而堅守之法除鑿埽外別無良策然鑿埽引溜生工已久爲河工所戒以其引動河溜側注隄根往往以無工而轉爲險工也且堆料備防二三年歸於朽腐未免虛費錢糧欲購儲碎石不但路遠價昂而灘面串溝阻隔船



運亦不能到臣深知從前失事皆在無工處所委因兩岸隄長一千餘里未能處處儲備稽料一旦河勢變遷塌灘潰隄動輒蒼黃失措釀成口岸前此原陽支河分溜幾至掣動全河若非用輒拋護其險實不可測其費亦不可數計見在隄前已成平陸輒壩屹立如故目下北岸暗險止此馬營榮原兩隄再能防護周密則串溝隱患可以悉除至下南廳爲省城保障祥符下汛並陳畱汛灘水串注隄根與北岸串溝隱患相同應請於該二廳各購輒五千方分段堆貯以備緩急並附片奏陳東河自拋用碎石均係專案請銀共計七十餘萬兩後將每年添料改辦六成碎石始末專案請銀然埽段愈添愈多經費仍不能節省者實因購石不易路遠

價昂僅於緊要工段拋石保護埽根不能拋成石壩是以大溜仍  
偏刷埽前上提下坐接鑲無所底止自臣試拋甄壩以來三年未  
添新工總計四年甄石土埽並原陽四壩料土甄石各工較道光  
十一年至十四年內共節省銀三十六萬二千餘兩與從前增添  
碎石僅此數段用銀數十萬兩者情形迥不相同而甄壩實能經  
久不壞較之埽段二三年卽朽爛脫胎並一經走失卽漂沒無存  
者省費不可數計夷險亦判若天淵臣非不知石堅於甄惟豫省  
採石之地最近者只有濟源鞏縣兩處必須春末夏初方能運到  
甄爲民間常用之物沿河州縣每處民窯數十座終年燒造隨時  
隨地皆能應手可以無誤事機且石性滑入水易於滾轉仍不免

引濶刷深甄性澀與土膠黏拋壩卸成坦坡卽能挑遠濶勢況每方甄價各處均係六兩石價惟黃沁一應每方係五兩八錢餘應自六七八兩至十三兩不等方價旣多寡懸殊而碎石大小不一堆垛半屬空虛尺甄以一千塊爲一方平鋪計數堆垛結實臣曾將石與甄較量輕重石每方重五六千斤甄每方重九千斤以一方碎石之價可購兩方之甄而拋一方之甄又可抵兩石之用是用甄較之用石錢糧節省更多上年曾咨調南河弁兵來豫帶赴兩岸查看甄工與南河石工辦法相類拋成之後又加碎石與南河之土壩包石毫無二致而甄壩不更堅於土壩乎或謂甄可以治將生未生之工不可以治已生已成之工不知治一將生未生

之工卽少一已生已成之險也或謂用甄可以減埽慮及河勢變  
遷者查各應道光九年新舊埽工僅一千五十餘段至十五年增  
至二千二百四十餘段乾隆年間止十一廳見增至十五廳河勢  
未嘗無變遷斷不至因減埽而遂變遷也或謂拋用甄工萬一偶  
有失事而人心叵測雖在未經用甄之處勢將誘咎於甄爲臣遠  
慮者查用甄工以前失事者不一而足而道光十五年原陽兩汛  
分溜成河用甄拋護並無意外之虞況各廳有工處所凡可以鑲  
埽之處臣仍儲備稍石照常修守不過於稍石之外添一甄塊工  
料用以蓋護舊工力杜新工並非舍稍石而不用也或謂甄塊入  
水易於酥損不知拋甄成壩一經淤泥灌入隙縫卽已結成一塊



實能穩定堅牢斷不至於碎裂嘗見井中所砌之甃因著水而更堅歷數百年不壞見買民甃多有數十年前漫口淤入泥土者皆完整如故臣與濱河士民詳加考證異口同聲特未身歷其境者妄爲臆度殊不足憑也夫隄防之設以衛民也鑲埽不過護隄隄前水深則險水淺則平水近則險水遠則平乃一定不易之理埽段淤閉報部謂之化險爲平自拋築甃壩凡壩前之水深且近者無不淺且遠而埽段逐漸淤閉已無不化險爲平此臣慎重要工復請用甃之實情也疏入奉 旨有該河督旣確有把握朕卽責成辦理之諭黃河以隄束水土工乃其根本自來失事多由隄身卑薄自道光初年辦理土工每年請銀九十餘萬兩及五十萬兩

不等後來埽工日增土工日減隄堰不可復恃公到任後卽飭趕辦子堰時以嘉慶二十四年異漲之水爲戒奏請撥款增修加高丈餘並修復遠年廢堰十八年河水漲發隄身僅高水痕五尺餘後復借墊銀兩奏明趕加各廳隄工實已高出水面一丈三尺論者以爲隄堰過於加高徒費錢糧二十四年異漲之水乃不常有之事似不必偏重土工公曰河工關係甚重水勢長落無常前者北岸長水隄高於水僅止五尺餘寸若非先將隄身加高必至漫隄爲患奈何安而忘危欲傲倖於萬一耶十月復奏准借墊銀十八萬將黃沁等七廳隄工加高或酌加子堰以高出本年水痕一丈爲度又恐各廳存甄無多應籌款購備復奏以添料之四成銀

兩改辦甄塊不獨例辦添料可以從省而甄工愈多埽工日少卽  
大汛購料亦可漸歸節省又附奏黃河修守以土工爲根本故以  
隄束水仍以埽護隄考治河諸書從前係用捲埽之法並有竹絡  
木困甄石柳葦同爲治河工料自用料鑲埽則以稽料爲正宗而  
溜趨靡常險無定所一經塌隄匯壩除鑲埽之外別無抵禦之方  
亦無一勞永逸之計緣鑲埽陡立易於激水之怒其始水深不過  
數尺鑲埽亦不過數段迨引溜愈洶愈深動至三四丈五六丈以  
無工而變爲險工於是溜勢上提埽之上首必須添鑲溜勢下坐  
埽之下首又須添鑲久之片段愈長防守更難爲力且埽段稽鬆  
易朽三四年卽歸腐爛經溜刷塌名曰脫胎必須趕緊按段補還



埽工淤閉後溜至復匯謂之舊險復生尤須搶鑲新埽二者爲河工最險儻料物一時不能應手卽釀成口岸近來錢糧按年比較不敢過於增多而埽工無法減少不得已減辦土工少拋碎石皆苟且因循之計工愈險而費愈鉅於修守更無實濟自試拋甄壩或用以杜新工或用以護舊工無不著有成效蓋甄壩卸成坦坡足以殺水之勢水見坡則無力故抵溜外移愈抵愈遠埽漸淤閉以險工而可化爲無工況鑲埽則溜注隄根屢鑲屢墊竟有相連數段同時走失將料物漂淌無存隄身立卽塌卸錢糧遂至虛糜拋甄則溜移壩外隄前立卽渟淤一壩得力可蓋數段之工雖經大溜衝刷隄身屹立鞏固省費實不可以數計臣所以不恤人言



不辭勞怨力肩重任爲國帑生民計不敢爲一身一家之利害計也臣於本年三月爲籌備串溝請購甄塊備防仰蒙 聖明獨斷俯如所請故雖伏秋異漲爲數十年所未有較嘉慶二十四年尙大逾二尺餘寸而化險爲平不至如二十四年之普漫固賴隄身加高而兩岸各廳從無塌灘潰隄出險生工之處卽鑲埽未穩者亦無不拋護穩定經費尤較往年大有節省則甄工之力也至收買民甄原有新舊之分舊甄重而新甄輕臣於十七年會同欽差查工深以新甄不如舊甄爲疑連年逐處講求始知舊甄久經浸透質潤故重新甄甫經燒成質燥故輕及拋入河中喫水新舊甄地輕重毫無二致且入水彌堅雖經數百年斷不致於損壞卽堆

貯備防亦可經久無弊不至如稽埭風火堪虞並枯朽黻爛不適  
用請將豫東兩省添購四成防料銀五萬五千餘兩改辦甄塊奉  
旨允行 上命牛公鑑巡撫河南 諭之曰栗毓美在東河辦  
理甚好汝每事不可掣伊之肘如伊有要事須人務必給他其眷  
重如此庚子正月京察復奉 旨交部議敘而欽使出查料埭撫  
拾小故奏劾之公遂奇痰陡生卒於上南廳胡家屯工次是年二  
月十八日也享年六十有三遺疏入 上震悼卽日奉 上諭加  
恩賞給太子太保銜照總督例賜卹次子栗燿加恩賞給進士服  
闋一體殿試尋 于公諡曰恭勤河南人聞之如喪考妣卽建祠  
處處祀之公才性通敏遇事輒洞悉原委措置得宜嘗言吾人爲

一事須要有定識定力苟可以利國利民必當身任其責設有阻礙應立一必爲之志隨機應變以冀有成不可以口舌相爭自古以忿激債國家之事者不一而足惟能忍者始克有濟耳任州縣時尤善折獄民間以爲今代之包龍圖嘗言讞獄宜旁敲側擊使之不得不供吐實情再察其神色度以物理人情自然判斷平允若徒事刑求或將緊要供情先出自問官口中卽案無枉縱亦難信於心矣結案之時應曉以利害告之情理將其心中疑惑奸謀詭計一齊道破然後可免人愆惠翻控常有原審無屈抑訟仍續控不休皆當時開導未明故也狀中列其斷案頗備今俱不錄以及善政善教之爲他督撫所能懿行嘉言之不悖聖賢之旨者亦

一切略之以公之所重不在此也

論曰近代循吏首推石司馬家紹而治河名臣則羣推黎襄勤公世序兩公皆讀書人子皆得親炙蓋皆有體有用不徒以治行見者也若恭勤公則未之見亦不知其爲人今歲在子畚太守幕內應教作文頗多臨歸復以恭勤公行述索傳夫傳者傳也恭勤始爲循吏可傳繼爲治河名臣則尤可傳因刪節之以覆太守其詞繁而不殺者以治河剗用甄塊本黎公碎石之意而變通之實能深明物理切合土宜不爲前人成法之所束縛其兩次陳奏之詞語重心長字字堅如鐵鑄文亦遒潔非老手不能賈誼陳政事疏班孟堅並採摭以入本傳固不可矜言高簡效世俗之以虛詞爲



渠枯也然而蒙竊更有說焉治河等於治邊從古通無長策惟我朝 聖祖仁皇帝三征漠北銳意攘除 高宗純皇帝開闢新疆準部回部盡入版圖累百年無烽煙之警而黃河則爲患累朝自斯文襄公以至黎襄勤公非無任事之臣殫精竭慮然皆目前救敗之計未有能建久安長治之策者惟乾隆十八年合河孫文定公嘉淦獨陳減河之議謂北之大清河爲濟水南之大清河爲淮水皆能滌河之淤宋熙甯二年河決澶州分而爲二一由南清河入海一由北清河入海南北分流歷久無患南渡以後河遂南徙論者謂地勢南高北下宜順水之性導之北行不可引之南下至正初決金隄等處命賈魯治之大開黃河故道水遂安流賈魯稱

善治河乃導之北行未嘗令南徙也明洪武初河決陽武東過開封南入於淮而河之故道遂淤正統十三年河決張秋河灣東流入於海景泰時又決張秋宏治時又決金龍口趁張秋衝會通河以入海張秋之東不及百里卽東阿之山山下卽大清河黃河決水不能踰山東走必自順河北行故凡言決張秋者皆由大清河以入海也自劉大夏築大行隄二百餘里偪河南行遂全入於淮逆水性而禍民生亦可謂拙於謀矣我朝運道河流皆沿舊制順治康熙年間決北岸者十之九決南岸者十之一北岸決後潰運道者半不潰運道者亦半凡其潰運道者皆由大清河以入海者也蓋以大清河之東南皆泰山之支腳故其道亙古不壞亦不

遷移從前南北分流之時已受黃河之半嗣後張秋潰決之日又受黃河之全然史但言由此入海而已並未聞有衝城郭淹人民之事則此河之有利而無害亦百試而足徵矣至於運道尤易爲力卽從張秋入海順河北行五六日可至利津距天津海道不過五六百里計大清河所經之處不過東阿濟陽濱州利津等四五州縣卽有漫溢不過偏災忍四五州縣之偏災卽可減兩江二三十州縣之積水并解淮揚兩府之急難此其利害之輕重不待智者而後知也文定之言如此予嘗書其後曰此今日救時急著若黃河分支北流則南清口以下之河可容淮水而洪澤湖不致滿盈洪湖不盈則高堰減壩不必多開而下河亦永無患矣恭勤公

在位不久其最出力者在搶護原武支河不致釀成決口爲地方  
憂然原武之支河卽文定公欲於陽武之下開減河者也夫減河  
之水以分其流猶之禦大敵者必別出一軍綴之以分其勢彼勢  
旣分則我禦之有餘力矣恭勤公必搶護支河蓋恐水分力弱不  
足刷沙下流且恐潰運道也然支河旣塞涓滴不使北流而全河  
匯注於南祥符遂至決口矣雖決口之由緣恭勤旣薨於所云下  
南廳爲省城保障祥符汛並睢州汛灘水串注隄根應請於該二  
廳各購輒五千方分段堆貯以待緩急者後人或視爲不急說未  
遽從故一旦決裂遂致水圍開封使恭勤公尙在知必有以備之  
卽或失事亦必有以禦之然隄身一再加築使河水擡高於城郭



田廬之上其勢亦岌岌矣雖有輒壩可恃然其人存則其政舉其人亡則其政息愚是以知水性靡常南行既久必復轉而北行文定減河之議實實可行且必全河並挽之使北借大清河之水以滌之使滔滔東下下行速而上流亦必不潰決也考禹河之水本向北行其入海在今之直隸其後轉而東徙其入海在今之山東北宋而後南北分流迭爲啟閉至明乃悉徙於南迄於今河身日墊日高東河南河更迭爲患無十年二十年不旁決者惟黎襄勤公在南河十年無患恭勤公在東河五年無患然黎沒而高堰幾危于友包君世臣著中衢一勺言其患實黎所貽彼於十年前決之而其後卒驗此雖事後成敗之論然亦可知河務至此勢實難

爲不改絃而更張之雖有恭勤其人亦必不能保其歷久而不壞也因附文定之說於此以告當世之畱心河務而不爲積習所拘者

右傳李祖陶撰

公姓栗氏諱毓美山西渾源州人嘉慶六年以拔貢生官河南知縣遇災年放稅振穀以實惠民不以上官意爲損益遷光州知州汝甯府知府徙開封歷河南糧儲道開歸陳許道遷湖北按察使河南布政使道光十五年授東河河道總督公前知武陟縣黃沁隄馬營壩工皆親其事及是益勤詢河兵官久於河者以地勢水脈前任官行事之當否蓋北岸自武陟至封邱二百餘里南岸之

祥符下汛至陳畱六十餘里皆地勢卑下多串溝串溝者在隄河間其始但斷港積水而已久之溝首受河又久之溝尾入河而串溝遂成支河於是以遠隄十餘里之河變爲近隄之河而隄河相遠之處舊皆無工不儲料者也於是以無工之處變爲至險之工故人不及覺覺不及防往往潰隄爲大患公乘小舟周歷南北時北岸原武汛串溝受水已寬三百餘丈行四十餘里至陽武汛溝尾復入大河又合沁河及武陟滎澤諸灘水畢注隄下兩汛素無工故無稽石隄南北皆水不可取土築壩公卽收買民甑於受衝處拋甑成壩四十餘晝夜成甑壩六十餘所壩始成而風雨大至支河首尾皆決開數十丈而隄不傷公由是知甑之可用又試之

原陽越隄及攔黃堰及南岸之黑塌皆效遂奏請減買稽石銀兼備甄似千甄爲一方方價六兩是後每有工役碎石及稽塌用大減數年內省官銀百三十餘萬而水益堅有不便其事者其說頗上聞公前後陳奏曰護隄之方率用稽塌然塌能壓激水勢俯蓄隄根備而不用又易朽腐碎石坦坡惟鞏縣濟源產石較近而採運已艱河工失事多在無工處所千里長隄勢不可盡爲儲備而河勢變遷不常衝非所防遂爲決口甄則沿河民窳終歲燒造隨地取用不誤事機且甄及碎石皆以方計而石多嵌空甄則平直每方石五六千斤而甄重多三分之一一方石價購甄兩方而拋甄一方當石兩方之用其質滯於石故入水不移堅於稽故久



水不腐又土不能築壩水中輒則能水中拋壩卽盪成坦坡亦能  
緩受急衝化險爲易或謂輒可保將生未生之工不能用於已生  
之後然使將生者可保卽別無已生之工昔衡工之決因灘陷埽  
不能施馬營壩之決因補隄不能得碎石使知用埽不如拋輒收  
輒易於運石則數千萬之官銀可省奏入 上知公忠實可任且  
綜畫周密卒皆 允之屢 詔褒賞訖公任五年河不爲患二十  
年薨於位 上爲之震悼 賜諡祭及太子太保銜時長子烜已  
官刑部郎中乃 賜次子燿進士公在工有風雨危險必身親之  
平居時河曲折高下嚮背皆在其隱度每月水將抵某所急備之  
或以爲迂且勞費公曰能知費之爲省乃真能省費者也水至乃

大服故十五年原陽之支河十八年盛漲八尺之水皆決口而有餘卒以無事或以爲天幸然前公任三年祥符決公卒逾一年南岸又決二十三年又決則豈非人事哉宜吏民羣思公以爲神且立廟也

梅曾亮曰公之令安陽武陟守開封時折疑獄如神他人有一事足爲循吏然於公猶非其大者傳曰心誠求之雖不中不遠公治河能通物性以盡利誠壹故也況求民情也哉

右家傳梅曾亮撰

山西栗恭勤公毓美由拔貢知縣官至太子太保東河總督爲治河名臣知縣事時善決獄嘗至滑縣查災聞習教者多而匪徒乘

荒肆掠勸知縣強公嚴密防範並往白太守未幾果亂沿及畿輔天下震驚人乃服公之先見其治河也剗造輒工深悉柳葦稽料易腐虛費卽碎石亦緣灘面串溝阻隔船運且輒與石較節省經費尤多於是破除浮議不解勞怨決計行之遂連歲奏績疊邀

優敘年六十三卒於河防工次 上聞震悼卹典綦厚河南人如喪考妣卽建祠處處祀之公歿之明年河決開封各官晝夜堵築當合龍之際河工忽來一蛇眾謹迎之蓋河將合龍河神必化蛇至有金龍四大王朱大王齊大王等神老於河工者見蛇之色而知爲某某嘗稱其號以金盤迓之蛇卽躍入以河督肩輿迎至廟中祭饗數日俟龍合蛇乃不見是役也蛇作灰色非向所見者歷

祝以某某大王均不爲動眾大惑巡撫牛公鑑聞之至河濱一見  
咤曰是粟大人耶蛇遂躍入盤中越日下埽平安葺事眾問巡撫  
曰何以識爲粟公耶曰粟公項下有白瘻風周圍似玉我見此蛇  
頸有白圈疑是渠化身呼之而應渠真作河神矣於是奏請以公  
列入河神祀典公六歲就塾師屬對句星垂天放彈卽對以月照  
海含珠九歲學爲文落筆灑灑如宿構同縣某翁相攸得之招至  
家令與子讀同臥起者數年一夕盜殺翁子室扃如故無跡可尋  
眾疑公公無以自明官亦不能爲之明已論抵矣女另醮同里富  
人王某婚數日王醉告女曰吾慕汝才色以重貲募劍客本欲殺  
粟不意誤中汝弟也女聞之殊自若翌日歸甯則徑入縣署號呼



官提王究不能置辯乃收王而出公於獄女見公泣語之曰吾所以忍爲此者以弟之仇君之怨非吾不能雪也今已白矣身旣他屬不能復事君亦再無歸王理計惟一死耳遂對公自死合邑皆驚其節烈公感其義通顯後爲位祀於別室者終身

右記陳其元撰

國家懷柔百神河神載在祀典每遇防河濟運顯靈經歷任河漕兩督奏於常例外 頒賜藏香復請 錫封賜扁有差夫禦災捍患功德在民固 褒賞所必及也惟近年河工久停而漕船北行沿河挽運督運諸員神奇其說幾乎以請封請扁爲常似非政體攷黃大王事蹟見池北偶談其人 國初尙在至朱大王卽河督

朱之錫栗大王卽河督栗毓美夫會典無異姓封王之例稱謂亦  
恐不經況諸臣所據爲顯應者尤誕妄無稽乎按河神助順必先  
有水族見形河漕  
各督卽迎之致祭其朱色者眾以  
謂之錫栗色者眾以謂毓美也安得一深明典禮之儒臣俾任  
秩宗釐正其失

右紀聞陳康祺撰

百四十一頁  
庚子年  
二月

三

吳廷琛

棣華吳公既歿之明年孤思樹等來徵幽竈之文憶昔成進士故事臚傳前一日進呈十卷君褒然居首余隨後塵於宮門外相識嗣同官翰林晚歲聚吳閩聯締倍洽曷敢辭按狀公姓吳氏諱廷琛字震南棣華其號隸籍蘇之元和溯明成化間始祖聞可公爲泰伯九十四世孫遞傳至公曾祖諱仁昭歲貢生曾祖妣汪祖諱士楷考諱文燿俱太學生祖妣王妣章並以 覃恩贈如例君同氣四人行爲季髫齡資穎疑有宿慧乾隆戊申年十六初應縣試歷其曹時山右康茂園廉訪校合郡儒童奇賞君因字以弟之女未婚也王子舉於鄉癸丑禮闈後始結褵踰數科嘗讀書西山益



自淬厲嘉慶壬戌遂魁南宮比 廷對復擢狀頭故 御製詩有  
雙元獨冠三吳彥之句蓋 本朝來似此者先祇得九逮君乃盈  
十而 天題榮寵則曩所未有也甲子典試湖南旋督學君雖授  
職尙與庶常同教習驟秉英蕩稱異數乙丑按各部躬親披閱屏  
絕弊竇丙寅春丁內艱回里戊辰服闋北上己巳甫散館適逢京  
察膺上考庚午夏出守浙中補金華府金華號學道鄉君追緬賢  
哲訪民瘼銳志興革新文廟勅育嬰堂城外雙溪橋久燬渡以舟  
水漲多覆溺修建費鉅議每中輟君至勸諭勾資眾服治行捐輸  
全集工竟成名曰通濟人無病涉焉臨婺六載善舉率類是丙子  
量移杭州聞永康東陽諸邑旱急往巡視鄰氓遮道迎送幾數萬

杭省垣要區他郡讞訟咸取裁定君綜覈名實黜或偏徇大府惟  
黃梅帥仙舟師契合師固海內傾慕者餘亦侃侃自將歷監司守  
常不變噫世俗喜脂韋仕途彌甚往往明知而暗詘桔槔俯仰冀  
邀薦牘風軌如君殆空谷足音矣道光壬午遷直隸清河道兼護  
臬篆畿輔京控案若縑絲君按日鞫訊夜繕奏彙至三鼓勿休詰  
旦詣轅連平顏惺甫制軍極推許據詞入告卽蒙 俞允終君任  
未干部駁歲杪 簡授雲南按察使滇僻遠折獄疏略君嚴加整  
飭罪必當情有宜良江川通海三縣民家被盜宰諱爲竊民具控  
君慎選屬吏赴勘并戒以儻稍袒庇乃從并救人追偵確果係盜  
劫上之督撫頗猶豫君力爭爰劾罷三令而議守望巡防之法盜

風衰息外此平反者難悉數乙酉權藩篆知銅庫虧乏由廠員半  
償私債徹底清釐覆盡發徑詳定勒限追繳一月後東西兩道報  
各廠豐收銅政大起丙戌九月內 召以四品京堂用君宦情本  
澹念年近周甲距家萬里而地高風烈頻患嗽藉是賦閒可假還  
調治丁亥秋引疾荷 恩準遽歸歸數年優游養病雅不欲出山  
然賑荒歎築郡城肩任無少諉與伯兄鑑庵太常夙友愛太常八  
旬有奇猶健雖異宅過從靡間仲叔早世槍鶴原善撫遺孤復偕  
太常立支祠俾高曾下子孫會祀其餘賙族濟窮事繁不備紀紀  
其大者生平不屑屑章句而經典實通貫文章道雋制義尤醞釀  
深厚元墨風行當代奉爲圭璋詩格最超及感時論事宗法杜陵



身處林泉繫懷魏闕但素惡炫名中年以前槩勿著錄至是始訂歸田集若干卷君卒於道光甲辰九月初三日距生乾隆癸巳二月十八日年七十有二嗚呼自君之歸也蘇臺方結問梅詩社余暨君廁其間觴詠甚樂無何石琢堂前輩韓桂船司寇彭葦間太守尤春帆舍人先後物故所仰者唯君而君又棄余去且壬戌同歲生數愈寥落東南之地獨區區勉偷視息迴首陶文毅公撫吳繪小滄浪七友圖時空勞夢想君少余四歲余乃爲君誌墓存歿之感烏能不悄焉而悲嘅焉而歎也君元配康淑人越二年卽卒未有子章太夫人命太常第三子承嗣卽思樹也舉乙酉科鄉試爲粵東樂昌令調署香山庚子英夷犯順香山當要衝君馳諭曰



食祿宜效忠幸退賊固佳萬一不測若瑟縮偷生非吾子也思樹  
得書振奮竭力堵禦城獲全君之持大義如此繼配陶淑人卒於  
杭署生子三毓英太學生布政司經歷銜金鑑府廩生毓華兩浙  
批驗大使筵李氏生子二毓蕃邑增生毓幹府庠生又趙氏生子  
一毓滋議敘縣丞女三二適士族一未字孫十八質生議敘縣丞  
福生未娶殤春生樂生源生思樹出崧生清沅俱入泮曼生蕙生  
毓英出旭生議敘八品銜耆生金鑑出敬生毓華出嘉生戩生繩  
生傳生毓蕃出寅生安生毓幹出孫女十六曾孫二曾裕曾植曾  
孫女四今道光二十五年九月初二日葬元邑廿九都六圖續字  
圩揚賢橋二配之舊塋銘曰

敦品則懿勤學則粹宜掇巍科 九重嘉獎目爲名榜傳徧玉珂  
剖符守正陳臬式敬無敢依阿吏民咸服爭迂行轂導之以和戒  
諱凶盜戒肆侵冒嚴而不苛請解簪綬樂處巖藪未竟厥施文譽  
丕顯藝林冠冕永維世儀伉儷同宅勒此貞石千秋弗劇

右墓誌銘朱珩撰

匡  
耳  
行  
屬  
次  
有  
才  
系  
牙  
一  
一  
一  
一

三

申啟

申啟賢河南延津人嘉慶七年進士改庶吉士十三年散館授檢討十五年充山西鄉試副考官十八年七月記名以御史用八月充順天鄉試同考官十二月補福建道監察御史十九年閏二月奏言地方官身膺民社當巡歷鄉村化導士庶用以體察輿情使有名要犯亦得親身密查 上嘉納之八月轉掌江西道監察御史九月奏言地方大員宜崇儉去奢以培民氣嚴禁賭博以靖民風 上是之尋劾河南滑縣知縣孟祀贍收畱難民之女爲妾並私匿叛產等劣款 上命侍郎盧蔭溥成格往按鞠實 諭曰該御史得有風聞詳加訪察所奏見已得實殊爲可嘉申啟賢著



賞加一級十月遷兵科給事中二十年升鴻臚寺卿二十一年遷奉天府府丞兼學政二十三年上莅陪都賞加一級二十四年調太常寺少卿二十五年補通政使司副使八月稽察右翼宗學十一月升順天府府尹道光元年直隸山東所屬地方蝗蝻萌生州縣官撲捕不力互相推諉奏請嚴禁並酌增捕蝗章程四條一驅蝻官雇夫役恐有隨意踐蹋者惟先相度生蝻之處地段大小用夫若干每名使驅一隴每十名以一役督之官親觀之使皆執持婦帚或柳枝按隴齊驅並肩徐進不許參差一有蝻之處按隴從一頭逐之至隴畔復添人週圍徐驅令其攢湊一處卽用葦箔圍之邊壓以土不使露隙惟畱窄門其門口用大水缸斜埋地

中缸沿與地相平再使人入葦箔驅之俾蝻至門口溜入缸中不能復出一蝗蝻皆性向火詩所謂秉畀炎火實捕蝗古法應於隴畔挑濠濠邊然火蝻皆奔赴使人從後驅之令跳入濠內或裝袋中以水煮之或在濠內以火焚之至成蝗生翅卽於田畔然柴蝗卽飛撲翅被焚燒須臾可得數十斤一雨際蝗翅淋溼捕捉甚易此時加價收買男婦老稚皆踊躍從事疏入如所議行三年耕藉禮成上以執事各員豫備甚爲整齊賞加一級五年正月京察屆期諭曰申啟賢在任數年辦理妥協著交部議敘三月擢倉場侍郎先是江南高堰漫口清水宣泄清江浦一帶河道淺阻有妨漕運不能抵通廷臣定議海運十二月戶部奏來歲海運

米石到津起卸請豫定章程 上命直隸總督倉場侍郎議奏啟  
賢奏議十一款一沙船到津如有米色微變由該商於准折耗米  
內賠補其未至微變若干石到壩時再受潮溼責令經紀船戶分  
賠一商船領運應給經紀等箇兒錢飯米折色及津貼等銀均係  
官爲經理儻有藉端需索情事嚴加問擬一戶部奏定添置口袋  
五萬條木斛百隻請於通濟庫給發置辦一需用剝船每以損壞  
者充數應令地方官認真查看如有滲漏卽將承辦之員嚴參一  
漕運於石壩起卸後由裏河轉運大通橋如有短少潮溼米石惟  
經紀是問不得牽涉外河剝船以杜抵賴一漕糧由朝陽門進城  
所有城外四倉並通倉拉運俸米甲米車輛請由東直門崇文門



分行以免擁擠一明年海運南糧及北倉滯漕爲數較多車輛不敷挽運添車置袋公項又致多糜請於城外四倉空廩及號房暫行囤貯騰袋運送以節糜費而速轉運一剝船腳餽飯米折色及津貼等銀請開三成交押運員弁帶領到壩後有潮濕短少等弊卽將三成扣抵一北倉折卸漕糧抗腳乞符等項應令直隸藩司天津道豫先籌款辦理一經紀在津起卸並沿途照料其飯米折色應量予加增海運漕米對船起卸囤貯過斛折耗較多請酌添耗米以示體恤至例給經紀津貼等項需銀九萬三千餘兩除以應繳筒袋銀兩作抵外仍不敷銀七萬五千餘兩請於天津運道兩庫墊發仍由兩江解還歸款一白糧米質鮮嫩請照向例備用



麻袋裝運到津另行起卸專用民船裝載運通起卸後經紀自行  
運倉以昭慎重疏入議行六年二月江蘇巡撫陶澍奏海運沙船  
見已開出十激一遇順風旬餘即可抵津 上命理藩院尙書穆  
彭阿前往天津會同倉場侍郎申啟賢驗收三月奏言商船大致  
平穩惟海運事屬試行辦理諸係初始章程雖經奏定機宜全在  
臨時或爲章程所未及而見待講求或爲章程所已詳而益求盡  
善隨時酌辦臨事籌商見在起運便捷商情踴躍疏入得 旨褒  
嘉五月以北倉存貯米糧變色奏請著落經紀賠補 上命穆彭  
阿就近查訊旋查明壞米二萬二千五百石黃色米二萬七千五  
百石並究出經紀于豐等上年豫留四倉收貯此米彼時米已潮

溼並不乾潔以致黻變奏入 諭令倉場侍郎將上年驗米之坐糧廳監督查明奏參並將經紀人等解交刑部審訊復 命穆彰阿會同倉場侍郎將黃色米二萬七千五百石估定成色報部覈辦六月戶部奏言據穆彰阿等覆稱估計米色不足七成難資搭放 諭曰上年豫省碾運京倉粟米經申啟賢在北倉督同坐糧廳安志驗收據奏米色俱係乾潔本年復以米質黻變係安志朦混驗收入奏當交穆彰阿等覈實估計茲據查明米色俱不足七成申啟賢身任倉場侍郎收米是其專責乃於此等受溼米石並未查明所司何事申啟賢著先行開缺來京聽候部議九月刑部奏訊明經紀貪贓舞弊啟賢有失覺察疏入得 旨申啟賢督辦

收米是其專責各經紀得贓朦收毫無見聞其咎甚重本應交部  
嚴議姑念該侍郎前與百春籌辦海運事宜尙屬妥善百春已賞  
加一級申啟賢著從寬降一級調用七年五月補內閣學士兼禮  
部侍郎銜十二月擢工部右侍郎兼管錢法堂事務八年提督江  
蘇學政十年九月得旨申啟賢著管理順天府府尹事務十月  
回京十一年正月充經筵講官五月調吏部右侍郎六月充江南  
鄉試正考官十二年正月調戶部左侍郎六月偕府尹徐鏞酌擬  
保甲章程臚陳四事一清戶口以便稽查一嚴比伍以覈奸慝一  
散冊簿以免滋擾一省繁文以杜需索疏入諭曰申啟賢等奏  
酌擬保甲簡明條款詳加披閱均屬周妥第行法惟視乎人爲政



貴持以久嗣後應嚴飭該地方官認真稽查實力奉行又籌議平糶章程六條一廠地宜同圍分設一禁米石攬和糠土一糶價毋許私增一升斗宜較準一禁囤戶冒買一禁吏胥勒索均如所議行九月奏請清釐各直省常平倉穀以重倉儲得旨常平倉之設原以惠民立法最爲良善惟久貯穀石不無朽蠹之虞因之推陳出新亦有出糶之例乃近年各州縣於旣出糶之後並不隨時買補僅以糶價存公屢經交代那新掩舊任意侵吞以致倉庾空虛毫無儲備卽穀價亦虛無著設遇緩急其何以濟本年夏間經申啟賢等確查順天各屬倉儲其武清等十州縣尙有存貯於額數不能無虧此外顆粒無存近畿如此各省可知著各直省督撫



查明各州縣常平倉向儲額數無虧卽遵照向例每年推陳出新  
妥爲收貯其有已經出糶而未買補責令察看年成隨時買補不  
得任聽吏胥藉口滋擾若有交代那移銀穀俱無者著嚴行勒追  
照數買補務令實貯在倉儻仍視爲具文復蹈前轍經朕訪聞查  
有虧短惟該督撫是問十五年七月調吏部左侍郎八月充順天  
鄉試副考官九月授山西巡撫十一月查閱省城營伍奏請將參  
將守備等員分別降調 諭曰巡撫職兼提督校閱營伍據實考  
覈分別示懲本屬分內應辦之事申啟賢甫經外任營伍素未熟  
悉一切操防訓練諸恐未必盡滿朕意然如所奏虛報弓力鳥槍  
擡礮竟有全未到靶者撫標係巡撫專轄城守近在省垣如果爾

心訓練其強弱更易周知前任巡撫鄂順安在任數年營務如此廢弛實屬辜恩溺職且本年山西輪應較閱之期哈朗阿祥康皆係朕親信大臣特派前往宜如何實心甄別不避嫌怨今省城營伍如此各營似此者不知凡幾是其較閱時一味顛預搪塞了事全不以公事爲重殊失朕特簡大臣整飭營伍之至意哈朗阿祥康鄂順安均著交部嚴加議處十六年以各州縣疲玩因循營私作僞每於莅任之初不問地方利病但問缺分肥瘠到任以後一切公事諉之幕友任之書役並不肅心例案奏請恭刊順治十二年御製人臣做心論雍正八年欽定訓飭州縣規條頒布通省官員以爲準繩疏入上從之並諭令各督撫俱卽遵照原

書敬謹刊刻頒發所屬實力奉行十七年定襄縣生員張保義呈  
控知縣黃旭於本年上忙錢糧具詳請緩仍復催徵啟賢奏請解  
任提省親訊 諭曰各直省設立州縣原期爲民興利除弊果能  
勤恤民隱潔己奉公何致紛紛上控該督撫果親提嚴訊查係民  
人誣控卽從嚴懲辦以儆刁風或該州縣貪婪營私審斷失實亦  
卽據實參劾予以應得之罪以服眾心乃近來各直省控案該督  
撫等每批與屬員審訊甚或批回本府本州辦理以致徇情枉斷  
將就了結羣疑眾謗京控不休殊非實心任事之道嗣後各直省  
督撫於民人控告官吏之案務當親提嚴鞫以申啟賢爲法尋訊  
明黃旭不能體察輿情且於平糶時失察書役混行開銷應請交

部嚴議下部議行十八年五月籌議查禁鴉片煙章程四條一力  
禁出洋賣運以塞來源一重懲官署吸食以示準則一嚴開館之  
條不令煽誘一加興販之罪俾免流傳疏入 命大學士軍機大  
臣會同各該衙門議奏議上 諭曰朕惟姑息非所以愛民明刑  
卽所以弼教鴉片來自外夷海販竅口實爲禍首罪魁非一律從  
嚴禁實重典不足以防偷漏而塞來源至吸食一日不斷則興販  
一日不絕亦不得稍從寬宥今定以死罪立限嚴懲庶幾根株淨  
絕立挽澆風朕言出法隨決不寬貸各懷遵毋忽十九年卒 諭  
曰山西巡撫申啟賢由翰林游躋卿貳外擢巡撫辦事細心不辭  
勞瘁前因染患喉痺迭經賞假調理冀就全愈深資倚任遽聞溘



逝殊堪軫惜申啟賢著照尚書例賜卹任內一切處分悉予開復  
 應得卹典設衙門查例具奏伊子申承祖著賞給主事服闋後以  
 各部主事用尋 賜祭葬諡文恪子承祖二品應生見官巨部主  
 事

右 國史館本傳

國朝青獻類徵初編卷二百一目錄

驅臣五十三

陶澍

國朝通志卷之二

--	--	--	--	--	--	--	--	--	--

國朝耆獻類徵初編卷二百一

通奉大夫前署江西巡撫江西布政使司布政使湘陰李桓輯

疆臣五十三

陶澍

陶澍湖南安化人嘉慶七年進士改翰林院庶吉士十年散館授職編修十五年充四川鄉試副考官十八年記名以御史用十九年三月補江南道監察御史充會試同考官十月奏劾吏部重籤之弊於掣籤既定之後將續到人員重爲設籤令其補掣如掣得第一名卽插入初掣第一名後謂之重一籤旣開濫倖之門必啟賄託之漸請將重掣名目槩行停止 上甚是之十一月 命巡



視中城十二月奏言各省州縣錮弊日深皆由該管上司不能正  
已率屬如勒接交代多攤捐款預備賞號派辦供給壓薦幕友濫  
送長隨委員需索提省羈留諸弊督撫藩臬中雖賢者或亦不免  
以致不肖之州縣既有所挾持以無恐而循良之州縣又有所牽  
掣而不能應請悉予裁革庶吏治日有起色 從之二十年正月  
奏教習之設原以教育八旗子弟非祇爲應試人員增一出身之  
路向由禮部奏請 欽派大臣糊名扁試秉公甄錄所以重訓課  
而嚴弊混法至善也後改於鄉會試落卷內挑取遂致辦理參錯  
多有格礙請復考試教習舊例庶於 國不教習八旗之典方爲  
有名有實下大學士軍機大臣等議行三月調陝西道監察御史

四月遷戶科給事中九月 命巡視淮安漕務二十一年二月奏  
陳鎮江運河事宜一練湖宜濬治一甘露港宜挑深一閘座宜整  
理一積土宜起除疏入下兩江總督查辦八月轉吏科掌印給事  
中二十三年四月俸滿記名以道員用十月巡視東城二十四年  
授四川川東道二十五年遷山西按察使道光元年八月調福建  
按察使十月擢安徽布政使三年正月授巡撫二月 上以安徽  
省倉庫錢糧虧數甚多曾經五次清查尙有轉轉款目 命澍逐  
細確查籌定章程覈實辦理三月覆奏從前歷次清查僅以州縣  
開報入冊之數定案不實不盡因思州縣虧缺藩司衙門俱有檔  
案可稽隨將各州縣欠解正雜錢糧並應捐未解各款分析開出

以司庫之檔案據州縣之冊報虛實立見計自嘉慶二十五年以前其虧銀十三萬餘兩穀米麥豆一萬餘石察其致虧之由多係因公賠累以及衝途款區入不敷出輾轉那墊成虧尙非侵盜入己懇請暫緩治罪勒限著追竊以追補舊欠必先杜絕新虧杜絕之法亦惟嚴交代提存庫減捐款禁流攤數端尤以有犯必懲俾後來不致效尤惟有極力整刷務使從前之宿累全清此後之章程悉定並酌議追補章程十條以聞均從之五年二月奏洪澤一湖必藉淮源旺盛方資收蓄敵黃自應多方導引以助其勢勘明各處情形壽州境之城西湖鳳臺縣境之蕪岡湖鳳陽縣境之花源湖均可抽溝入淮又懷遠縣新漲沙洲爲上游各州縣之



患必須再開引河數道除城西蕉岡兩湖係該民人自辦外其花源湖及新漲沙洲請動用開款剋期興辦又以淮水紆回一交伏汛每汪洋一片橫溢民田祇有築隄束水俾清流暢入湖心既可蓄以敵黃而兩岸民田即可藉隄保衛但經費浩大無從籌措應責成地方官隨時督勸百姓設法辦理自可漸著成效 諭曰興水利除水患莫大之善政也固不可徒費周章亦不可始勤終怠詳慎勉之四月奏安徽自分省以來未有志書於掌故難免闕漏請設局纂修 上允其請五月調江蘇巡撫旋奏安徽勸設義倉章程十二條得 旨所議州縣中每鄉每村公設一倉秋後聽民捐輸歲歉酌量散給出納悉由民間經手不假官吏防侵蝕以禁



騷擾矜貧寡而杜爭端各條著卽移交新任巡撫照議辦理先是  
洪澤湖決口運道艱阻協辦大學士英和請暫雇海船以分滯運  
酌折漕額以資治河 上命澍悉心妥議六月覆奏海運之法自  
元逮明行之有效止以閱時旣久章程難復然全漕由海運則不  
可而商船未嘗不可分載至折漕一事以江蘇一省言之額漕幾  
及二百萬如以百萬折色約計應折銀二三百萬平時一百數十  
萬之地丁猶以催徵不前矧於數月之內頓加逾倍之徵民間以  
米易銀遽難出糶勢必穀賤傷農至停運治河京師萬方輻輳漕  
米而外需用甚多若南方之貨物不至北方之棗豆難銷物情殊  
多未便是折漕與停運均不可行大抵專辦海運則恐商船不足

專辦河運又恐清水難恃來歲當以海河並運可期無誤 諭曰  
停運折漕竟無庸置議海運一事著俟藩司賀長齡赴海口查勘  
情形卽將一切章程妥議具奏十一月疏陳海運事宜一驗米應  
責成糧道會同蘇松太道監兌一赴津交米應分別委員前往一  
交米委員以到天津爲竣事無須再至通倉一協濟天津通倉銀  
兩由蘇省籌款解交一押運宜遴委武職大員得 旨允行六年  
二月澍至上海督辦海運趕緊斛兌隨兌隨開奏言海運水程自  
吳淞口出十漈東向大洋至余山北向鐵槎山歷成山西轉之眾  
島稍北抵天津總計水程四千餘里春夏之時東南風多行走尤  
爲順利並繪圖貼說以進又奏漕米經由大海應由水師營汛帶

兵防護以重巡防而昭整肅又奏載米沙船酌給船戶耗米到津兌交額糧後合計餘贖不下十萬餘石請照糧船餘米之例就近官爲收買四月奏蘇省海運應將歷年緩帶米石隨同新漕搭運赴津惟本年起運全漕米數甚多民鮮蓋藏請畱備本省糶買以濟民食卽以糶出之項抵補天津收買沙船耗米之價一轉移閒於太倉無損毫末而民食得以充裕均如所請行六月初運商船回棹澍復至上海督辦次運通計裝載正耗各米一百六十三萬三千餘石前後用船一千五百六十二隻埽數斛交完竣因奏言海運卹始人情觀望商船旣虞壓雇復懼難交畏縮避匿其難一也河運弁丁數千沿途照料尙不免風火沈失今以新定章程責



之素不相習之委員保無疎損其難二也各州縣米赴上海同時  
雇撥船隻難敷其難三也黃浦水次既恐停船待米又恐米到船  
稀盤量稍稽卽誤風汛其難四也海運用費初無成式籌畫稍疎  
官民藉口其難五也商船赴天津風利東南回帆又宜西北萬一  
停阻有妨二運其難六也茲幸商情感奮民廛安堵自開兌以至  
戡事諸極順利見在督飭放行約計六月下旬卽可全抵天津  
諭曰上年河務阻滯諸臣奏請試行海運事屬初始辦理維艱在  
事臣工竭誠宣力籌畫周詳陶澍親駐督辦深協機宜著賞戴花  
翎七月奏本年夏閒雨水過多洪湖啟放較早附近州縣悉被水  
淹見就災民棲止之區隨查隨賑俟水退人歸再行按戶辦理九



月奏江北被水災民就食南來見在籌辦撫卹擬擇棲止以資安  
集設籤冊以便稽查散口糧以資養贍別男女以重廉恥施醫藥  
以拯疾病給棉衣以禦寒冷禁販賣以杜拐掠設巡卡以防匪類  
俟上游各壩堵合田廬涸出該民人即可還歸原籍自謀生業俾  
免流移得旨正深塵注覽奏精詳周妥朕心稍慰十一月奏江  
蘇漕務閭閻每苦浮收而各州縣用度浩繁不能不藉資津貼抗  
玩者卽因此挾制以爲控端在顛預之州縣未必諒百姓之苦在  
顛愚之百姓亦未必悉州縣之難互相詬病而皆不爲無因惟有  
一種病官病民大爲漕害革除不可不亟者包漕衿棍橫索陋規  
稍不遂意非逞兇鬧倉卽連名捏控人數最多之處生監或至三

四百名漕規竟有二三萬兩既藉控爲抗以遂其包攬之私尤仗  
訟分肥以長其白規之數必應力挽頽風使衿棍無可挾持庶陋  
規可革費用自省而閭閻可期蘇息 上甚是之七年二月奏徒  
陽漕船前因西風潮弱致有淺阻臣親詣勘視督同道府擇要爬  
疏惟西閘門外至江口一帶無可攔蓄一遇潮退江水頓落船不  
能出擬用沙囊堵塞潮至則啟復設活水板閘潮來時啟一板而  
各板皆鬆抽卸卽易蓄送亦靈雖小汛期內亦得挨次放船本年  
漕運爲河務一大轉機惟有竭力督催俾得及早渡黃以全大局  
奏入報 聞時學政辛從益條陳漕務積弊 詔澍查辦並將收  
漕章程酌中定制五月覆奏前言刁徒橫索陋規日添勢必取償

鄉曲之清良爲補短率長之計以致浮者愈浮苦者愈苦乃此閒  
受弊之實在情形而學臣以爲官吏婪索是其常態縱無此等生  
監而小民之被苛徵亦不能少減殊不知陋規卽出於浮收欲減  
浮收先裁陋規實一定之理若料有司之不減而謂陋規可存而  
不論已非釜底抽薪之計况整飭士習首嚴義利之辨以主持教  
化者而爲此論似非所以訓士也正恐刁生劣監恃以無恐則陋  
規終難盡革而小民之累無窮甚或釀戎事端則所傷實多轉非  
所以保全善類夫徇眾沽名其勢順而易力挽頽風其勢逆而難  
斷不敢畏難避怨致令刁風日長民困難蘇又奏收漕一節嘉慶  
年間屢有八折完漕之議迄未能行蓋年歲之豐歉難齊地方之



繁簡亦異情形不能一例此時酌定收數原爲津貼而設萬一不肖官吏久且視爲定額而更有所加則作法於涼已非整頓之初意且刁徒訐告其意不在浮收而在需索即使定爲加二亦無難以加五加六捏詞妄控惟有力加整頓既不使不肖官吏浮勒病民亦不容衿棍把持藉端訐告似不必另議章程轉虞窒礙上題其言九年二月安徽省通志書成上以此書由陶澍勅修下部議敘十年六月以假照案內要犯任松宇劉東昇迅卽就獲賞加太子少保銜尋兼署兩江總督八月實授仍兼署巡撫十月以淮漕疲敝已極縷陳積弊情形並請刪減浮費停緩攤補命戶部尙書王鼎侍郎寶興同往查辦十二月查明運庫墊占虧缺



各項會奏略言兩淮正雜錢糧本係按綱徵收而外支各款則係按年支用如能一綱之鹽年額年銷則運庫解支自可年清年款無如口岸滯銷以後正課則統引分攤而雜款必須按年支發數十年來庫款之套搭那墊致虧銀數千萬之多皆由於此惟有將前項積欠暫緩攤帶自道光十一年辛卯開綱日起截清前積以斷葛藤庶可從新整理漸復舊規又言淮綱全局詳加綜覈力求課歸場竈之法大要有三而皆有窒礙之處一由竈丁起科竈丁皆濱海貧民若令先納課而後賣鹽則力有未逮抑令先賣鹽而後納課設遇歉產之日勢必課宕丁逃且場鹽每斤向賣制錢一二文三四文不等今加入課銀六釐是課重本輕仍難免透私之

弊此竈丁起科之難行也一由垣商納課招徠殷商令其認課包納竈鹽悉歸該商經理寓散於整較爲扼要惟竈戶以己業而聽命商人情必不願況商人惟利是視秤收則勒以重斤借貸則要以重息竈戶狃於售私職此之故竈不樂以鹽歸垣商亦必無貨完課此垣商納課之難行也一由場官收稅就各場產鹽引額攤定課額官爲經理似覺覈實無如每場應徵銀數十萬兩鹽場徵員豈能任此巨帑況試行之初額難懸定若聽其儘收儘解難保不匿報侵欺兼之場署多在海濱無城郭營汛防衛徵解亦恐有疏虞此場官收稅之難行也至於就井抽稅滇省雖有成效但兩淮場地延袤八百里非若滇省一井一官卽能查察未易做照辦

理即使先爲試辦而清竈僉商改官變法非一二年規模不能粗  
定且商販通行又必南侵閩浙北侵蘆潞若不統各省嵯務通盤  
籌畫實不免此盈彼絀之虞況此一二年中課額未可長懸場鹽  
未可停捆各岸食鹽更未可久缺伏思淮鹽定制逐層防範原屬  
至周至密惟有將舊章大加釐剔使射利者無可藉端欠課者無  
可藉口似較課歸場竈之法確有舊轍可循謹擬定章程十五條  
一裁減浮費一刪減窩價一刪減繁文一慎重出納一裁選商總  
一酌覈帶銷一積欠宜緩一宜恤竈丁一實給船價一嚴究淹消  
一疏浚運道一添置岸店一亟散輪規一整飭紀綱一淮北另籌  
其餘未盡事宜應隨時覈辦 諭曰據王鼎等奏鹽政無管轄地



方之責疏銷巡緝難期令行禁止著將兩淮鹽務改歸總督管理  
所有鹽政一缺著卽裁撤其會議酌定章程仍著照所議行十一  
年正月澍疏言鹺務章程甫立節目尙多如減價敵私諸條皆商  
情所不樂諉口所易騰一時未必帖然自應從實妥辦一有瞻玩  
卽追革究治方足以資整頓惟見在商人力能辦運者不過二三  
十家新商僉募尙需時日本年新鹽卽截清界限於春月開網而  
行抵楚西各岸已在夏秋之際明歲奏銷勢不能如期完竣不得  
不預行陳明得 旨明歲奏銷准其稍寬時日屆期奏明辦理樹  
又言兩淮商情疲敝若責令照額捆鹽自行賠補拋耗勢必仍圖  
夾帶隱占新綱應請每引捆鹽酌爲加數以五百斤出場除額鹽



三百六十四斤仍照案賞加鹽二十斤並例給暑月滷耗十六斤作爲常年拋灑其餘一百斤照依新綱科則帶完前綱正課此外如再有顆粒私增定卽嚴提重懲庶隱私可絕而國課自裕下部議行又以本任總督養廉已極優厚所有鹽政養廉五千兩應行恭繳至鹽政衙門浮費較多計前後裁減每歲費用銀十六萬餘兩其外支浮費及運司衙門濫支各項應飭查明一併刪減許之三月以兩淮候補各班人數過多差遣旣難徧及優劣亦無從周知查定例運判知事試用五年運判准改捐知縣知事准改補巡檢典史請量爲變通如試用未滿五年均准改捐改補下部議行五月奏江浙漕船半入運河而洪澤湖水驟漲不得不急籌

分洩因簽樁搭橋設關加緯節節挽渡各船順流渡黃全漕完竣  
洪湖水勢旋即漸次消落 上嘉其所辦甚合機宜六月以江淮  
並漲各屬多被淹浸災民遷依堰阜棲食全無自應設法拯濟請  
以銀易錢米隨查隨給以濟然眉 諭曰悽愴景況不堪設想若  
仍拘泥向例查勘分數分析輕重何濟於事務要趕緊拯救均霑  
實惠或可免委於溝壑也八月疏陳拯濟章程十二條一倡率勸  
捐以賙貧乏一資送流民以免羈畱一收養老病以免流徙一勸  
收幼孩以免遺棄一勸諭業戶以養佃農一殮瘞屍棺以免暴露  
一多設糶廠以平市價一變通賚賑以資熟食一捐給絮襖以禦  
冬寒一勸施籽種以備種植一禁止燒鍋以裕穀食一收牧牛隻

以備春耕得 旨所奏俱已詳備覽奏稍慰務須實心實力詳慎  
擇人辦理時廷臣等請課歸場竈或請就場收稅或請做照王守  
仁贛關立場收稅或請撤商歸竈徵其課稅 詔樹籌議樹以兩  
淮鹽課甚重鹽在場竈每斤僅值制錢一二文一經收稅則價隨  
課長爭其利者必多比戶皆私課稅因而更紬至於設廠抽稅則  
道路四通八達安必處處有隘可守繞越漏私更甚若淮鹽任其  
所之他省已受其害鹽法紛更愈甚關係愈大利權不操於上必  
移於下恐豪強之徒得據爲利其患有甚於私梟惟有認真督辦  
儻能得有起色則成法卽無庸另議更張萬一無可挽回再請另  
行籌辦疏入 允之又奏淮北綱鹽官督商辦滯岸無鹽濟售請



照山東浙江票引兼行法於海州所屬中正板浦臨興三場分設  
行店聽民投買運售擇各場要隘處設稅局給照票凡無票及越  
境者以私論如所請行十二年八月御史鮑文瀄奏兩淮鹽務自  
辛卯開網至今尙有三分之二未完若輾轉占礙稽延帑項出入  
憑何筭算且招徠商人未見樂趣或辦理仍未盡善 詔澍查奏  
尋覆言萬難措手之時思復舊規而力單任重實難得有把握蓋  
積重之由不自今始溯查 國初准網正課原祇九十餘萬至嘉  
慶二十年後正雜內外支款竟需八百餘萬嗣是課額多懸轉輸  
無力或數年始行一綱之引或統引而全綱不行商疲課絀百弊  
叢生奏銷不前則謬爲報效以緩正課支用無出則擅動庫款以



應雜需且批解則貼色貼息彌縫則公補公攤庫款既竭典質遂及於根窩私質無憑虛偽遂流爲印本其尤貽患後來者借本認息本罄息存以數十年後之膏血拔而用之於數十年之前而四千餘萬之舊項已空一千餘萬之欠款仍在毋怪乎昔枵而猶能揮霍今斂而彌形枯窘也亟圖整頓實已不遺餘力無如舊商早已消乏新商尙多觀望辦理實形竭蹶惟有敦飭運司就近體察如有可以鼓舞商情之處設法籌辦又總因革除陋規刪減浮費以致物情多怨商情隔絕請仍放鹽政一員專司課項及轉運招徠各務 諭曰陶澍奏請另簡鹽政實屬有心取巧國家設官分職豈容私意更張如果淮鹺疲敝實難整頓何以奉命任事之時

未思及此並無一言陳奏迄乎辦無成效又思更改不過以專管兼管甚相懸殊爲此避重就輕之計如此居心辦事豈公忠體國者之所爲朕總理庶政惟知賞功罰過視乎其人之自取儻辦理不善有負委任惟有執法從事治以應得之罪若如此朝更暮改不成政體朕亦不能對天下矣陶澍著傳旨嚴行申飭九月桃南廳屬奸民偷挖官隄掣動大溜澍以兼轄河工未能先事預防自請議處部議降三級調用上加恩改爲降四級畱任十月因桃南挖隄放水龍窩汛決口工部尙書朱士彥奏見在全黃入湖下河危險請從桃北另開新河使漕船從南岸東下渡河牽挽至桃北以上入運 命澍會同戶部侍郎敬徵南河總督張井履勘籌

議澍等奏查朱士彥所奏改河之事道遠費重且由蕭工挽歸正河舊河底反高新河一丈五寸水性就下必致兩岸皆成倒灌河身依舊淤高於漕運大有關礙請毋庸置議先是御史周彥以票鹽之法利於梟而不利於課其可慮有三等語入告 上以周彥既言有三可慮又云利多害少卽移其法於淮南豈非自相矛盾命澍悉心體察通盤籌畫總期有利無弊至是復言該御史請移其法於淮南蓋未悉淮網南北課額多寡懸殊且票鹽試行於淮北滯岸其運道須待雙金關開放又須渡黃河而涉洪湖抵正陽關之後分赴各岸尙須盤撥故可無虞泛濫淮南之鹽則江海四達無可壅阻淮北引地僅在皖豫一角淮南之楚西等省居各



省之腹中在在鄰界接壤如亦改行票鹽勢必四侵鄰境於各省  
鹽法亦多窒礙 命仍照原議妥辦十三年二月奏淮北票鹽業  
經試行有效應請推廣辦理請將安徽省之壽州河南省之信陽  
等十一州縣一律改行票鹽仍令將安徽省向由江運之桐城等  
八州縣及高郵湖運之天長一縣畱商認辦以固淮南藩籬再票  
鹽指地販運原以保固商岸今商運既不足額票販各口岸自應  
量予變通如所指之地鹽壅銷滯准其於出卡之後就所在地方  
呈明轉運他岸售賣至海州引鹽出場向由雙金閘啟行今請由  
鶯游門灌河口轉尖入黃行走擇要設卡盤驗俾內外河均有水  
可運各岸可無缺鹽之患又奏請將海州營錢家集都司一員把



總外委各一員額外二員馬步兵一百四十名移駐洪澤湖之老子山等處作爲內河水師營以資防禦均下部議行八月奏淮南加帶己庚殘引因各省連年水患未能帶銷占礙正綱應請停止所有商鹽每包五百斤出場解捆正鹽四百斤之外其餘百斤循照割引成例配割本綱正引按照科則正雜錢糧全數完納 命試辦一年果能有盈無絀再准其遞年倣照辦理時漕督貴慶奏沿途派委漕弁搜查回空私鹽有礙遄行請將漕弁撤回並江廣道遠丁苦請於例帶食鹽外加增買帶過揚州時納課給照准其售賣澍奏若遽請將漕弁撤退則幫丁舵水等放膽買鹽其停泊上載必不止如委員搜查之片刻而楚西等省之冬春銷市必盡

爲糧私所占明縱偷漏既有害於漕綱欲速反遲尤有誤於漕運  
況糧船水手素稱桀驁加以順帶官鹽必有梟匪出賃附和其害  
不可勝言以官事而論長蘆課紉有藉詞兩淮鹽壅無去路以實  
情而論所銷盡長蘆之私鹽所缺盡兩淮之官課兼之淮南二十  
場之鹽無從銷售數十萬竈丁生計有妨請仍照成案搜查於漕  
運鹽務地方均有裨益 上甚是之十月御史許球奏回空軍船  
請帶蘆鹽見仍堵截搜查伊等有利未獲而轉觸科條全虧資本  
總督一味濟之以猛是實慶籌議恤丁非徒無益而又害之殊不  
足折服幫丁之心江廣軍船人數眾多萬一另起衅端必致貽誤  
歸次 命澍查辦尋覆言歷來軍船帶私無不以搜查延誤新漕

爲詞迭經奏明如敢藉詞挾制或棄船星散卽嚴拏究辦若如該御史以水手與風客販私有別慮其搜查時貨本均歸烏有是未知所貸之貨卽風客之貨所虧之本卽風客之本鹽爲官物在平民不能縱任販私況糧船水手律有專條何得謂旗丁水手販私與風客究有區別今祇搜起其鹽趨行而過是正因漕務而濟以寬似不得謂一味以猛且漕船私帶未始非前途玩縱所致今若因查鹽而慮其啟衅則盜賊豈無飢寒之可憫梟徒亦有拒捕之堪虞又將何以折服之 上納之十四年正月計典甄敘 上以陶澍辦事實心艱務日有起色下部議敘十月報霜降安瀾下部議敘十二月御史許球以兩淮鹽務辦理支飾情形入奏 諭曰



該督如有天良卽當實力疏銷通盤籌畫儻稍混飾彌縫毫無實效帑課攸關豈容因循貽誤朕惟執法從事斷不稍爲寬貸尋奏言癸巳綱收銀二百七萬六千餘兩比較辛卯綱實多收銀十四萬三千餘兩比較壬辰綱僅少收銀五萬三千餘兩見在未運各引多至一綱有餘此係舊綱未竣並非本綱應運之引兼值頻年災歉商人之成本旣增各岸之疏銷未暢甲午新引見已開綱飭運司趕緊設法辦理因思裁革浮費爲眾怨所歸復以議駁太艱難免藉端報復浮言所至商情觀望應辦事宜不免阻滯然亦不敢避嫌避怨 諭曰嗣後若果有成效年勝一年朕豈有不爲卿作主之理無恤其他若歲歲空言搪塞部中不難稽覈前車未遠



朕不能上下其手也噬臍二字凍之識之十五年入 覲 賜御  
書印心石屋扁額澍以隄務已有起色奏請復設鹽政以專責成  
得 旨陶澍精神才具結實周到正當乘此鹽務日有起色之時  
實力整頓悉心經理方不愧爲國宣力之大臣況兩淮鹽政裁撤  
未久忽撤忽設亦無此政體所請著不准行十七年因河庫道李  
湘芷註考不實下部議處議降二級調用 上加恩改爲降四級  
畱任十八年二月奏淮北引餉原額止二十九萬餘引自改行票  
鹽按年約行四十萬引內外節存經費溢課爲數尙多應請嗣後  
淮北奏銷仍按原額造報此外票鹽溢課及經費餘存并每引酌  
量加徵雜課共可得銀三十餘萬兩以資協貼 許之十九年正

月奏請將淮南戊戌綱懸引提出二十二萬道歸於淮北行銷所有懸引課銀按數抵補足額下部議行二月因病陳請開缺六月卒遺疏入 諭曰前任兩江總督陶澍由翰林游歷科道出膺外任迨擢授兩江總督以來實心任事不避嫌怨上年染患手足痿弛之證迭經賞假俾資調攝今春因病勢日增勉從所請准其開缺冀可專心調理醫治速痊茲聞溘逝殊堪悼惜陶澍著加恩晉贈太子太保銜照尙書例賜卹入祀賢良祠任內一切處分悉予開復應得卹典該衙門察例具奏伊子陶杕著賞給主事俟年及歲時由吏部帶領引見將來靈柩回籍並著沿途地方官妥爲照料用示朕優卹盡臣至意尋 賜祭葬諡文毅

右 國史館本傳

道光十有九年夏六月二日太子少保兩江總督陶公薨於位  
天子聞而震悼 敕加太子太保祀賢良祠 予諡文毅公之孤  
杭方幼奉公遺櫬將歸葬湖南壘辱公知既代狀公行事上之史  
館遂敬銘其幽維公系出晉大司馬長沙桓公唐同光中諱昇者  
始家安化十三傳至公會祖崇雅崇雅生孝信孝信生必銓是爲  
公考鄉賢公三代皆 贈如公官曾祖妣彭祖妣李妣黃皆 贈  
一品夫人鄉賢公子二公其長也嘉慶五年舉鄉試七年成進士  
改翰林院庶吉士十年散館授編修尋丁父憂服闋補官十五年  
充四川鄉試副考官十九年改江西道監察御史巡視中城二十



年授戶科給事中巡視南漕二十一年轉吏科掌印給事中二十四年授四川川東兵備道二十五年今上登極擢山西按察使道光元年兼署布政使九月移福建至京旋擢安徽布政使三年正月擢巡撫五年夏移撫江蘇十年秋加太子少保署兩江總督十月卽真十一年春兼管兩淮鹽政十九年二月以病乞假開缺調理六月薨於兩江節署公爲翰林能詩爲御史能言及備兵川東又爲能吏值今上新政首受知遇二載歷兩司至巡撫其撫安徽釐三十年庫項以清吏治興義倉水利以拯三十州縣之災黎其撫江蘇扞行海運以甦蘇松常鎮太倉之漕困濬吳淞瀏河白茆孟瀆以醜三吳之積潦其督兩江兼司鹺政汰浮費二百



餘萬以劑淮南去五壩十楨改行票鹽以蘇淮北凡所設施不襲  
故常起雷造冰驅庸走智精誠所至窳郤耆開始賊終夷康衢王  
路羣疑朋喪 天定民誠吁可謂智不惑勇不懼者也澤施未竟  
邦楨遽隕匪公之邛斯民之恫公諱澍字子霖號雲汀生乾隆  
四十三年十一月三十日年六十有二配黃夫人側室賀張劉盧  
楊張子二葆賢殤以孫文熊嗣次桃 恩賞主事曾孫應曉女七  
所著有奏疏七十六卷詩文集五十六卷蜀輶日記陶靖節集注  
各如干卷桃奉遺櫬歸湖南以某年月日葬安化資江某原卽  
御書印心石屋摩崖之所也銘曰

沅湘濱澧楚四望並注洞庭濱弗章山迴水複鬱乃昌公奮神斧

剗大荒力振羣靡切非常如彼砥石江中央石不裂兮名不偃矢  
爲臣極爲民綱 天銘所勒公所藏千秋萬歲依 帝旁

右墓誌銘陳夔撰

維道光十有九年夏六月二日太子少保兩江總督陶公薨於位  
天子震悼 詔以公任事勇敢不避嫌怨堪式百辟加太子太  
保入祀賢良祠 予謚文毅並 允淮北士民之請建專祠海州  
明年又 特允入江蘇名宦祠不交部議嗚乎 朝廷所以勸臣  
工風中外者博矣哉 國家承明制矯明弊以內政歸六部外政  
歸十七省總督巡撫而 天子親覽萬幾一切取裁於上百執事  
拱手受成上無權臣方鎮之擅命下無刺史守令之專制雖蒐瑣

中材皆得容身養拙於其閒漸摩既久以推諉爲明哲以因襲爲老成以奉行虛文故事爲得體惡肩荷惡更張惡綜覈名實若斯支襄之勑中河鄂文端之改土歸流皆力戰羣議屢躓屢奮而後勝之以怡賢親王之畿輔水利猶不旋踵而泯蕩故便文畏事窶陋之臣遇大利大害則動色相戒卻步徐視而不肯身預自 仁廟末年以因循泄沓申戒中外而優游成習卒莫之反也東南大計無如漕鹽二百載來文法委曲煩重致利不歸下不歸上而盡歸中飽官民交困閒有講求剔剔芟蕪更革者則中飽蠹蝕之人轟起而交持之道光五年夏漕河大梗萬檣林東 詔江南大吏籌海運維時上海關僧撓於南通倉胥吏撓於北屯船丁役撓於



中不日風濤則日盜賊不日毒變則日繁費 天子移公自安徽  
撫江蘇公憫然一疏任之明年春海艘數千米百六十萬石倏抵  
天津不損一人一舟每百石費僅數十金視河運省費固倍視前  
撫臣章煦所奏海運每百石價三百兩之數且省數倍明年公遂擬  
改蘇松太倉三屬之漕永歸海運以大蘇官民之困先後章程六  
條八條雖事格未竟行而人知海漕利國利民利官爲東南採極  
做第一者自此始道光十年冬公督兩江兼管鹽政承蠲壞之後  
如淮南之窩價淮北之壩槓兩淮之岸費皆浮靡數百萬俾食其  
閒者千億計當事熟視一弊不敢動公謂非減價不能敵私非輕  
本不能減價非裁冗費不能輕本遂奏裁淮南窩價百餘萬江西



湖廣揚州各官費百餘萬又三奏疏駁糧艘夾帶歲少蘆私十數萬引而淮北則初改道不改抽歸局不歸商之制每歲暢行倍額溢課數十萬盡償淮北之積追且劑淮南之懸引末年并欲推淮北之法於淮南條舉規畫甫定而公已病然天下皆知劉晏舊法爲澄源上計不爲綱法所縛持者自此始方公初議海運則南漕北倉撓之議裁漕費則窩商蠶吏撓之議裁糧私則長蘆總漕撓之議改粟鹽則壩夫岸吏撓之議議沸騰奏牘盈尺使公之仔肩稍不力 天子之倚任稍不堅必不能善其後故敬揭公之力羈羣忌而未嘗不舉 恩禮未嘗不卒者於碑以爲封疆大吏勸又以謂今日東南民計 國計莫困於漕鹽公所排決疏導可垂久

大者亦莫如海運與粟鹽後有來者欲大蘇東南之困爲國家籌  
百世利非廣其緒而恢之不可也公諱澍字子霖雲汀其自號也  
湖南安化人嘉慶七年進士由翰林院編修改御史歷戶科吏科  
給事中巡中城巡南漕出爲川東兵備道道光元年擢山西按察  
使安徽布政使三年巡撫安徽五年移撫江蘇十年加太子少保  
總督兩江兼管鹽政卒年六十有二生平所至興革務挈大綱導  
大窾若治安徽之荒政之水利之清釐庫帑治江蘇之松江婁江  
白茆河孟瀆河他人得其一皆足名世而於公則爲緒餘故不悉  
書系出晉大司馬侃曾祖崇雅祖孝信皆 贈如公官考必銓邑  
諸生祀鄉賢祠曾祖妣彭祖妣李妣黃皆 贈一品夫人妻黃夫

人側室賀張劉盧楊張子次栲方八歲 恩賞主事女七所著奏  
議詩文集蜀輶日記陶靖節集注各如干卷以二十年某月日葬  
安化某原源自弱冠識公京師中歲棲遲江左受知至懇以篤會  
預託以身後樂石之文因敢刪舉其大者揭諸麗牲以餉來世銘  
曰

萬生芸芸以利相羣如蠶萃身有奮其除必爬與梳萬眾噩呼鄭  
有國僑唐有文饒始誇終謠我洞其原必橋其偏以對乎天我導  
其始人竟其委以俟君子萬夫之特兼人之力孰幹王國勛在三  
江魂返九江孰幹王邦如暘如月如霜如雪維臣心是勒如雪如  
霜如月如暘維 帝心是傍

右神道碑銘魏源撰

今上御極有自監司首蒙 聖恩建牙開府秉節鉞肩鉅任天下  
推爲一朝柱石之臣者曰湖南安化陶公公號雲汀少篤學幕宋  
范文正公爲人父莫江先生器之效蘇老泉名二子說曰是異日  
澍雨天下乎因名公曰澍嘉慶庚申領鄉薦壬戌成進士供職翰  
林庚午典試川省改御史轉給事中巡視南漕授四川川東道蔣  
礪堂先生督蜀一見曰此總督材也行將大用矣道光改元擢福  
建按察使調山西按察使公論治務持大體使官與民相安尤惡  
矯廉立名誤地方公事山西新疆驛道民舊助官夫馬錢忽告勒  
派公置不問復京控值公升安徽布政使 陛見面奏於 上案



遂定 上問公天下弊何從防起公稽首對曰 皇上如天風雨  
雷霆惟物所自召善惡積久必彰發唐虞三代聖主無以察爲明  
者 上稱善晉安徽巡撫修通志加敬敷書院膏火建義倉捐乳  
嬰堂資收民間兇器百廢次第舉鳳穎蝗起公禱劉猛將軍祠宿  
州蝻子多處青蛙無數食蝗懷遠界烏鵲數萬啄蝗立盡 御書  
神參乘昇扁額五年江蘇運河阻淺 廷議籌海運 上以國家  
河漕二百年一旦航海事屬非常非公不可調公江蘇巡撫公赴  
上海招募沙船商情踊躍千艘入洋浮天無際不逾月逮淀津較  
河運省數百萬事竣加太子少保銜 賞戴花翎公撫皖安慶等  
府江水漲公親往勘蠲緩給振採川廣江西米石減價平糶捐廉

倡屬勸富紳出銀米開粥廠食餓者無爲州被水重築江壩衛田  
廬及撫蘇逾歲江北大水公撫恤如皖及節制兩江十一二等年  
江北大水公撫恤亦如之公精於地理所至之處必登高以觀其  
形勢談山川曲折迴環瞭如指掌江蘇爲天下水利之區匯源於  
太湖而吳淞江爲之委公以爲水利不講則旱澇無備首濬吳淞  
江事重而功鉅益以練湖而蘇松一帶之水利治次孟瀆河繞常  
州全境不惟益灌溉兼濟商賈濬之而常州一帶之水利治建橫  
閘以通漕挑金陵內外河以通江太湖隸吳淞上游自浮門承浙  
水由大缺口入吳淞一併疏鑿復以新漲沙洲歸官儲其財備修  
理河道之用士大夫皆喜曰此百年之利也鹽法之敝極矣兩淮

鹽課甲天下商積欠歲額年減 上命戶部尙書與公議裁鹽政  
使公兼理當是時朝臣奏宜更張不曰歸地丁卽曰加關稅否則  
歸竈戶公議曰歸地丁則病農加關稅則病商歸竈戶則病鄰省  
不如申明舊章淮南課十之九仍責商運淮北課十之一倣浙省  
兼行票引裁浮費二百六十萬謗譏繁興言官交章相攻公持之  
愈堅賴 上委任專數年始稍稍復舊額而公亦以此積勞致疾  
公度量恢宏知人善任操縱屈伸在手而總歸於厚當移節來蘇  
或驚傳登白簡公謂首府庸劣貪懦之員隨時皆可革治督撫莅  
任甄別非定例也桃源奸民陳端決黃河灌洪澤湖公閱兵江西  
聞之馳歸河督已參河員與縣令仍不獲陳端 上旨嚴切議者



謂宜劾承緝不力者解說公不聽惟自引咎時朝在清江謁公曰  
陳端可得矣公問何故翱荅以州縣聞公引咎至於感泣陳端將  
焉逃乎既而果獲兪公陶泉守江甯公越級保鹽運司鹺務之整  
頓實賴其力及其卒也公哭之慟誄曰斯人難再得聞者莫不激  
勸其他爲 上所簡用因公薦仕至督撫兩司者多有名於世蓋  
公與屬員相矢以誠如范文正之守西邊推心置腹將士各自爲  
戰其以人事君汲引如恐不及亦與文正無異爲 國家培養江  
南元氣幾二十年爲人所不肖爲不能爲所向皆成功公疾急求  
解任 上勉從所請 諭以全愈卽行來京請安以慰廛念而公  
已不起矣初公從莫江先生讀書齋號印心石屋江心有石方正



如印 上嘉其名揮翰書之公鐫石金陵官署上以榮 君之賜  
下不敢忘其所學所著奏疏若干卷文集若干卷陶詩集注若干  
卷蜀輶日記若干卷詩集若干卷評家謂公詩不在韓蘇以下

國朝一大宗也公病中無一語及家事幼子服事無戀戀色卒之  
前江甯大雨猶命人扶立默禱十九年六月初二日酉刻端坐而  
逝年六十二遺摺入 上震悼晉太子太保銜照尙書例賜卹入  
祀賢良祠謚文毅子桃 賜主事

論曰昔人有言大雅烝民江漢推大臣下之功實以詠歌宣王之  
德也公總督兩江兼古方伯連帥之任志在法范文正先憂後樂  
以朝觀之公無時不在憂之中何嘗得一日樂乎顧范文正遇宋

仁宗始猶不免齟齬公鞠躬盡瘁得展生平所抱負良以遭逢明聖今上非宋仁宗比也是當於大雅中求之矣

右家傳劉鴻翱撰

公諱澍字子霖號雲汀湖南長沙府安化縣人系出晉大司馬桓公侃侃就封長沙子孫散處吳楚後唐同光元年有諱昇者由吉州遷安化支族蕃衍十五傳至公之考鄉賢公生子二公其長也少從鄉賢公讀書資江濱之水月庵庵俯石門潭兩巖壁立有方石峙出江心公所署印心石屋也公少穎異浩歌山水閒下筆驚人鄉賢公以此忘其貧乾隆五十五年丁黃太夫人憂六十年補邑諸生嘉慶五年中鄉試七年成進士改翰林院庶吉士十年散

館授編修尋聞鄉賢公訃歸里服闋入都十五年充四川鄉試副  
考官十九年改江南道監察御史充會試同考官巡視中城二十  
年轉掌陝西道擢戶科給事中巡視淮安漕務二十一年充順天  
鄉試內監試官授吏科掌印給事中二十二年充會試內監試官  
二十三年巡視東城二十四年授四川川東兵備道公少負經世  
志尤邃史志輿地之學所至山川必登覽形勢訪察利病典試四  
川著蜀輶日記西南要害如指諸掌及爲言官劾部員戀棧忘親  
及吏部重籤河工冒濫外省吏治積弊又條陳三急五宜以靖匪  
徒屢稱 旨巡視中城半載斷八百餘案及巡淮安漕務盡革陋  
規奏籌京口運河其冬漕艘阻冰高郵禱於露筋祠一夕凍解奏



庸 封祀人尤神之兵備川東相傳道署不利於官前後無入署者公獨居之無恙傳譎遂息兵備駐劄重慶扼大江之衝估舶鱗集私梟出沒獷悍繁劇號稱難治公日坐堂皇視事有訴立訊剖決如流數月滯訟一空又禁胥役之擾累飭行旅之宵柝巴達各縣振飢眾聚難散公令先給半月糧散遣立盡私鹽橫行沿江千百成羣當事議令營汛開銃擊遏公謂是必激變請減價敵私計減四分之一居民盡食官鹽私販遂絕數郡安堵而商銷亦倍額未期年政聲大著二十五年 今上登極四川總督蔣公攸銛奉召入京奏公治行爲四川第一堪勝大任是冬卽擢山西按察使閩郡士民攀轅祖餞夾江兩岸十餘里不絕至京 召見三次



欽交三案令赴任審辦是爲公受 止知大用之始道光元年  
三月至任兼署布政使每有京控多直交臬司不由巡撫前此未  
有也九月調福建按察使至京擢安徽布政使安徽錢糧虧空轉  
轉凡歷五次清查皆不實不盡前任巡撫李公鴻賓復奏明設局  
清查公治絲理勢鉤稽一載甫有端緒而三年正月奉擢巡撫之  
命督飭益力分別應參應補應豁於是三十年庫款之糾結豁  
然一清以爲吏治縣愒由於賠累牽掣不克自拔故清查後奏定  
章程十條嚴交代禁流攤裁捐款俾官得自立專力治民而吏治  
日起太平甯國旌德三縣不通水道漕米例由民折官辦乃奏做  
江蘇嘉定等縣例由司庫領銀採辦立限徵還以杜借墊之弊是

年江水大漲瀕江三十餘州縣隄圩皆破田廬蕩沒公乘舟徧勘  
而以蕪湖爲總匯羽檄交馳飲食俱廢委員分赴上游買米十萬  
石勸捐數十萬金區處條畫纖悉周至流移老疾孩稚者皆有所  
養殍殮者有所瘞民不知災蕪湖紳士建旬宣保康之坊明年宿  
州懷遠大蝗公率屬虔禱於省城劉猛將軍廟未幾宿州報青龍  
無數懷遠報烏鵲無數一日食蝗殆盡奏 聞特頒 御書神參  
秉畀額安慶旱禱於大龍山之孚澤亭雨隨車沛又禱雪至深尺  
許冬疫亦息公以水災旣退水利宜興親登塗山八公山絕頂以  
覽全淮形勢兼勘壽州之芍陂城西湖懷遠縣之郭塘陂荆山口  
鳳陽縣之花源湖鳳臺縣之蕉岡湖以及瀕江各圩隄壩次第

籌濟又以備荒宜豫而社倉春借秋還積弊已久惟有每鄉每村設倉於秋收後量力各捐不經吏役不減糴不出易不借貸歉歲卽全散之樂歲再捐以數歲救一歲之荒名曰豐備倉奏定章程十條行之購繳鳳穎刀械以靖鬪殺之源裁汰亳州里書以杜催科之弊旌表忠烈上及元明以敦風俗捫修省志以備文獻掌故盡心教養者如此其後復於江蘇做捐豐備倉穀各數萬石嚴懲邳徐海屬帶刀之風搜查糧艘水手槍械之禁又陽湖武進上元等縣以一次而題旌節孝三千餘人或五百餘人捫建總坊皆治皖之政所推廣也五年夏江蘇河淮交病漕運中阻協辦大學士英公奏籌海運及折漕之策遷延半載終無成議 詔移公撫江



蘇與兩江總督琦公善會議公奏言海運雖屬扞行海船實所熟習目前籌運急策無踰於此惟折漕變價數百萬勢必銀涌貴而穀陡賤恐官民交困來年當以河海並運爲宜以蘇松常鎮太倉之漕百六十萬石歸海運其江廣之漕仍由河運遂親赴上海籌商船訪道路定價值六年春海舶雲集復親往彈壓重申約束號令嚴明各州縣之米銜尾魚貫以次驗兌並檄崇明狼山與山東登萊諸鎮總兵會哨海口以壯聲威初運百餘萬石次運六十餘萬石由吳淞口出崇明十激轉成山入直沽口水程四千餘里皆旬月直抵天津不損一船上命重臣尙書穆公彰阿赴驗米色率瑩潔過河運數倍海商運漕而北載豆而南兩次得價且由部



發帑收買海船耗米十餘萬石其出力之商優給頂帶皆踊躍過望先後共用銀百餘萬兩不請一帑而漕項銀米自解津應用及調劑旗丁外尙節省銀米各十餘萬其海關免稅不過萬餘視河運又省費過倍奉 旨以公親駐督辦深協機宜 賞孔雀翎蓋

國家承平二百載自康熙開海禁以來商舶往還關東天津習以爲常凡駕駛之技趨向之方靡不漸推漸準愈久愈精而春夏東南風順於漕運北上尤利且無閘河穴贖倉胥勒索故費半而功倍明年公復與總督蔣公陳海運章程八條又議復尙書穆公海運事宜五條欲以甦三吳之漕困會議中止而未竟也自道光三年以來吳中連歲告潦由太湖入海之路不暢吳淞黃浦瀏河

卽禹貢三江遺跡自黃浦奪溜而吳淞中幹日微瀏河則幾全淤  
是以水無所泄當事屢議修濬不果其言治吳淞者又專以建閘  
禦潮爲首務公奏言治水宜扼其要欲舉全省之泖浦港汊一一  
排之濬之不但無此工力且太湖來源有限一泄無餘亦非所以  
兼蓄泄防旱澇之計其弊一由民田爭占致隘江流一由多開旁  
汊致分正溜至於吳淞建閘啟閉欲以抵禦潮沙不知長江大河  
天所以吞吐陰陽之氣非如無源港汊可扼其吭而節制之也海  
潮既能挾沙而來卽能刷沙而去黃浦從來無閘而海潮鼓盪江  
面闊深今日治水以吳淞爲最要治吳淞以通海口爲最要請以  
海運節省漕項二十餘萬兩興工得旨允行於是相度地勢徑

其紆曲八年三月竣工海潮直過崑山而西水深二丈以外其攔潮大壩內外刮刷淤泥立盡公賦放水長歌吳中紳士和者數百公復請借帶徵緩漕十餘萬石變價爲濬濶河之用部議未允及遷總督復與巡撫林公則徐奏言濶河與吳淞分流東達太倉爲元時海運出口之路其分支爲白茆受常州諸水由常熟昭文入海近皆淤塞不通關數州縣田賦之命惟二河尾閘皆有攔沙高仰內水低平與吳淞地勢懸殊若開通海口則潮沙必倒灌本朝大濬幾次皆旋卽淤塞莫若挑成清水長河工省而利久其海口各建石壩多置涵洞平時築閉以禦渾潮潦時放水歸海其估濶河工十六萬餘兩借帑攤徵白茆工十一萬兩官民捐辦十四



年五月工竣公與林公分路驗收父老夾岸歡迎咸言百餘年來  
所未有論者謂吳中近年水潦頻告幸免沈災者皆吳淞宣泄之  
方及是年太湖蛟水陡漲急檄太鎮洋盡啟瀏河白茆海口各壩  
不三日水消數尺歲仍豐收蓋自前明夏忠靖周文襄海忠介暨  
本朝莊滋圃協揆後修舉水利之效未有如公者吳中運道莫  
要於徒陽運河而練湖爲其上游孟瀆則其旁支公自巡漕時卽  
已條奏利害及撫江蘇益事講求於六年大挑時首將豬婆灘之  
古淺展寬濬深以除漕艘咽喉之梗惟運河全藉江湖灌注而地  
勢陡溜水去沙留冬月潮枯運艘尤滯練湖上起丹徒下抵丹陽  
周圍百餘里古稱放湖水一寸卽爲運河一尺近年上練湖已改



田升科僅存下練湖四十里淺涸不復濟運公勘知練湖居高臨下止須堰蓄無煩疏濬遇冬月需水時堅閉運河下游呂城各閘使水無所泄則但決湖水亦足以助潮灌運惟兩湖地勢相平下湖蓄至七八尺則上湖田亦淹至二三尺故上湖居民遇春夏水漲輒決閘放水不待秋冬而已涸於是籌款二萬金先復黃金一閘爲練湖關鍵並改建丹陽運河之黃泥閘以蓄全湖之水而運河之上游治矣其常州孟濱河旱則引江潮以灌田潦則宣洩入江每遇運河冬月築壩挑濬時尤爲商船出入要路與附近之德勝澡港二河均久淤廢公前請緩漕餘米十餘萬石截畱變價爲濶河孟濱工程至是先挑孟濱而雨雪不時淤沙屢積迨十三年

冬始竣而運河之下游亦治明代漕艘由孟瀆河逆江而上以至瓜洲原不專出京口而丹徒之橫閘越閘皆可出江較孟河近十之八議者止以焦山下石礁爲疑不知兩岸皆有緯道惟象山巖脚里許風順一帆可過八年冬糧艘回空京口潮枯難濟公先令江船引導飭松江幫數十艘沿京口南岸入閘復飭浙江幫千餘艘由北岸對渡入閘連檣安渡埽數歸次遂開運河之捷徑十年秋捕獲戶部假照要犯任開宇劉東昇解京 詔加太子少保銜尋署理兩江總督是年十月實授公之受總督事也值私梟黃玉林伏法前督臣大學士蔣公及鹽政運司皆獲譴 天子廬念淮漕欽差戶部尙書王公鼎侍郎寶公興赴兩淮會籌改法爲課歸

場竈之計公奏言兩淮歲徵正雜課及帑利銀共四百餘萬兩繁  
重甲天下近年以來侵虧那墊積欠如山勢已窮而無所復之今  
議者言改法有三一竈丁起科一垣商納課一場官收稅皆有散  
而難稽之勢且試行之初清竈招商改官變法非一二年規模不  
能粗定額課民食豈能懸待 國家鹽法本來美備止因事久弊  
生有名無實非法病人人自廢法今惟有申明舊章大加釐剔則  
除弊卽所以興利因奏章程十有五條而欽差復密請裁鹽政歸  
總督管理以一事權公於是專心壹力釐除積弊其大端著有成  
效者四一曰裁浮費以輕成本兩淮鹽務自正課外有場商之公  
費岸商之匣費公費舊定七十萬兩外總商復浮用數十萬兩匣



費則湖廣漢岸每引徵至一兩二錢亦百餘萬兩二項已與正額相埒又有根窩每引價銀一兩按全引亦須百餘萬兩其利皆不歸於納課行鹽之商故成本日重公奏請裁定公費匣費每引止徵四錢揚州每年開支三十萬湖廣江西亦委員查汰革去總埒其裁公費岸費百有十餘萬兩而窩價每引給一錢二分亦省費百四十餘萬兩嗣因湖廣支用浮濫奏請提質而公復裁鹽政衙門陋規十六萬餘兩並繳還鹽政養廉銀五千兩端本澄源浮冒膏絕二曰慎出納以重庫款鹽課入庫從前不分正雜遇有緊解百計那應始則以帑本抵額課迨帑本罄則令商豫納減納而以豫給印本抵課迨商墊復窮則又令其以印本帖息質貸而以減



帖額數攤於後數綱輾轉葛藤莫可究詰又有總商管庫不行鹽  
而專領費甚至報效皆出庫墊冒支從不報銷公奏分二庫以正  
項貯內庫專候部撥以雜項貯外庫不許以正項那墊革去總商  
管庫以杜侵漁永禁印本減帖以截虛抵俾勿貽後患三日嚴糧  
私船私以清綱銷向日糧艘回空夾帶蘆私每占正綱三月額銷  
公分派弁兵力行稽查自入境渡黃渡淮過關層層搜查令行禁  
正十三年漕督奏請漕舟許帶蘆鹽仍完淮課以劑窮丁御史亦  
以爲言公三奏駁之謂不但病漕亦且滯漕堅持定議蘆私遂絕  
至儀徵江船裝載兩鹽重斤夾帶虛報淹消借官行私尤爲腹心  
之患公令計船裝鹽不爾空艙實發水腳毋許剋扣嚴查水程銷

數有準而江船之私亦絕又力主散輪隨到隨售而久滯報淹之弊亦少四曰革五壩十槓以省淮北北鹽十載無課徧地皆私店閉商逃岸懸引紕皆由運道迂而成本重公始則試行官運繼則決計改票遂拗改道不改捆之計定歸局不歸場之制減稅裁費招商請票不數月商販輻輳場鹽一空數載以來奏銷數百萬兩皆一年行兩綱之鹽盡完從前之帶殘且剝淮南之懸引易簡嚴密化私爲官皆從來所未有也公未受任以前淮南以十載而行六綱淮北以十載而行三綱其每年奏銷報解之銀一則全虧帑本七百餘萬而以帑利貽患後來納課之商一則設立豫納減納帖息名色寅支卯糧以數十年後之課豫虧之於數十年之前以

致舊商累倒新商裹足及至道光八年十年閒則已無可那墊無  
可借貸遇報解則庫如懸罄遇開綱則止收空本公承極弊之後  
自道光十一年辛卯開綱至戊戌卸任兩淮入載完正雜銀二千  
六百四十餘萬兩而在岸緩納之課尙不在其內從無統綱借帑  
之事庫貯常實存三百餘萬兩幾於年清年款惟帶銷辛卯以前  
滯鹽殘引一百三十餘萬又帶徵還未銷印本積欠濫價統引殘  
課三百數十萬皆以今日代償前人之欠其占一綱引課之正額  
加以引地寥闊鄰私四侵事權非盡兩江所轄而銀價日昂售課  
勢難再賤價不減則不能敵私而緩納之課與積壓之引不能暢  
速提行故商力不無前卻幸近年兩湖總督林公則徐周公天爵



相繼整飭漢岸銷數漸有起色而公則已病矣公自簡任督撫以來如漕務之捫海運淮南之裁浮費截糧私淮北之裁壩槓改粟稅皆恆情所動色相戒公奮不顧身力排羣議卒能捫始善終可久可大建漕饒百世之利俾後人有所取法皆由聖天子明目達聰任賢無貳每述職入覲召見十餘次造膝密陳言無不盡十二年捕獲梟匪巨案奉硃諭卿爲幹國良臣卽朕亦獲知人善任之名十四年京察則有辦事實心漕務亦有起色之諭十七年京察則有任事勇敢之諭及本年二月告病奉上諭兩江總督陶澍勇於任事不避嫌怨上年染患手足痿弛之證疊經賞假俾得安心調理冀可速痊本日復奏辦公竭蹶籲請開



缺察其情詞懇切朕亦祇得勉從所請准其開缺調理一俟全愈  
卽行來京以慰廬念六月病革遺摺奏上復奉 旨賞加太子太  
保入祀賢良祠 予謚文毅子杕 賞給主事俟年及歲時入京  
引 見並 敕靈柩回籍時沿途地方官照料以示優卹蓋臣至  
意嗚呼 上之所以任公一德一心始終無二天下後世三復於  
蹇蹇匪躬之際益以思 明良遇合之難其將有灑然而流涕者  
矣公所轄三省河漕兵農吏治水利海塘繁劇甲天下又兼管鹽  
政案牘如山數載以來心血耗罄曾於十五年入 覲面奏以鹽  
務已有起色總督事務殷繁懇請復設鹽政以專責成奉 上諭  
連日召對陶澍見其精神才具結實周到正當乘此鹽務日有起

色之時實力整頓悉心經理無負委任不愧爲國宣力之大臣毋庸復設鹽政公自是不敢濟陳鞅掌盡瘁日不暇給氣血日置積勞成病每遇夏秋足疾輒發十七年十一月公六旬生日 御書綏疆錫祐之額 御書福壽字並壽品十六種以 賜十八年四月左手左足忽中風痺神明未衰而起居不便請 旨賞假兩月其日行事件交藩司代拆代行期滿復赴清江防汛力疾視事至冬復請假兩月終未全愈本年二月遂請 旨開缺調理奉 硃諭卿之體質本非不足緣費心太甚氣血保無消耗然澆苓可用熱燥之藥必不相宜宜慎之惟望卿不日全愈來京面晤以副眷注委任之衷情也卿其善體之公感激 天恩日思病起入 覲而

嗜血閒作多汗不寐精神益頓至六月初二日遂不起矣痛哉訃音所至寮吏軍民莫不隕涕兩淮嗟商感公德惠贖金賻奠德配黃夫人述公生平之言毅然卻之嗚呼公之清節孚於家人見於身後非苟然也公虬髯山立尊嚴若神飲酒數斗不亂洪音瓌辯上下古今往復曲折無不達之意接見寮屬自辰至午指麾區處不遺鉅細遇事奮發義形於色而胸懷洞無城府待人表裏如一初督兩江時值水災奏請河南藩司林公調江甯辦賑及林公由東河帥移撫江蘇與公益志同道合相得無閒而河事則與先後河帥張公井麟公慶和衷共濟皆前此所罕有道光十二年寶應朱尚書士彥奏安東改河之策 詔公會同河帥張公勘議前此

張公亦力主改河及是公謂不可行虛衷商議二公亦釋然無忤  
用人必盡其所長凡所拔舉至方面節鉞者皆有名於時服官數  
十年起居如寒素公餘手不釋卷奏議下筆千言無能代具草者  
詩宗杜韓尤工長句書法李北海嘗書余忠宣公墓碑勒石大觀  
亭於洪澤湖老子山海州雲臺山搜幽窮勝磨崖題名殆徧愛才  
好士講論文藝無倦建惜陰書舍於江甯專以經史古文課士建  
震川書院於嘉定並求歸太僕後人爲奉祀生建敦善書院於海  
州以造士訪求湘潭陳恪勤公後裔爲置祭田其他如巡城時則  
倡建悅生堂以贍京師窮民回籍時則捐漁稅議禁罟罾以利資  
江之行旅無時不以濟人利物爲志孝友純篤自鄉賢公棄養每



念先澤輒哽咽涕零特建鄉賢專祠復推先志倡修宗祠捐義學  
田考試田書院膏火田又建藏書閣以津逮窮鄉之士乙未冬入  
覲請假修墓 上垂詢里居山水 御書印心石屋四大字俾  
歸磨崖以寵其行尤爲未有 曠典弟潛諸生早世撫從子親賢  
如己出公生於乾隆四十三年十一月三十日享年六十有二配  
黃夫人側室賀張劉盧楊張子八春福曼珠普陀葆賢賀孺人出  
育麟劉孺人出恩壽佑元盧孺人出均殤枕張孺人出 賜主事  
孫文熊葆賢嗣子曾孫應曉女七湘潭周詒樸安化王育燿長沙  
彭申甫善化賀穀益陽胡林翼衡山聶有湖善化陳庚澤其婿也  
公所著有印心石屋詩文集五十六卷奏議七十六卷蜀輶日記

四卷陶桓公年譜四卷陶淵明集輯注十卷靖節年譜考異二卷  
陶氏世譜若干卷又校刊資江耆舊集六十卷公事業恢闔鉅細  
萬端遺孤幼穉未克撰次鑾自道光五年守松江卽從公襄海運  
迨大濬淞瀏泖瀆諸工皆先後從事及公乞病復蒙 恩命權總  
督實嗣河漕重任辱公知最深知公生平勛業亦最悉爰撰述行  
事以備史館採擇焉謹狀

右行狀陳鑾撰

蘇州滄浪亭爲宋蘇子美別墅南宋則韓蘄王居之巖石玲瓏水  
木清美遂爲城中名勝之冠道光戊子陶文毅公撫吳重修舉吳  
中前賢暨自古名流之宦游流寓於斯土者繪像合祀五百名賢

祠俶成之日招一時賢士大夫退居林下者拊五老會亦繪像賦詩以張之五老者內閣中書潘奕雋年八十八掌山東道監察御史吳雲年八十一山東按察使石韞玉年七十二刑部尙書韓封年七十一江蘇巡撫陶澍年五十公年最少蓋以耆英會中司馬溫公自況也兵燹後壽藤古木斬刈無存而樓閣丹青池荷石筍一經葺治猶是承平舊觀余道出吳門時一過之

陶文毅公丰裁峻整好議論人物惟恐不盡雖 廷對亦然開藩皖中循例覲 聖論某官溺職狀至於聲色俱厲鬚髯翕張 宣宗疑之密諭孫文靖公爾準察其爲人時文靖方撫安徽也文靖密疏薦引 硃批曰卿不可爲其所愚復具疏條列善政力保其

無他文毅遂獲大用然則文靖一言願不與九鼎鈞重歟

右紀聞陳康祺撰



國朝書目考卷之二十一

三

國朝香獻類徵初編卷二百二目錄

疆臣五十四

梁章鉅

李文耕

惠吉

朱為弼

張文浩

朱爾漢

賀長齡

國朝香獻類徵初編卷二百二疆臣五十四目錄

157-422

國朝耆獻類徵初編卷二百二

通奉大夫前署江西巡撫江西布政使司布政使湘陰李桓輯

疆臣五十四

梁章鉅

一故宦以乾隆五十六年入縣庠五十九年舉人嘉慶七年進士翰林院庶吉士改禮部主事充軍機章京升用員外郎京察一等授湖北荊州府知府歷任至江蘇巡撫兼署兩江總督得疾告歸道光二十五年在其子恭辰浙江溫州府任內就養病卒年七十五歲

一故宦道光二年由荊州府授江南淮海海道履任後力除積習實



事求是拒絕一切規費三年中河工多故而淮海所轄工終其任無事河上至今誦之四年調署江蘇按察使五年又調署江蘇按察使冬令有十三堡漫口事大府飛調飭委專司盤運漕糧總局將滯漕三百萬石盤運北上是役也先請帑一百一十萬兩故宦嚴覈之及竣事節省銀三十二萬兩繳上大府賢之踰月卽授山東按察使兼署布政使先是制河二大府銳意治河方議挑關孟兩灘以取直又議改上游海口以利運又欲開王營減壩以洩漲衝淮海所轄故宦曾經講求深悉情弊上書力陳其不可以去就爭之事遂不果而所全者多矣

一故宦道光六年由山東按察使調補江西按察使未到任遂擢

江蘇布政使此次爲三至江蘇地方利弊了然胸中用人理財舉措咸愜爲政獨持大體不以科條繳繞兩次護理巡撫思東南財賦綦重水利不可不修首治泲湖月餘功成旋請籌款挑濬吳淞江丁亥冬月興工戊子暮春竣事商民咸利賴焉皆能舉其大而非託諸空言者次年以挑濬吳淞江議敘加一級

一故宦道光十年冬已三屆護理巡撫次年適值江北大水成災流民蔽江而來日以萬計蘇城民情洶動乃急率屬捐廉一面給船咨送一面設廠畱養計三月餘咨送回家者六十餘萬人是在廠畱養者四萬餘人復自捐棉衣萬件以爲禦寒之具直至三月杪陸續盡送北返沿途頌德不輟計更給小兒二千餘口糧以

給難民所新生之子女故宦江蘇之德政此爲第一至於振拔人才培植士類眾善悉舉百廢具修不能悉數

一故宦十一年冬四屆護理巡撫以水利之修尙有未足於丹陽之練湖蓄水以濟運牐壩久廢漕船往來多阻亟爲修復又籌款奏修大挑武進縣孟瀆德勝澡港三河未竣事而後任至乃踵成之故宦歷次護理巡撫而有利必興一面奏請一面籌款舉行從不存五日京兆見其實心實政大槩似此

一故宦二十一年由廣西調任江蘇巡撫計至此已五任巡撫舊治之區彌形駕輕就熟舟過江甯適值水災未下車首先倡捐銀千兩交江甯府樊師仲以備拯恤時正英夷滋事莅任後數日卽

出署赴上海防堵先是天府已奏准寶山口商船一槩不許入港以防夷匪混入台縣商民洶洶幾成事變故宦稔知各船皆有行戶專管親至海口按船查點批准進港一面具奏報可人心始安歡聲雷動否則或爲夷人劫奪轉恐脅從爲彼所用矣計在上海五閱月練兵練礮收撫諸奸自吳淞至寶山口刁斗森嚴軍民安堵英夷望而卻避者故宦鎮靜之力爲多焉後遂遲志於浙江鎮海失陷裕督臣訃至卽兼署兩江總督旋奉督辦糧臺之命故宦以一人兼督撫事無敢刻暇未幾將軍參贊方駐兵蘇州列營城中外故宦晝治官文書深夜卽出巡河干鎮壓兵勇三閱月以來因勞疾作遂請開缺去任



一故宦敷歷中外垂四十年居官之餘不廢著述其書籍行世嘉惠士林者不下七十餘種吳中讀書家嘗奉爲圭臬於經史則有經塵夏小正通釋論語孟子三國志旁證於小學則有倉頡篇校證於選學則有文選旁證其纂言紀事則有古格言楹聯話巧對錄農候雜占樞垣紀略南省公餘錄退庵隨筆 國朝臣工言行記其徵文考獻則有 國朝書錄稱謂錄金石書畫題跋閩中詩文集三管英靈集東南嶠外詩話書畫錄詩文鈔而制義叢話試律叢話則家絃戶誦尤足爲後學津梁其餘四十餘種皆足以資考證廣見聞裨人匪淺政事文學一以貫之洵所謂仕學兼優當代偉人

右請祀江蘇名宦事實張之萬撰按公所著七旬後有自訂存目論語集注旁證  
 二十卷孟子集注旁證十四卷夏小正經傳通釋四卷倉  
 頤篇校證三卷稱謂拾遺十卷古格言十二卷國朝臣  
 工言行記十二卷三國志旁證二十四卷南省公餘錄八  
 卷樞垣紀略十六卷春曹題名錄六卷東南嶠外書畫錄  
 二十卷文選旁證四十六卷玉臺新詠讀本十卷制藝叢  
 話二十四卷試律叢話十卷楹聯叢話十二卷楹聯續話  
 四卷巧對錄四卷長樂詩話八卷南浦詩話四卷東南嶠  
 外詩文鈔三十卷閩詩鈔五十卷三管詩鈔五十八卷三  
 管詩話四卷三山唱和詩十卷東南嶠外詩話二十卷江  
 田梁氏詩存九卷退庵詩存二十四卷閩文續存八卷  
 退庵隨筆二十四卷閩文復古編六卷閩文典制鈔四卷  
 滄浪亭志四卷滄浪題詠二卷梁祠輯略二卷江漢贈言  
 二卷東南棠蔭圖詠三卷吳中唱和集八卷葑江別話四  
 卷北行酬唱集四卷歸田瑣記八卷浪跡叢談十一卷浪  
 跡續談  
 八卷

浪跡叢談記康熙朝士有宮僚雅集杯蓋其時十人各製酒器十

事互相招邀杯以白金爲之分別大小如沓杯式白質黑章外界  
烏絲花草內鑄諸公姓字里居旁鑄宮僚雅集四字以量之大小  
爲次首湯斌字潛庵河南睢州人次沈荃字繹堂江南華亭人次  
郭棻字快圃直隸清苑人次王澤宏字昊廬湖北黃岡人次耿介  
字逸庵河南登封人次田喜霖字子湄山西代州人次張英字敦  
復安徽桐城人次李錄予字山公順天大興人次朱阜字卽山浙  
江山陰人次王士禎字阮亭山東新城人皆一時同官坊局講讀  
者承平雅譙書俊遺風百世下猶足鼓人清興也梁氏書中記是  
杯淵源棻詳飾潤存之爲後來吉金錄中增一故事又按錢塘汪  
遠孫詩集有  
宮僚雅集酒器歌敘云孫兩人表丈出以宴客兩人頤谷子是此  
杯後入仁和孫氏矣汪詩又云前杭後梁兩勅敵以一合十傾醜



湖自注望浦諫庵兩先生皆善飲能盡一套

梁蒞林中丞章鉅獲見官僚雅集杯屢思倣製就養温州追溯開藩吳下時有小滄浪七友之集皆壬戌同歲生曾繪成長卷又勒石於滄浪亭至是復鑄成銀杯亦以酒戶大小爲序鑄名杯底七友者首安化陶文毅公澍元和吳廷琛棣華次之涇縣朱珩蘭坡次之中丞又次之寶應朱文定公士彥次之吳縣顧純南雅次之華陽卓文端公秉恬殿焉中丞復誌以七古亦見叢談

右紀聞陳康祺撰



國朝通志卷之三十一

三

李文耕

滇南之士大夫有以程朱之學服官治民者曰昆陽李復齋先生  
先生少篤學得張南軒義利辨朱子古文讀本陸清獻文集遂服  
膺終身嘉慶壬戌成進士歷任山東鄒平冠縣知縣膠州知州濟  
甯直隸州知州擢泰安府知府調沂州府擢充沂曹兵備道晉浙  
江鹽運使調山東鹽運使升湖北按察使未至授山東按察使調  
貴州按察使原品休致先生筮仕二十餘年毅然以崇正學挽澆  
風爲己任計在浙僅六閱月在黔三載其他遷轉不離吾東治吾  
東最久吾東被其澤服其德尤深官浙時句稽嚴明商不能欺拓  
貢院濬西子湖皆協爲籌畫官黔時州縣因缺苦不得久任先生

以所職殿最爲調劑吏治蒸蒸日上遇歲歉開粥廠食餼桐梓縣大水鑿葫蘆口而患息立男女紡織二局使民知棉繭作家諭戶曉篇使民重倫紀黔與滇接壤余來滇至今滇之人猶能道之初先生之任吾東也令鄒平度不得行其所學遽引疾受代者以交款累先生授徒省垣郭鑑湖者門人世熙之父精武略授公兵法未幾赴蔣令光壁之約至壽張縣癸酉白蓮教起曹縣戕官公爲蔣畫策練鄉勇擇武生爲隊長授以單刀法槍法陣法蔣居守先生出巡擒賊目張學義等自是賊不敢窺壽事平大吏以公有幹略檄飭起病坐補鄒平治鄒務清訟息盜尤盡心於教化甫抵任獄訟紛紜久之門可羅雀民婦陳氏訴其子忤逆先生自引咎其

子叩頭流血母爲請釋果改行爲孝立獲盜賞格捐設捕役工食  
數徵行窮詰窩家闔境夜不閉戶勅立梁鄒書院義學修伏生祠  
長白祠表范文正公讀書處立馬宛斯先生神道碑諄諄勉諸生  
以效法前賢邑有摩訶山會仙嶺爲祈晴禱雨處祈禱無不立應  
歲屢豐在任七年百姓初呼爲李教官後呼爲李青天循聲大著  
繼任冠縣膠州濟甯州治一如鄒將去冠亥刻授代而是日申刻  
役稟傳到聚眾鬪毆案兩造四十餘人意在困先生先生一訊俱  
服役大驚膠雲墨二河淤河岸多紳富鋪屋前任掣肘不能疏先  
生倡捐千金民爭輸約富紳閱河勢問某鋪某屋妨水否富紳勉  
應曰妨立命拆毀數百開工未市月而河流暢泰安沂州二府素



號難治而沂俗較悍先生爲守立屬吏課程告以治鄒平法化險  
健爲瀉良掖匪鹽竄望風奔潰勸民捐義倉備荒地產梓樺椿樹  
勸民種植養蠶兩府之風俗一變兗沂曹濱河先生爲監司修防  
必躬親前守秦撫軍奏興水利先生言山東地多沙土欲改水田  
徒糜國帑力爭而罷至是河員報河有淤沙請帑數巨萬開濬先  
生相度情形謂春漲卽刷去後果如先生言東鹺商積虧甚鉅充  
者半無業游民先生爲運司分別徵緩責令富商領運不得因引  
地滯銷賤價私賣而課裕及陟東臬平允安靜不務赫赫之名惟  
深惡懸案不結勒限嚴懲兗州多詐賊斃命立置縣役重典吏治  
肅然先生生平論治官辦事方能了事了事方能無事論除盜官

必實有衛民之心身所不能及者精神及之精神所不能及者聲名及之論教化歸本於立身官必能對百姓而後可以教百姓嘗謂東省之民氣粗性直粗固易於犯法直亦易於爲善故所至無不悅服刊德政碑甘棠八思詩去思錄湖南賀耦耕藩東投余書曰李復齋先生山左之福星也當先生去鄒平老幼餞送者擁塞街衢追至數十里不忍別後每過境必挽留其子孫至亦如之一日先生乘馬夜行天將曙道旁有賣粥者識之曰此非李青天耶以粥跪獻泣下復以粥徧食從者酬以值不受丙戌歲冬士民譌傳先生卒請祀名宦有司照例批斥踰二年聞先生之喪所在聚哭奏準題牌設位以慰輿情先生生於乾隆壬午十一月三十日

卒於道光戊戌四月二日享年七十有七曾祖從綱康熙丙子舉  
人爲黔貴定令祖皎乾隆丙辰舉人父學頤乾隆壬午舉人皆累  
贈通議大夫妣皆累 贈淑人先生事母孝母耳後痰核膿潰  
吮之而愈後母疾劇呼之曰我疾不起爾終身將如何先生泣涕  
對曰幸聞母教此生出處誓求對母朱太淑人領之而逝配雷淑  
人前三十餘年卒不復娶亦不設妾媵子四人德謹武庠生德慎  
例授承德郎先卒德蕙候選州同德輿早卒女一適武舉李春暉  
孫八人嗣武侯選府經歷允武太學生錫齡廷琛錫金俱庠生濟  
武縉武軍武並業儒曾孫三人啟功迪功培功先生致仕歸里門  
門卻軌日與孫輩及一二門人講學不輟當道過訪未嘗一識其

面每日昧爽起自立課程作三次省察著作宏富刊行世者二十  
三卷吾讀其憤悱初橐緝橐窮究天人性命之理實能以程朱之  
學爲學讀其官山左黔中文移札橐實能以程朱之學爲治滇遠  
在西南邊徼文章節義後先相望而道學一脈開自先生夷考其  
言與行殆陸清獻之流亞也先生諱文耕字心田別字復齋後更  
字壘石歿後舉鄉賢滇人不稱其官稱復齋先生云

右墓表劉鴻翱撰

昆陽李先生諱文耕字心田號復齋進士歷官按察使生平以徒  
義集義精義爲學服膺陸稼書張楊園兩先生嘗謂孟子以居仁  
由義爲尙志此士人律令法度也由居實扣在仁義上時時密勘



此心果能清明廣大沖然藹然通乎天命不爲私意閒隔可以立天下之大本否所行果能正直和平秩然抑然準乎天理不爲私情阻撓可以行天下之達道否仁義須實按在居由上務使天地盎然生物之意常油油在方寸閒而不屑簞豆不受萬鍾之心介然夷然真於日用事物上發出方是傾身入於仁義之中不徒苟於依附已也苟無此段刻苦嚴密之心道理總不在身上又謂君子無入不自得只是理順心安至其用心則全是憂勤惕厲蓋吾人自命爲士任重道遠實有不容謝之仔肩不易完之功力緝熙而後光明罔念卽可作狂是安得不矢之以憂勤惕之以危厲況乎遇有險夷人多疾疢不必孤孽始知慮患操心自古賢豪無不

動心忍性生於憂患此中之玉成君子者正復不少也憂勤惕厲亦何時何地而可忘者乎又謂事物之理可會於靜中不必專得自靜中也蓋學者工夫精義爲主義果精熟則無論動靜皆油油在心目閒如知萬物之皆爲一體則欲使之各得其所者常耿耿也知萬物之不離吾性則欲使之各盡其分者常切切也譬水之能流不待流派之分而淵源自裕如木之能長不待枝葉之發而根本自深操存者不以私而消此也涵養者不以慾而亂此也若夫既感之餘觸於事物而罕見之理未應之前埽空心性而渾以爲靜則亦非體用一源之謂矣又謂中庸立大本行達道是溥博淵泉而時出之皆聖人分上事若初學用功只是專心一志精義

徒義集義深造以道期於自得至於自得之則居安資深謂之立  
大本可也取之左右逢源謂之行達道亦可也又謂孟子雖以惻  
隱羞惡辭讓是非之情驗人性之仁義禮智然不過明其固有而  
非外鑠至擴充以盡其才仍有待於學問苟或徒恃良知之固有  
而不博之於經史精之於學問思辨不惟臆度之見揣摹雖真疑  
似之端歧出易惑且以一己之識見爲一己之範圍雖所見極大  
恐仍不免於坐井而觀也總之學問之道必折衷於聖人今於孔  
子好古敏求博文約禮之訓之外另標宗旨別立門戶得不謂之  
異端乎至於知行並進如目視足履是兩事而非兩候卽顏子循  
循博約之教絲毫不敢躡等然未嘗限定幾日博文幾日約禮必

俟聰明之盡然後講求踐履也蓋隨博隨約卽知卽行而前便是  
路頭隨時不煩等待若知而不行直將聖賢緊要言語當一場閒  
話說過雖辨論之極其精引證之極其博亦何裨於身心性命乎  
以上二弊一則知不求真一則行不求實學問之大害也去此二  
害學路乃正又謂異端之害汨溺人心然惟高明者多中之其餘  
未數數觀也至近日功利之害偪天塞地澈骨透心勿論富貴貧  
賤高明沈潛之人舉凡交際往來倫常日用之事非利不動非利  
不行直以趨便求益鍊成人心鑄成世界一舉足而不忘利一出  
言而不忘利一涉念而不忘利其有正人君子倡爲義舉者則子  
立無與孤掌難鳴除貼心貼力任勞任怨外仍須以利脂秣以利



灌溉然後各得其欲爲我所用而隄防少疏仍恐爲所劫制其旁  
觀之忌者惡者譏誚之阻難之中傷之又無論已嗟嗟一舉事而  
傷仁人孝子之心短英雄豪傑之氣殆無有過於今日之世局世  
態世味世情者矣士君子生當此時苟欲正人心變風俗計惟操  
甄陶一世之權有甄陶一世之德激濁揚清舉直錯枉變化愧厲  
遲以歲年底幾滌垢穢之肝腸剔腥羶之骨髓漸復本心知有廉  
恥若在下之君子則惟自完其貞獨立不懼謝流波於砥柱標勁  
草於疾風樹準立規守先待後至於觀感興起則仍聽之於世而  
已嗚呼民受天地之中以生天理人倫昭揭於日星者無古今一  
也民彝物則保合於造化者無盈絀分也好是懿德若性生焉顧

人品參差或相倍蓰自賢人以至庸人嗜好迥殊矣自恆人以至下流嗜好又迥殊矣乃至苟賤卑污不齒人類下視等儕仍有過之推其由來只是好利一念中之而其後遂淪胥而靡所底也可勝歎哉可勝歎哉其訓諸孫曰自來詮道字者莫如子朱子日用事物當行之理皆性之德而具於心無物不有無時不然數語精切周詳確當不易今人爲學其止知作文應舉者卑陋固不足道閒有求向上工夫者又以道爲元虛高妙之一物而懸揣臆度求之至當前日用事物則以爲粗迹而不屑意卽有告以道在日用事物者亦復觀望游移不肯踴實向前是以徒有求道之名終無求道之實也不知道率於性而天命之性之具於吾心者卽此萬

事萬物之理其大者子臣弟友範圍於當前而不可尺寸踰其切  
者貌言視聽附麗於當躬而不可須臾離其一切酬酢事物之理  
胥根天命之性而來其分之而一事一物各有至當恰好之處是  
一物各具一太極也其合之而萬事萬物各有至當恰好之處是  
萬物統體一太極也道之範乎人者至切至密如此而今乃懸揣  
臆度觀望游移曰吾將以求道則是大道別有所在而當前之子  
臣弟友可姑任其不孝不敬不序不信而無礙也當躬之貌言視  
聽可姑任其不恭不從不聽不明而無傷也臆宇宙閒安得有此  
道理不屬鬼神不察之地可以容吾之任情肆志而自如者其亦  
不思之甚也矣若夫真心求道者則不然道端於趨向今日志道



卽是今日用功道凝於誠篤今日任道卽是今日著力當前之所  
得者卽當講求得其理而後動也當前之所應者卽當精察順於  
理而後安也一念悠忽卽是坐聽其道之離一事縱弛卽屬顯判  
於道之外顏子得四勿之訓而曰請事斯語仲弓得敬恕之傳而  
曰請事斯語夫豈有所觀望等待者哉總之道在日用無物不有  
無時不然朱子之訓甚明學者親切體之當自知其所用力而懸  
揣臆度觀望游移者可以廢然返矣觀此則知先生之心思嚴謹  
體驗精詳事事鞭辟近裏步步踐履著實是以出其所學事君則  
忠臨民則惠其宰鄒平冠縣清訟息爭除奸戢暴而尤盡心於教  
化民初呼爲李教官後呼爲李青天及守泰安沂州爲屬吏立課



程謂官不勤則事廢而民受其害而勤本於仁無惻隱在抱之心必不能殷殷於民事又本於誠無明且對越之隱必不能凜凜於官箴其爲臬司一本勤慎不務赫赫名而察吏安民見於山左文移黔中文移者至誠至仁至周至悉發於心而根於性也先生於世道澆漓人心沈溺之際而壁立萬仞超出羣流一言一動屹若蔡山萬事萬理渾然太極規模氣象有令人想像於不容已者矣著有喜聞過齋全集歿後崇祀鄉賢山左舉名宦

右學案唐鑑輯

惠吉

惠吉富察氏滿洲鑲黃旗人嘉慶八年由廕生除主事分刑部學習十一年補主事十四年升員外郎十七年升郎中三遇京察皆列一等二十五年發往山東以道府用道光元年補登州府知府二年署濟東道四年調兗州府六年調濟南府尋遷兗沂曹濟道七年以黃沁兩河並漲保護平穩下部優敘八年復以修防勤奮敘功九年三月擢河南按察使十月調福建按察使十一年遷布政使十三年臺灣不靖上命將軍瑚松額等勦辦設軍需局於廈門以惠吉總其事七月臺灣平下部優敘旋擢廣西巡撫時越南國內訌夷匪農文雲等據越南之保樂州越南國王討之未克

十四年正月有夷匪百餘人潛遁入關願投誠乞命固拒之乃退前任廣西巡撫祁墳以聞上以夷匪既詐冒叩關恐尙有續至者敕祁墳惠吉董率文武各官嚴密防範毋稍疏懈旋據祁墳奏越南事稍定惟農文雲未獲聞向雲南一路逃竄諭惠吉與阮元伊里布盧坤祁墳嚴飭各邊界一體堵緝儻農文雲潛逃內地被獲卽縛交該國自行懲辦四月惠吉奏獲夷匪阮克鏢等六名更名薙髮欲竄入邊地卽被查獲欽遵諭旨將該夷匪等檻送越南仍加意查緝以靖邊圉上聽之十一月奏言農文雲退回保樂聞該國剋期進剿用兵年餘雖蠻觸相爭勝負無常恐農文雲戰敗闖入內地亟飭加意嚴防以杜竄越諭曰該國兵

連禍結一日不靖則內地不可一日無防況農文雲結怨已深勢  
不兩立萬一戰敗逃竄或假冒內地人潛行混入尤須逐細稽查  
以昭嚴肅務使外匪內奸無從竄越十五年四月奏越南內訌已  
平農文雲力屈自殺內地所獲夷匪均械送該國辦理防兵分別  
撤回並陳越南國王感激悃忱報聞十六年二月湖南武岡州  
匪徒滋事新甯縣匪黨應之上以新甯界連廣西敕惠吉酌  
派文武員弁協力兜擒四月召來京九月授盛京兵部侍郎十  
一月調盛京刑部侍郎十七年四月授刑部右侍郎尋兼鑲紅旗  
漢軍副都統十八年二月以已革捐職知縣晏象和遣子至京呈  
控山西沁源縣知縣王庭桂負債不償並及庭桂添派軍需等款



命協辦大學士戶部尚書湯金釗偕惠吉馳至山西按其事象和坐誣論罪如律疏既上金釗先還京惠吉復至綏遠城會同將軍鞠榆次縣民人智彥士京控案得實以聞閏四月授熱河都統五月奏熱河山水驟發旱河淤墊兵房衝淹請分別籌辦從之十九年二月以保送筆帖式祿德引見箭射無準部議降一級調用上改爲降一級畱任三月調烏魯木齊都統四月奏挑濬旱河工竣是月由熱河入覲赴烏魯木齊任二十年五月奏捕獲免死發遣逃犯何洛奉請旨卽行正法事下刑部議刑部照遣犯脫逃律引直隸王四子一案改擬鞭責上以罪名輕重懸殊敕部再行詳覈刑部尋奏何洛奉原犯於夥盜行強時曾

經告知較王四子在外聽聞者情節較重請仍照惠吉原擬卽行  
正法將援引失當之刑部堂司官議處六月奏遵 旨裁撤吐魯  
番屯田官兵並籌辦招墾查吐魯番屯田二萬餘畝於乾隆四十  
四年移駐屯田兵丁七百名歲種一萬餘畝彼種此閒以養地力  
今旣裁撤官兵改設戶民宜確切丈量招戶墾種並將渠水分撥  
均資灌溉以杜紛爭其闢展勝金阿斯塔納等處地畝宜撥給回  
子承種按畝升科奏入如所請行八月奏烏魯木齊所屬州縣其  
閒墾三萬三千餘畝 諭督飭所屬隨時籌畫水利實力招墾以  
裕邊儲二十一年六月奏吐魯番境內伊拉里克地方有可墾之  
地惟須引伊拉里克河水以資灌溉其源出喀喇沙爾蒙古山中

該蒙古盟長福晉喇什丕勒願將流出山外之水呈獻 上以該  
蒙古等以水草爲生計游牧蕃滋相安日久若引用水源究恐妨  
其生計二十二年六月奏巴里坤宜禾縣地震兵民房舍傾圮見  
飭鎮迪道圖璧往勘量加撫恤 諭曰巴里坤爲新疆東路瘠苦  
之區見猝遭地震兵民房屋陡被震塌必致失所無依情殊可憫  
著該都統卽飭鎮迪道酌帶銀兩確查被災情形先將貧苦之戶  
壓斃者妥爲收殮壓傷者酌給藥餌之費棲止無所者量給房費  
至極貧無業之戶應否再加調劑著查明情形另行覈辦總期災  
黎無致失所二十三年三月以病奏准開缺回旗調理是年還京  
病痊二十四年三月授漕運總督十二月奏幫船兌開遲早乃漕



行第一關鍵請 敕新漕及早兌開沿途河閘亦當豫爲疏濬修築得 旨從之二十五年正月授陝西巡撫二月調福建巡撫四月調雲南巡撫尋擢陝甘總督會甘肅番賊滋事 上命惠吉馳赴甘肅相機妥辦七月惠吉行抵潼關奏言聞甘肅西涼一帶無業回民甚多必有從中煽惑之事疏入 諭曰回民勾結番眾滋擾邊境事所必有該督務嚴飭守卡官弁禁止回民出入儻訪有從中糾約之徒卽行嚴加懲辦毋稍姑息時署總督陝西巡撫鄧廷楨奏官兵疊次擊賊分守要隘 上以賊番經官兵捕擊勢必分路逃竄 諭惠吉於到任後與鄧廷楨相機勦辦尤當設法斷其後路勿令竄歸巢穴八月惠吉抵甘肅先是提督胡超總兵站



住連與賊戰站住擊賊於硫磺溝敗之賊西竄至是惠吉檄站住  
由巴思洞進兵以截其後並令署總兵恆安等由前路夾擊之時  
檄調肅州兵進勦肅州兵不欲行譁於提督胡超轅門惠吉等以  
聞 諭曰惠吉等奏征兵不遵調遣干犯號令一摺此次胡超  
統帶官兵出卡捕賊肅州官兵膽敢同時譁諫不肯入山玩法已  
極善惠吉查出爲首之人一面奏聞一面卽行正法該管將弁著  
查明嚴參懲辦胡起身任提督乃不能約束兵丁致敢干犯號令  
實屬畏難苟安庸懦無能著交部嚴加議處尋奏官兵遇賊於石  
灰關等處奮力搜勦又奏官兵在東科爾寺等處疊次捕賊見在  
酌留官兵固守要隘以資防範並據籌來春進勦情形十月卒於

任 諭曰陝甘總督惠吉久任封圻勤勞素著履任以來正值審  
辦番案事方資整飭遽聞溘逝殊堪軫惜著加恩照總督例賜卹  
所有任內一切處分悉予開復應得卹典該衙門查案具奏尋  
賜卹如例

右 國史館本傳

日本書紀卷之二十一

十一

朱爲弼

朱爲弼浙江平湖人嘉慶十年進士以部屬用籤掣兵部十二年  
丁母憂十五年服闋二十年充馬館監督二十二年補主事二十  
四年升員外郎八月充順天鄉試同考官十二月記名以御史用  
道光元年五月升河南道監察御史九月奏言江西閩浙連界之  
封禁山內近有流民潛匿滋生事端請嚴密查辦得旨允行二  
年協理京畿道監察御史三月奏請將各部煩苛無當之冊籍大  
加刪除以清案牘而釐弊源疏入下部議行四月轉補京畿道掌  
印御史十一月以引見遲誤部議奪俸三年二月補禮科給事  
中四月稽查海運倉十一月奏請整飭捕務以靖盜源疏言順天



府四路同知均冠以捕盜之銜所管各路千總把總外委等弁其  
二十餘員所領馬步守飛虎兵共三百五十餘名責成分路躡緝  
盜賊近年以來該同知等於緝捕事宜闕焉不講所轄弁兵往往  
缺額不補或以老弱充數甚至藉捕盜名目譌詐地方請安議章  
程將各該弁等分別勤惰與以獎罰並將該同知等如何約束稽  
查之處明定規條責以實力嚴捕至京城內專司緝捕各衙門亦  
須併力查拏不分畛域則畿輔地方日就肅清矣又外省通衢大  
道該管地方官弁尤應嚴密稽查今則汎守空虛橫行劫掠如江  
蘇省自王家營起至邳州一帶界鄰東省地方劫盜類皆塗面持  
刀搜括財物行人屢有被劫之案均未拏獲應請 旨敕下各該

省督撫查明飛飭所屬嚴拏究治以除盜賊而安行旅奏入如所  
請行十二月劾倉場侍郎和桂張映漢覆奏海運倉豆石霉變情  
形不實 上命解和桂張映漢任交大學士托津戶部尙書英和  
會同刑部堂官按治之鞠實和桂張映漢褫職監督雅隆阿吉升  
阿何元瀛遣戍奪職有差四年二月巡視西城三月奏言江蘇省  
海口壅塞浙江上游均受其害請趁水源未降之時於劉河吳淞  
太湖一帶確勘情形大加疏濬爲一勞永逸之計 從之四月授  
順天府府丞五年擢順天府府尹六年二月復補順天府府丞六  
月稽查右翼宗學十一年四月遷通政使司副使七月補太常寺  
卿十二年二月轉宗人府府丞四月升都察院左副都御史九月

充武會試副考官十月充武鄉試副考官十三年四月擢兵部左侍郎充殿試讀卷官五月署倉場侍郎六月實授十四年十一月調漕運總督先是御史章燁奏稱山東東昌府境內廬州幫水手聚眾械鬪傷斃數十餘命糧船所過地方時有折體斷肢漂流水面皆由水手戕害所致地方官置之不問督運官往往姑息養奸明知故昧至是 上命爲弼查禁尋酌議章程覆奏略言漕運總督向來押運北上例隨尾幫其在前三各幫難於遙制所有在前各幫水手滋事請責成押運官并會同地方文武官員嚴拏速辦除重應正法輕應枷號外其應發遣軍流以下罪名訊明後先於犯事地方枷號示眾俟漕竣後再行覈辦至攬充水手定例責成頭

舵分別雇用確知姓名籍貫保結又有前後船十家保結有犯連坐嗣後水手有犯頭舵查明稟報者酌給獎賞十家保稟報者免其連坐仍給獎賞其頭舵十家保能將重犯縛送運官究辦者優加獎賞若知情徇隱加倍治罪疏入得 旨允行十五年三月奏重運船隻銜尾前進請 旨飭下河東河臣先期挑濬十字河淤沙以速漕行毋致臨時互相推諉 上是之四月以首進漕船行抵清江浦不戒於火延燒廬州常白等幫船三十九隻焚燬米三萬六千餘石自請議處部議降一級畱任七月條奏剔弊速漕章程一新漕須趕早開兌一回空須速歸水次一各幫應僉新丁宜先期辦理一各幫失火船隻宜嚴禁捏報一各衛屯田妥爲清理



一淮塘幫船酌減數目一每年領運千總加意揀選一江蘇總運  
丞倅責成管押幫船過淮渡黃一江廣各幫經過九江蕪湖等關  
催令迅速查驗疏入均下所司議行八月因病陳請開缺 諭曰  
朱爲弼著賞假安心調理毋庸開缺九月以病難卽痊籲請開缺  
允之二十年卒年七十子善旂國子監學正善驥道光十五年  
舉人

右 國史館本傳

張文浩

張文浩順天大興人由捐職布政司經歷投效東河工竣分發江南歷署通州州判邳北河務通判嘉慶十年三月升署宿北河務同知旋調署山清外河同知再署山清裏河同知十四年八月所屬山陽縣狀元墩隄蟄河水漫溢經督臣阿林保等劾奏奉 旨嚴議尋議革職十五年馬港口大工合龍出力降一等補用十六年二月承辦閘工塌卸 諭令革職賠修十二月以王營減壩告成開復十七年李家樓大工出力以同知畱於南河卽補十八年四月補外河南岸同知是年全漕渡黃較早文浩催儻奮勉得旨下部議敘十九年七月河東河道總督吳璥奉 命塞睢河決

口請於鄰省酌調諳習之員赴工差遣奏入 敕文浩速赴睢工旋以南河修防穩固總督百齡等奏文浩在事出力請量予鼓勵賞加知府銜十二月擢署淮海道二十年二月睢工合龍吳璫上其功二十一年南河奏報安瀾文浩防守出力疊奉 恩旨下部議敘二十三年黃河盛漲文浩相機宣洩復得優敘二十四年八月河溢儀封復決武陟之馬營壩吳璫請調諳練大員文浩復奉 旨馳赴蘭儀工次二十五年四月馬營壩大工合龍吳璫奏文浩尤爲出力 賞戴花翎時儀封決口未塞 特旨擢署河東河道總督 諭曰吳璫年老不能耐勞河督事務較繁精力恐難周到著張文浩以道員署理專駐豫省籌辦大工及黃河隄岸各

事宜其山東運河事務仍著李鴻賓署理六月會勘沁河隄工以  
民埵卑缺請借帑修築 從之七月奏請續撥防險銀兩八月酌  
議儀封大工築壩挑河佔銀四百五十萬兩得 旨允行九月奏  
霜降安瀾 賞三品頂帶兼右副都御史銜十月 命速籌堵築  
又 諭餉銀已如數續撥不得藉口不敷停工待餉文浩奏防汛  
勤奮人員又請修築隄堰十二月奏引河通暢 賞捨獐獐馬褂  
以示嘉獎 諭曰豫省儀封大工指日合龍山東運河著仍歸張  
文浩管理尋奏儀封大工合龍 賞二品頂帶兼兵部侍郎銜道  
光元年正月欽天監奏彗星出東壁分野在衛地其占主大水  
上以修省之道不可不思患豫防衛地見屬豫省爲黃沁交匯之



區隄工不可不慎 敕文浩與河南巡撫姚祖同董率屬員小心  
防範時回籍御史王錦雲致書吏部侍郎吳烜言河身淤墊若不  
增隄恐有漲決之患吳烜以 聞 命履勘情形設法辦理文浩  
奏河灘高下不齊則隄高於灘亦不能一律長隄千有餘里豈能  
一律增高請加子堰二三尺 從之四月奏請修運河劉昌莊減  
水閘分洩漲水增濬利運五月奏運河東岸壩工及南壩頭河面  
護埽加鑲又奏黃河北岸馬營壩工程飭委道廳各員疏復溝渠  
鑲築壩埽奉 旨張文浩於修防事宜實心經理著加恩實授河  
道總督尋奏修運河上河二廳開座又請籌添馬營壩土埽各工  
以資防衛旋丁母憂服未闋 特召起復來京三年六月署工部

左侍郎先是直隸總督顏檢陳奏直隸河道情形及文浩至 上命偕候補三品卿繼昌會同直隸總督蔣攸銛將南北運河及永定滹沱諸河情形悉心查勘妥議章程 諭曰蔣攸銛係本省總督張文浩係特派之人不許彼此推諉務要和衷共濟克副委任嗣後應行陳奏事件著卽聯銜具奏值永定河北中汛漫溢蔣攸銛奏請文浩赴工商議估辦乃 命繼昌還文浩駐工會辦七月奏北中汛地處上游業已奪溜未能興工請俟秋分後新楛登場購料堵禦其口門以下宜挑濬引河以便合龍時引水下注九月永定河大壩合龍奏善後要工請撥經費銀兩奉 旨俞允十一月會同總督蔣攸銛奏言勘籌直隸河道因漫水未涸無從查勘

考詢各處河道隄埝無不堙塞殘廢每年二月半方可動工五月半後卽須停止工繁時促斷難同時興作請於來歲春融周歷履勘分別緩急奏明估辦又奏言永定河所以爲患固由下口不能暢流亦由上游無所宣洩請修築金門關添設減水壩再查近年河瀆每多側注北岸宜添築越隄以爲重障十二月御史王世紱奏言減水河道久廢關係民田宜加濬治俾河水順流入淀 命文浩會同蔣攸銛於明春前往履勘妥議具奏四年二月授江南河道總督九月奏報安瀾是年糧艘回空以黃水高於清水停阻河北者數月奉 旨切責 諭令設法蓄清以資浮送十一月始以全數渡黃入奏 上念來年新運北來尤爲緊要如有淤淺處

所必須及早籌疏 命督率河員妥辦勿令臨時再有阻滯又以  
漕行延緩文浩辦理不善下部議處部議褫職 諭曰本年回空  
各幫船在河北停阻至數月之久張文浩總理南河於一切修防  
是其專責乃並不隨時查勘豫爲設法妥籌以致延誤漕行所司  
何事其辦理錯謬之處卽照部議革職實屬咎所應得惟念自前  
月二十日以後清水暢順幫船陸續開放業已全數僭渡幸未貽  
誤該河督之罪尙可稍從末減張文浩著拔去花翎降爲三品頂  
帶仍畱河督之任以觀後效該河督務當激發天良董率工員將  
緊要處所及早趕緊疏挑俾皆通暢儻明歲重運經臨復有淤淺  
阻滯之事必當從重治罪不能再邀寬貸會洪澤湖漲水未消連



日西北風大作高堰十三堡隄潰一萬一千餘丈山盱周橋之息浪庵亦過水八九丈各壩均有漫溢事 聞奉 旨嚴議部臣議文浩溺職奏請罷黜 諭曰本年洪湖水旺高堰大隄掣塌多處皆由禦黃壩堵遲以致黃水倒灌湖水驟漲石工因此塌通過水張文浩身任河督剛復自用於此等要工重務不能相機妥辦所司何事實屬負恩溺職著卽革職 上命尙書文孚汪廷珍馳至江南查勘潰決情形文孚等奏言本年五六月間黃水漸長節經道廳各員稟請堵閉禦黃壩及放五壩以減洩湖水張文浩固執不信馴致湖水漸長堰盱各工漫溢詳訊工員僉稱張文浩於禦黃壩應閉不閉五壩應開不開以致有潰決之事 上以文浩措

置乖方糜帑誤漕 命於工次枷號一月枷滿日發往伊犁效力  
贖罪以昭炯戒六年回疆不靖文浩以廢員隨營效用烏魯木齊  
都統英惠奏請派往糧臺 上不許事平英惠奏請鼓勵奉 旨  
張文浩著不准釋回十六年十一月故

右 國史館本傳

--	--	--	--	--	--	--	--	--	--

157-474

VII

朱爾漢

公諱爾漢字麗江姓朱氏先世自鄆遷餘姚曾祖名進祖大彬不仕父健遷大興官絳州吏目大彬健皆 贈朝議大夫前母林氏母熊氏皆 贈淑人公神明挺勁有識斷能得人死力奴客悉以兵法部之自初入仕卽在行閒後遂與教匪相終始少時吏於戶部以吏目分發甘肅署甯夏典史再署岷州吏目被議輸資復官借補靖遠典史赴衛藏迎班禪額爾德尼入 朝道聞熊太淑人之喪去官服闋赴甘肅候補時平涼鹽茶廳回豪田五作亂公與通判吳君廷芳知縣黃君家駒守靖遠城賊仰攻一日引去靖遠回豪哈得成等一百三十有八人期夜半爲內應公鉤得賊情令



守者悉登無驗不得上下漏初下乘馬至哈得成之門陽科其穀  
餉軍因拘焉所分遣捕賊人亦誘擒城下餘賊而賊雜守者在城  
上且數十人縣胥鐵光保最爲劇賊公登城給使獻刀卽反接以  
布袜其口直掖下城遂令鳴角城上捕賊人聞角聲皆拍賊肩曰  
視地賊視地則扼而反接之於是無脫者夜將半城外賊復引向  
城公呼語之復引去於是公以知兵聞升署隆德縣事諭底店據  
岩降回徙之補隆德縣知縣升涇州直隸知州豫擒教匪頭目劉  
松並其孥升鞏昌府知府嘉慶元年教匪起陝西白河湖北當陽  
亦起二年賊大入四川總統宜縣公駐達州檄公參軍事是時賊  
渠王三槐拒總統於方山坪白巖山者極險固賊渠林亮工樊人

傑屯山上與方山坪爲聲援將軍舒亮公提督穆克登布公屯山  
前之韓彭坳公將成都兵三百募兵三千屯山後之排亞口排亞  
口之上曰金鳳觀曰草店曰鴨坪公一日盡攻克之復進有木柵  
當隘不見賊唯一犬獠獠然我兵有躍而攀柵者賊乃自厓旁引  
刀斷其指我兵擲火焚柵賊鳴鑼擊所樹旗左右招賊賊大至公  
慮斷後路退師時九月九日也先是與韓彭坳爲師期而韓彭坳  
之師中道而綏賊得專力山後我兵不能克十月奉節賊千餘人  
援白巖公敗之擒賊渠邱廣福十一月白巖賊久困欲走傾巢來  
犯戰一晝夜不得路仍退至屯公以親搏戰創甚回鞏昌道遇河  
州總兵保興公曰君文官乃能爾吾輩當何如後保興公與王三

槐戰於三匯遂死事三年公運甘肅麥十萬石餉軍行至成縣賊渠高均德將眾七千窺麥公與涇州知州沈君清都司馬君良棟敗賊於格樓壩生擒賊軍師李得勝四年賊渠張漢潮犯秦州公赴成縣會勦而鞏昌警至馳還賊已據城東駕鸞河公夜掠賊卡至城守始固賊不敢攻以功升鞏秦階道生番鐵布者世居西傾山中凡十餘萬人乘教匪猖獗時出盜內地主兵內怖四川教匪謀畱軍勦鐵布公以鐵布未叛亂且地險一搆兵非數年不平鐵布奉回教公召其阿渾諭曰鐵布非反者然爲惡不已且移軍至奈何其不爲惡知盜蹤者速來首於是來首者踵至公一日出姓名紙一曰此鐵布盜也復出圖紙一曰盜巢及出沒要隘盡於此

分遣一百數十人捕之其來首者助之縛悉就擒鐵布乃定六年  
陝西湖北四川教匪捕斬略盡餘賊多竄甘肅公將千六百人遮  
尾之前後數十戰而西河砦東溝塢南家渠卷洞溝硝厓廠睡佛  
洞諸戰皆大勝生擒其渠八年甘肅教匪平上功狀第一 賜花  
翎公用兵常分數隊迭前迭後賊不知眾寡隊各就地勢結陳槍  
箭不妄發賊近在三十步始發之賊陳動則追殺不動結陳而待  
賊攻則彼此互援常以此獲勝其助戰者鄉勇侯達海侍衛李榮  
華武舉劉養鵬千總銜鄒坤桂攀桂皆操刺健兒也旋調肇羅道  
升廣西按察使署布政使十二年三月十八日卒於按察使任年  
六十有三配江淑人子長浩江西候補知府次沅浙江候補運判



國朝通志卷之二  
卷之二  
三  
女長適天津知縣黃德棻次適陝西候補縣丞陸淮公葬通州里  
橋之祖塋銘曰

教匪之至以萬眾先公所部兵極於三千摧孱蹈弱遂無重堅大  
將倚之如臂在肩斬蜀之勢決秦之阻陳如撒星戰如集雨手撫  
瘡痍目馴貔虎帳合千旌城堅萬杵 皇帝眷功以擢以褒貂蟬  
之 錫出於兜鍪善哉始終無有瑕尤子子孫孫蒙 國之庥

右神道碑懌敬撰

賀長齡

賀長齡湖南善化縣人嘉慶十三年進士改翰林院庶吉士十四年散館授編修十五年充廣西鄉試副考官十七年大考二等二十一年放山西學政二十四年十二月充文淵閣校理尋記名以御史用二十五年十一月充日講起居注官十二月升詹事府左春坊左贊善道光元年授江西南昌府知府二年升山東兗沂曹濟道四年四月署山東按察使閏七月授廣西按察使九月調江蘇按察使五年升江蘇布政使六年調山東布政使七年閏五月署山東巡撫六月兩江總督蔣攸銛奏來年新漕仍行海運上命沿海各督撫籌議長齡旋查明應行各章程具奏一在途各商

船應催令回南受兌一最要島嶼令該管將弁親督彈壓一陸路  
委員應行酌減一收入津口船數日期應歸直隸奏報一收島船  
隻應相風催令開行 上題其言七月御史吳敬恆奏衍聖公官  
屬冒濫請嚴示限制 上命長齡確查具奏尋查明奏言嗣後保  
舉廟員三代年貌一併咨部俾無捏混恭遇 覃恩惟咨部題補  
者得邀封典此外槩不准行仍令衍聖公隨時覆查不得以身家  
不清之人濫充 從之八月奏擊獲假充王府差官之棍徒克昇  
額在東阿縣請託嚇詐請解京交部審辦九月奏臨清州揭獲逆  
帖一紙 上命密查寫帖及張貼之人嚴拏究辦隨訪獲形迹可  
疑之臨清州人徐慶龍具奏 上命將起意情由根究明確旋奏

審明徐慶龍委係妄冀要功並無商謀滋事情節 命再覆加嚴  
鞠按律定擬十月調江甯布政使因母年老奏請量移近省得  
旨所奏著不准行十二月 諭曰吏部具題山東省大計卓異本  
內新城縣知縣容異一員該撫賀長齡原註悃愾慈祥考語爲政  
之道總須寬猛相濟豈因一意慈祥遽爾列諸上考直省督撫當  
於屬吏中體用兼備者登諸薦牘固不可任武健嚴酷之吏爲害  
閭閻亦不可長優柔之習稍形廢弛十年十一月請開缺回籍養  
親旋丁母憂十三年服闋尋患病十五年病痊投福建布政使十  
六年調直隸布政使旋升貴州巡撫三月入 覲九月疏劾興義  
府知府谷善禾人地不宜定番州知州明玉精力衰頹請分別改



簡勒休又平越州知州羅文寶延案不結請革職得旨所參是  
均。 尤之十月請將在部候補知府孔繼尹發往黔省差委 諭  
曰孔繼尹前在山東官聲雖好然地方情形不同該撫何以知其  
於苗疆要缺相宜該省差委乏員不妨照例請揀此端斷不可開  
所請著不准行並下部察議十七年三月會同雲貴總督伊里布  
奏請將石阡府改爲直隸廳所屬龍泉縣撥歸思南府管轄思南  
本係簡缺所轄婺川安化印江三縣號稱難治見將龍泉撥歸應  
將思南府改簡爲繁都勻府原係繁缺見在民苗馴服所屬易治  
請改繁爲簡又銅仁府屬平頭司吏目係屬閒員請裁汰定番州  
羅斛州判係苗疆要缺命盜詞訟近益繁多請將羅斛改設知縣

部議以平頭司吏目無專辦公事准裁至石阡府羅斛州判均仍其舊九月奏湖北漢局存積白鉛六百餘萬斤足供數年銷售請暫停辦運以紓廠力又奏黔省歲運京鉛四起自己亥爲始歸併兩運以節經費 允之十一月奏掣獲龍泉縣傳授報恩會匪犯曹得成呂相桂等審擬發遣如律十八年七月以奏夾帶小錢弊端輕聽新選銅仁府知府周作楫之言率行入奏得 旨周作楫著交部議處賀長齡輕聽屬員亦屬冒昧交部察議十二月遵義府屬仁懷縣民人穆繼賢糾眾滋事與四川綦江縣接壤因勾結川省匪徒數百人欲赴川劫掠仁懷縣知縣王鼎彝往捕綦江外委章泗明亦來查辦章泗明遇賊倉猝被害長齡偵知匪等於附

近村莊裹脅愈多恐該處兵單漸致蔓延卽檄調弁兵圍擊隨殲  
斃賊黨十五名擊獲頭目謝世昌等五名又續獲賊匪二十餘人  
會同雲貴總督伊里布次第奏入 諭曰匪徒糾集恣搶所供頭  
目十名均須按名弋獲卽就地正法被脅之人旣有自首自應免  
罪有捉獲首犯來獻者亦不過貸其一死該督等所奏籲請加恩  
之處斷不可行並著咨會四川認真防堵旋會奏提督榮玉材與  
貴西道周廷授調兵分路進攻該處山口路狹匪等壘石樹柵一  
時不能摧破俟續調各路兵齊竭力進剿得 旨催令未到各兵  
趕緊馳往攻剿迅速蒞事隨調到各營弁兵出隊前進殲賊匪二  
百餘人焚其巢燒斃之賊不計其數生擒三十餘名又獲男婦百



餘人合計拏獲首夥各犯千餘名奏入得 旨嘉獎十九年正月  
奏查禁卽岱普安清鎮各廳私種罌粟得 旨嚴飭地方官認真  
查訪立予拔棄又奏續獲開館販煙各犯起獲煙土等件 諭以  
查緝尙好總期有犯必除以絕此患勉之三月保奏降調知府周  
作楫畱黔補用下部議鑄級四月奏拏獲天主教何枚等犯議罪  
如律又奏部選思南府知府谷善禾才難治劇請酌量另補六月  
奏訪獲吸食鴉片煙之大定府經歷陳培玉請發往新疆效力贖  
罪得 旨所辦好七月會奏貴平營都司馬鳴珂剋扣兵餉吸食  
鴉片並侵蝕銷造火藥銀兩請革職嚴審八月奏鎮甯州訓導蔣  
紹周捏詞妄傳查詢廣順州吏目丁申難保無挾制索詐情事請



華職審辦十二月奏黔省不通舟楫民間絕少蓋藏見於無義倉  
處添辦先於省城糧儲道倉籌備實貯永甯羅斛等州報捐倉穀  
各一千二三百石其大定等處報捐倉穀二萬餘石一俟實數貯  
倉卽續行奏報二十年二月奏黔省土瘠民貧女紅不勤謀衣更  
艱於謀食見督同司道教民栽種木棉以冀漸知紡織玉屏縣栽  
種桑樹二萬餘株知縣王存成在署設局教以養蠶取絲婺川縣  
知縣陸文衡設局購木棉五百斤教人紡織民間能養蠶者百數  
十戶能紡織者百數十人庶漸推漸廣益宏 聖主帡幪之化得  
旨實力勸導不可中輟勉之三月奏請都勻府八寨廳設立義  
學並加增學額下部議行經禮部奏稱向例添設學額督撫與學

政會銜此次該學政並未列銜 上命長齡明白專摺回奏六月  
奏稱繕摺時學政王慶雲出省考試是以未及會銜得 旨賀長  
齡著交部議處又奏舉人饒懷清護庇吸食鴉片人犯致犯脫逃  
請革去舉人嚴密旋審明具奏得 旨賀長齡所辦甚好一律查  
緝不准疎懈二十一年八月審辦糾眾結盟匪徒汪擺片等四十  
一人如律十一月奏挾嫌誣訐之學正熊文錦請從重發往新疆  
充當苦差先是御史花詠春奏飭邊疆認真訓練 上命各督撫  
妥議十二月長齡議稱黔省形勢四鎮分設四隅撫提兩標居中  
控制布置最爲得宜貴東與雷州鎮同城其鎮遠鎮亦該道所轄  
貴西與威遠鎮同城其安義鎮亦該道所轄唯糧道不兼兵備請

將糧道兼兵備道銜所轄貴陽石阡等營責令稽查統於年內結報一次奏 聞下部議行二十二年三月戶部奏請 敕力求撙節 上命各督撫分別緩急通盤籌度長齡議請將黔省通事土弁苗弁苗兵衝僻各路驛夫六項裁汰每年撙節銀一萬八百七十餘兩並請將撫臣學政司道額支養廉銀每年捐出二成銀五千六百八十兩州縣養廉銀每年捐出一成銀四千八百三十六兩俟經費充裕再爲復額疏入如所請行十二月奏黔省辦運黑鉛酌停三年尙有盈餘請 敕部議以節經費尋經部臣議停四年 從之又奏言貴州省城貯有劈山威遠子母等銅礮平時並不操演嗣後請定爲每年冬操演放一次多年銹壞者改鑄擡礮



以資利用得 旨著依議行至黔省跬步皆山所製擡礮自以輕捷便利爲要儻過於笨重運用不能得力卽致有名無實二十三年五月奏永甯州撤任知州富呢雅杭阿公事未能明練得 旨嚴實辦理尋奏言察看該員才具短絀不知愧奮請以州同降補二十四年三月奏黔省安置各省流人及新疆改發人犯見有三千餘名恐地方官約束難周加以苗民錯處罅隙易生請將改發黔省者仍發新疆安插奉 旨下部議奏旋經刑部議上復奉 旨交軍機大臣會同刑部妥議 敕下伊犁將軍辦理八月奏黔省擡礮製齊而火箭尤佐擡礮所不及數月以來製造均已如法眼同試放皆輕便適用得 旨所造不爲無用其善練之十月奏



遵義府屬稅口十九處子口十四處近年以來山徑紛歧稽查匪  
易擬將青坑稅口移於茅苔村其蘭坪等處子口一併裁汰庶走  
私可絕稅課自充二十五年正月會奏黔省下游鎮遠黎平都勻  
三府及古州廳所屬苗俗桀驁以盜爲生州縣差役緝捕難周擬  
於古州鎮遠兩鎮兵內挑選或十名或五名酌量地方衝僻令其  
專擊盜賊另挑數名作爲餘額遇缺卽補無事仍就本營操演不  
使曠廢責成旣專緝捕自倍臻周密得旨均下部議行四月升  
雲貴總督請入覲旋因病賞假調理六月諭令毋庸來京  
卽赴新任俟三年屆期再行奏請七月奏請將黎平營參將張肇  
泰朗洞營參將存住二員帶往滇省飭伍練兵報可八月兼署

雲南巡撫十月永昌府回匪糾眾肆掠先將滋擾情形奏入 諭  
長齡慎密籌辦又 命激勵將士迅卽兜剿勿任滋蔓續奏稱回  
匪於保山縣猛庭寨聚集聲言報復見飭迤西道羅天池提臣王  
一鳳相機督辦尋奏言回匪千餘人由枯柯河大田壩等處衝突  
營盤已飛咨提臣張必祿添調官兵親往堵禦十一月又奏回匪  
偏近永昌郡先經迤西道羅天池將城中內應回民殲除淨盡匪  
等撲繞金雞村營盤經騰越鎮中軍遊擊朱曰恭帶兵迎敵將放  
槍之賊擊斃張必祿等分路進攻竊斃匪犯數十名匪等棄柵逃  
走查明回寨並無匪徒藏匿見將未到官兵截回歸伍有 旨嘉  
之二十六年五月奏永昌逃散回匪經外來奸回煽惑糾眾復出

提督張必祿總兵音德布等奮勇迎擊將賊首殲斃 諭曰此次回匪滋鬧見據生擒之馬良一犯供稱上年九月搜戮內應殺人過多是以羣圖報復是羅天池辦理不善咎無可辭所有議敘著撤銷賀長齡著交部議處七月奏漢回構隙情形得 旨著賀長齡督率所屬嚴禁外來游匪以絕構煽儻再有滋事唯賀長齡是問凜之八月奏軍犯王芝異奮勇敢請援回疆遣勇成例將其釋回 諭曰賀長齡所奏甚屬謬妄內地與回疆情形迥不相同在配軍犯自宜嚴加管束不得藉端遽請免罪致使妄生希冀該督總制兩省營伍不惟雲南之兵歸其統轄卽貴州各營亦無難隨時札調此次辦理么麼回匪何必藉一軍犯之力練勇相助耶



賀長齡辦事毫無見識懦弱無能有負朕望著嚴行申飭交部議處經部議褫職 上加恩改爲革職畱任又 諭曰上年雲南回匪滋事經賀長齡親往督勦辦理果協機宜何至本年復有蠢動見雖據奏稱連獲勝仗地方安謐惟究未能及早籌防優柔從事致復勞師糜餉已屬咎無可辭甚至總督重任兩省營伍皆其統轄豈竟調遣乏人轉藉一軍犯之力練勇助勦謬妄無能莫此爲甚賀長齡不勝總督之任著降補河南布政使十二月抵任二十七年二月患病回籍三月 諭曰雲南漢回報復幾於無歲不有著李星沅悉心酌辦儻賀長齡從前辦理不善卽據實嚴參尋奏入得 旨此次雲南回匪又復滋擾賀長齡未能詳慎區分率行



掩捕又率准張富等投誠種種謬妄實屬辦理不善賀長齡著革職二十八年故

右 國史館本傳

君姓賀氏諱長齡字耦庚號西涯晚自號耐庵湖南善化縣人也舊籍會稽其高祖上振公爲湖南司獄卹囚有隱德貧未能歸居會垣爲善化人世世以仁厚傳家迨君爲雲貴總督會祖士英祖國華考啟會皆 贈榮祿大夫會祖妣馮氏祖妣陳氏妣嚴氏皆 贈一品夫人君英姿動人而志高言下見善如不及勇於任事自秀才至詞翰常以文章爲羣黨雄而自視恆闕如也初放廣西考官繼放山西學政稱得士之盛云 今上登極大簡賢能君以

春坊贊善出守南昌以察吏助大府指臂信讞紓民間疾苦深得  
上下心二年七月擢兗沂曹濟道四年閏月擢江蘇按察使五年  
四月升江蘇布政使時以清口塞議海運協揆英和連疏其利而  
外間以事涉勘始愼之不敢決君主之海運乃行六年十二月調  
山東布政使時庫項輻輳君立清查局或追或補數月頓清旋護  
巡撫條奏甚眾七年九月調江甯布政使十年十月請假省親丁  
母憂服闋因病請假十五年四月奉 召入都授福建布政使十  
六年正月授貴州巡撫閱九年而升雲貴總督君之惠政在貴州  
者雖屢冊不能罄而其待士也尤加意焉養之教之奮而鼓之循  
而導之優游而涵育之擴充其所已能輔翼其所未逮父之於子

師之於弟不是過也凡書院義學在省垣者暇則往焉或背書或摘講經義樂此不倦固其所好抑亦愛士之心深也他若迪官方澤黎庶緝盜賊懲胥吏贍倉儲練營伍收卹孤嫠行養嬰幼開通溝瀆布種桑棉亦皆義肅仁安法明恩備君好與人詰辨相知與不相知但可與言見則發端啟問逐層推詰窮其原又竭其委叩其中又討其邊愈攻愈進應者傾囊倒篋不足以給之而君方鯁鯁然未已也蓋其聽言也順而易受其取言也廣而能蓄一人作如此言然之一人作如彼言亦然之惟其善而已無彼此也其讀書也亦若是君無日不讀書亦無書不讀未聞者記之數聞而互異者亦記之一篇若是易千百篇亦若是是以胸懷磊落得於古

者足得於今者多事來亦以其所得者應之而已然而干得之中未嘗無一失也而心之光明則可以告於天下之總督任適永昌回變督兵勦辦亦卽解散次年遭孽復行聚搶以是左遷河南布政使嚴天告雖旋以前案羅觀察搜殺過當未經嚴參落職君少失怙恆痛不丁丁養又以官遠不能迎奉太夫人爲不樂居喪三年不出閭閻友於兄弟雖遠每月必數起居以爲常戚鄰貧乏者周恤不少吝嗇年尤好行善事君生於乾隆乙巳年二月初八日戌時卒於道光戊申年六月初六日巳時葬長沙明道都南嶽廟金雞嶺之原子山午向元配徐氏前任河南安陽縣知縣諱坦公女繼配鄭氏山東同知諱士杰公女韓氏山西平陽府知府諱某



公女皆早卒陳氏同邑處士諱鏞公女妾陳氏馮氏吳氏子二長  
殤繼配陳氏出次詒令胞弟桂齡之子入繼娶丁氏翰林院侍講  
學士名善慶公女女五長適河南固始縣前任山西巡撫吳公諱  
其濬長子蔭生元禧徐氏出次殤鄭氏出次殤韓氏出次殤陳氏  
出次幼妾陳氏出孫女一君才高望重交游徧天下而於同邑唐  
鑑最親且信葬有日其孤走書請銘不敢辭銘曰

梧桐兮高岡鳳凰鳴兮邦家之光棗竹兮淇澳圭璧綽兮君子之  
獨君子之獨兮至隱實大兮聲揚而聞遠名孚其實兮仕孚其學  
仁愛其心兮經緯其腹先民而勞兮先士而覺不顯其恩兮兩甘  
林綠不大其威兮風柔草肅欽崆兮黔之陽迢遞兮阻且長思君

之去兮徒倚而徬徨祝君之來兮蘋藻而羔羊惟此遺愛兮百世  
烝嘗

右墓誌銘唐鑑撰

公諱長齡字耦庚晚自號耐庵又號齧缺叟姓賀氏系出唐祕書  
監知章祕監居山陰會稽間子孫多隸浙之甯波府定海縣康熙  
二十六年分定海爲鎮海定海二縣公之先隸籍鎮海自祕監二  
十五傳有諱宏聲者是爲公高祖以雍正六年任湖南按察司司  
獄子孫遂占籍善化司獄仁厚惠囚於衣糧厚於常格囚感甚爲  
位以祀於獄曾祖諱士英祖諱國華皆早世妣皆節孝膺 旌典  
考諱啟曾性方嚴居恆不妄語笑子弟侍奉凜然無敢咳唾祖父

兩世皆習法家言佐郡邑治三世並 贈如公官贈公舉丈夫子  
八人公次居第五生而岐嶷如成人弱不好弄讀不釋卷年十六  
應童子試輒冠其曹明年辛酉補學官弟子又二年居贈公憂歲  
丙寅入獄麓書院從羅鴻臚典受業明年舉本省鄉試第一聯捷  
成進士改庶吉士是爲嘉慶十三年次年散館授編修旋充庚午  
廣西鄉試副考官二十一年 簡放山西學政二十五年保送御  
史引 見記名旋轉左春坊左贊善中間屢充文穎館協修本衙  
門撰文文淵閣校理日講起居注官當是時公以文學侍從之臣  
迴翔 禁近殆將一紀而 特達之知從此始矣道光元年四月  
出爲江西南昌府知府故事首郡由大吏揀調公莅茲任蓋出

特簡二年七月擢山東兗沂曹濟道四年四月署山東按察使閏  
七月擢廣西按察使旋調江蘇按察使五年四月擢江蘇布政使  
六年十二月調山東布政使七年四月自江蘇入 覲 上曰汝  
聲名甚好今調山東非因汝曾任山東實因地地方難治也五月赴  
任未幾 命護巡撫八年八月調江甯布政使十年十月丁母巖  
太夫人憂回籍終喪以心疾請假調治十五年四月奉 旨飭來  
京聽候簡用八月授福建布政使十六年正月調直隸布政使旋  
擢貴州巡撫五月 陛見七月抵任二十五年五月擢雲貴總督  
二十六年降補河南布政使踰年春病免歸里復以雲南回案落  
職二十八年六月六日薨於里第春秋六十有四公前後所歷官



及顯晦升沈蓋如此公資性沈毅學問純正故能敢言敢爲肩任  
宏鉅道光四年大風壞高堰清口水澀 詔羣臣議海運協揆英  
和公連疏稱便而事涉剗始節目繁重悉以爲難公執議謂海運  
之事其所利者有三國計民生海商也所不利之人有三海關稅  
僧天津倉胥屯弁運丁也三者之人所挾海爲難使人不敢行者  
亦有三風濤也盜賊也霉溼也所離海爲難使人不能行者亦有  
三商船雇價也倉胥勒索也漕丁安置也必洞悉夫海之情形與  
人之情僞且權衡時勢之緩急而後知事有必行某宵旦討論寢  
食籌度徵之屬吏質之濱洋人士諏之海客畸民眾難解駁愈推  
愈審更無疑義說具復魏制軍書復爲圖說上之大吏於是江督

某公蘇撫安化陶公協力行之公乃擇諳悉洋面商人使雇覓沙船一千五百餘號裝兌蘇藩所屬四府一州額漕正耗米一百六十三萬三千餘石由吳淞出崇明奈山北放大洋趨成山轉之累以達天津水程四千餘里往來不爽時日昔元代棚行海運造平底海船六十艘運米四萬六千石其後船歲增造費且無算明王宗泐以海道不熟失風驚遊門而罷固其時海道未通又無沙船之利亦講求不能如此之精也 成皇帝嘗詢江蘇何務最難對曰漕務因陳辦漕之難 上曰聞挑河頗認真何以回空之船如此遲滯公奏減壩本不宜開傾天下之財不能挑河故從古無挑法今挑辦亦不得法而合龍又非其時向來合龍在冬令冬水力

能搜根離大汛尙遠故合後得安穩無事 上問江南官吏優劣  
奏言大氏循分供職者多實心辦事者少又言用人之難人才多  
格於例求 朝廷不拘成格道光中大學士寶興奏請嚴禁奸商  
錢票公議覆略曰政在便民道崇簡易錢質繁重難以致遠票則  
無須運載而可交易遠方錢有良惡數易混淆票則無庸揀數無  
宵小盜竊之虞水火沈失之患三利可徵應請一仍其舊又議覆  
嚴塞漏卮奏曰論罪必貴衡情吸食鴉片之人徒以自戕軀命耳  
而與殺人同科毋乃過當且科條愈重則句結愈密摘發愈難矣  
某御史奏請查禁漢奸盤剝苗民 詔公議覆奏曰苗疆自前撫  
臣嵩溥查辦保甲之後盤剝準折等弊均經奏明飭禁但須實力



奉行無須更設科條原奏謂流民漸少今殊不然自臣履任以來興義各屬已無不墾之山而客民仍多趨之者則以興義地賤也然地多煙瘴新徙之民輒多死亡故地不加廣曾無人滿之患言者乃謂客民獲利甚豐半皆廣田畝而峻牆宇毋乃偶見一二遂以槩之千百若使目擊流民之苦必不忍爲是言也黔不產鹽布帛又貴類皆挹注於他省苗民借居巖洞所饒者雜糧材木耳非得客民與之交易則日用無資所有亦莫之售脫且苗民務耕作而不知貿易客民耐勞而儉用多就穀賤之地爲家是未嘗不兩相資益若謂紛華靡麗皆由客民導之以至窮乏則漢人中昔稱富戶今爲貧民者又將誰咎盈虛消息物理之常卽無客民固不



能保苗民之常富也而臣細察漢苗情形則更有數端一則苗民實爲漢民害一則苗民自爲害一則土目土司之爲苗民害一則苗民之爲土目土司害洞悉隱結縷析條分而要以釐剔之餘漸移習染庶幾革薄從忠焉御史田潤奏請團練鄉兵已爲璧昌劉韻珂梁寶常諸疆吏先後奏駁公是時撫黔亦請召募訓練土兵上以團練既經指駁恐無實效公覆奏曰瀕海各省五方混雜團練鄉兵動踰數千不免恃眾恣肆故辦理爲難黔省土曠人稀岡嶺叢雜姦宄最易出沒苗俗習於獷悍又多剽掠故良懦民苗自相團結以資保衛漢民謂之齊團苗民謂之估榔州縣因兵役不敷亦每捐貲添募守卡巡查是雖無土兵之名早有土兵之實

此其爲數不多又皆散布無虞擾累實裨巡防若恐日久視爲具  
文此則有治人無治法凡事類然未宜因噎廢食也公之持論侃  
侃無稍阿諛大率如此而其爲政之大端更有犖犖可紀者一在  
恤民一在恤吏一在育人才一在講武備南昌爲豫章首郡公私  
繁劇案多委員承審往往玩延不結民受其累公別設自理讞局  
詳定章程局員以勞敘績公日與諸員會食卽席研究情實辨詰  
疑難諸員欲備諮詢不得不先自詳察公又與之縱談古今放懷  
暢飲脫遺拘檢使得盡其辭意其時案無留牘民大感悅城外野  
寺厝柩數千公示限三月遷葬力不能遷則官爲葬之歷年積殯  
數月一空山東屬地平行水鱗歸宿公諭民按地爲溝洫以資灌

既溝旁種樹枝葉茂密由是收穫倍常行旅亦便臨清州馬進忠等既以習教謀逆伏法而臨清營署獲揭帖臚列僞號剋期七月十五稱兵舉事內有進忠餘黨及附近州縣人名氏凡數百人一時驚懼悉欲按拏公曰焉有謀爲不軌而以姓名月日告人者是貽害平民也尋察知進忠案由州人徐化隆舉發邀賞未得化隆死其兄慶隆聞進忠餘黨林老仲潛回欲藉此興獄爲倖功計讞定誅慶隆旁無株累公之赴黔也沿途諮詢知黔民所苦無如詞訟拖累履任卽以聽訟之勤情爲察吏之權衡並以清理詞訟查辦匪類約束差役之法逐條申明頒示各屬復慮匿案不報飭將上批自理新舊各案分已結未結按旬開報以便稽覈使功過分



明瓊瑜莫掩由是而吏勤其職黔中多山少田不產布帛舟楫匙  
通商貨難至公目擊貧黎藍縷衣不蔽體蠶然憂之乃刊布蠶桑  
編木棉譜於楚豫各省購棉子二萬六千一百餘斤通頒各屬使  
之栽種設局雇匠教之紡織及成紬則勝於遵義之橡繭布則賤  
於客貨民大便之社倉舊法春借秋還每多逋負公於黔省各州  
縣添設義倉勸諭官民捐輸增義穀三萬三千五百餘石改出借  
爲平糶責成紳士司之穀貴則碾米減價出糶銀存於官而數記  
於紳穀平糶還穀交自紳而銀發自官互相稽查以杜其弊倡建  
尙節堂爲房舍百五十二間收卹嫠婦堂外建義學三所延訓蒙  
師以教其孤建及幼堂收養無依童卅教之識字習技藝至年十



七始令其出時仁懷逆匪謝法真聚眾焚劫就擒伏法公以逆產荒廢奏懇賞入二堂以資養贍公居官莅事未嘗規避處分深避新吾呂氏私罪不可有公罪不可無之言而於屬吏公過亦肩任之嘗言爲長吏者必恤屬而後可以責屬當旬宣東省時查明州縣未結舊案交代一百九十六起奏請勒限一年完結遲延處分槩予寬免因念山左州縣素稱瘠苦所入本歛又病攤捐非量爲變通莫蘇其困乃具奏曰臣於實虧各員從嚴參辦不下數十起各牧令亦豈罔知警戒而究不敢謂此後遂無虧空者則以致虧半由於攤捐況辦公有費贍家有費應酬鄉黨親朋又有費供給過往差使又有費已爲竭蹶不遑而以從前懸缺之項攤之於事

後無涉之人揆之事理詎爲平允徒以官項不便無著耳不知攤扣太多不但無補於國計實於吏治民生大有妨礙應請將盤查案內之二成緩俟曹工三成攤完後再行接攤其常年捐款由臣酌量刪減而最苦州縣免攤公旣調江甯以清查未完奏畱月餘是時舊案未結者僅十數起公以清釐於前尤不可不豫防於後乃申明新案交代二參之例其款日分應領應攤應交應賠使抵款皆歸有著通省倉庫一時頓清東昌泰安兗曹等三十餘州縣舊於衛河水次兌漕時日迫米有不足則於水次買補墊兌甚而旗丁藉例索詐不遂則並見米不收徑自開船出閘州縣無如何公奏言 天庾正供所重在米但以乾潔爲準不必以買補爲非

今東省開內州縣計開廩以至兌運爲期不及一月以數千至萬餘石之漕剋期收足於旬日間則必所屬糧戶無一玩抗無一疲乏而後可又須於旬日之間將數千以至萬餘石之漕運於數百里之水次則必風雨一無阻滯車輛一無損折而後可揆時度勢實所不能乃必泥於不準買米上兌之例徒供旗丁譌索以苦此數十州縣若更相沿勢必日甚誠不可不思所變計也又以發遣軍流徒犯由府解司遠者解道之例長途疏虞往返耗費請改府屬解府州屬解州直隸州解道以免苦累皆奉 俞允其後撫黔山徑崎險押解尤艱亦以此法奏改焉恤民如彼恤吏又如此故公所至氓庶懷德而急公僚屬感恩而思奮雖黠猾之吏莫不更



革而士林尤喁喁向化也初公居詞垣藉授徒脩脯自給誘掖勤懇十數年中成就百輩視學山西於晉陽書院增益膏火釐正條規不時召入公廨授之餐而課試之按臨所得佳士資送會城肄業試竣復擇其尤攜入京師黔地瘠苦文教未興或連數廳縣無一義塾公謂諸守令自三代以來上失其教惟書院之制會生徒講習爲近於古而崇教化厲人才固有司者之責於是倡廉勘建凡貴陽銅仁安順石阡等府普安八寨郎岱松桃等廳黃平州普定天柱永從甕安清平興義普安等縣皆興立書院義學並上其事於朝各予獎敘其於省會書院重定條教分上內外三舍隨才造就諸生日所讀書填注簿冊公餘親往試背並摘問要義



以爲升黜復下其法於州縣令做行之貞豐州向無拔貢入寨廳童試向附都勻府取進無定例銅仁府縣松桃廳向附鎮遠石阡向附思南路遠費繁憚於跋涉公奏請增設銅仁石阡考棚貞豐入寨貢額學額黔士奮發興起懽聲雷動巖陬僻壤羣砥於學先是公居憂在籍以鄉閭師資不廣往往失學出貲分設義學四所延師課讀美意良法具見文集扶風學舍記中蓋公生平以培養人才扶植學術爲事故汲汲不遺餘力要以成效其於治兵亦然御史花詠春請飭邊疆認真訓練公議覆曰兵必與將一心而後可用平時各將所轄之兵卽令各將自爲召募自爲訓練遇有徵調卽令自將以行則責有專屬練之必精恤之必至束之必嚴恩

信既能相孚威令自能相攝將必與將一心而後可用傳曰師克在和和非詭隨之謂也節制明則分定分定則勢順順則和矣平時果能節制行兵自有紀律韓信之多多益善用此道也有制而後能和也兵必與兵一心而後可用曹劌論戰全以氣勝心齊則氣盛心散則氣衰以五方糾合之眾而欲其協力同心全在平時整頓聯絡管仲軌里連鄉之法所謂晝戰目相識夜戰聲相聞患難足以相死者用此道也尤須使知全家參養悉出天恩所得錢糧無非民力常與講明激發人孰無良詎不感奮二十三年遵旨保舉武職奏白臣聞練兵必先擇將大將必有統御之才戰將必有折衝之勇卽下而偏裨亦必才氣實能獨當一面而後可

無債事要未有不嫻明紀律與士卒同甘苦克勝將帥之任者紀律一壞何變不生歷稽前史將之以貪敗者覆轍相尋則常失之於先才後守謂殺敵致果不必稽其素行耳實則素行既乖豈能服眾卽小有才幹亦且于智自雄動輒誤事是所謂才者非才也雖使詐使貪用人不拘成格然貪詐卽果有才亦但可爲人使而不可以使人但可取濟一時而不可恃爲長策必其明階級以修軍政汰虛糧以實軍伍勤訓練以振軍威舉事一出於公故人不取犯否則利令智昏舉錯乖謬雖復按期操演亦何益哉公在黔中召募士兵一千餘名每士兵十名半習火槍半習刀矛遇有營兵出缺士兵併入挑選歸伍仍募補以符原額奏請省中糧儲道



加兵備道銜所轄貴陽石阡平越仁懷等處營分責令稽查年終  
結報一次籌款添贍軍倉穀千餘石遇穀貴時移營酌借於月餉  
內次第扣還隨時買補又以地方盜案例應文武會捕而武營往  
往不能得力通計黔省文武養廉不過八萬而武職廉俸兵餉多  
至八十萬各營將弁多於文職數倍兵丁多於差役數百倍下游  
古州鎮遠二鎮之兵不下二萬承平既無徵調卽當責以緝捕追  
亡逐捕非捷不可格鬪擊刺非勇不能躡險搜窩非膽不敢緝捕  
固征討先資也法當於百名內挑選數名令其專拏盜賊免派雜  
差擇弁管領日習拳棒刀矛槍礮火箭跳淵等技分隸府廳州縣  
文員並轄計功拔補其管領將弁亦與計功不力則過亦同之無



事時仍就各營操演不使曠廢如此則兵非增設餉不虛糜公先  
爲議使人共曉復奏行之當是時公私憂旤變將萌軍政廢弛亟  
思整理以固邊疆會提督某入 覲極陳公能飭武備未幾 命  
總督雲貴公莅滇日申儆營規入條嚴操守講紀律恤兵丁勤訓  
練勤緝捕和輯民夷嚴禁洋煙勤修軍械通飭滇黔鎮將使察所  
屬分三等出具考語冀甄察材品以收實用乃使軍未周而左遷  
之 命下矣初滇中漢回構衅已久道光十九年緬甯雲州順甯  
連次互鬪結怨益深二十五年四月永昌回馬大等以唱曲與漢  
民鬪毆漸至糾黨千餘滋擾邨寨經永昌守會營勦退旋復聚集  
猛庭寨圍攻永昌時城中回民眾多將爲內應人心洶洶九月二

日迤西道羅天池遽以計掩殺之公甫以八月二十四日抵任省會距永昌千三百餘里方咨會提軍張必祿就赴堵禦又飭迤南道周某馳往督辦而肅清內應報至公據以入告並夾片保敘卽親赴永昌沿途曉諭匪黨解散前後投首者百餘猛庭屯聚之眾亦旋撲滅其肇釁之回民張世賢漢民萬林桂等審擬如律讞已定矣二十六年正月回眾復叛公察知搜殺內應未別善良回眾得以藉口疏請將保敘諸員撤銷並自請議處復馳赴大理永昌勦辦殲斃首犯賊眾解散在逃之張富率其黨馬效青等繳獻器械詣軍投誠公欲破除漢回畛域爲之奏懇免罪王芝異者以事充軍順甯當回眾再集猛庭呈告奮勇團練鄉兵頗爲出力公與

巡撫陸公建瀛援新疆成例合詞請以功抵罪準其釋回 上諭  
曰該督辦理果協機宜何至復有蠢動見雖據奏地方安謐究未  
能及早籌防甚至以兩省營伍皆其統轄豈竟調遣乏人轉藉一  
軍犯之力謬妄無能莫此爲甚著降補河南布政使及公自豫藩  
歸里復奉 上諭曰李星沅奏遵旨確查原辦回務情形覽奏均  
悉此次殲擒雲州回務之告病道員羅天池未能詳慎區別率行  
掩捕以致回眾寒心有所藉口實屬貽誤大局著卽革職永不敘  
用賀長齡於羅天池搜殺過多託疾以去並不從嚴參劾止請撤  
銷議敘又率準張富投誠代請免罪實屬辦理不善著一併革職  
時公甫抵家患水腫腹脹隆然不任行步日以問學引掖後進其



於升沈得失意道然也公宣力中外垂四十年所至愛民禮士興利除害以儉率下服御儉從皆極簡約河南舊俗新歲宴會彌月不絕公抵藩任戒屬吏曰頻年水旱民不聊生而盛張譙飲耶一筵之費數十百人之資也宴會之風遂以衰息令某某以貲得升階公詰之曰汝虧帑若干而復能納貲何也方擬整刷通省官吏籌補庫款遽以病去中州人士深悼惜之生平取與一準於義陋規多所屏卻中朝權貴亦無所饋獻而親戚故舊僚屬振恤無愆任江藩時糧道名中山者常以缺苦多累爲言公時其乏而周之於其卒後復厚資之俾其妻子扶櫬北還於是所負同鄉秀公者金四千遂焚其券曰聞賀公同寅未久吾滋愧也同母兄弟凡七



人長松齡次椿齡壽齡文齡公皆請 賜封爲奉政大夫熙齡出  
嗣叔父後由翰林院編修掌四川道監察御史柏齡桂齡丁未進  
士廣東潮陽知縣擢府同知當匱乏時公皆分潤白首依依無間  
言從祖某游粵西父子繼歿公備貲歸其櫬泉其眷屬衣食嫁娶  
咸資之建家廟定宗規置義田倡捐千金爲卹瘞費然公固囊橐  
無餘自滇赴豫力卻餽贖而貸金以成行云公儀表豐碩風度端  
凝性寬厚而虛謙下人好問無貴賤無智愚推誠相與片長必譽  
亦往往受欺誑覺而不悔曰知人固難然如八九失而一二得猶  
足收一二之用若壹意猜疑則忠信且失之顧必自役其心於察  
察之途乎按宋呂氏童蒙訓言呂正獻旣薦常秩後頗悔之以語

明道程子明道曰願侍郎甯百受人欺不可使好賢之心少替然則謂公爲過於長厚者亦未嘗衡之古人耳公善飲居詞垣時詩酒豪邁後頗以酒失自規其爲學以導養身心爲主日取先儒嘉言懿行以自淬厲晚尤致力周易時有獨得郵書唐太常鑑反復論之不爲苟同公餘專習草書效孫虔禮屬藁作札皆用之無一筆苟所著書今編刻耐庵文集六卷詩集三卷其奏疏札示藁凡數十冊藏於家札示尤多可採如謂屬吏稟牘率以儷語衍飾無裨實用飭令據事直言不用常行格套卽以行草親書不用書手細楷皆足破拘牽粉飾陋習而意尤在規其人之能否諳悉事理也所輯書如 皇朝經世文編百二十卷學術治術皆備風行海

內孝經輯注勸學纂言望溪先生左傳義法舉要皆刊行黔省所  
刻書如詩書禮記精義左傳讀本公穀摘鈔本陳文恭課士直解  
李立侯浙噉存愚所重刻如顧氏日知錄方氏周官辨皆以黔中  
僻遠書籍罕至故廣爲刊布以惠來學卒使黔士蒸蒸嚮學風氣  
丕變聞公課士時遴爲上舍者三十有六人復汰其二曰非吾徒  
也旣而卅四人皆授科第或爲明經其二人者一歿一從賊矣初  
黔人士服教沐德思因公誕日製錦稱祝屢請不許乃陰圖公像  
祀之及聞公赴皆行哭失聲流徼遺愛沒世不泯公去位十年而  
黔中寇事起矣嗣子詒令咸豐補行壬子乙卯科副榜貢生同知  
銜候補內閣中書後公十年卒孫克繩克恭



論曰公爲政無赫赫名在當時疆吏中閤如也至朝士相與語曰  
黔撫章疏不問可知大氏請節婦祠乞書院獎耳由斯言推之則  
其時風尙可知此俗之所以日媮盜之所以日熾也敦詩書崇節  
義以靖兵刑公信知本哉詒令嘗出公交游所貽簡札數冊公自  
署曰師友誨言而不佞往所削牘亦與焉又嘗以公韻語中部分  
微淆爲易之過半公無忤色曰吾久不檢韻書也其虛懷服善無  
人已眇域可槩見矣平生所見巨人長德能去驕矜者以公爲最  
於戲眞古人哉

右傳羅汝懷撰





國朝耆獻類徵初編卷二百三目錄

疆臣五十五

鍾祥

麟慶

何焯

林則徐

李象鵬

補錄

林則徐

國朝耆獻類徵初編卷二百三疆臣五十五目錄



國朝耆獻類徵初編卷二百三

通奉大夫前署江西巡撫江西布政使司布政使湘陰李桓輯  
疆臣五十五

鍾祥

鍾祥楊氏漢軍鑲黃旗人嘉慶十三年進士歸部銓選二十一年  
選授浙江龍泉縣知縣二十五年調山陰縣知縣道光元年升嘉  
興府乍浦同知旋丁父憂回旗三年服闋捐升知府分發湖北以  
親老告近改掣山東四年奏補濟南府知府六年七月擢兗沂曹  
濟道十一月擢山東按察使七年遷山東布政使九年丁母憂回  
旗十年 命署理雲南布政使十一年五月服闋實授十二月調



江西布政使十二年九月授山東巡撫十一月擊獲南河窰隄首  
犯陳瑞之袁雙觀奏辦如律十二月以曹州府知府王廷濬曹縣  
知縣秦錫九千總花應春等緝捕不力奏請分別撤任摘頂示懲

上題之十三年二月遵 旨籌議給事中渥克精阿奏各省倉  
庫虧缺一懸款東省舊案懸款以各官養廉二成分年扣補新案  
交代絲毫顆粒均期滴滴歸源不必再議提補一攤款凡動支之  
款果係歷辦成案舊有名目者酌令照案攤辦儻事係期爲變易  
名目不准流攤必令依限歸補一捐款事屬公需方准捐辦但可  
截止者卽當減除務須籌捐者亦當撙節惟通融之法一時之宜  
未便明定章程轉致日久生弊一倉穀東省見辦州縣交代均不

准作價流交委員盤驗取具實存在倉印結至從前賑糶出借及  
參案報虧均應買補如州縣敢將倉穀私用私糶一經查出嚴參  
懲辦得 旨依議委行九月請將參革長清縣知縣李應曾任內  
應領採買截漕腳價餘款四千七百餘兩發商生息以爲充登曹  
三鎮隨時修理要械之用並請派買倉穀以重儲備 允之十二  
月奏裁堂邑縣丞通開闢官十四年訪拏鄉試包攬傳遞之候補  
守備馬德俊等革職審究奏入 上嘉其查拏認真十五年二月  
偕東河河道總督吳邦慶奏請於捕河廳屬之壽東汛加築土隄  
以利漕運三月以濟南東昌武定等府秋成歉薄青黃不接糧價  
增昂請將奉天進口糧船暫免輸稅以恤民艱並 從之六月奏

歷城等三十五州縣二麥被旱請分別緩徵八月因本年麥收歉薄奏請將章邱等二十三州縣應收麥石改收粟米俱允所請十月疏請於省城添建義倉以補常平不足略言東省常平倉穀動缺已多買補必俟豐年且一時亦難驟買如額見在倡率捐廉於省城添蓋倉房分爲四廠自道光十四年始巡撫與司道府按年捐輸以二百石爲率州縣之力能捐者祇令百石至二百石而止每年可得穀一萬數千石近省城者俱交本色稍遠者按每石一兩三錢折交司庫遇歲歉價昂無論遠近均卽折交俟價平時由司委員照常價購買以備災賑再於兗州曹州繁要之區以次酌量建倉捐儲輔常平而濟民食得旨此舉甚好要在妥實二

字勉之尋兼署河東河道總督奏言鄒平等三十七州縣衛得雨較遲嗣又被水被蟲收成歉薄請分別緩徵如所請行十六年四月勘明恩縣等處境內四女寺支河壩工奏請援案發帑辦理下部議行又奏益都等四十六州縣均未豐收請緩徵以紓民力

允之七月擢閩浙總督十七年正月京察屆期 諭曰閩浙總督鍾祥精明沈細務當清慎持躬公勤莅事朕將有厚望焉尋議合巡洋面覈實稽考章程奏請於閩省南洋九營除提標中營無庸添撥船隻外其餘八營及北洋面營以次添撥哨船無論南北巡船行至閩安鎮海口俱令稟報總督其南境哨船巡回之時必過廈門卽令就近稟報提督北境哨船巡回之時必過福甯卽令就



近稟報總兵以憑稽察庶官弁不致畏險偷安亦不能捏飾混報  
並咨行浙江一體辦理得旨所議井井有條用心周到可嘉之  
至著照所請行三月偕福建巡撫魏元烺籌辦查拏夾帶私鑄並  
勒限收繳情形奏稱閩省寶福局久撤尙不慮有局私惟奸商自  
外攜來或名砂壳或係夷錢在於毗連江西廣東一帶地方攬使  
亟應嚴行禁止海船夾帶尤當嚴查其海口島嶼卽無窩存私鑄  
亦不可不豫爲防範又民間攬用之弊見均查禁仍勒限給價解  
省銷燬咨部以憑查覈得旨總在認真辦理時御史王藻疏請  
查勘沿海港汊村莊以清盜源上命江浙閩廣各督撫妥議章  
程五月偕浙江巡撫烏爾恭額福建巡撫魏元烺奏言閩浙洋面

西南至廣東北至江蘇島嶼林立各按就近洋面委員親查今公  
同酌覈謹列六條一沿海港汊宜實力編查保甲以靖盜源一海  
口要隘及偏僻沙塗必稽查周到俾無縱漏一造報商漁出海船  
隻宜聯環保甲不准出租以杜影射一水師巡洋宜遵新定合巡  
章程實力巡緝一沿海各屬米石非奏明撥運不准私載出洋以  
杜接濟一私藏槍礮軍火器械宜嚴行查禁收繳 從之八月奏  
准裁撤福州糧捕通判缺其所管督捕事務改歸捕防同知管理  
十八年查辦延平建甯邵武汀州四府會匪酌定防緝章程責成  
延建邵道汀漳龍道率屬防緝並於鄰省交界處所建設卡房專  
派丁役盤查奏入 諭曰法在必行勉力認真毋忽十九年五月

赴泉州府校閱營伍行寓印信被竊自請從重懲處下部嚴議尋  
議褫職 諭曰總督統轄兼圻責任重而體制嚴所用關防尤爲  
緊要此次鍾祥赴泉州府屬閱伍講習武備眾所觀瞻宜如何外  
示嚴明內存敬慎關防係隨身攜帶之物小心守護並非照料難  
周何至匪徒等夤夜在其住屋偷竊如入無人之境儻查出後卽  
時人贓並獲嚴行懲辦尙可稍從寬宥乃日久無獲是該省吏治  
武備廢弛已可槩見鍾祥著卽照部議革職以示懲儆二十年  
賞三品頂帶授四川布政使二十二年 召來京以三四品京堂  
候補二十三年四月 賞頭等待衛充庫倫辦事大臣閏七月授  
河東河道總督二十四年正月以壩工埽段遭風蟄動未能先事



預籌自請治罪 上以鍾祥到任未久予革職給七品頂帶暫留  
河督之任將來興舉大工卽責成鍾祥借河南巡撫鄂順安督辦  
三月覆勘上年中河漫口以後上游四廳長隄均形單薄請將隄  
堰壩工擇要興修估需銀兩卽由豫省動撥如所請行七月 諭  
曰頻年軍餉河工一時並集正供所入不無支絀之虞儻此次大  
工可緩至明歲秋閒再行辦理諸事益當順手鍾祥鄂順安受恩  
深重具有天良著卽密籌全局據實直陳旋借鄂順安覆奏密籌  
中牟大工勢難緩辦得 旨趕緊修築鍾祥鄂順安辦理大工責  
無旁貸惟當相度機宜實心經理於慎重之中力求妥速固不可  
草率從事尤不可遷延遲玩坐失事機二十五年正月奏言全河



大溜悉歸故道暢達東趨並將善後工程督令道廳節慎估計豫  
籌防堵 上以鍾祥鄂順安經理得宜迅速蒞事 賞還鍾祥二  
品頂帶並 賞戴花翎八月請預提下年防險銀兩 諭曰豫東  
河工採辦碎石銀兩年年預提甚屬不合此次姑允所請准其預  
提丙午年例撥銀兩嗣後仍當按例採辦不准再行預提二十七  
年議請嗣後估辦土工以三成錢文搭放計豫東黃河每年估修  
土工以三十五萬兩爲率每年可搭錢十五萬串報 聞二十九  
年二月疏稱沛縣賽堰工程爲運道所經關係甚重請仍歸江南  
省民辦 諭曰該處切近十字河如遇水漲噴著鍾祥責成洳河  
同知隨時實力搶撈惟當不分畛域任怨任勞求於公事有濟三

月偕河南巡撫潘鐸山東巡撫徐澤醇遵議裁併冗缺請將山東  
運河道屬之泉河通判河南開歸道屬之歸河通判併歸河營協  
辦守備各缺一併裁撤以歸簡易如所議行四月卒子德振錫振  
均候補主事

右 國史館本傳



## 麟慶

麟慶完顏氏內務府滿洲鑲黃旗人嘉慶十四年進士以內閣中書用十五年補官十九年遷兵部主事二十三年改授詹事府右中允二十五年轉左中允道光二年京察一等記名以道府用三年授徽州府知府四年四月 仁宗睿皇帝實錄告成麟慶以前充總纂 賞加道銜七月調潁州府知府十一月授河南開歸陳許道九年升按察使十一年署布政使十二年二月擢貴州布政使閏九月護理巡撫十月奏裁普定縣屬江隴土守備十一月奏山田墾荒永免升科均如議行十三年正月升湖北巡撫三月授江南河道總督先是荊州副都統善英奏營馬虧額馬乾銀兩歷



任將軍副都統俱充公用 命麟慶會同湖廣總督訥爾經額馳  
往查辦是月奏荊州滿營自嘉慶五年奏裁馬二千匹後以節省  
馬乾銀兩貼餽實馬添設餘兵尙無剋扣情弊惟年久未經奏明  
請將歷任將軍副都統協領議處 從之四月丁母憂八月署理  
江南河道總督十一月奏黃河大隄向係官栽柳株以護隄根其  
河北運河隄灘多係民業請做照黃河隄一律栽柳並免糧禁耕  
得 旨俞允十二月奏陳南河大局情形擇要籌辦略言近年來  
河湖交敝欲復舊制不外蓄清刷黃古人引導清水三分濟運七  
分刷黃得力在磨盤埽自廢棄後河務漸壞今擬復磨盤埽舊制  
至洪澤湖水甚寬高家堰工絕險臨湖各壩多封柴土蓄水盛漲

啟放輒壞壩底糜費不貲應做滾水壩成法擡高石底至蓄水尺  
寸爲度其山盱五壩並下游揚河境內車邏等壩一遵奏定丈尺  
啟放水定卽行堵合至於黃河當體察平險節可緩之埽段辦緊  
要之土工一切疏浚器具祇可備運挑挖若黃河底淤非人力所  
能強刷惟有儲備料土遇險卽搶以防爲治而其要全在得人又  
奏蘆葦爲工程所必需右營蕩地荒廢產蘆不足議築圩蓄水以  
資灌溉奉 硃批觀汝所論頗爲正當日久果能得力不止汝爲  
一代名臣能承朕恩朕亦獲知人之明勤實慎勉而外朕無可諭  
矣十四年五月奏洪澤湖茫無港汊商船遇風每多失事又新設  
水師營駐紮老子山分帶哨船巡湖必應豫籌屯避之所請於老

子山西北挑砌石壩一道東面沙路上加築碎石高出湖面以便停泊如所議行六月奏淮海常鎮等道另案用銀上以南河連歲安瀾而工用日增降旨切責八月偕兩江總督陶澍奏改山盱通判爲同知海安同知爲通判下部議行九月以中河廳緯隄甫修復蠶下部議處十五年六月服闋九月實授河道總督奏駱馬湖及下游六塘河爲蓄洩要區居民占種灘地淤淺過半請照舊章申禁舊河尾閘啟放水誌請定一丈五尺允之十七年麟慶以年力就衰之睢南河營守備秦盛奏請越升淮揚河營遊擊嗣經兵部將秦盛帶領引見諭曰似此衰邁之員守備亦難稱職該河督不加參劾反請越升姑容見好殊非覈實辦公之道秦

盛著勒令休致麟慶著交部議處部議降三級調用上加恩改  
爲降五級甯任時欽差兵部尙書朱士彥赴江南盤查河庫以收  
支總數奏 上命麟慶逐款嚴查十八年奏款項無虧惟南河津  
貼船隻運腳免扣銀兩未經奏明應自道光八年至十六年歷任  
河督河庫道賠繳臣於道光十一十二兩年工項造冊不清未能  
查出請交部察議 允之十九年三月奏請興修惠濟正閘福興  
越閘八月因河湖並漲險工迭生請例外撥銀五十萬兩奉 旨  
如數撥解嗣後不准援以爲例十二月兼署兩江總督二十年四  
月卸江督篆自麟慶督南河以來安瀾議敘者六京察奉 旨優  
獎者再二十一年九月復以霜降安瀾 諭曰本年祥符漫口全



黃雁注洪澤湖麟慶化險爲平著交部議敘十月遵 旨查明河  
南安徽被水處所並奏南河要工年內興辦俾附近災黎自食其  
力以工代賑 上可其奏二十二年四月英夷犯上海寶山五月  
命麟慶於漕艘經行處督兵嚴防六月夷船駛至京口 諭曰  
淮揚一帶已有旨令麟慶設法堵禦該河督於軍務雖非專管但  
際此逆夷猖獗自當協力同心俾運道無阻揚州得以安全功甚  
偉也及京口失守夷船趨瓜洲復 諭江北防務責成麟慶會江  
蘇巡撫程爾采亦請 敕麟慶帶兵駐揚麟慶奏時屆大汛未便  
驟離清江請 賞加運司但明倫按察使銜防堵揚州臣在清江  
聯絡應援並奏嚴緝鹽梟團練鄉兵採木編筏以備火攻啟壩洩

水以膠逆船各事宜皆如所議七月奏夷船仍泊金焦山下及瓜洲儀徵等處已設法將水路堵截並於旱路要隘挖坑設伏發倉平糶慰諭居民地方漸俱安定 硃批所辦甚好是月河決桃北崔鎮汛下部嚴議部議上 命革職畱任戴罪圖功以觀後效尋奏博採眾議回空運道改由中河灌塘見於河西築蓋黃託清各壩臨黃兩岸估築緯路東岸建草閘一木涵洞二攔堰二恐迤下淤墊築束水壩以資偪刷舊河身內築南北攔壩西面鑲埽引洪澤湖水外注攔入北岸揚莊運口迎濟船行十一月 諭曰桃北漫口麟慶本應照東河成案治罪姑念回空無誤夏秋辦理防堵亦尙妥當無不掩功著卽革職免枷號發遣二十三年河決中牟

命發往東河交欽差工部尙書廖鴻荃東河總督鍾祥差委二  
十五年正月工竣以四品京堂用二月 賞給二等待衛作爲庫  
倫辦事大臣 召見時以骹疾開缺二十六年二月病痊仍候補  
四品京堂七月卒子崇實舉人候補員外郎崇厚舉人候選直隸  
州知州

右 國史館本傳

何焯

道光十八年夏余由陝西按察使升雲南布政使秋七月抵任始  
得知原任雲南巡撫何公諱焯卒於十七年三月二十八日距生  
於乾隆三十九年十一月初五日享年六十有四鹽法道王霞九  
狀公之行公之子增傑致書乞余銘公之幽惜余至滇晚未得與  
公一相見也蓋公之捐館舍已踰年矣初嘉慶己巳公與余同成  
進士余官中書公出翰林院庶吉士改兵部主事非歲時公會不  
相往來然聞公在職方司有聲如江督奏參漕弁夾帶私鹽部議  
褫職百餘員公行查船丁食鹽區爲分別大半得邀開復其一事  
也道光改元遷員外郎再遷車駕司郎中充壬午 恩科禮闈同



考官京察一等授福建汀州府知府汀據閩之上游西南與江西  
粵東接壤深山僻徑匪徒出沒其間有奉 旨嚴拏巨盜歷數任  
不能得公下車擒獲置之法一郡肅然長汀縣令某因事赴鄉爲  
鄉民所困閩邑洶洶公不爲動親書曉諭眾立解散遂捕治其魁  
自是汀民不敢與官抗大吏奇公之能調福州福爲省會治績尤  
著兼署鹽法道適已奉 命擢貴州貴西道閩督以閩饑疲滯非  
公不能整頓奏請調補得 旨俞允離務爲之一清余於十三年  
赴臺灣道任至福省福汀兩郡之人士猶頌公之德不衰越一歲  
擢廣西按察使丁太夫人憂服闋授雲南按察使越二載升山西  
布政使未至調陝西護理巡撫陝屬倉庫充實惟發典生息銀兩

移用久漸成虧公提取發領狀存案備稽其弊頓除余曾署陝藩  
嘗謂屬吏臣子爲 天子守財幸遇一完全之區斷不容稍開漏  
卮蓋師公之遺意也公精明渾厚陳臬滇時疑獄多所平反癸巳  
地震復捐廉撫恤民忘其災 上以公熟於滇省情形特授公雲  
南巡撫公感激圖報滇地夷人素稱安分因漢奸重利盤剝激成  
事端公飭地方官驅懲邊防以靖滇水下流瀦爲海口環繞昆明  
昆陽呈貢等數州縣境匯納灌輸關於農田水利源長數百里沙  
石堆徙易淤向例十年一修必先築壩公特於川字河建立石閘  
啟閉以資蓄洩今節相伊公萃農中丞顏公魯輿議濬六河使余  
與糧道司其事所以免築壩之費者則得於公建石閘之力嗟乎

以公之心存君國孜孜圖治使再加公數年其大有造於滇者當不止是天何遽奪公之速也悲夫余之同譜二百四十人前後三十年間病廢死亡者十有七八矣幸而存者多屈抑下僚能致位通顯者十無一二矣其列官京師者無論外惟麟見亭督南河而公開府今公又歿悵科運之否塞殆不勝故交零落之感焉按狀公原名炳字允彪號寅士先世由浦江遷蕭山曾祖諱錫宗祖諱源考諱楷皆以公貴累 贈通奉大夫曾祖妣氏盛祖妣氏黃妣氏陳均累 贈夫人公少孤事太夫人以孝聞與兄弟友睦嘗館於山村小庵四顧荒寂眾數相驚公坦然一少聞剝啄聲則一青衣麗婦入曰夫久出今忽得書不識字來請先生教公唾之曰村



中豈無識字人何必乘夜求我宜速去婦慚而出蓋公之不欺暗  
室器量固已偉然矣夫人陸氏丈夫子二長增傑太學生候選鹽  
運司提舉次殤女子二長適同邑太學生湯文次字湖北沙市通  
判陸君思敏子側室李氏出孫男一福銘孫女三以某年某月某  
日葬公於某阡乃系之銘曰

蕭山之峯嶂壁巍巍鍾公之靈蕭山之野原田晦晦作公之宅念  
古來之將相同百年之過客惟勳業之在天壤奕世猶過邱隴而  
感嘆其遺跡嗚呼公乎俄頃倏忽判成今昔公之懿行視此篆石

右墓誌銘劉鴻翱撰





林則徐

林則徐福建侯官人嘉慶十六年進士改翰林院庶吉士習清書  
十九年散館授編修二十一年充江西鄉試副考官二十二年記  
名以御史用二十四年三月充會試同考官閏四月充雲南鄉試  
正考官二十五年二月補江南道監察御史時河南儀封南岸工  
程未竣則徐以料販囤積居奇奏請 敕該地方大吏嚴密查封  
平價收買以濟工需下河南巡撫議行四月京察一等帶領引  
見記名以道府用尋授浙江杭嘉湖道道光元年因病回籍病痊  
仍赴浙江候補二年授江蘇淮海道未赴任署浙江鹽運使三年  
擢江蘇按察使四年正月署布政使八月 命總辦江浙水利旋

丁母憂五年奉 旨赴南河督修隄工工竣仍回籍六年四月  
命署兩淮鹽政以病未赴任十月服闋七年五月補陝西按察使  
署布政使旋升江甯布政使十月丁父憂十年正月服闋六月補  
湖北布政使十一月調河南布政使十一年七月調江甯布政使  
先是江蘇因水災咨辦河南米麥經則徐委員赴商邱劉家口及  
陳州光州等處採辦分由河淮運達江境至是以赴江藩任順道  
親往督辦並於淮揚一路勘災籌賑十月遷河東河道總督十二  
年正月疏言運河挑工已完六分惟沿隄出土之路因泥漿拋撒  
逐條凍積名曰泥龍尙未除淨雖據各汛稟稱向係全工完後一  
律起除但日積日多挑運更爲費事且一經春雨更恐衝入河心

見嚴飭工員凡挑完一段卽起淨一段泥龍其已挑未淨之處官  
差夫頭均量予懲責 上遶之二月授江蘇巡撫未卽赴任三月  
奏言稽料爲修防第一要務卽爲河工第一弊端其門埽灘埽底  
廠及併埽戴帽各名目非抽拔折視難知底裏見將南北兩岸十  
五應各埽查明其辦理未善之員應請撤任得 旨向來河臣查  
驗料埽從未有如此認真者五月疏言河標四營悉心校閱弓力  
輒者居多特爲較準定式諭習硬弓並將陝甘督臣楊遇春所製  
速戰陣法繪圖貼說發各標學習報 聞六月抵蘇撫任疏言江  
蘇錢穀最爲繁重而漕務痼疾已深整頓錢漕先懲已甚清釐倉  
庫尤貴截流當執法者不敢以姑息啟玩心當設法者不敢以拘



率礙全局報 聞先是 上命各督撫酌裁文職閒員則徐前於  
東河總督任內請裁山東泉河通判至是將江甯鎮江府照磨揚  
州府檢校華亭縣主簿金壇縣湖谿司巡檢各缺借總督陶澍奏  
裁又借南河總督張井奏裁江防廳屬之丹徒縣縣丞儀徵縣清  
江關關官揚糧廳屬之如皋縣縣丞均得 旨允行閏九月以南  
河盜決官隄要犯陳端等奉 旨飭屬拏辦兩月尙無弋獲部議  
降四級調用 上加恩改爲降五級畱任十一月奏各屬未結交  
代已逐案清楚並查提十一年分各屬存庫銀數報 聞先是則  
徐在江甯藩司任內以各屬水災籌議倡捐煮賑資送畱養收孩  
瘞棺捐衣勸糶養佃當牛借籽種禁燒鍋十二條經總督陶澍奏

奉 諭旨務須詳慎擇人辦理至是諸務告竣偕陶澍奏請將在  
事出力人員及捐賑辦賑紳商等分別獎勵 允之十二月以密  
陳藩臬道府考語疏言察吏莫先於自察必將各屬大小政務逐  
一求盡於心然後能舉以驗屬員之盡心與否若上司之心先未  
貫徹於此事之始終又何從察其情僞臣惟持此不敢不盡之心  
事事與屬員求其實際半載以來隨時考察謹將司道府之立心  
行事人品官聲略具梗槩以 聞得 旨畱覽十三年四月奏十  
二年分京控各案埽數審結報 聞又以給事中孫蘭汝奏江浙  
兩省錢賤銀昂臚陳受弊除弊各款遵 旨偕陶澍覆奏言洋錢  
通用以來內地紋銀日耗此時固難驟遏惟設法以截其流嗣後

應令悉照紋銀爲準雖不必官爲定價致涉紛更總不得以色低平短之洋錢反浮其價於足紋之上至外洋以鴉片煙易內地紋銀此尤大弊之源節經嚴拏懲辦誠恐此拏彼竄未能淨盡請密敕沿海關津於洋船未進口之前嚴加巡邏俾不得句串分銷再於進口之時實力搜查俾不得夾帶偷漏儻別經發覺卽將牟利之奸商得規之兵役一併追究加倍重懲又紋銀出洋戶部則例言照例治罪而作何治罪刑部律例無明文應請交部定例嚴辦 上允之並下刑部議行六月 上以給事中渥克精額奏各省倉庫舊虧未補新虧又起各州縣懸款宜勒限提解流攤宜嚴行禁止捐款宜大加裁減倉項宜覈實買補 命各督撫妥籌嚴

辦則徐以督飭所屬實力整頓並於倉庫交代隨時加意嚴查覆  
奏得 旨不可一奏了事務要行之以實先是則徐在臬司任內  
奉 旨總辦三江水利未卽遵行嗣經陶澍奏准孟瀆劉河分年  
籌辦至是孟瀆工竣以劉河爲三江之一近日淤墊更甚奏請勘  
辦 允之七月奏言江蘇錢漕倍於他省其中有緩有急有舊有  
新勢不能一齊清楚與其漫無區別徒令剜肉補瘡莫若專嚴於  
提新而暫緩於補舊果使新款皆能全解是州縣無可新虧而舊  
欠可漸冀彌補得 旨竭力爲之八月以江蘇各沙洲經前撫陶  
澍奏准召佃收租充水利經費惟其中有書院善堂公產及民戶  
承買之業奏言凡在道光八年新例以前報部有案者遵照舊案



一律准買執業其未經報部及例後所報者發還原價槩行歸公以示限制而杜效尤下部議行是年夏秋間江蘇各府或江湖盛漲廬畝被淹或暘雨愆期收成積歉並經奏請恩施至九月蘇松等屬續遭風雨加以嚴霜重露木棉穀粒均多受傷委員勘實復請賑請緩以聞十一月偕陶澍及浙撫富呢揚阿奏籌鹽務章程並嚴堵淮私以衛浙引得旨認真辦理又以拏獲盜決官隄首犯陳端等伏法偕陶澍奏保出力人員允之十四年奏改金山縣知縣典史白衛城駐洙涇鎮其原駐洙涇鎮之巡檢調駐衛城十五年八月偕許黻關監督松桂奏查濬關丈量定則並籌議科罰事宜十一月偕陶澍奏籌趕辦新漕各事宜均如所請行

是月署兩江總督十六年正月奏查江淮等屬熟田舊欠錢糧請分別緩徵以紓民力又遵旨籌議約束糧船水手章程疏言此等無賴之徒以禁其攜帶兇器爲除暴第一關鍵應請責成正丁及頭舵等將所募水手按船編年貌冊給腰牌註明不許攜帶器械上船正丁具甘結並頭舵互保結十船連環保結由衛備幫弁加結申送糧道及總運廳員儻玩違不遵令正丁頭舵隨時首報立即查繳究辦有徇隱者察出亦照律治罪備弁及總運官畏難不辦由糧道撤委嚴參至沿途游幫匪徒並責令隨時稽查犯者加等治罪並請敕下沿途各鎮總兵隨處查拏送究均如所請行二月回本任三月以籌辦通漕要道偕陶澍奏練湖隄壩勸諭

民修運河開工由官捐辦報 聞又奏拏獲漕船游幫水手行劫  
傷人各犯嚴審究辦得 旨查緝甚屬認真嗣後總當如是辦理  
先是寶山縣海塘於十五年夏秋之交以風潮猛烈衝塌五千餘  
丈工急費繁奏奉 俞旨率屬捐廉爲倡計工需在二十萬兩外  
寶山紳庶捐銀十萬兩有奇復於附近之嘉定上海二縣互勸集  
捐親赴工次勘定委員辦理至是年五月工竣復親自驗收奏請  
俟過秋汛風潮將辦理出力人員乞 恩獎勵 允之七月復署  
兩江總督十一月以江蘇近年漕務難辦皆因鋪戶於兌漕之前  
先將洋錢價擡高以困州縣迫開幫之日又將銀價擡高以困旗  
丁輾轉低昂縣幫交累借署撫怡良奏言欲絕市僧之居奇應請



先於辦漕禁用洋錢庶挽回橫習 諭曰見在新漕受兌期於重  
運早開所有縣幫交涉一切費用著槩禁折給洋錢向需洋錢一  
區者以紋銀七錢三分覈實給發庶市僧無可擡之價縣幫無爭  
較之煩而漕行亦得迅速旋即署督任遵奉 俞旨入覲十七年  
正月升湖廣總督三月奏報抵任得 旨公勤誠實始終如一識  
之五月以雲南兩幫銅鉛船隻越過鹽卡不聽查驗並於後幫追  
獲私鹽請將失察之運員及不卽據實稟明之護總兵分別議處  
上韙之並 諭四川總督飭屬於瀘州等處場店先禁私銷各  
船過夔州府關一併認真查緝七月奏籌襄陽一帶緝私事宜又  
奏三年軍政之期尙需時日請將各屬武弁先行查覈俱 允之



先是則徐於十五年撫蘇時密封奏稱河庫道李湘莖明練樸誠辦事細緻至是以庫款牽混不清經欽差尙書朱士彥奏參奪職上以則徐註考不實下部議處部議降二級調用得旨改爲降四級畱任九月以堵緝粵私奏請責成衡永郴桂道辦理諭曰該道駐劄衡州耳目較近此次各屬拏獲私鹽多由該道設法督拏卽著該道就近督飭力堵粵私至衡永各處路徑叢雜私販繞越無常議將卡巡改爲游巡隨處探拏較爲得力卽著該督飭令該道張晉熙督率委員及該州縣勘明私販來路何處最爲扼要何處最涉分歧游巡員弁應如何分合稽查詳細籌議章程由該督撫覈定試辦時前任總督訥爾經額奏武岡州滋事首逆藍

正樽已被鄉勇毆斃則徐遵 旨研究亦以憑取從犯逆屬各供  
並認明衣物毆斃屬實覆奏 諭曰種種疑竇欲蓋彌彰林則徐  
平日辦事尙屬認真故將此案特交詳鞫乃以事非本任與已無  
干遽隨同附和遷就了事甚非覈實辦公以誠事君之道著交部  
議處部議降二級調用得 旨改爲降五級畱任十月以湖北各  
屬豐收糧價平減偕巡撫周之琦奏請將武昌等府闕額倉穀動  
項乘時買補並飭禁書吏藉端剋扣勒派等弊報 聞十八年二  
月偕湖南巡撫錢寶琛奏籌辰沅道屬苗疆屯防各事宜疏言一  
清屯田從前鳳凰永綏二廳屯長屯丁承種田畝聞有私行典押  
之事迨節奉清查後俱係自領耕種實無捏飾情弊見仍飭該道

率屬加意稽查如有違禁私典及移抵換段者卽行嚴辦一清佃  
欠查租穀積欠原佃逃亡另招頂耕之戶豐歲所餘僅供口食舊  
逋實難代完應請援案豁免嗣後責成該道督飭屯弁及各佃廣  
開水利各勤力作以期年清年款一清支銷苗防經費本以租穀  
十萬餘石供各項支用迨清查後租穀旣減去二成經費亦加意  
撙節按款確覈均難再減應請照舊支銷一清借款苗疆練勇歷  
年借欠銀穀非無力完繳卽無從著追應請一體豁免嗣後不准  
濫借遇有水旱不時或出征調遣不得已必須借支該道詳明督  
撫酌覈一籌歸補苗疆經費支款闕額前清查案內或分別捐賠  
或借動司庫見在所短銀穀未敢乞 恩賞給款項惟有漢岸鹽



商生息一款本爲苗疆經費而設每年以息銀之半歸還本銀見計閱四年即可補足應請將此歸本之息量展四年以資籌補一清催徵各廳縣屯田十萬餘畝均處萬山之中每當山水漲發易於衝刷自道光六年後有歷年衝廢者經該道查明基址無存實屬無從修復應請將短收額數照例豁除一申邊禁查額設苗官給守備千總把總職銜管束散苗歷年有約束不力不治輿情及書吏延玩誤公者俱經斥革另補應仍令該道隨時查察如有盤剝勒索等弊立即嚴辦一移屯員查北關屯守備統轄練勇千名事務殷繁於訓練難期得力以致上年有糾眾挾借之事應請將事務較簡之新場堡屯守備改駐鳳凰廳城與北關屯守備按左



右二哨各帶練勇五百名其新場堡催租等事改歸永安卡屯干  
總就近兼管下部議行又奏准移桂陽州州同駐泗州寨爲分防  
泗州寨州同裁泗州寨巡檢移設黔陽縣新路市爲石橋司巡檢  
先是湖北鍾祥縣河隄漫口潛江縣護城土隄衝缺均經奏請支  
款修築至是黃梅縣積潦隄工商捐民辦復勘估據實奏聞又  
以設法整頓鹽務疏言貧民挑運售私其近川近粵近潞地方與  
兩淮場窳皆遠而鄰鹽一躐卽至成本旣輕售價自賤且鄰省鹽  
課皆輕淮綱獨重卽彼此同一宙鹽亦必彼盈此縮況以無課之  
私販紛紛侵灌其勢之不能相敵更不待言前所奏緝私各事宜  
俱蒙訓示遵辦見又剴諭紳民日用飲食何在不可節省獨於

食鹽計較貴賤犯法食私紳衿革功名平民受滿杖明利害者當不至如是之愚且湖廣錢漕最輕若鹽課復背官食私天良何在嗣後責成紳衿大戶及鄉團牌保互禁食私犯者公同送究其挑賣之窮民許改充肩販由官鹽店給票赴鄉賣完繳價再從前襄陽宜昌衡州三處奏明官運商鹽減價售賣以敵鄰私歷辦並無成效且一種奸販轉賣減價之賤鹽以灌旺銷之引地藉寇資盜無異剝肉補瘡應將此三處不令抑價以杜流弊得旨所論周到妥細勉力而行必有功效四月以扼要彈壓奏請湖南提督常駐辰州府允之並諭每年應赴常德駐劄之處仍由該提督隨時酌量毋庸拘定時日閏四月以湖南撫標右營遊擊馬辰前

經則徐保奏至是失察家人及弁兵舞弊事覺復遵 旨按問奏  
參嚴議則徐亦下部議處降四級畱任八月奏南北兩省拏獲煙  
販並收繳煙土煙膏煙具情形得 旨所辦甚屬認真可見地方  
公事果能振刷精神實心查辦自可漸有成效九月以各州縣水  
旱偏災奉 恩旨膳黃祇能開載若干村莊應蠲應緩應遞緩其  
地名不能一一全敘吏胥難保無高下其手矜民亦或狡稱蠲免  
紛紛訐訟奏請將應蠲應緩應遞緩之頃畝細冊飭該州縣另行  
繕榜隨同膳黃徧貼曉諭並責成該管道府稽查毋許隱匿 諭  
曰所見精細著依議行又以湖北漢陽荊州武昌各府屬於夏秋  
閒江水盛漲千里長隄化險爲平安瀾普慶請頒江漢神廟 御

書稿額並請漢神廟增入祀典春秋致祭 允之十一月入 覲  
賜紫禁城騎馬 命頒給欽差大臣關防馳往廣東查辦海口  
事件該省水師咸歸節制十九年三月偕總督鄧廷楨等奏虎門  
收繳英吉利躉船鴉片已踰十分之八即可乘勢清理東路 諭  
曰所辦可嘉之至該夷等畏罪自首情尙可原著免其治罪該督  
等請酌賞茶葉著照所議辦理並則徐下部優敘四月遵 旨奏  
查虎門各海口安設木排鐵鍊及添置礮臺情形報 聞時各國  
夷商貨船進口俱遵具並無夾帶鴉片切結惟英逆抗延不遵九  
月夷目義律等糾結大小師船以索食爲名犯尖沙嘴經參將賴  
恩爵等擊走之義律復潛至澳門藉西洋夷目代遞說帖並求爲



轉國則徐以其言未可遽信奏請相機蓄銳勦撫兼施得旨既  
有此番舉動若再示以柔弱則大不可朕不慮卿等孟浪但誠卿  
等不可畏憚先威後德控制之良法也勉之慎之尋以夷情反覆  
無常仍向東西兩路偷運私銷並勾結兵船潛圖報復於各海口  
犯順六次疊受懲創猶復逗畱外洋則徐等奏請停其貿易諭  
曰該夷等不知感戴自外生成是彼曲我直中外咸知尙何足惜  
則徐等復奏請 敕下福建浙江江蘇各督撫嚴防口岸以杜偷  
運均如所請行先是三月調兩江總督未卽赴任至是十二月授  
兩廣總督奏請暫移高廉道駐澳門控馭夷商清釐積弊其前山  
寨內河水師都司併歸節制 允之二十年正月以御史駱秉章

奏陳整飭洋務五條一慎選洋商以專責成一嚴禁孛氈以防句  
串一嚴禁夷人久住省館以絕弊端一禁止夷船灣泊省河以防  
偷漏一內地洋銀與紋銀一律嚴禁出洋遵 旨將辦過情形及  
見定章程按條分晰覆奏軍機大臣議行先是十八年則徐在湖  
廣總督任內以江漢安瀾奏准將漢陽安陸等府興修隄塍籌辦  
驗收之各員議敘至是隄段復漫潰經總督周天爵以上屆辦理  
未善奏參 命卽註銷並則徐下部議處降四級畱任四月奏請  
於尖沙嘴及官涌兩處添設礮臺如所請行時英逆由粵洋分帶  
兵船以乞求通商爲名於福建浙江江蘇山東直隸盛京各海口  
駛行窺探九月 諭曰自查辦以來內而奸民犯法不能淨盡外

而興販來源不能斷絕甚至本年福建等省紛紛徵調糜餉勞師  
此皆林則徐辦理不善之所致著交部嚴加議處卽來京聽候部  
議此次英夷各處投遞稟帖訴稱冤抑朕洞悉各情斷不爲其所  
動惟該員以特派大員辦理總無實濟轉致別生事端誤國病民  
莫此爲甚是以特加懲處並非因該夷稟訴遽予嚴議也尋部議  
革職 命仍折回廣東以備查問差委二十一年三月 賞四品  
卿銜 命赴浙江鎮海軍營協辦事務五月 諭曰林則徐經朕  
特給欽差大臣關防辦理廣東事件旋令其總督全省軍務皆其  
統轄旣知兵丁習染甚深更應多方訓導勤加練習其於夷務亦  
當德威並用控馭得宜乃辦理諸未妥協深負委任著革去四品



卿銜從重發往新疆效力贖罪七月 命免其遣戍發往東河襄  
辦河工並經總理大學士王鼎遵 諭察看以則徐曾任河南藩  
司東河總督熟悉情形深資得力覆奏得 旨著卽督飭工員趕  
辦二十二年工竣 命仍遵前旨遣戍伊犁二十五年九月以伊  
犁將軍布彥泰奏委勘辦伊犁開墾事宜則徐於阿齊烏蘇地方  
捐辦要工並遵 旨偕喀拉沙爾辦事大臣全慶赴庫車阿克蘇  
烏什和闐喀什噶爾葉爾羌及伊拉里克塔爾納沁等處周歷履  
勘漸次告竣經布彥泰入奏 諭曰林則徐自查勘以來自備資  
斧效力奔馳將近一載著有微勞著飭令回京以四五品京堂候  
補十一月 賞三品頂帶署理陝甘總督十二月行次甘州以野



番肆劫奏請先飭鎮將防護馬廠並擬改製大礮做照洋礮之法  
推輪運放冀使兵膽先壯有恃無恐得 旨著署督務當實心整  
頓信賞必罰以壯士氣而挽頹風二十六年二月卸任三月授陝  
西巡撫 旨暫留甘肅借總督布彥泰辦理番案六月以勦捕  
番族及漢奸搜逐殆盡借布彥泰入奏得 旨所辦可嘉之至下  
部優敘旋抵陝撫任十一月因病奏請開缺得 旨賞假三箇月  
安心調理二十七年升雲貴總督先是雲南保山縣漢回構燬互  
關有年七哨匪徒沈振達等因被回民丁燦廷等以串謀誣害劫  
殺無辜兩次赴京具控經地方官提解案犯鞠訊復糾眾挾術劫  
奪犯證燬官署搜殺回戶並以永昌鎮道帶兵往捕抗拒合圍至

是二十八年則徐正調集各路官兵赴剿適於途次又聞趙州彌  
渡地方有匪徒勾結滋事遂先行移兵進剿殲數百匪並撫恤受  
害良民趙州底定保山匪徒聞風震懾迫全師壓境卽畏罪獻俘  
將首從各犯三百餘名分別治罪復乘大兵凱撤將歷年永昌順  
甯雲州軍營剿散餘匪搜獲多起究出戕擄員弁及拒殺兵勇各  
要犯多名正法奏入 諭曰將弁同心士卒效命且辦理善後事  
宜請臻妥協洵屬調度有方 命加太子太保銜並 賞戴花翎  
又以迤西查拏餘匪奏請審明後立即懲辦毋庸解省審轉經刑  
部覆奏並請定年限得 旨該處軍務甫竣餘匪自應嚴辦著卽  
予限五年二十九年五月以上年雲南騰越廳卡外野夷滋擾則

徐飭總兵拴住迤西道王發越等籌辦並明光隘土守備左大雄  
營帶練勇出卡赴勦至是該夷等畏威悔罪立誓輸誠奏入 諭  
曰洵能遠振軍威又安邊地六月因病請假一月七月復奏請開  
缺回籍調理 允之三十年五月大學士潘世恩尚書孫瑞珍杜  
受田避 上登極求賢詔保舉見任及在籍人員則徐與焉得  
旨著卽迅速來京聽候簡用九月以廣西各屬賊匪充斥 諭曰  
朕睽懷南服民生一日不安朕心一日不忍前任雲貴總督林則  
徐疊次宣召尙未來京著卽作爲欽差大臣頒給關防馳赴廣西  
會勦林則徐受 皇考簡任深恩前在雲南辦理漢回軍務迅速  
辦事朕所夙加著卽星馳就道蕩平羣醜綏靖邊疆毋違朕命十

月 命署廣西巡撫十一月行次廣東潮州病卒經福建巡撫徐  
繼畬奏 聞 諭曰前任雲貴總督林則徐由翰林游歷外任疊  
蒙 皇考簡薦端寄宣力有年上年勦辦雲南保山匪徒調度有  
方渥荷恩施賞加太子太保銜並賞戴花翎旋因病請假回籍朕  
御極之初知林則徐平素辦事認真不避嫌怨疊經降旨宣召來  
京嗣因廣西匪徒滋事特授爲欽差大臣頒給關防令其速赴軍  
營勦辦前據馳奏已由本籍起程方冀迅掃邊氛以綏南服茲據  
徐繼畬馳奏該大臣沿途勞頓舊疾復發於廣東潮州途次溘逝  
念其力疾從公歿於王事覽奏殊深悼惜著加恩晉贈太子太傅  
銜照總督例賜恤任內一切處分悉予開復應得卹典該衙門察



例具奏伊子編修林汝舟文生林聰彝文童林拱樞著俟服闋後由吏部帶領引見候朕施恩尋 賜祭葬 子諡文忠咸豐元年雲南巡撫張亮基以入祀雲南名宦祠題請禮部議奏則徐歷任封疆均有善政其任雲貴總督時辦理漢回互關一案除莠安良邊圉綏靖實係功在生民應請准其入祀得 旨允行二年陝西巡撫張祥河以則徐前任陝撫實有善政奏請俯順輿情建祠歲祀經部議覆奏 諭曰林則徐在陝西巡撫任內居官慈惠率屬廉明其籌辦撫賑培植學校嚴懲姦宄諸政績均於地方有裨該省西安同州鳳翔等屬紳民公懇建立專祠著准其擇地捐建以表臣節而順民情子汝舟翰林院編修

右 國史館本傳

林則徐字少穆侯官人林氏自唐後卽爲閩中甲族前明科第尤盛史稱其三世五尙書皆以清德著公生時閩撫徐士林鳴騶過其門故公父名之曰則徐以徐公有德於閩也公少而沈敏愨謹事親至孝爲帖括之學實事求是不涉時趨以嘉慶甲子領鄉薦百文敏由楚督左遷汀漳龍道一見目爲大器廣爲延譽張蘭渚中丞撫閩招入幕府張爲乾隆樞直舊臣精吏治公相從四五年盡識先朝掌故及兵刑諸大政益以經世自勵辛未成進士甲戌畱館以編修用丙子典雲南鄉試己卯擢御史海鹽張寶納款後以副將仍官粵公特疏請調西北邊缺以杜舊黨簧鼓之漸 睿

皇帝深賞之京察一等授浙江杭嘉湖道下車後於所屬海塘水利悉心求之一攝運司從帥仙舟中丞釐革夙弊浙鹽至今守其法以疾引退道光初元起病 宣宗夙知其賢奏對大稱 旨授南河淮揚道未三月擢江蘇按察使申理淹滯搏擊豪強風采卓著癸巳大水松江民有聚眾告災洶洶將變巡撫已調兵公力陳不可扁舟往解散民皆悅服是年通省災振事一以委公綜理精密活老弱無算而帑不稍糜且爲當牛之政冬質春贖各截牛角單原主爲驗次年春耕無一踣斃者民頌大起江浙兩撫議修七府水利以繼夏原吉之績奏公總其成 硃批卽朕特派非伊而誰其承 異眷也如此會丁內艱寮屬致賻皆卻之甲申冬高堰

十三堡決口洪湖水盡涸無以濟運急修石工蓄水江督選舉天下廉能董其役首以公名上 特起公以墨經從事數月工竣而公積勞疴作會戶部奏行海運自明永樂迄今已四百餘年未舉舊典無徵大府交章薦公爲總理困於疾未赴遽歸閩中丙戌兩淮鹽綱渙散諸臣皆獲譴責奉 旨奪情以三品卿銜署理鹽政公堅請終喪次年入都授陝西按察使旋擢布政使復丁外艱里居三年庚寅起復授湖北布政使調河南又調江甯一歲之中周歷三省所至貪墨吏望風解綬疆臣重其才皆折節傾心下之多所興革凡民生疾苦吏事廢墜人才賢否無纖悉不知知無不行上亦眷倚特甚一時賢名滿天下至兒童走卒婦人女子皆以公



所莅爲榮輒曰林公來我生矣至以公所行政播諸歌謠荒村野  
市傳之以爲樂本朝自陳恪勤陳文恭後長吏聲譽之盛無與公  
並者辛卯秋 特授河東河道總督公以不諳河務辭其疏云臣  
自問不敢欺而不能受人欺則與自欺奚別言極懇至 上溫  
詔荅之勉赴任河東承前人奢靡之後聞公至皆悚勵懼旦夕嚴  
劾公獨先以誠信許其滌舊染勉自新老成之士朝夕諮訪豫東  
黃河多至十數廳所儲歲料數千垛皆徒步抽驗其虛實繪全河  
形勢於壁孰夷孰險一覽而得羣吏公牘不能以虛詞進風氣爲  
之一變是冬奉江蘇巡撫之 命自此撫吳者五年吳人夙感公  
惠聞公再來益大厥施出境誦迎者數萬人時辛卯再大水壬辰

癸巳相繼患澇河事孔棘沿河開壩及通倉交兌費益重旗丁倍其數取之州縣州縣倍其數徵之小民一軍船津貼多至千金蘇漕一百六十萬石分載數百艘徵米之外費多至數百萬惟閩閩是求民既困災又困於浮勒有棄田以逃者漕務大壞十三年秋杪陰雨不止稻已刈復敗例定秋災不出九月公方擬以續被災荒例請緩而嚴旨詰責陶文毅方督兩江亦躊躇未敢決公乃單銜密疏瀝陳江蘇連年錢漕之累小民之苦反覆數千言堅請緩徵上鑒其誠特允所請是年江蘇徵公言官民全局幾殆其疏略云民爲邦本食爲民天故下恤民生正所以上籌國計若避怨沾名不以國計爲亟則無以仰對君父卽爲覆載之所不容臣

雖至愚何忍出此江蘇向稱繁富乃在百貨流通今則權子母者  
既無可牟之利任筋力者遂無可趁之工昔年尙患無墊買之銀  
今且患無可買之米晝見陰霾之象自省愆尤宵聞風雨之聲難  
安寢席大江南北爲各省通衢中外仕宦甚多一切實情難瞞眾  
人耳目臣如捏飾非無可以舉發之人但求多寬一分追呼卽多  
培一分元氣云云疏彙爭相傳鈔遠邇爲之紙貴小民間之皆嗟  
歎聚泣慶更生公念漕政爲倉督漕督所主運道則轄之兩河臣  
東南有漕者六省督撫預其事非蘇撫一人能抗而吳民且夕就  
斃終夜輾轉不能已乃倣周文襄酌劑公私田加耗減耗之法凡  
百畝中有二三十畝近乎沮洳者皆爲之請緩推之千畝萬畝皆

然統數其田畝之數約七八成餘則報款米數則就其上則者計之俗名曰暗減賦且緩徵例於次年帶收惟遞緩則已民間得此惠喘息爲之稍蘇士大夫有頌公者公輒顰蹙曰此非平世法乃一時權中之權顧我一日在吳則自操其銜勒吏不能欺民可得實若繼之者不推其濟變之初意而漫然從事則守令必有緣以爲奸高下其手將損上不益下矣流弊所窮貪涼靡止我方負作俑之罪千載下孰能諒之迨公去蘇十數年間一一如公言然細民究賴以存活公在蜀奉 旨飭議奏大理南漕條陳有疏曰臣經理五屆蘇漕但能無誤正供而實不敢云無弊公焦心剝肝拯災民於水火中而不自爲德惟知引過自咎且直陳於 帝主之



前其事 君之光明憂民之惻怛古之純臣無以過也十六年署  
江督擒斬巨盜吳黨運等數百置之法江北以安駐清江浦催空  
運糧艘河員有瀆防債事者公特糾之不少貸次年述職入都卽  
奉 旨擢湖廣總督甫莅任大閱士伍徧歷楚南北籌江隄修防  
諸事宜擒匪藍正樽滋事在趙金隴後爲亂兵所戕 上不之信  
南撫訥爾經額坐褫職公乃密疏云民可使由不可使知藍正樽  
一日不死則一日人心不定設有假託嘯聚則禍將復起乾隆末  
川楚之變卽由嚴緝劉之協所致 硃批云有膽有識不愧古大  
臣之風兩淮鹽務江督主運楚督主銷往往議論不合公與陶文  
毅相契如一時韓范於淮鹽之入楚者引爲己任裁岸費清輪規

嚴飭弁役緝私於疏銷利民之策無絲粟不詳盡准噶方爲大暢而禁煙之事起雅片煙者產自南印度爲英人屬埠乾隆時始入中國嘉慶稍盛有嚴禁迨至道光而吸食徧各省出洋銀以數千萬銀價一兩易錢二緡軍國度支莫不交病鴻臚寺卿黃爵滋奏請以嚴行禁約定限一年六閱月過此則置大辟 宣宗惡之深飭疆吏月具煙犯摺以期新法必行方條議時公力陳其害恆上意有此禍不除數十年後無可用之兵無可籌之餉語奉 硃諭密圈命入都計事 召見十九次 賞紫禁城騎馬給欵差大臣關防馳赴粵沿海水師一體歸節制蓋西洋互市惟廣東一口爲雅片煙所從來專責公以清其源也公夙以天下事爲己任感

上殊遇毅然成行而中外柄臣有忌沮之者京朝官故人子弟亦以邊釁爲公慮公謁座師沈鼎甫侍郎曰死生命也成敗天也苟利社稷不敢不竭股肱以爲門牆辱相顧涕下遂出都道經燕趙楚越官紳來謁者苟有一得皆諮詢而籍之入粵卽會同廣督鄧廷楨嚴劾歷年底私之督標副將韓某以徇前督李鴻寶設巡船專查煙土委任韓弁乃得重賄縱庇之洋煙之橫實出此公特首糾之籍其家累巨萬官民大服啟粵秀書院觀風以禁煙試時務策粵人皆交口宜禁公才望赫奕冠寰宇英酋義律懾公威重與廣府余保純洋商伍姓者密議願繳在海船上二萬一千箱易絲茶償余乃常州紳士爲公撫吳時激賞素以幹力著伍則與義



律最昵知使節不久留欲彌縫其間而陰與洋行分年償其值其  
稟牘恭甚公據其詞入告奉 旨嘉獎有不慮爾等孟浪但慮爾  
等畏蕙語公乃馳檄宣 示英國王詞意剴壯外國爭傳其文就  
省城外濬大池焚燬數月始盡陶文毅卒旋奉 旨調兩江總督  
樞相忌其功思困之乃請以鄧調兩江而移公爲粵督 命下余  
伍之初計沮公亦知事未易竟嚴飭義律具結嗣有販煙來粵者  
貨卽入官人卽正法義律諾其半而正法一事難之蓋西洋行律  
卽重譴無殊死者相持數月無要領照例封船停貿易斷水穀驅  
逐出澳門義律遷延海外以兵船嘗試公與提督關天培密布水  
師兵弁一轟之於九龍山再擊之於夾沙嘴凡三挫其鋒英人自



通市於嘉慶己巳吳熊光任道光癸巳盧坤任皆恃礮火在省河  
耀兵呵喝當局遷就竣事無敢實以兵力懲創之者有之自公始  
西洋聲教素不通中國其貿易主於洋行至其國之道里風土兵  
民習尙虛實強弱人無知之者公獨設閒得其新聞紙及外洋紀  
載通以重譯能中其窾要而洋人旦夕所爲纖悉必獲聞西酋駭  
爲神助水師大小兵弁亦畏公號令嚴無不致死力無戰不捷中  
國機巧之士公皆羅致之密製火攻器具黑衣乘潮焚其巨艦長  
風怒濤中萬眾號呼不復相救義律窘迫甚乃請命於英王集同  
人公議乾隆朝平準平回平兩金川平緬甸平安南威稜震海外  
知中國勢盛無敢以用兵請惟英商嗜吃失煙土最鉅願罄已資

千萬助軍而仍憚公之在粵也兵船過老萬山望洋瑟縮不敢入  
犯知浙江懈於防己亥七月徑陷甯波定海縣浙撫烏爾恭額張  
皇入告京師大震齟議漸起而英酋亦狡甚遽赴天津海口投書  
直督琦訴冤抑琦前督兩江時公爲之屬後時望出其上深嘆之  
遇公保定議時事不合論直隸屯田水利又憾公越俎至是得閒  
遂密陳撫議意在擠公所爲樞臣內助之上意動批公他摺實  
斥甚厲公具摺請治罪而附片云雅片煙之害如洪水猛獸雖堯  
舜在上不能不爲驅除 大聖人執法懲奸爲天下萬世計而天  
下萬世之人斷無有以雅片煙爲不必禁之理請視職赴定海軍  
效力以必勦爲期得 旨革職以琦署兩廣總督公隸麾下備差

遷琦悉反公所爲許償兵費二百萬以香港地俾之要挾日甚虎  
門遂失守琦被逮公奉 命以四品卿銜赴定海裕謙軍營七月  
復奉 旨與鄧督同戍伊犁行抵清江浦河南祥符河濱大學士  
王文洛出司塞決奏請公赴工效力乃改道汴梁先後六閱月風  
雪中日夜露坐與士卒同畚鍤正月藏事奉 命仍往伊犁公乃  
寄學關中攜二子出塞凡三年將軍布彥泰深敬公以新疆方興  
屯田無可屬計無踰公者特疏請公總其事周歷天山南北二萬  
里東西十八城濟水源關溝渠教民耕作定約束數十事計開各  
路屯田三萬七千餘頃大漠廣野悉成沃衍煙戶相望耕作皆滿  
合兵農而一之歲省 國家轉輸無算而回民生計亦大裕爲百



餘年入版圖未有之盛丙午 特旨賜環以三四品京堂署陝甘  
總督青海番族叛公督兵驅剿甫定移撫陝西值大旱公籌畫災  
振請行捐輸事賴以集公以積勞疾作乞退 温旨不允丁未正  
月擢雲貴總督趣赴任滇南通省漢回雜處客主相忌不通婚姻  
始則漢民勢盛官恆偏袒積久回怨深屢報復回性忍驚而專一  
漢民渙散轉爲所屈守令懼斃巨又從而抑漢就回往復之間率  
不能平道光中有通判張景沂以禮拜寺前隙地納賄啟爭端漢  
回仇殺千人難由是始丙午丁未閒迤西道羅天池信紳士之言  
一夜誅城中回眾逾萬老弱無不併命至爲冤濫賀長沙爲總督  
處置未協革任去以李文恭代之用兵數月稍有緒量移兩江



上以公馭邊精審特以滇事屬公自丙子典試至是逾三十年矣  
昆明人士聞公重來距踊甚兵事始末隱微罔不畢達公先以文  
告徧示通省曰今爾後但以良莠不分漢回莠則雖漢必誅良則  
雖回勿問剗切明曉聞者皆感泣故後來雖駢誅之徒亦甘心就  
戮相謂曰吾曹一身固殄而子孫滅族從此永出覆盆雖死猶活  
我也公臨大事輒舉其要以生道殺民多類此保山回民滋事公  
奏請親臨督勦且閱迤西永昌一帶邊務簡精銳三千人以往滇  
軍自阮文達內召十數年卒伍廢弛公素號令明肅壁壘一新出  
師之日旌鉦夾道將士皆奮厲有壯采滇民觀者山谷填咽僉謂  
雍正鄂文端後所未見中途聞彌渡亦警乃疾趨先擊之一鼓掃

蕩保山匪徒聞風震懾公未至卽呈請縛獻公素偵知首要各犯  
姓氏別有杜文秀者機警多智曾入都控瀆事公撫而遣之入賊  
巢按名就縛無一人遁公詳列各犯罪狀五雀六燕悉當辜卽漢  
民有句煽附和先事凌激者亦一一窮治之中外讐服定善後條  
約絕後患奏入 上大悅加公太子太保 賞孔雀翎公旋省後  
遽遭鄭夫人之喪公少境遇艱糲誼篤至是悲不自勝而頻年  
積勞舊疾疝氣大作屢請乞身 宣宗春秋高盱衡中外忠實可  
倚無出公右將以資望用公入相兼樞政堅勿許公先後疏至十  
餘上 宣宗不得已勉徇其請己酉夏受代啟行滇民焚香載酒  
遠邇不期而集至數萬婦孺奔走號泣擁公馬幾不能前士紳銘

公德政自迤西至黔界大書深刻巖壁殆徧省城書院生徒繪截  
鐙圖以紀其事公瀕岐與寮屬論回事曰馭邊者公勤仁明威少  
一不可守令能公勤則小費可弭大吏能仁明威則眾心自服經  
此次創艾區區之力不過維持十年過此非所知矣迨咸豐七八  
年滇患復熾悉如公料公自沅湘泛大江東歸過南昌居百花洲  
養病月餘從容歸閩未幾 宣宗崩聞至公慟哭攀髯病體益劇  
不能入京謁 梓宮潘文恭杜文正以公 先朝耆碩彙征之典  
首薦公爲 文宗初政有具經文緯武之才所居民樂所去民思  
語與周文忠同被 召未赴洋人據省城烏石山閩督劉百計遷  
就之諸紳大譁公家居持論侃侃洋人畏公逡巡避去而閩督大



憾之將劾其撓撫局會廣西賊起 上卽家起公爲欽差大臣赴  
桂林辦賊公聞 命一日卽行前事遂寢而閩督亦被臺諫繫劾  
褫職矣公力疾督師年已六十六自許可償馬革之志桂林土賊  
大小十數股聞公將至輒相約棄戈投誠願自解散粵東壯士舊  
隸公部者爭請自效廣督徐爲公年家子募驍健五千人爲一隊  
先期致書於公公中途方爲之申約束定規制而疾大作抵潮州  
憊不能興日夜苦滯下數十次學使許閣學爲公故交按試相值  
公猶向索書籍時淮南改票鹽公搥牀曰奇禍自茲始矣楚中游  
手以鹽爲活者眾一旦失生計必大誤國甚於粵匪俟寇滅必力  
言於 上懲創議者許公悚然而別公忠誠篤棗蹇蹇匪躬至臨



危猶憂在天下不二日公遽薨易簀時以指向天呼星斗南三字  
無一語及私連日大風霾日色昏翳海潮夜嘯慘冽哀鳴異於平  
日遺疏上聞天子震悼贈公太子太傅特謚文忠自乾隆  
初傅相國後百年無此典矣天鑒優崇蓋異數也而粵寇無所  
忌畏馴致海內大亂迨武昌陷鹽船水手數萬人率從賊爲前驅  
直下東南以靡始服公遠見焉公身體不遂中人端凝嚴重行止  
如載華嶽眉目疏朗光奕奕出數步外神采威秀顧盼風生與人  
和易溫粹雖卑官下寮輒與坐論終日鮮情容驕色能使人盡言  
而考訂詳審博覽彊記纖芥事數十年不忘屬寮謁公必先畢夜  
溫故牘猶有不能對者而公數其曲折某地某人及錢穀畸零瑣

屑千端萬緒了了然如螺紋之示於掌上聞者駭服故人之事公如對神明如臨師保庸妄之念非惟不敢騰諸口並不能存諸心尤慎舉劾歷封圻十四省所薦不過數十人皆以才德致通顯爲時名臣而無一人貽物議其所擯斥尤少於舉數人皆沒齒無怨詞雖受劾之戚族亦服爲至公奏牘中論屬吏優劣適如所分從無譽之過情而毀之過當者於近人推許蔣襄平嘗謂以人事君之美我不能比蔣公十一顧蔣進賢多而猶有徇虛聲敗末路之士公則非深知其生平者不妄薦也公以端亮敏毅上結 宣宗知遇道光一朝三十年凡河工海運鹽政軍事苟遺大投艱必專任公始終 眷倚同列不敢望中間遭讒小挫湯文端奕都護皆

以薦公膺譴責而上意實眷之不衰故晚節尤盛督撫同官一省往往多齟齬甚至水火公交寅僚能推功讓能雖自守以正而不以名位矜己不以賢智先人遇政事宛轉商推惟善是從無隱情無成見各省督撫司道皆樂與公共事無一隔閡失歡之人固公之局量足以容之也愛士最摯所至書院績學之士及高才生率承敬禮優恤勉勵多掇巍科以去文書中有佳牘必詢其幕客姓名籍記而揄揚之千里之外舊交故吏雖歷久輒詢其處境之枯菀有不待請而拯掖者有當困厄而遠爲湔雪者皆喜過望而感之次骨一時文臣軍吏無智愚賢不肖皆樂爲之用甘爲之死且有得譙讓而猶以爲榮者周旋朋舊睦敦戚黨必誠必信於細



民之情僞困敝災振諸事深思曲體凡所設施卽其人自謀亦不  
及此江南科場素患擁擠公爲江南藩司釐定條規刻時懸旗魚  
貫鱗次法簡而易旁及水漿糕餌及廁溷細務皆求其爲士便各  
省援以爲式至於今仍遵守焉程侍郎春海贈公楹帖曰爲政若  
作真書縣密無閒愛人如保赤子體會入微人皆傳誦以爲工於  
形容公在翰林以書名出入殿董尤長小楷爲世所重終身無嗜  
好雖書畫碑版亦不甚經意朝夕孜孜不倦者國政民瘼兩大端  
而已公盛德純忠豐功偉績他人行一已足名世而公所樹立優  
指未能盡其尤著者新疆屯田江南漕振雲南回務三事皆以一  
時貽百世之利一心布萬民之澤粵東燒煙之役雖論者謂之過



當而西人傾國之資呈繳至二萬餘箱終公任番舶不能還志於  
粵二十年來洋人紀載於中國大臣皆直斥其名惟公則尊之曰  
林文忠無敢慢之者使全局堅任公張國威而靖外患又豈不可  
必哉且使公延數日之命則粵匪已如鳥獸散何致蹂躪至十七  
省而宗社幾危劫運所關雖公亦無如何也公生子三長汝舟道  
光戊戌翰林次聰彝浙江候補道署按察使三拱樞刑部郎中皆  
秉公訓恪謹廉退世其家女一適同邑沈中丞葆楨公之甥也少  
英儁耿介公課之嚴致不相能而於公女伉儷甚篤任江西廣信  
府賊大至城空公女獨守井待盡招沈同難賊退後曾帥以實狀  
疏達上爲動容沈由此不二年開府公忠盡之教施及女子如

此可謂難矣公仁聲洋溢凡血氣之倫皆爲翕服至寇亂後山野鄙儒不知時王政體不知民生利病但牽附一二杞宋不足徵之法嘗公功烈之卑學術之淺始稍稍有異詞嗚呼公之功水土稼穡之功也公之言布帛菽粟之言也而其誠則感孚於異類浹洽於羣黎非權術所能致矯僞所能沽固不屑與妄比唐虞三代之王安石虛負大名之殷深源較尺寸之短長也

評曰林公之成績茂矣方之前修如湯和之沿海列屯周忱之治吳滅賦李化龍之開泃平播其聲施相上下特公能兼之耳葛相之才遜於景畧後人不以彼易者君子所貴在信與誠驥不稱其力聖經固深訓之矣陳壽之贊也善無微而不賞惡無微而不貶

庶事精練物理其本循名責實虛僞不齒終於邦域之內咸畏而愛之由其用心平而勸戒明千載下公其庶幾焉鄭僑之猛甯武之愚公其嚮往者歟

右傳金安清撰

江蘇賦稅甲天下自元迄今未之有改豐年尙可支持歉歲卽形拮据比來連年水旱勸捐議賑一而再三國帑多糜民財告匱林中丞少穆一摺剴切敷陳因全錄之道光十三年十一月十三日江蘇巡撫林則徐片奏再江蘇連年災歉民情竭蹶異常望歲之心人人急切今夏雨暘時若滿望得一豐收稍補從前積款乃自六月閒江湖盛漲沿江各縣業已被災其時蘇松等屬棉稻青蔥



猶冀以江南之贏補江北之絀蓋本省漕賦在江北僅十之一而江南居十之九故蘇松等屬秋成關係尤重惟所種俱係晚稻成熟最遲秋分後稻始揚花偏值風雨陰寒遂多秀而不實然大槩猶不失爲中稔迨九月後仍復晴少雨多晝則霧氣迷濛夜則霜威寒重雖已結成顆粒僅得半漿鄉農傳說暗荒臣猶不信於立冬前後親坐小舟密往各處察看見一穗所結多屬空稈半漿之禾變成焦黑實爲前所不及料然猶盼望晴霽庶可收曬上糞不意十月以來滂沱不止迅雷閃電晝夜數番自江甯以至蘇松見聞如一臣率屬虔誠禮禱悚懼滋深雖中間偶爾見晴而陽光熹微不敵連旬盛雨在田未割之稻難免被淹卽已割者欲曬無從



亦多發芽霉爛鄉民烘焙勉強試糶而米粒已酥上糶卽碎是以業戶至今未得收租臣先因欽奉 諭旨新漕提前趕辦當經欽遵 嚴飭各屬勒令先具限結將何日開倉何日徵兌何日開行登載結內並聲明如有逾期願甘參辦字樣呈送如不具限卽以才力不勝立予參撤不使戀棧貽誤各屬皆具結遵辦然賦從租出租未收納賦自何來當此情形屢變之餘實深焦灼又各屬沙地祇宜種植木棉男婦紡織爲生者十居五六連歲棉荒歇業生計維艱今年早花已被風搖而晚棉結鈴尙旺如得晴暄天氣猶可收之桑榆乃以雨霧風霜青蒼腐脫計收成僅止一二分小民紡織無資停機坐食且節候已交冬至卽趕緊種麥猶恐過時況又

雨雪紛乘至今未已田皆積水難種春花接濟無資民情更形窘迫此在臣奏報秋災以後歉象加增日甚一日之情形也地方以秋災不出九月不許妄報原係遵守定例然值連陰苦雨人心難免惶惶外縣城鄉不無搶掠滋鬧之事臣飭委文武大員分投彈壓見已安靜除寶山鄉民因補報歉收擠至縣署一案另摺奏明嚴拏提審外其餘情節較輕例不應奏者亦當隨案照例懲辦以戢刁風惟據續報歉收情形勘明屬實不得不照續被災傷之例酌請緩徵正在繕摺具奏聞承准軍機大臣字寄欽奉 上諭近來江蘇等省幾於無歲不緩無年不賑國家經費有常豈容以展緩曠典年復一年視爲相沿成例並奉 諭旨該督撫等不肖爲國

任怨不以國計爲亟是國家徒有加惠之名而百姓無受惠之實無非不堪之官吏私充囊橐大吏祇知博取聲譽等因欽此臣跪誦之下競凜慚惶莫能言狀伏念臣渥蒙 恩遇任重封圻且居此財賦最繁之地乃不能修明政事感召和甘致地方屢有偏災極知經費有常而不得不爲賑恤蠲緩之請撫衷循省已無時不汗背靦顏乃蒙 皇上不加嚴譴 訓飭周詳凡有人心皆當如何感愧況臣受 恩深重曷敢自昧天良若避怨沽名不以 國計爲亟則無以仰對 君父卽爲覆載之所不容臣雖至愚何忍出此卽如上年臣到蘇之後秋成僅六分有餘而蘇松等四府一州於徵兌新漕之外尙帶運十一年舊漕二十萬石合計米數將



及一百八十萬爲歷來所未有之多原因 天庾正供不敢不竭  
力籌辦其辛卯年地丁督同藩司陳鑾催提嚴緊亦於奏銷前埽  
數全完業經專摺奏蒙 聖鑒在案竊惟盡職之道原以 國計  
爲最先而 國計與民生實相維繫 朝廷之度支積貯無一不  
出於民故下恤民生正所以上籌 國計所謂民惟邦本也本年  
江湖盛漲係由黔蜀湖廣江西安徽各省大水併入長江其破圩  
淹灌等處原不止上元六縣臣所請撫卹第舉其最重者而言仰  
蒙 皇上天恩准給口糧災黎感喻肌髓嗣經官紳捐資撫卹臣  
卽復行奏請毋庸動項將所發上元江甯句容江浦儀徵五縣銀  
兩畱爲辦賑之需冀丹徒一縣捐項已有五萬餘兩並足以敷賑



濟當將前發之銀提回司庫凡此稍可節省之處均不敢輕費帑  
金惟於災分較重又難猝集之區則不得不酌給例賑臣等另摺  
請撥之十三萬兩僅分給十二縣衛軍民雖地方廣而戶口多亦  
祇得那節動撥此外無非倡率勸捐以冀隨時接濟惟頻年屢勸  
捐輸卽紳富之家實亦力疲難繼查道光三年大災通省捐至一  
百九十五萬餘兩至道光十一年災分較前相埒僅能捐至一百  
四十六萬餘兩其餘各年捐項較絀此時閭閻匱乏勸諭愈難然  
觀此情形待哺災黎不能不勉籌推解臣與督臣率同司道等官  
各先捐廉倡導以冀官紳富戶觀感樂施凡此情形皆人所共覩  
不肖州縣捏災冒賑地方刁生劣監豈肯不爲舉發而紳富之家

又安肯聽其勸諭捐貲助賑至再至三且捏災而轉自捐廉似亦無此愚拙之州縣也至展緩之舉祇能緩其目前仍須徵於異日非如蠲免之項慮有侵吞州縣之於錢漕未有不願徵而願緩者至必不得已而請年復一年則地方凋敝情形早已難逃 聖鑒然臣初亦不料其凋敝之一至於此是今漕務瀕於決裂時刻可虞臣不得不將見在實情爲我 皇上密陳梗槩查蘇松常鎮太倉四府一州之地延袤僅五百餘里歲徵地丁漕項正耗額銀二百數十萬兩漕白正耗米一百五十餘萬石又漕賍行月南屯局恤等米三十餘萬石比較浙省徵糧多至一倍較江西則三倍較湖廣且十餘倍不止在米賤之年一百八九十萬之米卽合銀五

百數十萬兩若米價昂則暗增一二百萬兩而人不覺況有一石之米卽有一石之費逐層推計無非百姓脂膏民間終歲勤勞每畝所收除完納錢漕外豐年亦不過僅餘數斗自道光三年水災以來歲無上稔十一年又經大水民力愈見拮据是以近年漕欠最多州縣買米墊完畱串待徵謂之漕尾此卽虧空之一端曾經臣縷析奏聞然其勢已不可禁止矣臣上冬督辦漕務將新舊一併交幫嗣因震澤知縣張亨衢辦漕遲誤奏參革審而漕米仍復設法起運不任短少皆因正供緊要辦理不敢從寬也今歲秋禾約收已遜去年茲復節節受傷發芽霉爛詢之老農云見在縱能卽晴趕曬尠朽之穀比之上年每畝已少五六斗就蘇州一府



額田六百萬畝計之卽已少米三百餘萬石合之四府一州短少之米有不堪設想者民間積歉已久蓋藏本極空虛當此秋成之時糧價日昂一日實從來所未見來歲青黃不接不知更當何如小民口食無資而欲強其完納卽追呼敲扑法令亦有時而窮前此漕船臨開有缺米州縣尙能買補近且累中加累告貸無門今冬情形不但無墊米之銀更恐無可買之米曩時蘇松之繁富由於百貨之流通挹彼注茲尙堪補救近年以來不獨江蘇屢歉卽鄰近各省偏災布匹絲紬銷售稀少權子母者旣無可謀之利任筋力者遂無可趁之工故此次雖係勘不成災其實困苦之情竟與全災無異臣惟有一面多勸捐資妥爲安撫一面督同道府州縣



將漕務設法籌辦總不使藉口耽延但本年已請緩徵之處尙不  
過十分中之一分有餘此外常鎮等處亦已紛紛稟臣覈其情  
形略輕者無不先行駁飭但天時如此日後情形如何臣實不能  
預料晝見陰霾之象自省愆尤宵聞風雨之聲難安枕席並與督  
臣陶澍書兩往復於捐賑辦漕等事思艱圖易反覆商籌楮墨之  
閒聲淚俱下從此卽能晴霽歉象尙不至更加如其不然臣惟有  
再行據實奏聞仰求訓示遵辦大江南北各省通衢且中外  
仕宦最多一切實情難瞞眾人之耳目臣如捏飾非無可以告發  
之人我聖上子惠黎元恩施無已正恐一夫不獲是以察覈  
務廣但民間困苦顛連尙非語言所能盡本年漕務自須極力督

辨而觀此景象時時恐滋事端至京倉儲蓄情形臣本未能深悉  
儻通盤籌畫有可暫紓民力之處總求 恩出自天多寬一分追  
呼卽多培一分元氣況 天心與 聖心相應定見祥和普被屢  
慶綏和長使 國計民生悉臻饒裕臣不勝延頸頌禱之至

右筆記梁紹王撰

宮傅林文忠公道光朝名臣也余劇喜人道公事聞輒稱述於人  
而亦罔不神色飛揚抵掌前席惟恐余言之竟也以此見秉彝直  
道有不期然而然者然而傳聞異詞閒至失實今不衷諸一是將  
承譌襲謬雖不能掩瑰琦之光亦何以釋後來之惑跡公生平善  
政良法殆難僂指數要其愜心者爲回城開墾而飲恨不磨則未

若防海禁煙之爲甚煙禁旋弛海患日深微特事敗於垂成復變本加厲焉微特譏聞於一時復騰謗無已焉一似公爲禍首罪魁有斷斷無可解免者天日在上余雖構味所不能不大聲疾呼拯人魔窟者此也鴉片煙者產西洋印度國明時流入中華本草綱目著其名曰阿芙蓉藥籠備物而已用者絕尠有賤丈夫者製管開燈橫陳對吸以是沈痼終其身印度旋淪於泰西之英吉利國英遂獨擅其利權康雍倍蓰乾嘉什百道光且千萬英之利不可勝窮而華之患不至家無完人國無餘財不止黃鴻臚爵滋有憂之疏請塞漏卮部議加等治罪勒限一年六閱月逾限販者吸者予緘首公於丁酉春來督吾楚奉 旨交議公條上利害甚悉闕



奏陳拏辦情形 宣廟嘉之璽書褒美明年 命以欽差大臣查辦海口事務水師並歸節制是爲公涉洋事之始居頃之有切切私議者曰洋事壞矣壞於公過刻凡物質灰便無用獨鴉片灰力反勝質公乃不用火投煙土於坎雜角子石灰水沃之卽洋艘油布裹藏舵底者悉泅毀無遺漸致府夷怨或又曰壞於公過驟英例君與商共治其國用而煙利駕百洋貨上乃不走一紙書先禁約而後搜查罔計彼折閱忽任吾銷毀無怪挑夷怨而夷果藉以有詞嗚呼由前之說尙出細人由後之說雖君子亦叢詬焉謀國不臧駸駸乎併口同聲矣及遲之旣久歷證余所聞實不然蓋公自奉 命莅粵卽移檄英國王詞義嚴正宣 上威德飭禁輿販



旋繕守禦於虎門各海口添建礮臺設木桴鐵索又明年授兩廣  
總督則益修備以碎石實破舟沈諸隘增募水陸防守奏移高廉  
兵備道駐澳門撥隸水師資控馭時通商之國以十數見兵威若  
是厲禁若是無夾帶煙土仍給茶葉大黃又若是咸傾心受約束  
惟英目義律等持兩端尋以索食爲名糾師船犯尖沙嘴公遣參  
將賴恩爵擊走之斷其接濟尋六犯海口皆受懲創義律潛赴澳  
門倩西洋夷目遞說帖求轉圜公以其言未可信奏請相機勦撫  
並請 敕福建浙江江蘇諸督撫嚴防各海口復奏停其貿易英  
人屢撼之不動則大懼旣以粵之無隙可乘也乃改圖犯浙陷定  
海掠甯波沿海騷然中外當事者莫能折衝禦侮乃爭歸咎於次

輔時任直督所轄距公遠初與公無與也自粵督鄧公廷楨移督  
閩而閩疆亦固若粵迄浙事亟撫軍烏爾恭額昧於防禦倉卒張  
皇獲重譴直督惴惴焉慮英犯天津輪船不瞬息而至將爲浙撫  
續且先在保定與公議事不合公又嘗爲其屬吏斷斷持正相鑿  
枘突英人詣天津卑詞訴屈求互市而不以兵戎實出其望外知  
煙未易禁使非禁絕己爲重臣無可逃免也計不若痛劾公可取  
悅英而速行成冀卸責又幸爲見好地驛然以激變爲公罪與首  
輔比而碁公卽奉有赴粵查辦之旨竟代公任又恐和議之不  
速成也悉撤公前設各隘兵以媚英初不料英輒徑犯粵城漢奸  
復誘索天字馬頭並索林鄧二公首要求卒無厭公知事不可爲

具遺疏以待代公者約賂重金弛煙禁而圍乃解公銜命以四品卿赴鎮海軍營效力尋謫戍伊犁矣是說也余得之粵人傅大令祥麟且曰公戒期出城時洋艘旋城河有願得公而甘心之謠中軍副將與廣州余太守請以千人或五百人護行公卻之乘輿張蓋從數騎飄然徑去英人登桅持遠鏡相睇貶服不已則公之威信感人華夷靡間也辛丑夏河決開封王相國鼎出視工公方議戍相國疏畱公督辦歲云暮矣而龍未合販糶料者麇集工次斤昂至三百餘文值海疆開例籌捐戰和無定供軍餽夷幣且難爲繼公盡策請相國撫軍出示以歲闌停工停買糶越旬日復示以販者淹畱良苦許別開子廠收儲備明春用則糶價斗跌至



斤十六文省帑金無算是說也余得之豫人高大令錫綬高又曰  
公權奇人也剝下益上惡公者與煙禁等聲譽頓損於開藩吾豫  
時余詢其由來則販楮者多高戚舊借貲牟利者所傳余笑曰利  
於工卽利於國利於民牟利者偶失利於公何嘗焉高亦無以  
應王寅春大工告成在事者咸得優敘命公仍就戍相國與公  
共事久稔公深旋都復命不敢爲乞恩迨洋事日棘遂以尸  
諫而力舉公其子持諫章示首輔輔曉之曰尊公已矣子茂年不  
爲居官計乎子竟易循例遺摺以上宣廟大疑屢詰問首輔代  
掩覆相國死狀終不得上聞都人士憫相國忠而詈其子不肖  
者比比也自是繼相國者湯協揆金釗面奏舉公被嚴飭退仍



具疏切陳卒不安其位首輔持他事議黜之繼協揆者唐太常鑑  
以目眊呼甥黃太史兆麟扁密室繕摺黃婉勸毋徒蹈禍機太常  
曰吾老矣薦賢報稱在此舉得罷斥吾安之卽偕林公戍萬里吾  
甘之疏上雷中卽告歸時代公者與靖逆揚威兩將軍旣黜復用  
陳侍御慶鏞具疏論劾引大考翰詹 欽命題烹阿封卽墨論猶  
明斥三人爲阿大夫而隱以卽墨大夫喻公也然公就戍時無幾  
微忿愆意有門下士官陝者迎謁公竊爲不平見公談笑自若不  
敢言退謁鄭夫人曰甚矣此行也夫人曰子毋然 朝廷以汝師  
能舉天下大局付之今決裂至此得保首領 天恩厚矣臣子自  
負 國耳敢憚行乎公之義命自安誠孚閭閻有如此是說也余

得之善化俞侍御東枝俞歸自京師不誣也公在塞外伊犁將軍  
布彥泰公國士目之視如手足心膺公以塞外隸版圖數十年竭  
內以輸外者無紀極無已時非甌脫誠皆棄壤也緣官無善教人  
不知耕實無物土之宜者爲圖謀至計然地利無盡藏民事不可  
緩因殫精區畫奏記將軍將軍據以入告有 旨命公勘辦開墾  
事宜公親歷庫車阿克蘇烏什和闐喀什噶爾葉爾羌及伊拉里  
克塔爾納沁等城縱橫三萬餘里水利大興自是冰天雪海中綠  
畝黃雲所在彌望歲省腹地撥帑數百萬金 宣廟嘉勉將軍將  
軍奏非公不克臻此乙巳秋 特旨賜環以四五品京堂用旋署  
陝甘總督方事之始將軍飭罪員悉聽公調遣長沙黃太守冕最

有勞至是亦 賞六品頂帶釋回手冊示余紀巔末特詳不具錄  
蓋公歷仕宦功德及民者固多其閒牽制不果行與旋興旋罷或  
事與願違十未及二三者殊不乏獨此四年中稱心之舉願酬於  
失意遠謫時要微將軍力公報稱蓋忱又終湮滅將軍之賢爲何  
如明年將軍調補陝甘總督公卽補陝西巡撫一時媒孽公者或  
身敗或名廢 先皇帝知人善任明良之際遇又何如哉公署陝  
督也飭鎮將防護馬廠野番之肆劫者以戢任雲貴總督也滇中  
漢回構釁垂數十年焚殺無虛日議者每袒分左右公諭曰止分  
良莠不分漢回行提兵出勦保山逆民途次聞趙州彌渡逆回起  
卽就近勦彌渡殲數百人保山民股粟縛犯迎師公諭以恩信復

乘勢搜獲永昌順甯歷年拒捕戕官諸匪寘諸法滇人肖像祀之  
蓋公復職後又無在不以武功顯天下益莫不想望公再當夷事  
也公引疾歸閩洋人謀據會垣烏石山因倡驅夷議大忤當事意  
外夷方爲斂跡而當事思中傷之會 今天子嗣服潘相國世恩  
杜尙書受田交章薦 天子將使公籌畿輔水利疾未卽至適粵  
匪洪秀全等稔亂 特命公爲欽差大臣馳往督勦尋 命署廣  
西巡撫事公力疾出粵人以公嘗總制其地威惠著聞俟其來額  
手相慶卽賊黨中有前代公者所撤海防各隘健兒退卒落拓伏  
莽聞公將至皆大慙悔誡其黨散去大半且有公來反正投效語  
秀全懼謀遁入海粵事弭在指顧聞忽報公薨於潮州蒙 賜祭



葬 贈諡飾終之典一時無兩要自公薨軍民失倚賊寢無所制  
不可謂非又增公一飲恨也易簣時呼星斗南者三或問余此何  
謂余曰泰西稱地球五大洲以吾華爲亞細亞洲佛經稱四大部  
洲以吾華爲南贍部洲吾華居星斗之南故北辰常在北海疆事  
起後進成就公請方略公曰英易與耳終爲中國患者其鄂羅斯  
乎時鄂人不交中國越數十年間者惑焉公蓋以髮逆患在一時  
洋防患在後世西洋國眾而聯渙靡常北洋地大而在在毗連我  
邊裔舉吾華數萬里百十年事蓋無日不往來於胸中故公之存  
若沒實關治亂安危之數殆與司馬文正病嚙時無非國是宗忠  
簡連呼渡河者三古今同揆天不憖遺請之何哉雖然司馬文正

往矣無以黨事追咎文正者宗忠簡往矣無以金事追咎忠簡者  
獨公秉純忠抱孤憤齋志以歿乃舉世以嗜煙而遷怒禁煙以畏  
夷昵夷而遷怒拒夷次輔代公者之劾公也曰阻撓夷務然則夷  
務當依違乎曰要結民心然則民心當拂逆乎其加公罪案者卽  
自供罪案也何待辨所不能問執悠悠之口者人情無關於華夷  
敵國易乘吾罅隙以泰西而論有君主有民主有君民共主而斷  
無無主之國矧英國地隘齒繁利在互市君民合計煙實大宗一  
旦欲絕其利源制其死命激而生變禍不崇朝此不待智者而知  
者也豈以公之周而慎勸且明慮不及此獨斬一檄剴切麤諭於  
事先遽與爲仇率爾燒禁冀服人心而滿吾志其不貽人以口實

者幾希其不致我曲彼直橫決莫可收拾者幾希己亥夏都中人  
來伏讀三月 上諭軍機大臣等林則徐覆奏堵截洋船情形請  
暫緩議斷互市及頒行各國檄諭等語所見是此次查辦海口防  
堵躉船各國業經遵繳煙土自應加恩准予照常互市以示懷柔  
所有斷絕茶葉大黃著暫緩置議其英吉利既有在粵領事經該  
大臣等就近諭知辦理所有檄諭該國之處亦著暫緩頒行統俟  
議定與販吸食各罪名頒行新例時於善後章程內另行詳細籌  
議仍遵前旨擬彙進呈再行頒發欽此讀竟益大駭夫公奉 命  
使粵在戊戌十一月至是五閱月矣原奏尙云暫緩檄諭 諭旨  
亦云暫緩檄諭並俟於善後章程內另行詳議頒發審若是善後

無期檄終不發僅諭領事蔑視其主是激之變也欲不啟兵端得乎既而思之 聖主賢臣必不作此無把鼻句當因復取 諭旨細釋之豁然曰吾知之矣此次 諭旨末曰仍曰前曰再是必有前次 諭旨在必有前次擬稟在卽必有一頒發諭該國王之檄在惜自交涉洋事以來和則諱戰戰又諱和公件多不發邸鈔非在樞府末由全悉緯恤杞憂幾令人悶殺甲辰秋闈後澈浦巖仙舫丈正基以州牧服闋入都余謁湘干出公在粵公牘書札彙約二指許則首列莅粵移會英主檄恍如書闕有聞其軼乃時時見於他說喜不自勝迨書藏副異日尙欲備鈔其牘札迫巖丈游歷通政歸而余又出宰蜀中之昭化遂不果三復此檄非徒白公之



誣亦以存 國之體今距公薨十年所矣不知中外交涉尙有幾  
許得體大文字思之惘然爰錄全文以質論世者 大清國欽差  
大臣兵部尙書湖廣總督林兵部尙書兩廣總督鄧兵部侍郎廣  
東巡撫怡會同移文與英吉利國王爲會禁鴉片事照得天道無  
私不容害人以利己人情不遠孰不惡死而好生貴國雖在重洋  
二萬里外而同此天道同此人情未有不明於死生利害者也我  
大清四海爲家 大皇帝如天之仁無所不被卽遐荒絕域亦  
在並生並育之中廣東自開海禁以來流通貿易凡內地民人與  
外來番船相安於樂利者百數十年於茲矣且如大黃茶葉湖絲  
等物皆中國寶貴之產外國若不得此卽無以爲命而 大清一

視同仁許其販運出洋絕不靳惜無非推恩外服以天地之心爲心也乃有一種奸夷製造鴉片夾帶販賣誘惑愚民以害其身而謀其利從前吸食者尙少近則互相傳染流毒日深在中原富庶繁昌雖此等愚民貪口而戕其身亦屬孽由自取何必爲之愛惜然以大清一統之天下務在端風俗以正人心豈肯使海內生靈甘心鳩毒是以見將內地販賣鴉片與吸食之人一體嚴行治罪永禁流傳惟思此種毒物係貴國所屬各部落內鬼蜮奸人私行造作自非貴國王令其製賣卽各國中亦只數國製造此物並非諸國皆然又聞貴國亦不准民人吸食犯者必懲自係知其害人故特爲嚴禁然禁其吸食何如禁其販賣並禁其造作乃爲清

源之道若自己不食而仍敢製造販賣引誘內地愚民是則欲己之生而陷人於死欲己之利而貽人以害此皆人情所痛恨天道所不容以 大清威振華夷何難力制其命而仰體 聖明寬大自宜告誡於先且從前未用公文移會貴國一體嚴禁則猶得推諉不知今與貴國王約將此害人之鴉片永遠斷絕我內地禁人吸食爾屬國禁人製造從前已經製造者貴國王須卽全行搜盡投之海底斷不許天地閒更有此種毒物非獨內地人民不受其害卽該國民人既有造作安知其不吸食並製造而禁之則該國亦不受害豈不各享太平之福並覘貴國王恭順之忱如此明乎天理而上天不至降災協乎人情而民人無有吸食卽使該國仍

行製造終亦無處可賣無利可謀與其虧本徒勞何如改圖生業  
見在內地搜出鴉片盡付油火燒焚若再有夷船夾帶鴉片前來  
不能不一體燒燬恐船內所載貨物亦難免玉石俱焚是利未得  
而害已行欲害人而先害己我大清所以能服萬國者正有不  
測之神威毋謂言之不早也貴國王接到此文即將如何嚴禁斷  
絕緣由速行移覆幸勿說飾支延竝切盼切

右逸事識餘曾寅光撰

公前戍伊江時南中諸君有贖緩之舉公婉謝之而公子汝舟言  
尤切至一同敬惟人臣事君猶天惟義與命無所逃之雖昔人有  
言曷若歸命投誠乞憐君父要之心迹今古一時未可一槩量也



公爾之甚正今公已奉天子簡命巡撫秦陝移督滇黔恩寵眷注日隆矣藉令當日義舉果行權重媲美其不如少遼緩之以待天心之自轉明白然方諸君爲此時豈逆料有今日事情發於中而事迫於會苟可取濟將不復權衡審度而爲之於義甚可嘉夫天下義有所不暇精而情有所不能待至於天人訢合主臣道隆果有以大慰中外之望則又非一二人意氣所能感格而國家景福無疆之徵驗也於虜遠矣

右書手札後魯一同撰

林公之卸督篆也方奉不許通商之命次輔代公者親詣公所專主和議力言不可戰之故公語人曰是來名爲相商實則鉗子

口耳寓書江督伊里布公云主和之說某公自以爲得計軍營凡  
奉 廷寄及發兵奏摺夷書往來不以一字示人將弁司道問及  
曰夷人第求數事而已問所求何事又祕而不宣惟密任直隸守  
備白含章及夷目賴地之漢僕鮑鵬往反投報皆 廷律期會蓮  
花港及期義律不見明日復往議甚密左右莫獲與聞夷人既製  
小船聽其闖進三河口故鎖口唾手可得鎖口既去故直倡省城  
卽使省城幸而無恙而各路礮臺新安香山兩邑均爲逆夷所占  
損 國威長寇志誰之過歟縱逃法網必獲天誅言之可爲痛哭  
流涕者也如昨者川楚調兵徒爲夷人藉口較之日前一氣貫注  
難易迥殊況此次大敗皆由煙費七百萬兩激之牛羊雞鶩小米

之饌激之豈能復溯繳煙之事若瞞天昧己再加狂誣必當暢敘  
一辭遣人齎投都察院亦得光明磊落而死耳江督得書喟然長  
歎而不能贊一辭也廣東臬司王廷蘭云開門揖盜當事者百喙  
奚辭迨至臥榻之旁已被他人鼾睡乃獨歸咎於始事之人不亦  
冤乎天河生云英夷之覬覦五口瀕海游奕蓄志於數十年之前  
飄忽無常先後一轍禁煙變不禁亦變禁煙而公得始終其事或  
不至於大變戎狄之性知畏威不知懷德豈一朝夕之故哉  
初林公懸賞購夷夷眾心悸不畱漢人在船公鼓勵兵民士氣方  
銳及次輔某撤防減兵畏夷如虎紳民有擒漢奸者曰若卽漢奸  
有告販煙者曰若卽販煙至有誤發信礮觸怒夷人之語賊始肆

然無所憚矣公之言曰自古用兵必爭主客之勢得主勢者常勝  
逸待勞靜待動也況夷人遠涉重洋入犯中國不獨官兵操必勝  
之算卽沿海貧民已足以與之爲敵而絕其生機自貧民爲夷所  
用而我又從而驅之傷已夷日日遺奸民十八人分班探事軍中  
雖奉密旨同官所不知夷輒知之蓋我軍所用偵探率以數百  
錢遺無賴小民道聽塗說或且故甚其詞以恫喝將士搖動人心  
賊中間諜則力能通諸大帥左右與之共心腹斯其所以異也  
英吉利內犯之初正彼國被兵缺餉之會彼熟悉我之虛實而我  
不知其事變是可惜已初英夷與鄂羅斯兩國交惡鄂羅斯方爭  
印度於英夷積歲構兵外強中瘠阿富汗尼木哈臘諸部又與英



夷爲儲其本國煙價關稅銀虧缺千有餘萬借貸鄰國以助餉需  
及以禁煙故入犯廣東兵分財匱勢頗不支而法蘭西米利堅等  
國又皆乞我督撫請於 朝廷願出兵船爲中國效力英夷聞之  
進退維谷當時得如林公者數人禁漢奸簡軍實仰稟 廟算有  
戰無和使之負重創失大欲則英夷畏威懾法必不敢久畱而去  
不必借諸國力而後患消弭者多矣乃以一二畏葸之人坐失機  
會使得從容定變而專力於我鴉片顯布於近洋姦宄接踵於內  
地一事失策而毒痛宇內一時貽誤而延禍數十年得失之機毫  
釐千里惜哉惜哉

江南鄉閭合兩省爲一與試者多至萬六七千嚮因點名擁擠停

止搜檢竟一晝夜而不能成事自林公少穆開藩江甯分爲三路  
點名先期覈計各屬人數多寡按照時刻分配均勻又刊印章程  
隨卷給發某時某路點某學一目瞭然每屆一時發礮懸旗大書  
三路應點學分由內而外以及街衢巷渡無不周知葢陰以兵法  
部勒之事不繁而易舉申酉閒即可局門場內則膳錄對讀與夫  
粥飯水夫之類無不躬自稽察就號舍而親嘗之故士林泠然感  
頌近日遵用其法而人數不均時刻以中路爲早遲而左右不齊  
懸旗則內外不符擁塞紛亂自若也有治人無治法信哉言乎

右筆記黃鈞宰撰

國朝三才圖會卷之二

四

李象鵬

公諱象鵬字雲皋號雙圃明初籍長沙爲著姓曾祖石柱公祖倬齋公績學好善矜式閭里父燮亭公郡庠生仁厚友愛以文行名於時生子二長侖圃公諱象鵠嘉慶己未進士官翰林院編修次卽公也公賦質英挺敏雋過人讀書十行並下幼從侖圃公讀書嶽麓名宿咸心器之稍長有聲黌序甲子捷賢書辛未成進士入翰林歷充 國史館纂修文穎館提調治河方略總纂石渠羣彥抗手交推公亦念侖圃公志緒未竟益勤著作以燕許文章自任庚辰分校禮闈稱得士道光壬午京察一等出知直隸宣化府關南連值歲歉糧價翔貴公爲嚴禁奸販安戢屯戶分廠煮粥民無



低離郡有柳川書院分俸新之增膏火明條約按月五課公餘進  
生徒講貫曾未三載授科者五拔萃者六邊郡夙陋之習至是一  
變旋調正定府知府再調保定府知府保定畿輔首善繁要甲於  
天下是時總督大學士蔣公攸銛治尙明察寮屬屏息那文毅公  
彥成繼之風規尤峭厲公整紛剔蠹舉重若輕親治文卷行所無  
事每遇庭論辨析必反覆自暢其說無少屈撓同官或相顧色沮  
而公持正自若大府倍倚公如左右手 成皇帝駕幸木蘭公迎  
謁 天顏溫霽獎勉至再蓋稔知公之賢可大受也丙戌升直隸  
通永道調河南糧鹽道下車後體察機要著理漕說嚴飭並示禁  
差役藉雇糧剝攔截民船州縣便於轉輸弁丁無不懾服又請復

潞鹽仍歸商運明定章程兩河人士至今頌德勿衰己丑丁外艱  
癸巳服闋入 見甫四日卽授江西吉南贛甯道當東粵之衝犬  
牙相錯連山伏莽出沒無常轄境遼闊多瘠土州縣幾不可治公  
掃除宿弊整飭嚴明地方秩然就理值贛州大水斗米千錢公設  
法招徠汎舟雲集市價頓平仍出廉俸助賑活人無算信豐縣民  
某因姦謀毒本夫誣弟殺兄供詞甚狡幾成冤獄公切究得實及  
權臬事姦夫姦婦問如律丙申擢江蘇按察使旋署江甯江蘇布  
政使陶文毅公澍方督兩江引與同心政肅刑清一時稱盛戊戌  
調貴州按察使會仁懷縣軍務兼籌轉餉事竣得從優議敘逆黨  
株連頗眾公悉心研鞫無縱無枉庚子擢貴州布政使首禁漢奸

盤剝苗民以遏亂萌倡建尚節堂收養嫠婦以正邊俗捐置石洞  
坡義園祠祀鄉先達之有德於黔者以垂政績百廢具舉澤久益  
深甲辰乞假歸官民間聲臥轍奔走流淚公亦惓惓不忍舍然終  
不肯畱矣乙巳入都奉 旨以三品京堂候補仍乞假歸公勇於  
任事精於料事鏡燭犀剖動中肯綮他人四三年不能了者公以  
旦夕了之他人千萬言不能決者公以片言決之至於錢穀冗雜  
參伍錯綜羣苦芴絲難治公則條分縷析若網在綱有條不紊且  
從容談笑閒以雅謔似絕不經意者與人寬恕伉爽表裏如一  
是非曲直無少假雖人心如面或轉以此尼公而公不屑顧也夫使  
如公數輩擔當世務經畫封圻必克建樹非常幹旋元氣大有裨



於國計民生何止以東南財賦之區惜不得假手於公爲之補  
偏救弊耶公泊於榮利家濱漁樵渡自號漁樵散人當居變亭公  
憂輒不樂再仕祇以主知優渥義難愒然舉凡立義塾以待族  
人之讀書捐義倉以待鄉人之緩急置本邑卷價以待孤寒之就  
試皆遵變亭公遺命獨力成之居恆追慕侖圃公築棟懷堂見志  
嫂王宜人從兄湘帆大令年皆八十公每過從必依依其孝友慈  
惠老而彌篤亦可以風世矣公解組優游合林下十八人繪湘中  
耆英國廣徵題詠古稀已近矍鑠健陔步履勁捷望若五十餘人  
方命駕入省俄頃聞無疾而逝遠近聞之莫不駭悼泣下享年六  
十有八以庚戌十一月葬善邑阿彌嶺加爵壟之陽坤艮爲塋夫



人張氏汪氏邵氏側室宜人朱氏劉氏朱氏廖氏子家驊太學生  
郎中聘浙江前湖南巡撫陸費名璵公女家驄聘同邑前貴州貴  
西道鄭諱世任公女女十適何適湛適周適俞適胡適陳適常適  
夏適程適唐沅於公誼爲甥舅皆有媯所自出公采芹之日沅甫  
周晬貌茲後進官轍略同公每寓書告誡及躬聆緒論懇到詳勉  
常若所親故於公之立身行政微窺崖際誠未能表揚萬一要未  
敢以不文辭銘曰

衡嶽英靈湖湘閒氣早陟詞垣游膺藩寄脂韋如雲孤標果毅孰  
營城府闢以簡易艱鉅奚辭彊禦奚畏人疑凌鑠我行其志敷歷  
中外 眷隆簡畀時行時止舒卷如意所去民思公望延歧長沙

耿天無何星墜城南允臧以昌後嗣

右神道碑銘 先文恭公撰

日專... 各... 三

三

國朝耆獻類徵初編卷一百三補錄

疆臣五十五

林則徐

林則徐福建侯官人嘉慶十六年進士改翰林院庶吉士十九年散館授編修二十一年充江西鄉試副考官二十四年三月充會試同考官閏四月充雲南鄉試正考官二十五年二月轉江南道監察御史時河南儀封南岸工程未竣則徐以料販囤積居奇奏請飭地方大吏嚴密查封平價收買以濟工需下所司議行先是海盜張寶投誠後累官至副將至是復擢總兵則徐恐其驕蹇不可制疏劾之上寤其言四月京察一等復帶引見記名以



道府用尋授浙江杭嘉湖道道光元年聞父病引疾歸二年授江蘇淮海道未赴任署浙江鹽運使三年遷江蘇按察使四年正月署布政使八月丁母憂五年奉旨赴南河督修隄工工竣仍回籍六年四月命署兩淮鹽政以疾辭十月服闋七年五月授陝西按察使署布政使旋升江甯布政使十月丁父憂十年正月服闋六月授湖北布政使十一月調河南布政使十一年七月調江甯布政使時江蘇水災咨糴河南米麥則徐委員赴商邱劉家口及陳州光州採辦由河淮運達江境順道親往督辦並於淮揚一路勘災籌賑十月擢河東河道總督十二年正月疏言運河挑工已完六分惟沿隄出土之路因泥漿拋撒逐條凍積名曰泥龍尙

未除淨日積日多挑運更爲費事一經春雨更恐衝入河心見飭  
工員挑完一段卽起淨一段泥龍其已挑未淨之處官差夫頭均  
量予懲責 上是之二月授江蘇巡撫未卽赴任三月奏言稽料  
爲河工第一弊端其門塚灘塚底廠及併塚戴帽各名目非抽拔  
拆視難知底裏見將南北十五廳各塚查明剷弊者察治並請裁  
山東泉河通判得 旨向來河臣查驗料塚從未有如此認真者  
六月抵巡撫任疏言江蘇錢穀最爲繁重而漕務痼疾已深整頓  
錢漕先懲已甚清釐倉庫尤貴截流當執法者不敢以姑息啟玩  
心當設法者不敢以拘牽礙全局報 聞時議裁汰冗員八月則  
徐偕兩江總督陶澍奏裁江甯鎮江二府照磨揚州府檢校華亭

縣主簿金壇縣湖谿司巡檢又借南河總督張井奏裁丹徒如皋  
二縣縣丞儀徵清江關關官均 允行閏九月以河南盜決官隄  
首犯陳端日久未獲降五級畱任先是則徐在江甯藩司任內以  
各屬水災建議倡捐煮賑資送畱養收孩瘞棺捐衣勸糶養佃典  
牛借利種禁燒鍋凡十二條經陶澍以 聞至是事竣借陶澍奏  
請獎勵捐輸出力各官紳 允之十二月密陳藩臬道府考語疏  
言察吏莫先於自察必將各屬大小政務逐一求盡於心然後能  
舉以驗屬員之盡心與否若大吏之心先未貫徹於此事之始終  
又何從察其情僞臣惟持此不敢不盡之心事事與屬員求其實  
際謹將司道府之立心行事人品官聲略具梗槩以 聞初則徐

任按察使時奉 旨綜辦三江水利以憂去任經陶澍奏明孟瀆  
劉河分年籌辦十四年孟瀆工竣六月則徐以劉河近日淤墊更  
甚奏請接行勘辦 從之七月奏言江蘇錢漕倍於他省其中有  
緩有急有舊有新勢難一律清解與其漫無區別徒令剝肉補瘡  
莫若專嚴於提新而暫緩於補舊新款果能全解是州縣無新虧  
而舊欠亦可漸冀彌補得 旨竭力爲之八月奏江蘇各沙洲前  
經召佃收租充水利經費惟其中有書院善堂公產及民戶承買  
之業請自道光八年新例以前報部有案者遵照舊案一律准買  
執業其未經報部及例後所報者發還原價槩行歸公以示限制  
而杜效尤下部議行是年夏秋間江蘇各府或江湖盛漲廬畝被



淹或陽雨愆期收成積歉九月蘇松等屬續遭風雨木棉穀粒均有受傷委員勘實奏請蠲賑格於廷議復上疏曰蘇松常鎮太倉四府一州錢漕最重道光三年水災以來歲無上稔民力益見拮据今歲秋禾節節受傷甚至發芽霉爛每畝比之上年少收五六斗民間積歉已久蓋藏本極空虛當此秋成之際糧價日昂來歲青黃未接不知更當何如小民口食無資而欲強其完納卽追呼敲扑亦有時而窮前此漕船缺米州縣尙能買補近且累中加累不但無墊米之銀更恐無可買之米且鄰省亦連被偏災布匹絲綉銷售稀少權子母者無可牟之利任筋力者無可趁之工故此次雖係勘不成災而困苦情形實與全災無異觀此景象時時恐

滋事端儻道盤籌畫有可暫紓民力之處總求 恩出自上多寬  
一分追呼卽多培一分元氣疏入報 可十一月以陳端就擒伏  
誅偕陶澍奏保出力人員十五年正月奏鎮江所屬丹徒丹陽運  
河爲江浙漕船要道見屆大挑之年請計段興工均 允之十一  
月署兩江總督十六年二月回巡撫任七月復署兩江總督十一  
月入 覲十七年正月擢湖廣總督時荆襄歲苦水患則徐抵任  
後修築隄工躬自監視七月奏籌襄陽等屬鹽務緝私章程如所  
議行尋以江南河庫道李湘茝因庫款不清褫職則徐坐前任江  
蘇巡撫時註考不實降四級畱任九月前任總督訥爾經額奏武  
岡州滋事首逆藍正樽已被鄉勇毆斃則徐遵 旨研究亦以毆

斃屬實覆奏 上責其隨同附和遷就了事降五級畱任十八年  
二月偕湖南巡撫錢寶琛奏籌辰沅道屬苗疆屯防各事宜下部  
議行又疏陳整頓鹽務略言貧民挑運售私其近川近粵近潞之  
處與兩淮場竈皆遠而鄰鹽一蹴卽至成本旣輕售價自賤且鄰  
省鹽課皆輕淮綱獨重卽彼此同一官鹽亦必彼盈此縮況以無  
課之私販紛紛侵灌其勢更不能相敵見在剴諭紳民日用飲食  
何在不可節省獨於食鹽計較貴賤犯法食私紳衿革功名平民  
受滿杖明利害者當不至如是之愚且湖廣錢漕最輕若鹽課復  
背官食私天良何在嗣後責成紳衿大戶及鄉團牌保互禁食私  
犯者公同送究其挑賣之窮民許改充肩販由官鹽店給票赴鄉

貢完繳價再從前襄陽宜陽衡州三處奏明官運商鹽減價售賣以敵鄰私磨辨並無成效且一種奸販轉買減價之賤鹽以灌旺銷之引地藉寇資盜無異剗肉補瘡應將此三處不令減價以杜流弊四月奏請湖南提督常駐辰州府扼要彈壓均 允之閏四月湖南撫標右營游擊馬長失察家人及弁兵舞弊事覺則徐至曾經保奏降四級留任九月奏各州縣水旱偏災奉 恩旨贍黃祇能開載若干村莊其地名不能一一全敘難保吏胥無高下其手矜民亦或狡稱蠲免紛紛訐訟請將應蠲應緩應遞緩之項畝細冊由各州縣另行繕榜隨同贍黃徧貼曉諭並責成該管道府稽察毋許隱匿 上嘉其所見精細 允行先是鴻臚寺卿黃爵



滋疏請嚴禁鴉片煙以塞漏卮吸食者治以死罪 命下中外各  
大臣議奏則徐葵言鴉片流毒已甚非難於革癮而難於革心欲  
革玩法之心安得不立恒心之法況行法在一年以後議法在一  
年以前轉移之機正繫諸此必直省諸臣共矢一心極力挽回以  
期永絕澆風此法乃不爲贅設遂擬章程六條一收繳煙具以絕  
饑根一各省於定議後出示分一年爲四限遞加罪名以免觀望  
一加重開館與販及製造煙具罪名勒限自首以截其流一失察  
處分先嚴於所近一著令地保甲長查起煙土煙膏煙具庇匿者  
罪同正犯一豫講審斷之法以杜流弊因繕呈戒煙經驗藥方數  
種尋奏湖南湖北拏獲煙販並收繳煙土煙膏煙具情形 上甚

嘉之十一月入 覲 賜紫禁城騎馬 命頒給欽差大臣國防  
馳往廣東查辦海口事件水師咸歸節制十九年三月偕總督鄧  
廷楨等奏查辦躉船二十二隻起獲煙土二萬二百八十三箱請  
酌給茶葉大黃以示體恤得 旨所辦可嘉之至該夷畏罪自首  
情尙可原免其治罪酌賞之處著照所議則徐下部優敘四月奏  
夷人夾帶鴉片請照化外有犯之例人卽正法貨物入官議一專  
條並酌予限期 上命軍機大臣等議行新例既定則徐請先傳  
檄英吉利國王諭以利害擬彙呈 覽頒發又遵查海口排鍊礮  
臺情形奏言廣東中路海口以虎門爲咽喉進口七里一山屹立  
海中曰橫檔其前有巨石曰飯籬排又其前小山曰下橫檔海道

至此分二支右多暗沙左以武山爲岸山下水深夷船必由之路海面僅三百餘丈鎖以鐵鍊承以木排復建礮臺俯臨排鍊就令夷船堅固衝斷鐵鍊尙有一層阻截羈絆多時臺礮乘之必成灰燼報聞時通商之國以十數俱遵具並無夾帶鴉片切結惟英吉利持兩端七月夷目義律率船五隻以索食爲名犯尖沙嘴則徐檄參將賴恩爵禦之九龍山碎其雙桅大船夷船紛集礮彈如雨我軍以網紗障船就旁施礮斃夷多名接仗踰五時夷人死傷益眾逡巡遁八月復檄守備黃琮等偵夷船於潭仔洋面乘夷人方開礮亟擲火斗火罐焚其船敗走之義律因潛赴澳門倩他國夷人遞說帖求轉圜則徐以其言未可信奏請相機勦撫諭曰

既有此番舉動若再示以柔弱則大不可朕不慮卿等孟浪但誠卿等畏蕙先威後德控制之良法也時御史步際桐奏謂責夷出結徒開含混之路則徐覆言夷人最重然諾彼愈不肯出結愈見其結之可靠亦愈不能不向其飭取臣不敢存趨易避難之見致負委任尋義律經則徐檄諭雖自稱悔罪稟請逐船按查勒限驅回空臺仍觀望圖免具結九月復乘閒糾兵船滋擾水師提督關天培敗之穿鼻洋遂竄泊尖沙嘴則徐以其北有山梁曰官涌可以俯而攻也令深溝固壘以待之英夷采六犯官涌皆受懲創然猶逗遛外洋則徐疏其反覆情形上以彼曲我直中外咸知諭令停止貿易暴其罪狀驅逐出口則徐復請 敕下福建浙江



江蘇各督撫嚴防海口如所請行先是三月則徐調兩江總督未  
卽赴任十二月授兩廣總督奏請移高廉道駐澳門並撥隸水師  
以資控馭 允之尋順天府府尹曾望顏奏請無論何國槩絕通  
商大小漁船槩禁出洋以斷接濟則徐遵議奏言自斷英夷貿易  
後他國夷商喜此盈而彼絀當以夷制夷使相聞相睽若槩與之  
絕轉恐聯爲一氣且廣東民人多以海爲生計槩禁出洋則勢不  
可以終日擬令漁人出洋止許帶一日之糧庶少接濟下軍機大  
臣議行時英夷被逐寄旋外洋勾引漁船蟹戶誘以重利希圖接  
濟銷售二十年正月則徐定計以毒攻毒令關天培密裝礮船雇  
漁蟹各口教以出洋埋伏候夜深順風揚火焚賊附夷舟匪船二

十三隻延燒夷舟及海灘篷寮自是漢奸膽懾夷船接濟幾斷四月奏尖沙嘴爲夷船經由寄泊之區又爲粵省東赴惠湖北趨閩浙要道請與官涌兩處各建礮臺俾聲勢聯絡如所請行五月再焚夷船於磨刀外洋延燒匪艇十一隻篷寮九座尋謀知英夷新來兵船游駛外洋請飭沿海各省嚴備嗣探夷船揚帆東向因奏言夷情詭譎凡事矯飾虛張若徑赴天津求通貿易所陳或尙恭順仍懇優以懷柔之禮 敕查嘉慶二十一年成案將其鑿詞人由內河護送至粵藉可散其爪牙六月英夷改犯浙江陷定海掠甯波則徐上疏自請治罪並密陳夷務不能中止略云英夷所憾在粵而滋擾於浙雖變動若出意外其窮蹙實在意中惟其虛

國朝書局影印 卷八十三  
僑性成愈窮蹙時愈欲顯其桀驁試其恫喝甚且別生祕計冀售其奸如一切皆不得行仍必帖然俛伏第恐議者以爲內地船礮非外夷之敵與其曠日持久不如設法羈縻抑知夷性無厭得一步又進一步若使威不能克卽恐患無已時勢必他國紛紛效尤不可不慮因請戴罪赴浙隨營自效英夷旋復構費於粵則徐調集米艇火船築墩置礮於蓮花峯下爲關閘前山障蔽又以安南軋船專擊船底夷人所憚遣人求式倣造以備火攻七月親駐虎門督師水路夾擊轟傷夷船沈其三板數隻獲礮彈大小二百有奇八月再敗之龍穴洲船夷惶亂不能拒僅放空礮他船來援我軍轟斷其篷索不得進遂乘湖南竄二役斃夷無算官兵受微傷



僅數人捷奏未至九月 諭曰自查辦以來內而奸人犯法不能  
淨盡外而興販來源不能斷絕甚至本年福建等省紛紛徵調糜  
餉勞師皆林則徐辦理不善之所致著交部嚴加議處卽來京聽  
候部議此次英夷各處投遞稟帖訴稱冤抑朕洞悉各情斷不爲  
其所動惟該督以特派大員辦理總無資濟轉致別生事端誤國  
病民莫此爲甚是以特加懲處並非因該夷稟訴遽予嚴議也尋  
部議革職 命仍折回廣東以備查問則徐旣獲罪琦善代之十  
二月琦善奏英夷要求情形 上覽奏震怒所請廈門福州通商  
及給還煙價均不准行飛調四川湖南貴州兵赴廣東 諭琦善  
督同則徐妥爲辦理二十一年三月 賞四品卿銜 命赴浙江



鎮海軍營協辦事務則徐至浙與兩江總督裕謙浙江巡撫劉韻珂籌辦海防節次擒獲夷匪正法杜絕接濟嚴堵要隘夷不得逞五月復革去卿銜遣戍伊犁七月河決開封則徐道中奉 旨免戍襄辦東河河工時大學士王鼎奉 命總理河務以則徐熟悉情形深資得力入奏得 旨卽督飭工員趕辦二十二年工竣仍遣戍二十四年伊犁將軍布彥泰奏請 飭則徐勘辦伊犁開墾事宜則徐親歷庫車阿克蘇烏什和闐喀什噶爾葉爾羌及伊拉里克塔爾納沁等處請酌給回子耕種並請改屯兵爲操防均如議行二十五年九月 命回京以四五品京堂候補十一月 賞三品頂帶署陝甘總督十二月行抵甘州會野番肆劫飭鎮將防

護馬廠并倣洋礮之法改製大礮推輪運放士氣爭奮二十六年  
三月授陝西巡撫仍暫畱甘肅偕陝甘總督布彥泰等辦理番案  
六月勦番族番僧於黑錯寺復追掃果岔匪巢殲擒殆盡得 旨  
調度有方下部優敘十一月因病奏請開缺得 旨賞假三月二  
十七年升雲貴總督時雲南漢回互鬪垂十數年焚殺幾無虛日  
則徐抵雲南適回民丁燦廷赴京疊控保山縣漢民沈振達串謀  
誣害劫殺無辜經地方官提犯鞫訊漢民遂糾眾奪犯燬官署劫  
獄囚接殺回戶拆瀾滄江橋道路以梗永昌鎮道帶兵往擒漢民  
遂拒捕二十八年則徐督兵赴勦途次聞趙州之彌渡有客回甸  
結土匪滋事遂就近移兵勦之破其柵殪匪數百並撫恤受害良

民趙州底定保山民聞風懾服縛犯迎師則徐按其罪重者百數十人立誅以徇復乘勢按捕永昌順甯雲州姚州歷年拒捕戕官諸匪千餘名寘諸法奏入得旨加太子太保銜並賞戴花翎二十九年五月騰越廳卡外野夷滋擾則徐檄總兵拴住迤西道王發越率明光隘土守備左大雄剿平之上嘉其遠振軍威又安邊地六月因病請假七月復奏請開缺允之三十二年五月大學士潘世恩尙書孫瑞珍杜受田應文宗顯皇帝登極求賢詔均首以則徐薦命迅速來京聽候簡用九月以廣西逆首洪秀泉稔亂諭曰朕睽懷南服民生一日不安朕心一日不忍前任雲貴總督林則徐疊次宣召尙未來京著卽作爲欽差大臣頒給

關防馳赴廣西會剿林則徐受 皇考簡任深恩前在雲南辦理  
漢回軍務迅速蒞事朕所夙知著卽星馳就道蕩平羣醜綏靖巖  
疆毋違朕命十月 命署廣西巡撫十一月行次廣東潮州病卒  
諭曰前任雲貴總督林則徐由翰林洊歷外任疊蒙 皇考簡膺  
疆寄宣力有年上年剿辦雲南保山匪徒調度有方渥荷 恩施  
賞加太子太保銜並賞戴花翎旋因病請假回籍朕御極之初知  
林則徐平素辦事認真不避嫌怨疊經降旨宣召來京嗣因廣西  
匪徒滋事特授爲欽差大臣頒給關防令其速赴軍營剿辦前據  
馳奏已由本籍起程方冀迅掃邊氛以綏南服茲據徐繼畬馳奏  
該大臣沿途勞頓舊疾復發於廣東潮州途次溘逝念其力疾從



公歿於王事覽奏殊深悼惜著加恩晉贈太子太傅銜照總督例  
賜卹任內一切處分悉予開復應得卹典該衙門察例具奏伊子  
編修林汝舟文生林聰彝文童林拱樞著俟服闋後由吏部帶領  
引見候朕施恩尋 賜祭葬 子諡文忠咸豐元年雲南巡撫張  
亮基請以則徐入祀雲南名宦祠二年陝西巡撫張祥河奏請於  
陝西省城爲則徐建立專祠均 允行同治四年入祀江蘇名宦  
祠子汝舟翰林院編修聰彝浙江候補道拱樞江南道御史

右 國史館本傳

按此傳友人鈔示稍遲與  
前傳詳略互見因並存

國朝奇獻類徵初編卷二百四目錄

職臣五十六

富呢揚阿

程林采

吳其濬

張溥中

陳鑾

補錄

陳鑾

四庫全書  
卷之二

國朝耆獻類徵初編卷二百四

通奉大夫前署江西巡撫江西布政使司布政使湘陰李桓輯

疆臣五十六

富呢揚阿

富呢揚阿富察氏滿洲鑲紅旗人由禮部筆帖式中式嘉慶十八年舉人二十一年京察一等記名以理事通判用升主事二十四年升員外郎二十五年授福建汀漳龍道道光二年署按察使三年授浙江鹽運使四年閏七月升浙江按察使九月調湖北五年十月升貴州布政使旋護理巡撫十二月調湖南布政使六年三月調浙江布政使十二月署理巡撫七年丁母憂十二月百日孝



滿八年六月署福建布政使九月調署江西布政使九年正月護理巡撫十二月服闋授盛京工部侍郎兼管奉天府府尹十年授浙江巡撫十一年七月借杭州將軍福祥奏請於滿營牧廠餘地收租項內借錢二萬串交鹺商每年生息二千串作爲杭州乍浦滿營向不領賞之閒散人等嫁娶喪葬 恩賞如所請行十一月奏鹽引壅滯請將庚寅秋冬辛卯春夏引目銃銷並議加斤 諭曰前因兩浙鹽務敝壞道光元年撤鹽政歸巡撫兼管經帥承瀛更定章程頗有起色黃鳴傑程含章俱遵循辦理劉彬士在浙最久亦未議及銃銷加斤富呢揚阿到任甫一年何以頓形壅滯雖據奏錢賊銀貴賣鹽錢文不敷易銀完課又因陂雨不時土鹵歉

薄場價增昂私鹽充擾庚寅一綱掣銷無多非鈇銷賠課不足以清綱分非援案加斤不足以培商力第自元年以來各綱年清年額帶完舊欠已丑引目已報全完該撫此次奏稱祇銷九萬餘引與奏銷原案不符且旣因額鹽壅滯欲將引目鈇銷自難再於額外加斤益礙銷路著不准行又借漕運總督吳邦慶會議給事中邵正笏奏浙江漕船坐兌流弊請照江蘇調幫輪兌略言江浙情形不同事屬枹始配搭船糧恐蠹吏奸丁勒增滋弊至漕船水手例按遠近給錢調兌則自遠而近者不能減自近而遠者必議加尤恐滋事坐兌旣無誤漕運應請無庸更張從之十二年六月奏英吉利夷船駛入鎮海欲赴甯波海關銷貨當飭該管道府曉

諭並咨會提鎮督兵驅逐 硃批所辦甚是閏九月遵 旨奏裁  
浙省通判以下冗員八缺十三年六月奏覆給事中孫蘭枝疏陳  
江浙錢賤銀昂受病在地漕鹽課關稅及民間買賣除弊在嚴私  
鑄禁紋銀出洋及減洋銀價值臣惟行政以便民爲先截流以清  
源爲要洋銀流入中國已久操之過急非所以便民也第其成色  
本低應飭嗣後價值不得浮於紋銀浙江例不與外夷通商非洋  
銀來源應飭嗣後內地赴粵貿易者止准以貨易貨或以洋銀易  
貨不准以紋銀易貨夷人在粵貿易者止准以貨易貨或以紋銀  
易貨不准以洋銀易貨則洋銀之來路塞紋銀之去路斷矣報  
聞先是給事中邵正笏奏兩淮船板等船運販私鹽侵害浙引得

旨許該督撫妥議或在沿江隘口移駐員弁盤驗或於常州屬  
孟濱德勝圩塘港三河之中酌擇一河通舟餘槩釘柵或修閘座  
委員啟閉此外如丹徒各口濱臨大江淮私直達亦著籌議堵截  
十一月富呢揚阿偕兩江總督陶澍江蘇巡撫林則徐閩浙總督  
程祖洛覆奏臣等查常屬三河通潮灌田釘堵則淤且妨運道今  
擬於圩塘港口釘橫石三條每石中開三尺俾潮汐可通並於江  
陰宜興荆溪丹徒金壇溧陽等境各擇要隘分別建閘設卡派員  
弁兵役梭巡如所議行時浙江海塘潰壞屢修未竣富呢揚阿先  
於五月開奏擇其尤險者先行興築又於十一月奏風潮續坍各  
工請建大盤頭禦潮皆奉 旨允准十二月前任東河總督嚴烜



奏言東防廳本年請修塘工一千二百餘丈外尚有應修者三千餘丈西防廳亦有險要處請 敕估辦 上命富呢揚阿籌議十四年四月 命煇偕刑部右侍郎趙盛奎往勘七月趙盛奎嚴煇富呢揚阿會奏言按潮勢之重輕分工程之緩急添築盤頭改鑲柴埽以護塘根兼布竹篁塊石估需銀一百九十一萬八千餘兩諭如所請尋 命盛京工部侍郎烏爾恭額會辦九月烏爾恭額以柴埽費鉅入告 上復令左都御史敬徵戶部侍郎吳椿往勘尋 命烏爾恭額巡撫浙江吳椿畱浙會辦十一月富呢揚阿調盛京工部侍郎兼管奉天府府尹十五年正月 賞加副都統銜作爲科布多參贊大臣十月授盛京刑部侍郎調烏魯木齊都

統十六年授陝西巡撫奏遊匪佩刀擾害黨羽眾多 硃批隨時  
嚴辦斷不可姑容養奸十七年奏見辦刀匪請照豫省南陽汝甯  
陳州光州及安徽潁州等屬兇徒結夥三人以上但有一人持械  
傷人者除死罪外餘俱發極邊足四千里充軍持械十人以上無  
論曾否傷人不分首從俱發雲南兩廣極邊煙瘴充軍 敕部議  
行十八年四月署烏魯木齊都統申福奏請鼓勵勸建書院捐修  
出力人員 諭曰烏魯木齊地屬邊陲該都統等惟當講求武備  
實力操防開墾屯地廣儲糧餉若照各省建立書院之例徒務虛  
名是重其所輕必至輕其所重安望其認真訓練克盡職守耶此  
事勸建之初係由長清誤會諭旨並未專摺具奏富呢揚阿到任

後又未詳查奏明請旨富呢揚阿著交部議處尋議降二級畱任  
先是盛京將軍寶興奏銀價日昂由奸商所出錢票輾轉外兌並  
無見錢下步軍統領府尹督撫議八月富呢揚阿奏外兌之弊陝  
省惟西安鳳翔同州有之然難驟禁請嗣後以銀換錢者專向換  
錢之字號取票以票取錢者專認票上之字號見錢此外非錢鋪  
不准出票得 旨依議十九年御史焦友麟奏請廣教化整風俗  
略言州縣事繁責成教官稽察邪教擇品學兼優之生員分任之  
富呢揚阿借陝甘總督瑚松額學政孫瑞珍遵 旨議奏教官例  
禁干預地方一旦任以稽察非呼應不靈卽藉端擾累生員品學  
果優必閉戶潛修其出入衙門者必非安分事屬難行請毋庸議

從之二十年奏准籌補西安等八屬常平倉缺穀十三萬餘石  
二十二年三月擢陝甘總督十一月兵部議裁伊犁總兵移置天  
津 命陝甘總督伊犁將軍會同妥議富呢揚阿偕伊犁將軍布  
彥泰奏新疆邊防重地未便將伊犁總兵裁撤請以西安總兵裁  
移下部議行先是青海野番節次偷渡肆擾經官兵捕逐出卡多  
在河北盤踞窺伺二十三年三月富呢揚阿奏派提督周悅勝總  
兵徐華清站住分途進剿旋奏連獲勝仗七月奏河北肅清河南  
番族畏罪獻賊酌撤各路官兵 上以蕙功迅速賞戴花翎並  
諭番賊出沒無常該督毋得稍存怠玩善後章程尤宜斟酌盡善  
九月偕西甯辦事大臣法豐阿條奏善後章程二十四年正月



上以回疆當五當十普爾錢行使便利 諭富呢揚阿體察陝甘  
二省當可做鑄請奏錢法首重流通甘省土物無多惟恃山陝懋  
遷而以新疆爲銷路普爾錢在新疆各城已不能一律行使貿然  
試鑄恐虛擲帑金請 飭新疆將軍都統參贊議之三月番賊復  
擾河北六月奏賊番搶掠涼州營馬匹守備追賊被戕 諭曰上  
年因番賊肆搶經該督等帶兵勦辦聲明河北近邊肅清河南各  
番畏法獻賊將官兵陸續撤回並於善後章程內將提鎮會哨之  
期改於六月該番經大創之後自當畏威斂跡何以撤兵未久且  
提鎮甫經會哨即至有牧馬被搶弁兵傷亡之事著富呢揚阿明  
白回奏并交部嚴加議處至此項番賊究竟係何族類並著確切

查明九月富呢揚阿奏提訊獲匪係四川果洛克黑番其地在瑪慶雪山之南山迢路險此時大雪封山未便深入惟有嚴飭將弁巡防十月部議降三級畱任奉 旨富呢揚阿降三級畱任不准抵銷二十五年四月卒照總督例 賜卹旋因番賊益擾戕害總兵御史田潤奏前歲西甯番擾並未接仗富呢揚阿惟邀番僧至營優賚面給和約被搶馬匹僅派各營攤賠後仍未補 命陝甘總督惠吉署督鄧廷楨西甯辦事大臣德興查覆十一月奏入 諭曰番僧和約據奏傳會傳譌應毋庸議惟馬匹挑變攤賠弊竇多端著惠吉詳查辦理富呢揚阿前奏接仗情形雖非盡屬虛無究不免鋪張粉飾若使其身尙在當重治其罪富呢揚阿見經病

國朝元上... 卷二十一... 故所有飾終之典一併撤銷以爲欺罔冒功者戒孫倭星額候補主事

右 國史館本傳

公諱富呢揚阿字海帆先世居納音在長白山東富察氏有八公出納音富察氏高祖圖祿贊隸鑲黃旗入關曾祖哈山刑部尙書祖太子太保恭恪公諱富明安湖廣總督生甘涼道諱富巽娶徐夫人再娶田夫人生公七歲孤嘉慶十八年中順天舉人由禮部筆帖式歷祠祭司員外郎擢授汀漳龍道道光二年遷浙江鹽運使歷浙江湖北按察使湖南浙江福建江西布政使入爲盛京刑部侍郎管奉天府尹事旋外授浙江巡撫又入爲盛京工部侍郎

以副都統銜爲科布多參贊大臣轉盛京刑部侍郎道改爲烏魯木齊都統十六年轉授陝西巡撫晉陝甘總督二十五年四月九日薨年五十七兩娶皆宗室女有女三以某年月日葬於某所其故吏陝西按察使唐公樹義屬梅曾亮銘其碑其詞曰

富察八氏公系納音世秉節鉞鑒於天誕公以童孤在幼不弄侍母夫人倚杵夜誦儀曹清寅以孝廉官司於祠祭典祔守匱

仁宗大行陟方近畿儀法曠絕公誨公稽宗伯入告以郎受知觀察於閩政不蹉失轉運晉階宰樞平直於臬於藩六省咸秩帝曰兪哉釐刑盛京遂撫兩浙繼祖封疆維時浙西海塘孔棘東塘沙漲湖乃西擊穿漏膏腴化爲鹵瘠禦悍保堅惟石坦坡乾隆迄



今制久則磨信臣異議公曰復貫輕費重民百九十萬 帝曰汝  
才中外咸庸奉天之尹兼以司空時科布多方籌參贊念莫公宜  
遂往使換都統之印新疆旋縮都統一朞入撫陝西去其玩吏忱  
慙 帝咨時有悍民相呼刀客捕斬其魁以靖閭陌撫陝六年陝  
甘晉督我夷我赫奠此邊腹議普爾錢五十當百曰不便民以公  
奏格蒙古卓帳西甯是毗河南野番屢驚我師厲驚鳥散我勞彼  
玩閱兵河州深念長算齋志病薨有識哀歎凡公所爲務在休息  
振興八儒莘莘翼翼民便其簡士懷其德公雖云亡公德孔嘉故  
吏懷風銘石不磨

有神道碑梅曾亮撰

程林采

程林采江西新建人嘉慶十九年進士改翰林院庶吉士二十二年散館授編修道光五年二月京察一等引見記名以道府用三月授甘肅涼州府知府七年逆裔張格爾糾同回眾入卡滋擾大兵疊次勦辦克復回城林采辦理糧餉揚威將軍長齡上其功賞戴花翎十二月迴避從兄蘭州道程喬采調補陝西鳳翔府知府十年擢陝西督糧道十四年授山東按察使十六年升安徽布政使十九年擢安徽巡撫二十年二月奏請借項修築桐城縣隄工以工代賑並酌給口糧略言桐城縣地處濱江上年江湖盛漲衝潰圩隄田多漫淹見經勘明東鄉之天治河頂衝處所應築

新隄一道計長一千三百二十四丈陳家洲舊隄應加修一千七百九十丈並越築新隄一千五百丈大成舊隄加修三百六十丈南鄉之石嘴頭迤下永賴永成兩隄應加修三千六百四十丈又白灰溝起至南河拐止舊圩隄應加修二千九百丈均係刻不可緩之工共估需銀三萬兩如再不敷由該縣紳民等捐辦強壯之民可以傭工代賑至老弱婦女力難工作冬令雖捐散口食而春閒待哺尤殷請 賞一月口糧免致失所得 旨允行三月甄別太湖令林昇慶太和令楊慧經候補令何詒鑰署廣德牧英祿降補休致有差 允之七月充江南鄉試監臨官疏奏鄉試上江下江中額互有錯誤考官文慶胡林翼下部嚴議二十一年正月保

奏擊獲私硝出力人員游擊呂邦治清河縣知縣唐汝明升擢優  
敘有差十一月疏請籌費雇募土兵安徽省江北各州縣於添募  
兵勇之外挑選驍勇四百名以資訓練所需經費請於司庫存貯  
社穀息銀項內酌發奏入得 旨此項驍勇固宜勤加訓練期收  
實效而各營額兵尤當認真操演不得以老弱遊民濫行充數總  
期有勇知方毋得有名無實餘著照所議辦理二十二年四月奏  
亳州被水地畝逐漸涸復二麥可期有收請將卞家鋪等二十八  
堡口糧仍行 賞給被水較輕之五十一堡毋庸給發口糧十月  
劾奏亳州城守汛千總王國彩於擒匪縱紅等竄入境內未能督  
兵奮勇殲擒輒稱臨時潰散請革職逮問十一月劾奏遇事退怯



之安徽撫標中軍兼左營參將蔡邦慶以原品休致悉如所請行  
二十三年九月因秋雨過多黃水漫溢被淹地方較廣民力困憊  
奏請酌留庫項十萬兩以備賑卹又奏委用知縣傅繼勳英山縣  
丁憂知縣李鈞策試用知縣顏培文承鑄礮位捐貲出力奏請獎  
勵均從之十一月調浙江巡撫尋卒

右 國史館本傳

吳其濬

吳其濬河南固始人父烜禮部右侍郎兄其彥兵部右侍郎均有傳其濬由舉人捐內閣中書嘉慶二十二年一甲一名進士授修撰二十四年充廣東鄉試正考官道光元年充實錄館纂修官旋丁父憂五年丁母憂八年服闋九年充日講起居注官十一年入直南書房十二年命提督湖北學政十四年九月回京仍入直南書房十二月升洗馬十五年六月擢鴻臚寺卿閏六月授通政司副使十六年八月超擢內閣學士兼禮部侍郎銜十一月充玉牒館副總裁十七年充浙江鄉試正考官八月授兵部左侍郎命提督江西學政十二月調戶部右侍郎兼管錢法堂事務

留學政任十九年八月御史焦友麟疏陳廣敷教化下各直省督撫學政議其濬偕巡撫錢寶琛奏查辦教匪請專責其成於州縣而分任其事於教官並添派族正一項令於各族祠堂宣講 聖諭廣訓先報名存案備查得 旨地方官有教養斯民之責果能除莠安良何患姦宄不戢民俗不醇多設科條轉滋煩擾所有該撫等奏請分任教官添設族正之處著無庸議九月轉左侍郎仍留學政任二十年四月奏新喻縣生員胡思津鬧漕案內鞠出訓導劉筠袒護包庇知縣包世臣有意消弭各情請飭臬司訊辦 從之六月以准補拔貢所遺廩缺辦理兩歧經禮部奏定詳補章程下部議處九月湖北大冶縣知縣孔廣義列款訐總督周天爵

上命其濟借刑部左侍郎麟魁往鞫其事復傳 諭有人奏湖北候補知縣楚鏞搆造刑具名曰飛禽椅墊以沙石資鋒跪人於上勒取供招因傷身死者纍纍相望且豫取病結使屍親無可如何州縣爲親民之官遇有案犯自應細心研鞫務得實情若濫用非刑三木之下何求不得著吳其濟等詳細訪查如果有各項違例刑具卽據實奏聞毋稍徇隱尋訊出周天爵私製非刑如飛禽椅之外尙有快活凳上綳子猴兒上樹等名目令楚鏞在署審案任意施用受刑垂斃者盛以籬筐發交縣監又派楚鏞總辦鹽卡將零星負販貧民繫帶鐵桿婦孺殘廢妄加刑責致死多命外委韓雲邦誣拏平人爲盜百姓不服鬪傷官兵不加斥革反聽其子周



光岳關說令充巡捕奏入 上褫天爵職遣戍伊犁革光岳舉人  
楚鏞先在省城柳號期滿發往烏魯木齊充當苦差並將巡撫伍  
長華布政使孫善寶按察使林紱分別降革有差十月署湖廣總  
督十一月授湖南巡撫二十一年十月御史盧毓嵩請嚴禁私硝  
出口酌定官爲收買章程下其濬議尋奏湖南所產土硝本係官  
買見因軍務撥解及本省操防並無餘贖毋庸更議設局報 聞  
十一月劾于總胡再忠調赴軍營沿途需索縱兵滋擾 命發往  
新疆充當苦差二十二年正月湖北崇陽縣逆匪鍾人杰聚眾滋  
事連陷崇陽通城將窺巴陵其濬偕署提督台湧馳赴岳州以調  
兵未集先募糧船水手協堵鎮鎮兵至分布臨湘平江各要隘

其濟移駐湘陰賊匪二千餘偷劫平江軍營擊卻之二月湖北官  
兵收復崇陽通城鍾逆就擒餘黨竄入湖南者陸續捕獲正法  
諭曰此次逆匪先後占據兩城經吳其濬台湧堵截去路不至蔓  
延調度有方均著交部從優議敘三月以疾乞假調理四月兵部  
議令各省酌裁冗兵其濬奏湖南地處苗疆人情易擾所裁不多  
徒生驕卒之疑而啟苗猺之伺請無庸議 命湖廣總督裕泰詳  
察尋議准於不近苗巢之處酌裁一百餘名七月奏鎮筸鎮兵歸  
伍例不准支借行裝乃行經常德府署武陵縣知縣翟誥濫稟知  
府葛天柱准動庫項給發請交部分別議處崇陽之役湖南委員  
有在湖北軍營出力得與保升知縣者其濬奏軍功甄敘人員係

就一時勞績加以獎勵仍須察其才力優絀未便槩行升用致誤地方是以從前平糶案內應升之人有至今尚未得缺者此次保奏各員應由臣詳加察看遇有相當缺出如果勝任方與平糶軍功覈計升補至湖南防堵出力奏准應升州縣人員臣已飭兩司酌量委用儻才力不及卽行撤銷奉 硃諭所辦覈實認真之至十二月列款奏參署提督台湧經欽差禮部尙書麟魁刑部左侍郎王植查明台湧尙無任性妄爲情事惟賞需旣由捐辦不應收受糧道備賞銀兩雖經繳還究屬不合奏請照例議處二十三年五月調浙江巡撫六月武岡州痞匪曾如炷聚眾阻米出境署知州徐光弼往緝被戕其潯督兵搜捕獲犯百餘人分別首從治罪

如律因奏洪巖洞藏匿姦宄素爲民害請設卡巡防編列保甲以靖地方 從之閏七月調雲南巡撫二十四年 上以前代開礦官吏因緣爲奸故國與民交受其病我 朝雲南貴州四川廣西均有銀廠歲收額課從無擾累是官爲經理不若聽民自爲計四省可採之地尙多 命各督撫體察情形聽民採辦不可假手吏胥其潛借雲貴總督桂良奏滇省舊廠見祇存十五處并新開各廠歲課四萬餘兩查礦硿情形不一往往見有礦苗呈請開採商丁甫集旋以無砂廢散其設廠之所先不過數十人裹糧結棚略有所獲則四方商賈百工技藝走集日衆多或至萬餘人向委廠員彈壓平其爭訟擇吏役誠實者數人司文書出納官之薪水吏



之工食皆有一定舊章並無擾累至可採礦地雖多亦有不能盡  
准者蓋深林密箐民夷雜居夷人嗜利輕生動與漢民結訟若再  
令它取銀砂勢必劫掠鬪爭釀成事端卽土司境內亦必無礙田  
廬及附近邊防始可覈辦報 聞八月以捐輸東河河工 賞加  
五級尋署雲貴總督二十五年三月劾奏代理師宗縣知縣試用  
州判李熙恬非刑斃命褫職逮問四月調福建巡撫八月奏滇省  
銅本每於正額之外輒以多辦銅斤爲辭借支銀兩積成鉅款請  
清查銅廠情形及庫存款項 上韙之旋調山西巡撫兼管鹽政  
二十六年五月奏河東活引課銀短絀請裁減鹽政辦公銀一萬  
兩充抵得 旨允行定例實缺知縣不准改補敎職其濬以神池

縣知縣楊銜才具平常違例奏請改教下部議處十月奏販賣鴉片煙土例禁綦嚴近更有不法之徒伺煙販經過糾眾爭奪事發到官各知罪名甚重兩造均不吐實僅以尋常搶奪鬪毆結案此風不戢輕則恣行械鬪重且釀成盜劫因請將緝捕認真之鳳臺縣知縣蘇元峩酌加獎勵以示觀感十二月以舊疾屢發陳請開缺 允之旋卒 諭曰山西巡撫吳其濬由翰林修撰入直南書房洊躋卿貳外擢巡撫學優守潔辦事認真茲聞溘逝殊堪軫惜著加恩賞加太子太保銜照巡撫例賜卹尋 賜祭葬子元禧以祖烜廕從四品廕生候選縣主簿榮禧崇恩俱中書科中書

右 國史館本傳

國朝文獻通考卷一百一十四

四

張澧中

張澧中陝西潼關廳人嘉慶二十二年進士以主事用分刑部道光六年充提牢廳七年補官八年升員外郎十一年二月京察一等記名以道府用十一月俸滿截取記名以繁缺知府用十二年投直隸大順廣道十三年署按察使十六年擢福建按察使十七年四月升直隸布政使五月調山西布政使二十年授雲南巡撫二十一年四月偕雲貴總督桂良奏言道光十八年滇省奏准將昭邇大理麗江永昌順甯普洱六府永北景東蒙化鎮沅元江五直隸廳州所屬尋常遣軍流罪及命案擬徒人犯就近解赴各道審轉詳院覈咨惟各屬有例不解犯僅止覈轉之案向由臬司轉



詳近來有由司詳咨者亦有由道徑詳者辦理殊覺參差請嗣後  
昭通等府廳州縣所屬除尋常遣軍流罪及命案擬徒人犯照新  
例解道審轉外其例不 犯止由地方官審擬具詳及例止解赴  
府州審勘轉詳者均仍照向例由該管府州詳送臬司覈詳其永  
北景東蒙化鎮沅元江五直隸廳州本屬地方辦理前項事件仍  
由各該管道員轉移臬司覈議詳咨以昭畫一而專責成 詔如  
所議又奏審辦鴉片煙案除罪犯斬絞例應題奏或案情疑似比  
引定擬者仍候部覆遵辦外其按例問擬遣戍軍流罪無可疑者  
由臬司及覈轉之道員具詳覈明咨部之日卽飭該州縣將人犯  
請咨解配仍俟年終彙題以免獄犯擁擠而亦速示懲創得 旨

允行八月借桂良奏請將繁疲難三字之建水縣改爲簡缺歸部  
銓選而以改設之邱北縣要缺作抵 從之二十三年四月借桂  
良奏土匪刀承緒在邊外暗糾夷匪聚眾千餘於南甸附近一帶  
村砦擄搶滋事協防夷西汛額外委明春被戕節經派兵勦捕  
先後擒獲匪犯三十餘名燒斃五十餘名地方漸就肅清惟刀承  
緒逃逸未獲見在懸賞購綫務獲解辦請將防範不嚴之騰越同  
知吳均署南甸都司楊濟川摘去頂帶勒緝七月奏堵擊川匪王  
缺扒等在大姚縣境殲擒多名地方安靜又四川備弁追捕餘匪  
至元謀縣馬街地方會同把總袁秀獲匪多名請將辦理錯誤之  
永北廳同知黃德濂稟報遲延之元謀縣知縣羅慶元分別解任

撤任查辦均報 聞閏七月 命來京另候簡用十二月署刑部  
右侍郎二十四年八月充順天鄉試副考官十月授刑部右侍郎  
二十七年河南游饑 上發帑銀一百萬兩解豫撫卹九月 命  
兵部尙書文慶偕漴中赴河南查辦賑務十一月初賑事竣偕文  
慶奏言此次河南災區較廣若非認真釐剔事弊叢生臣等甫入  
豫境卽飭查造丁口細冊按籍稽考虛實卽可立見復調取藩司  
較准庫數以憑抽查賑銀又飭各州縣按旬具報錢價庶易錢散  
放之處亦有考覈抽查戶口而冒濫之弊除平估銀錢而剋減之  
端絕密定分查合查而胥吏之影射難詳分散數總數而官民之  
見信易察聽民間實領之數視昔爲多覆覈賑務動用之銀較前



轉少此後按照見辦章程踵而行之可期無弊並請飭下撫臣  
督同藩司屆期分投抽驗認真散放以杜蠹耗而卹民艱又將辦  
賑浮冒之考城縣知縣畢元善解任查辦及短絀錢數造冊外錯  
各員分別交部嚴加議處上聽其言尋授山東巡撫命卽赴  
任禮中於途次具摺謝恩奉硃批嚴實認真切忌疲玩勉之  
十二月大計屆期循例奏請展限並言山東省三鎮三司五道十  
府例應察覈於年終密奏查山東吏治因循兵情怯懦以致盜匪  
肆無忌憚實由上司之姑息勸懲無方鎮營之懈弛操防不力伏  
讀硃諭嚴實認真切忌疲玩實爲東省對病之良藥竊謂欲清  
盜源自察吏始欲遏寇談自練兵始官方旣肅自有以服愚賤之



心紀律既嚴自有以戢宵小之氣而察吏練兵之責在臣與鎮司道府臣惟有悉心訪查將該鎮司道府秉公考覈據實奏聞第甫經到任未敢稍涉輕率應請 旨展至來年三月惟三鎮分別等第歷係年終密咨兵部亦請一併展限得 旨允行初山東藩司王篤以虧空庫款被劾 上命山東巡撫迅速取具藩司衙門清冊奏交戶部確切查覈至是澧中奏庫款糾紛易滋弊混前任藩司王篤在任多年出納是否悉符先應認真釐剔逐細查開奏交戶部但款目繁多必須少寬時日辦理庶臻詳備 上允之諭曰該撫等均係甫經到任無所用其迴護務宜秉公查辦毋得意存瞻徇豫爲開脫地步代人受過也懷之又奏東省各屬傳應

買補因公動缺常社倉穀本年收成歉薄若將缺穀採買誠恐糧食增昂有妨民食請緩至來年秋收後酌量買補從之先是御史王東槐等奏山東省盜賊公行捕務廢弛上命禮中到任後按照劫案多寡查明奏參二十八年二月奏查明鎮道等官失察盜案多寡請將兗州鎮總兵富勒興阿曹州鎮總兵祺壽兗沂曹濟道王懿德濟東泰武臨道岳齡等分別交部議處又請將經徵錢糧四載五載六載全完之膠州知州張同聲甯海州知州博文青城縣知縣張被垣奏請給予護敘三月奏劾虧短庫款鉅萬有餘之單縣知縣陳世埰及延不完解之前任臨淄縣知縣陳鏞等分別褫職懲辦俱如所請又奏檢查庫簿近年徵解日形短絀每

遇餉需緊迫非詳請改撥卽輾轉那借總由不肖州縣或以完作  
欠或已徵不解積欠成虧盈千累萬如果後任按照例限將交代  
算明據實揭報所虧銀數不難水落石出查東省未完交代竟有  
一百四十餘案之多內有一案交代牽扯多任卽該府州及監交  
委員亦因積重難返不免爲之調停或以不應交代之款列入交  
代後任不敢具結因而歷任拖延是交代一日不清虧空一日不  
出庫項卽一日無著惟有逐款澈底清查務使從前侵欺弊端盡  
行呈露仍妥籌良策以資彌補疏入下戶部議尋議上得 旨卽  
照所議督同藩司迅速查辦至如何速籌歸補及以前庫項如何  
逐款有著以後錢糧如何依限考覈之處均著該撫悉心籌辦妥

議具奏旋奉旨照十二條一清釐藩庫一嚴查交代一稽覈提解錢糧一追繳那用庫項分限繳銀無絀者請酌量調補一追補本員因公那用宜分別見在官階之升降一接收前任虧累宜酌展限期并分別完繳銀數酌量先予開復處分一籌補無著之款宜酌提節省一上司分賠宜遵成例辦理一緩徵民欠宜確切查明一攤賠各項宜照原案辦理一虧缺倉穀宜覈實辦理一存司領款宜覈扣備抵下部議奏尋議那用庫項接收虧累按限完繳未經全完者分別銀數酌量調補開復窒礙難行並酌提節省輟轉股削易滋流弊應無庸議餘悉照所議行四月奏督率文武設法捕匪先後計獲擒幅各匪七百餘名提省究辦治如律五月奏言



東省地廣民稠風強俗悍貧民鮮有蓋蔽一遇歉歲曹屬之搶匪沂屬之披匪幅匪武清屬之梟匪聚眾每至百餘人隨地裹脅莫延不已羣匪多起於曹沂而兗濟受害爲尤甚地方官如果於事主報案立時勘捕何至原贓全行無著惟其輾轉稽延曠日持久賊銷跡滅縣案以待不能卽正典刑匪徒遂無顧忌愈形态肆況旅店涸跡一二匪類尙可稽查盤詰豈兇匪百十成羣轉難察查惟官不以盜爲事民始敢與盜通氣上年劫案各匪其強悍狡黠者亦無一二多係無業遊民隨聲附和殲厥渠魁脅從自散卽牧令中亦非無長於緝捕勇敢任事之員惟大法則小廉人存則政舉兇匪之橫行咎在牧令牧令之不職責在上司見在會同三鎮

督飭司道文武員弁振刷精神不分畛域就見獲各犯窮究夥黨按名搜捕並將爲賊銷贓接濟盜糧之奸民一體嚴究確情查拏懲創諭曰除暴安良爲地方官要務必須力求實效方能有益民生據奏東省盜匪肆行實由地方文武各官捕務廢弛防範不嚴之故大法則小廉人存則政舉兇匪橫行咎在牧令牧令不職責在上司該撫見經拏獲多名嚴辦並將諱匿各員分別查參復督同文武各員按名搜捕嚴禁接濟盜糧等語所奏實屬詳盡惟言之匪艱行之惟艱果能實心辦理政事認真查拏盜匪各文武同心協力畛域不分互相堵緝匪徒自易就獲卽如近來各該御史所奏山東盜風又復漸熾原未必事事皆實而亦斷不至盡虛

著該撫督飭文武各官振刷精神卽照所議嚴禁接濟窩頓以清盜源儻地方官仍蹈前轍稍事因循卽嚴行參辦毋稍姑容勿得徒託空談毫無實效勉之慎之尋因病請假得旨賞假調理旋卒遺疏入諭曰山東巡撫張澧中由刑部司員簡放外任擢至巡撫晉躋卿貳復經簡放山東巡撫辦事實心不辭勞瘁前因患病賞假方冀調理就痊藉資倚任茲聞溘逝殊堪軫惜張澧中著加恩照侍郎例賜卹任內一切處分悉予開復應得卹典該衙門察例具奏尋賜祭葬如例子樹蘆候選訓導

右 國史館本傳

陳鑾

陳鑾湖北江夏人嘉慶二十五年一甲三名進士授編修道光二  
年充浙江鄉試副考官五年二月京察一等引 見記名以道府  
用七月授江蘇松江府知府六年六月以海運漕糧兌運完竣辦  
理妥順 賞加道銜十月調蘇州府知府七年閏五月催漕出力  
下部議敘八月江甯等府屬被水成災鑾承辦賑務撫卹得宜  
命交部從優議敘八年挑濬吳淞江工程一律完竣得 旨以應  
升之缺升用九年三月升江西督糧道六月調江蘇蘇松常鎮太  
糧儲道十年三月以蘇州常州一帶運道淺滯未能先事豫籌下  
部議處九月升廣東鹽運使十一年升浙江按察使十二年擢江



西布政使尋調江蘇布政使十三年兼署按察使十五年八月護理江蘇巡撫十二月偕署兩江總督林則徐奏言泰州屬富安等九場被水成災見在滷氣淡薄產鹽不旺請於來春青黃不接之時按煎停場撥給穀石折色散放以資接濟並請於商捐項下動支毋庸開銷正款如所請行十六年正月奏籌議水手章程略言糧船水手兇悍之風本非一日卽懲創防範之法亦非一端欲清其致患之源必破其久延之習查漕運全書內載漕船雇募水手責成衛所及押運員弁互相稽查又刑例內載糧船水手夥眾十人執持器械者照強盜律治罪容隱不首者照強盜窩主律治罪嗣後雇募水手除責成衛所備弁旗丁頭花互保外如有玩違滋

事者照例加等問擬以昭炯戒則漕政日漸肅清矣下部議行二月擢江西巡撫五月廷臣奏參江西省貪劣各員上命戶部尙書耆英署吏部尙書朱士彥前往會同查辦九月偕耆英等奏言查明清江縣知縣孫慧焯徵收民欠錢糧挾勢借貸書吏錢文先令墊解十月又奏審明南城縣知縣黃宗憲那移漏稅罰款復捏稟職員鄧文郁挾嫌傾陷讞定均治如律十七年正月奏豐城縣雷公腦等處土石隄工被水衝塌亟須修築並請於小港口建石閘以資啟閉東岸建石埽以禦溜勢於田廬保障實有裨益允之又奏請吉水縣縣丞移駐張家灣泰和縣早禾司巡檢移駐馬家洲萬安縣阜口司巡檢移駐武索並請將吉水縣屬之中鶴一

鄉專歸縣丞分轄泰和縣屬之七都改歸巡檢分轄下部議行是月調江蘇巡撫先是御史劉夢蘭奏糧船積匪弁丁每多容庇上命漕運總督及有漕各督撫會議具奏二月偕兩江總督陶澍奏言江西糧船向由新建豐城鄱陽水次受兌漕糧路經都昌等縣渡湖出境應請自今春爲始凡糧船受兌之處責令各該縣嚴密查拏其經過地方亦責令各該縣親身帶領捕役協同汛弁會同各幫弁按船確查偵有匪徒潛匿卽時擒拏懲辦如該幫丁舵人等有能指名稟官者重加獎賞儻有容庇卽將該弁參處示懲似此立定章程庶可杜絕後患疏入 允之八月在籍給事中瞿溶呈控江蘇常州府屬收漕勒折一案 上命確切覈辦尋奏言



該府各屬漕務均照舊章辦理並無官吏浮收民心不服情事  
諭曰漕糧爲天庾正供在民不准稍有拖欠在官不得任意浮收  
自應遵向例照舊章毋任絲毫增添以示限制如經徵各州縣浮  
勒入己任聽經手漕項人等刁難勒捐苦累閭閻著卽分別嚴參  
提究其刁劣糧戶強以低醜潮雜之米赴倉捏交甚至健訟把持  
抗糧多事著卽從嚴懲辦毋稍寬縱十八年二月奏請將桃源縣  
境之王家集添設千總一員穿城集添設外委一員並抽撥各營  
兵丁五十名駐防巡緝以資控制下部議行五月籌議查禁鴉片  
煙章程略言制治之法節流必先清源用刑之道由輕而後及重  
查鴉片煙土來自外洋凡沿海奸民運銀出洋易土圖利者坐謀



三  
三  
叛已行律內地販煙及開設煙館者坐毒藥傷人律愚民吸食者  
予限一年違者依律論死如是衡情定法分別等差庶幾人心就  
正民俗還淳漏卮塞而 國本培矣疏入 命大學士軍機大臣  
會同各衙門議奏議上 諭曰朕惟姑息非所以愛民明刑卽所  
以弼教鴉片來自外夷海販竅口實爲禍首罪魁非一律從嚴槩  
置重典不足以防偷漏而塞來源至吸食一日不斷則與販一日  
不絕亦不得稍從寬宥今定以死罪立限嚴懲庶幾根株淨絕立  
挽澆風朕言出法隨決不寬貸各凜遵毋忽九月偕兩江總督陶  
澍奏稱上海等處盤獲販賣高頓鴉片煙土各犯共起獲煙土一  
萬六千餘兩並諭令海船繳出煙土四萬一千餘兩得 旨該督

等於所屬地方有犯卽懲辦理認真可嘉之至陶澍陳鑾均著交部議敘該督等仍當嚴飭所屬循照見辦章程認真查辦不准稍有疏懈果能力除痼疾朕必嘉悅勉之十九年三月署兩江總督尋奏查江蘇吳淞海口距海關尙遠向來商船夾帶鴉片煙土每於入口後巧爲偷運請將進口商船卽用海關印條封固各艙押赴大關先行驗封然後驗貨並遴委丞倅參游駐劄該處以專責成嚴禁小船出洋接濟裝運遇有近口寄旋洋船查明應進口岸與應赴他處者分別催令收口開行以杜偷漏下所司議行四月奏江南興武二九兩幫潛船丁力疲敝請將江甯江浦二縣調濟快丁案內應掣本銀二萬兩仍行存典生息撥抵該二幫積欠剝

價及添補辦運之需以紓丁力 上允所請九月以秋汛安瀾下  
部議敘十月奏請 敕下儒臣推闡 聖諭廣訓頒發各省以資  
誦習疏 聞 諭曰向例各直省地方於朔望宣講 聖諭廣訓  
俾鄉曲愚民皆知向善良法美意允宜永遠遵行惟州縣地方遼  
闊宣講仍慮未周著照所請嗣後各學政到任卽恭書 聖諭廣  
訓刊刻刷印頒給各學徧給生童令人人得以誦習並著翰林院  
敬謹推闡 聖諭內黜異端以崇正學一條擬撰有韻之文進呈  
候朕欽定頒發各直省令該學政一併恭書徧給鄉塾俾民間童  
年誦習潛移默化以端風俗而正人心是月兼署江南河道總督  
十一月奏江蘇各州縣衛秋禾木棉歉收請分別緩徵以紓民力

如所請行尋卒年五十四道疏入 諭曰署兩江總督江蘇巡撫  
陳鏜由翰林簡放知府洊擢江蘇巡撫署理兩江總督辦事實心  
不辭勞瘁年力富強正資倚任遽聞溘逝殊堪軫惜著加恩賞給  
太子少保銜卽照總督例賜卹任內一切處分悉予開復應得卹  
典該衙門察例具奏伊長子陳慶涵著賞給舉人一體會試尋  
賜祭葬

右 國史館本傳



東洋書院蔵書目録

三三

國朝耆獻類徵初編卷二百四補錄

疆臣五十六

陳鑾

道光十九年江蘇巡撫署兩江總督江夏陳公薨於位遺疏上

宣宗成皇帝震悼賞加太子少保銜飭部照總督例賜卹逾十餘年江蘇官紳以公遺愛在民合詞籲請入祀江甯府學名宦祠既奉。俞允而湖北官紳復以公孝友睦婣文學政事足爲士林模範請祀鄉賢時公薨既久葬又十餘年矣墓碑未立公子慶滋以知府需次直隸述公行請爲銘諸碑鴻章先於公爲部民繼人翰林爲後輩又繼公巡撫江蘇署兩江總督及奉 命總督湖廣實

公之鄉聞諸士夫道公治績者甚具今總督直隸與慶滋同官一方義不可以不文辭公少有大志爲諸生時嗜讀先正格言以爲法協辦大學士文敏公百齡總督兩江聞公賢延居幕府公於三省吏治河防漕務鹽政營制海防莫不悉心講求蓋已裕經世之略矣中嘉慶戊辰 恩科本省鄉試第五名舉人庚辰會試以二甲第三名成進士授翰林院編修道光壬午散館充武英殿纂修浙江鄉試副考官 記名御史京察一等 簡放江蘇知府補松江署江甯調蘇州權蘇松太兵備道擢江安糧道改蘇松糧道洊升廣東鹽運使浙江按察使署布政使旋擢江西布政使復調江蘇布政使升江西巡撫復調江蘇巡撫權督兩江敷歷中外近二

十年公爲政以教養爲心務持大體規久遠之利守松江時高堰未築運道阻塞吳中議行海運以卹始人多難之公奉檄駐上海籌度機宜整定規條事遂以濟海運之可行自是始署江甯值下河諸邑水災流民攘奪村市囂然公禁止入城捐俸勸分設逢廠城外分男女以振又以流民深聚則難區處散則可全其生檄大縣畱養二千人小縣畱養千人續至者按人資送白大府檄行各州縣如法分振存活無算而居民無譁江浙農田最重水利畧上海道時以吳淞江口紆曲易淤議用逢灣取直法濬之俾水勢迅駛任蘇藩議開太倉劉河昭文白茆河濬各屬支河旱澇得備在浙江江西亦然凡沿湖沿江隄岸督吏稽察修廢補敗增高繼長



寶山有海塘壞五千餘丈華亭海塘亦傾五千九百餘丈公籌捐興築用覈工實民以永安蓋凡有利於民生者公知無不爲爲之必使可以經久官上海察知黃浦江風浪險惡因做揚子江之制枌造救生船分置各岸行旅至今賴之撫江西興復省城隆冬振濟粥廠撫蘇州枌建義倉以備凶荒誠心所孚神人交應挑吳淞江時先築攔潮大壩將成輒圮公虔祀周太僕祠潮退而壩成周太僕者乾隆閒濬吳淞江以身殉事者也江西旱蝗公作文禱神卽日霖雨蝗盡死其在江甯亦然有烏鴉啄蝗之異又屢降陣雨驅蝗陷於泥中歲以無祲 上爲御書福祐康年四字以答禮席所至尤以敦名節崇教化爲本整理各省書院文風丕振在蘇松

修前明忠臣瞿式耜墓道在江西修先賢澹臺子墓漢忠臣陳蕃祠署總督時以鄉曲愚民惑邪教實由正教不明之故奏請 敕儒臣推闡 聖諭廣訓中黜異端一條撰爲四言韻文頒各省鄉塾俾民間咸得讀之以收涵育薰陶潛移默化之效奉 特旨允行是時天下方承平海波不驚 上灼知公賢勞實深倚重屢奉 硃批有厚望於汝之旨又有看汝精力才具深愜朕懷勿苟安畏難之諭公益思致身報 國察吏鋤奸閭河巡海整理水陸營務 冒暑往還積勞成疾未竟其用 朝野悲之自公薨之後不及十年而時事日亟矣公諱鑾字仲和一字玉生號芝楣湖北江夏人祖籍蘄州曾祖諱天佑貢生候選州同祖諱正勳乾隆丙午科舉

人丁巳科進士四川潼川府知府署川東兵備道父諱受疆貢生  
候選鹽大使本生父諱受培優貢生安徽宣城縣知縣崇祀名宦  
祠皆以公貴 誥封光祿大夫曾祖妣氏胡祖妣氏程妣氏高本  
生妣氏楊氏孫氏俞皆 封一品夫人公持身儉素有餘則以篤  
宗親敦任卹於蘄州建陳氏家廟買田四百餘畝爲祀祖贍族之  
用於江夏倣宋范文正公法置義田 成皇帝御書義莊扁額以  
賜道光辛卯湖北大水公捐金數千振卹於族媼鄉里守節婦月  
送薪米有子者資助肄業配樊夫人繼配張夫人秦夫人周夫人  
均以慈惠稱公生於乾隆五十一年四月二十九日薨於道光十  
九年十一月二十三日年五十有四所著有耕心書屋詩文集若

千卷輯先正格言十卷三楚歷朝名賢墨蹟撫楚帖十卷子五人  
長慶涵道光己亥科 欽賜舉人藍翎同知銜河南上蔡縣知縣  
次慶藩道光甲辰 恩科副貢內閣中書慶溥道光己酉科舉人  
江蘇候補道慶洽藍翎同知銜江蘇候補知縣慶滋鹽運使銜道  
員用直隸正定府知府均周夫人出孫九人曾孫十五人咸豐十  
年葬於武昌城東喻家橋夾山口周夫人塋銘曰  
民爲邦本官爲民依吏瘼其職實禍之幾小臣不廉大臣不法厝  
火積薪姦宄萌甲陳公遭時海宴河清人狃治安公念在氓農田  
水利所至拊營反經修慝識深慮宏仁心仁聞 天子嘉之奄有  
南服任公設施剔弊剗奸文經武緯惠養士民培 國元氣天不



愁遺喪此元臣繼公者何馴至振鈞撥亂反治羣推能者保邦未  
危吾思公也魄反其宅神遊學宮仰公治行視此碑豐

右神道碑銘李鴻章撰

公諱鑿字仲和號芝楣湖北江夏人先世唐中和中江州九世同  
居詔旌義門至宋嘉祐始遷蘄春二十五世又由蘄州遷江夏公  
祖諱正勳官四川潼川府知府本生父諱受培官安徽宣城縣知  
縣崇祀宣城名宦祠季父受疆無子以公嗣焉公童齒修學文采  
彪績翕然之論風飛川至年二十三舉於鄉庚辰始成進士殿  
試進呈卷在第五仁宗睿皇帝覽所對策謂可大用以第三人  
及第授翰林院編修道光壬午散館派武英殿纂修是年秋奉

命典試浙江兩浙故多治樸學遂經術者公悉心甄采得士如瑞  
公常張公福堊朱公應元皆掇巍科躋揆輔一時以爲知人旋考  
御史奉旨記名以道府用其秋簡放江蘇松江府知府公以  
文學侍從之臣出爲二千石下車之始敦敷教化勤求吏治先是  
南河高堰未修運道間阻巡撫陶文毅奏請試行海運招募沙船  
出吳淞口上溯天津兌收上海隸松江府治公先駐其地相機督  
辦不數月初次兩運全輸津門大府以是重之旋調署江甯府知  
府又調授江甯府知府在江甯時首都護籜幾無虛日公乃虔虔  
夙興敏而有勛及治吳中懲俗習之浮靡施以樸質肅厲高榷改  
幣一朝而化調署蘇松兵備道往來江壩研慮揆督諭知江道紆

國朝名臣傳卷之二十四  
五  
夷易於淤先築巨壩三日而畢督飭工員巡犒夫役進力挑拍深  
廣盈昔次年二月江工告成震澤下游不憂履跋士庶歡騰有神  
君之目己丑四月奉 旨授江安糧道七月調任蘇松糧道督運  
南歸涂次奉 旨升授廣東鹽運使未及莅事奉 旨升授浙江  
按察使莅任旬日署理浙江布政使時遇秋水洊至數郡爲災公  
請於巡撫富呢揚阿勿集流離勸理荒政而又留意水利以爲湖  
郡居太湖下流洩水以太湖爲歸禦水以壩岸爲重嘗因勘災躬  
履其地目擊形勢周咨耆黎知向來田高於湖漚港宣洩其勢甚  
順近歲湖高於田旣患衝突汎濫又值山水下注田疇多淹峻築  
隄防庶資保障遂督率捍衛因地制宜垸岸完堅互相洩蓄又檄



仁錢兩邑低窪之處遵照辦理浙西農田屢歌豐稔公之惠也旋  
升授江西布政使又奉 旨調授江蘇布政使是時總督爲陶文  
毅巡撫爲林文忠公戮力旬宣實心爲治勤勤竭誠不徇自逸又  
奉 命護理江蘇巡撫旋授江西巡撫具摺入都請 訓 召見  
九次垂詢江蘇漕河浙江連年工振公以實對故撫豫章時於修  
荒政興水利諸法講求尤切丁酉二月奉 旨調江蘇巡撫具表  
稱謝 溫諭備至蓋公之治吳不十餘年由太守至開府勤思乾  
乾通迥治理而含謨吐忠尤有孚於 帝心焉公撫江蘇乃其舊  
治節旄所至頌謳涌溢因利革弊持其大體會閩粵商人販運煙  
土被所連染艱於改飭兼有作奸犯科流害靡底公條奏章程六



倏奉 旨有所議甚好之諭總督陶文毅因病解任公拜署理兩江之 命隨卽會同河督麟公漕督鐵公合看河漕兩標又閱淮海各營親往勘驗清河縣之老子山移駐水師周歷洪湖詳察清水源委七月間回江甯公以觸暑往還稍得休憩猶復親詢要讞披覽積牘力疾視事以致盡瘁薨於兩江督署遺本具奏 上深軫悼賞給太子少保銜照總督例賜卹餘卹典如例公居恆憂國如家勤於王事治吳治越政績輝著其所厝制皆洞曉民瘼帥循舊制而吏民愛戴不區終始性又樂善好施由江西巡撫入 覲時奏言臣少慕范仲淹拊置義田近蒙 簡畀外任搏節廉俸所入置田數百以贍親族 上親書義莊二字以褒寵之嘗刊先正

格言十卷歷代名賢墨蹟樵楚帖十卷又集名臣言行錄及續修  
鹽法志皆未就也三世皆 贈光祿大夫妣晉 贈一品夫人原  
娶樊氏繼娶張氏秦氏周氏皆 封夫人子五慶涵 欽賜舉人  
慶藩慶溥慶治慶滋俱有聲於時

論曰公之治吳也最久優賢敦歷頌德亦最深量能授宜嘉錫來  
撫宜乎 聖主畀任之專也聞公未第時客遊兩江督署節相百  
文敏甚器之嘗曰異日居吾位者惟子也不及三十年吳躋其位  
後先暉映抑何不爽文敏之知人亦神矣哉嘉道之閒三江爲文  
物隩藪民俗亦殷盛公始而典試浙右後由太守監司上歷封圻  
皆不離乎三江者近是放詳中外數十年無隕越傾軫之時雖慶

公遭遇之隆亦見公之和平仁厚有以致福也祖賢於公爲戚屬  
今來撫公故鄉景仰前型追儀昔武故言之亦最詳也

右家傳彭祖賢撰

一故宦培植文風誘掖寒賤守松江時倡捐求忠書院膏火聚諸  
生肄業其中月試制藝詞賦經解躬爲講誥郡人士皆興於學守  
蘇州時郡有平江書院向係文臺肄業故宦復遴取諸生捐給膏  
火優加獎誨勛以聖門主敬之學署蘇松兵備道添建蕊珠書院  
聚舉貢生監校課時藝並肄經史浙江詒經精舍節相阮元所建  
三十年來精舍久閉無踵而行之者故宦莅浙捐助膏火重開精  
舍手自爲文訓諸生以治經爲學之要他若松之雲間蘇之紫陽



正誼杭之敷文崇文紫陽江西之五柳濂溪江甯之鍾山尊經各書院莫不加意獎拔捐廉修葺凡所賞識擢高科登清要者接踵而起每遇寒峻雖一材一藝必獎勵成就贍其身家俾專力於學一故宦爲國用人取才有識道光壬午科典試浙江與戶部侍郎金匱顧皋悉心校閱兼搜遺卷得士竺陳簡等九十四人馬槐吳天慶尤爲一時宿學而內閣侍讀學士張福星刑部員外郎沈濂刑部員外郎軍機章京朱應元翰林院侍讀學士瑞常江西臨江府知府虞協等皆接踵魏科敷歷清要一時號爲得士任江蘇藩撫時翰林院編修胡林翼陳廷經時均以舉人受業門下勉督不遺餘力以國士期之至於下僚屬吏用之必盡所長凡所拔擢



皆卓然有名於時

一故宦欽奉古賢修復祠宇松江府求忠書院向祀明儒方孝孺  
歲久荒廢市井據爲茶肆故宦至驅逐之復捐俸修葺求方氏子  
孫名貞秦者永奉祠祀於常熟建雙忠祠祀瞿忠宣式耜張忠愍  
同敞築亭於前顏曰倚劍並修築瞿忠宣墓道署後有明正德時  
忠臣光祿寺少卿唐公墓年久頽冢將平故宦修護之立碑以表  
忠節巡撫江西修先賢澹臺子墓陳公仲舉祠徐孺子亭凡此宣  
幽修廢之舉常人所忽故宦獨矜矜於此其隱維風俗人心不淺  
一故宦遇事必規久遠之利不冒苟安目前當任上海道時廉知  
黃浦江風浪險惡因做揚子江救生紅船之制捐貲造船分派馬

頭隨時救護等議章程通詳立案以垂永久行旅賴之又  
在蘇藩司任詳請大府於撫署後建設義倉數十間購儲米粟以備荒政  
一故宦與利尤能剔弊除莠卽以安良蘇州爲三吳省會五方雜  
處姦宄潛藏故宦任蘇州府時嚴禁婦女入館看戲又有婦女開  
設茶肆乘機誘詐大爲風俗人心之害密訪姓名榜示通衢令其  
前改又懲里中無賴糾眾打降搭臺滋訟等弊積習一清蘇松漕  
糧最重向來縣幫糾葛丁胥交蠹需索恫喝米色不純兌開延滯  
故宦任督糧道深悉其弊釐剔幽隱務俾慎選正供冒濫胥絕蘇  
省育嬰堂規模甚鉅經費亦充因經理失人遂至有名無實故宦  
嚴懲侵蝕精覈浮冒董事侵虧積弊頓除歲活嬰孩甚眾巡撫江

西議禁開採鉛礦以絕奸民嚴覈滋事水手以肅漕運移駐丞尉  
以便稽查驅逐流囚以清封禁嚴懲擔匪以靖地方全境因之安  
謐至平反冤獄聽斷如神由郡守以至開府累雪疑讞開釋無辜  
而奸慝亦從無漏網戊戌秋提勘海州屬招解因姦滅口謀害幼  
孩一案堂訊時察情未確反覆推鞠遂得實情因照本律問擬得  
免重辟人尤神之

右節名宦事實陳魯撰

按陳公入祀江甯名宦祠在道光三十年

一本賢至性純篤夙敦孝友本生父名受培安徽宣城縣令歿於  
任邑人追思德政籲請大府題奏入祀宣城名宦祠本賢感其  
厚誼捐田五十餘畝以資文塾諸生膏火本賢勵志攻苦曲體親

心髻年入泮筆耕舌耨負米奉親嘉慶戊辰授高魁嘗謂里人曰  
事親不專在祿養要善體親心而曲承之自修身業以尊榮之至  
於顛沛流離呼天號泣以竭其孝是人子不得已之苦衷也吾願  
平淡無奇奉親百歲猶唐魏徵不願爲忠臣之意也旋次第遭本  
生父母喪哀毀骨立葬祭一遵古禮旣葬每見時新蔬果必往祭  
之筮仕後乞假歸省於嗣父母本生父母墓前呼搶欲絕鄉人爲  
之感泣家遺薄產悉推讓與共祖之兄其天性肫摯如此

一本賢博極羣書學堪經世少有神童之目每爲詩文風發泉涌  
頃刻數篇書似李北海米襄陽中年更入顏平原之室所著有耕  
心書屋詩文集二十卷嘗刻先正格言十卷又集三楚歷朝名賢



墨蹟撫楚帖十卷又集名臣言行錄及續修鹽法志則未竟也

一本賢自奉儉約家風嚴整自舉貢至筮仕閱二十年衣裳不忍更換常著布履飲食每饌二簋從未因口腹而恣傷生畜嘗書古人格言於壁曰小過必改德之基也微命必救壽之徵也隻字必惜費之本也粒米必珍富之源也生平厚人薄己家規井然妻周氏贊襄內政一本勤儉貴而不驕賢而有法刑于之化於茲可見一本賢樂施好善康濟爲懷道光辛卯年後楚省水患頻仍田廬傾沒人不聊生大吏辦理撫振本賢遠任他邦猶兩次寄捐廉俸銀一千兩以濟振卹又本城大觀書院爲闡省文風所係齋舍圯塌不蔽風雨本賢捐金五百葺而新之又捐貲修理本邑學宮自

爲記載通志此皆彰明較著之事更有不與人知之利濟則不可枚舉矣

一本賢出爲名臣實素有大志少時喜誦先正格言弱冠舉孝廉遇極艱苦未嘗介懷協辦大學士百齡總督兩江聞其賢延居幕府本賢於三省吏治河防漕務鹽政營制海防莫不悉心講求故躬履其任措置裕如江南士民旣請記名宦祠復於蘇州之滄浪亭側五百名賢祠內繪本賢遺像馨香禱祀至今稱道不諼

右節鄉賢事實彭久餘撰

按陳公入祀江夏鄉賢祠在光緒十二年

日本書紀卷之二十一

--	--	--	--	--	--	--	--	--	--	--

國朝書獻類徵初編卷二百五目錄

監司一

李允禎

方國棟

王天鑑

鮑開茂

賈壯

王紫綬

李允函

王震生

南鼎甫



皇朝通志卷一百一十五

--	--	--	--	--	--	--	--	--	--

國朝耆獻類徵初編卷二百五

通奉大夫前署江西巡撫江西布政使司布政使湘陰李桓輯  
監司一

李允禎

往余在翰林今廣西布政使述齋李先生爲編修余嘗歎其有文  
學政事才後出知臨江督府范公上其治狀尋拜轉運兩浙之  
命余嘗自喜言之不誣後每當 廷推意未嘗不在我述齋也今  
年秋述齋將舉母董宜人之喪合諸乃考僉事公之兆而屬余以  
誌銘因得讀忍庵黃宮贊所爲狀始稔僉事公之歷官聲績足以  
啟翼後人而又竊怪捐館舍時述齋方在襁褓何以能得之詳則

又知孝子之克追念先德詢諸士大夫及甘陵淮徐諸父老之口  
件繫以爲家法世譜而其事皆出於眾論之所同然益可知其非  
無美而稱之也按狀僉事公諱允禎字貞甫號修庵先籍江西贛  
州明洪武初調德州衛隸右所遂爲德州人累傳至逢時嘉靖甲  
辰進士官御史論馬市有直聲歷山西左布政使公高祖也次子  
汝棟隆慶庚午舉人生煥煥生嗣美以子貴 贈奉政大夫工部  
員外郎公其長子也自少力學工文癸酉舉於鄉順治元年隨牒  
除故城知縣地衝困供億一切辦而民安之覈舊丁二萬餘之屬  
存者七千將請除會調豐縣吏觀望爲奸公收縛吏集眾焚舊冊  
而別具狀竟得請後述齋除清江縣蠹吏董宜人喜曰此爾父在

故城時清丁地法也豐俗多告訐富家大率破曰鏃狀公請於上官悉下其狀於縣置對杖斃其魁於通衢風乃息民有二女次豎而貧姊夫欲私之不可遂以盜陷其夫論死公微行入獄訶知其姊夫賄盜與獄吏作奸狀論如法而釋其夫又有富家子利其亡弟之財誣其婦以姦廉得其主謀者痛繩之冤始白有兄弟爭財直在弟判歸之各責以大義皆感動泣謝去會碭缺縣官監生某引賊破縣城上官以公才賢委勦賊出不意掩捕之皆敗走甫定而防兵至聲言欲屠城以牛酒犒師力止其帥入城民恃以無恐後述齋知臨江嘗禽斬盜魁董宜人則又喜曰我嘗以爾父在碭率兵捕賊告爾爾庶無負也尋升南城兵馬司指揮遇籍沒家輒



收其往來札火之保全者甚眾晉工部營繕司主事尋督瑠璃廠  
革侵蝕清逋課窳戶工價實給如額時建端門大工賴以速成遷  
員外郎加一級有文綺鞍馬之賜 覃恩晉階奉政大夫順治  
九年出督清江船政兼理鈔關清船廠大料小料之弊革關鈔濫  
差及額外加稅之弊因排纂漕使五集以示後云晉屯田司郎中  
十三年升廣西左江道按察司僉事抵岳州病甚不能前明年遂  
告歸公歷任十有四年卽任繁事劇皆自擘理不一假他手奸猾  
吏風累息而尤以清操著稱抵豐時庫吏張設甚盛駭問之故曰  
庫中羨餘耳怒而斥遣之所拔豐諸生持百金爲贄謝弗受署碭  
山途遇賊數十艘皆呼曰此清官各散去清江任滿校公帑餘數

千金不一取也性孝友甫舉於鄉卽以先所析產授之弟自奉甚約而能急人豐與清江兩舊任各以缺額被畱爲力任代償而聽其去皆感泣曰公活我歸以疾杜門官長造請謝不見嘗爲家訓曰我祖父忠厚傳家願予利於人不取人利我爲官常存此心爾等後有居民上者其勿忘祖父訓則知述齋之清節歷任不渝其教有自而公不獲之左江後其民竟享賢方伯之利者無窮公利人之心又可以不恨也公生於明庚子十一月十一日卒於康熙元年九月二十六日年六十有三又三年乙巳二月十五日葬於州之北衛河東原凡三娶始宋氏廩生懋胤女 贈宜人繼趙氏 儒士懷女繼董氏廩生元勛女 封宜人自公知故城縣卽任以

家政內外肅睦一不貽夫子憂而自述齋少長卽舉公之政績以  
教人皆以爲賢母云生於明庚申十一月二十四日卒於康熙四  
十二年正月二十八日年八十有四子三浹順治丙戌進士延慶  
知州調芮城知縣卒宋宜人出次濤康熙丙辰進士由翰林院編  
修今官廣西布政使世所稱述齋先生也次潤廩生卒皆董宜人  
出女一適高苑教諭趙珪孫六人元璿貢生任奉天府通判元琛  
元璣元琮元琪元瓚皆諸生銘曰

廉吏不可爲也而可爲安民之吏歲計有餘也而日計亦如之左  
江之歷政皆立效兮曾幾何時維清節之未訖厥施兮維後之貽  
噫嘻往者多不可追孰知去後四十餘年而五嶺以西如食左江

之遺愛兮以莫不思

右墓誌銘韓莢撰

公諱允禎字貞甫別字修庵其先賴人後遷濟南之德州曾王父  
汝棟隆慶庚午舉人王父煥太學生考嗣美 贈奉政大夫工部  
員外郎李氏之世至方伯公逢時始大方伯爲御史有聲明世宗  
朝嘉靖庚戌屢上書言兵事其後出按宣大力言馬市非是忤大  
將軍仇鸞事具前史自方伯至公凡四世公少而端重不妄言笑  
稍長嗜讀書湛於古學工部侍郎程公紹見其文異之崇禎癸酉  
舉鄉試數困公車順治元年除知故城縣改知豐縣遷兵馬司指  
揮歷工部營繕主事虞衡員外郎屯田郎中擢廣西左江道僉事



以病致其政歸歸五年卒其爲故城路當子午會 國初征勦四  
出舟車驛騷公按符而給民不知病縣戶丁額二萬餘鼎革後死  
亡過半而額徵如故公編審得見丁七千有奇餘悉除去始至豐  
吏盛陳金幣於署公曰此餌我也卻之縣民嚚訟者羅織富人輒  
破家公請於監司臺受牒必下之縣鞠得誣罔狀杖斃其魁劉某  
等於通衢訟以衰止豐民某妻美而豔其僚壻富豪也挑之不從  
又詬厲之豪怒賂盜引某誣服矣公閱案牘所坐止一布疑之夜  
微行入獄有二人閣中偶語收案之卽豪也詰得其奸立釋某而  
寘豪於法甲弟死利寡婦之產賂乙自誣與婦姦公下乙獄遣甲  
與婦歸其家久不爲理而令獄吏私於乙曰甲與弟妻已均產釋

惡矣及集訊先呼甲案前語叱之退繼呼乙至佯怒曰據甲供狀  
乃強姦強姦罪當死趣下重囚獄乙謂甲賣己懼吐實遂正二人  
罪有兄弟訟田直在弟而吏數直其兄公反其獄而責以大義二  
人慙悔痛哭遂爲兄弟如初其治獄明決皆此類河決徐州臺符  
下徵柳萬東例派里社公曰吏樂從事民將弗堪但下教借牛車  
數兩吏不測所爲以請公曰豐西鄙十里許有柳蕃衍數百畝無  
主者刈取之足辦此矣事集而民不知太學生吳某連土寇陷碭  
山監司才公俾攝其事屬以辦賊公出不意掩捕獲之餘黨解散  
株連者悉置不問越數日濟上軍至聲言且屠城公具牛酒扉屨  
犒師數十里外其帥欲入城覘賊公曰罪人已得餘皆赤子何勞

大軍爲力持不可縣境以安其在工部督造端門工成晉秩 賜  
文綺廢馬督清江廠船政潔廉自矢材美而工良窮丁無力供造  
有繫累瀕死者盡釋之暇則復清江書院以造士歲饑設三廠以  
食餓人全活萬計公自縣令歷郎署陟監司所至以幹局見稱而  
廉聲流聞孚於神明格及盜賊其事往往甚異嘗夜自碭山渡河  
遇賊艘知爲公也相戒勿犯赴粵舟次小孤山風起水涌長年無  
人色公仰天祝曰某平生自信俯仰無愧否者神當覆吾舟語畢  
而風止待 命岳州愛岳陽樓風物之美遂居之午夜恍惚若有  
神告曰速去甫移居而樓火公少事王父父母以孝聞旣舉孝廉  
盡推產與其弟歸里後杜門謝賓客訓課子姓門以內皆有禮法



數語以祖宗忠厚勤儉之道或以橫逆來輒異語謝之不較也鄉  
郇皆以公爲長者生以明萬厯庚子十一月十一日酉時卒以康  
熙元年九月二十六日巳時得年六十有三娶宋氏 贈宜人繼  
趙氏董氏 封宜人子三人浹順治丙戌進士芮城縣知縣宋出  
濤康熙乙卯解元丙辰進士翰林院編修潤廩生董出女子一人  
適教諭趙珪董出以康熙四年二月十五日葬河東祖塋系以銘  
銘曰  
試當盤錯古循吏仕不大昌功則沛令名無窮年不逮有子式穀  
及苗裔我銘其藏視萬世

右墓誌銘王士禎撰



公諱允禎字貞甫其先家江西贛縣後徙山東之德州前明世宗朝有諱逢時者以進士歷官山西左布政使嘗爲監察御史諫止大同馬市與倖臣仇鸞忤其事具載前史卽公之四世祖也曾大父諱汝棟隆慶庚午科舉人大父煥國子監生父嗣美以公貴贈奉政大夫工部員外郎母高宜人公少工場屋之文舉崇禎癸酉科鄉試入國朝用薦除故城知縣調豐縣已兼攝碭山縣事碭山土寇方熾上官欲揀材幹吏使勦賊度無踰豐令者故遂以委公公乘閒冒重圍出賊不意入其城賊疑有大兵繼公後遑遽遁去於是碭諸大家爭以通賊相告訐公罪其渠而條疏寬釋其株連者甚夥碭人甫定會濟甯駐防軍至聲言將屠城城中洶洶

思潰公先諭民無恐卽治牛酒往逆其師於數十里外爲言境內  
皆良民已無賊矣帥不肯從公與往復數四大聲曰縣固某之縣  
也脫有不虞某自任之卒拒使不得入及公還老幼擁拜馬前曰  
使君活我微使君不死於寇必死於兵矣治狀暴聞遷南城兵馬  
司指揮踰三年晉工部營繕司主事順治八年初建端門成以督  
琉璃窯功 予員外郎銜加一級 賜文綺名馬各一又以 覃  
恩階奉政大夫十一年晉虞衡司員外郎以督清江船廠竣事疏  
獻羨餘白金數千兩於 朝再加一級晉屯田司郎中十三年遷  
廣西按察司僉事分巡左江道行次岳州邁疾遂乞致事歸閱五  
年終於家康熙改元九月某日也享年六十有三公性嚴重寡言

笑居官以公廉自持尤長於治劇凡所區畫必先事爲之備好釐  
奸弊勇於敢爲雖老猾吏無不縮手屏氣者而又能拊恤細人若  
惟恐傷之案牘滿前迎見立解抉摘其根株悉盡以是士民始而  
畏繼而愛及其旣去且久而益思慕不釋也故城額丁二萬餘兵  
燹後死徙者過半願歲徵猶如故民間大困公編審已有緒矣適  
改官將去乃大集父老取故冊焚之曰毋爲若曹異日累也因鎖  
書吏密室中晝夜開除以新冊申上官竟得請其困始蘇豐庫吏  
張某號蝨魁乘公始至豫陳金帛什器於署公大駭曰此出正項  
乎抑爾所自置也吏漫應曰司庫者故例耳公怒曰庫中絲毫皆  
公賦何得借是餌我命悉撤其具杖吏黜之未幾吏果以賕敗自



是終公之任未嘗支庫中一錢黃河決上官徵柳材急豐當輸柳萬餘束吏請率下里公曰如是則做安底止且必誤期日遂呼諸大家告以某所廢地有柳可刈某某戶有斂禾牛車可發官錢以賃眾皆曰然不踰日而事辦豐有豪民欲淫妻之妹爲其夫所辱銜之賄大盜引爲同劫其人不勝榜掠前此獄已具瘐且死矣公獨覺其冤微行入獄中具得獄吏與豪相左右爲奸狀立置豪及吏於法而釋其人有嫠婦擁貲甚厚其夫兄利所有謀嫁之不可喉某甲使自誣與婦姦甲旣至官公以無左證不信也姑緩其讞而繫甲空舍陰使吏誑之曰伯得弟婦財將解訟矣久之公召甲於庭陽正色呼曰若知死罪乎眾皆質若強姦律強者死促入死



囚獄勿畱行甲大懼泣且訴曰實無姦也彼誑某爲之又欲賣某死乎婦遂得白有兄弟訟田者官得兄賂扣其弟弟訟不已公廉知其情卽判歸弟田并以大義加鑄責兩人皆感泣卒爲兄弟如初錫諸生有訐監生范某欲叛者公呼騎將詣其家眾力諫不聽卽止諸從者於外親行視室中所在錢穀充斥而叛具無有也出叱諸生曰若曹殆利其財耳柰何遽陷人滅族事未幾復譌言范監生將引賊至矣先是公頗奇范狀貌乃勉使以武自奮遣卒衛致諸徐州其後范果官守備屢向公垂涕以謝公之愛護士民多此類也嘗夜渡大河猝遇大盜數十從者不知所出公言笑自如已而盜詢知爲公輒譁語曰此好官也不可犯遂以次散去是時

民間爭籍籍頌公而諸上官迄搢紳大夫亦數相引重尤受知於  
徐州道張公兆罷每語僚屬曰李君真能吏也最後公出權清江  
巡按御史秦公世禎抵境所逮繫他關奸胥不下數十輩獨清江  
一無所問某息謂公曰某雅聞君清操今所見殆勝所聞矣秦公  
名御史以風采著江南雖同時大吏莫不震懼者而公顧爲所知  
如此公歷宦中外十四年橐無餘貲家無膏腴之產先世所授田  
數頃旣舉於鄉悉以讓其弟及引疾歸杜門謝絕干請有司莫能  
識公面居常訓戒諸子嚴而有法子姓無敢違公教者娶宋宜人  
繼趙氏又繼董宜人子男三長浹順治丙戌科進士芮城知縣嘗  
與討叛將姜瓖有功不得敘中考功法免次濤康熙丙辰科進士

由庶吉士授翰林院編修次潤州學生孫男六曾孫男二既葬編  
修君撰次公事略畀琬識其墓琬日考諸前史所紀如漢之黃丞  
相霸卓太傅茂皆非有帷幄之勞介甲汗馬之績惟以吏治循良  
遂得封侯錫土茂又圖像南宮列名元勳之次照耀史冊聲施無  
窮以今觀公之爲政夫豈不頽頽古人哉至於錫山之亂揭竿弄  
兵者遮塞道路公挺身策騎挾數吏卒蹈不測之險視羣媮譬若  
豚犢然不煩尺箠寸鋏驅之境外卒能撫恤其善良而保全其子  
女俾錫之遺黎得沐 國家休養生息之化殆三十餘載者其誰  
之賜也惜乎壽不酬德位不配功故公所可表者僅止於此琬不  
敢以老病無文爲解謹掇拾其大端識之非徒慰公地下而已蓋



將告 國史之傳循吏者使有所考焉公之葬也以某年月日其地在州之某鄉某原是爲表

右墓表汪琬撰

李公允禎字貞甫號修庵其先世以洪武十九年由江西贛州府甯都衛遷山東濟南府德州衛遂世爲德州人自甲申筮仕故城縣令乙酉改知豐縣尋署碭山縣丙戌升南城兵馬司指揮己丑晉營繕主事督寶源局庚寅督琉璃窯辛卯以員外銜加一級賜文綺鞍馬晉階奉政大夫壬辰督清江船政甲午升虞衡員外加一級進屯田郎中丙申升廣西左江道按察司僉事丁酉以疾致仕公生而端謹童子時不妄言笑嬉戲刻意問學博極羣書祖



父以長厚多外侮公益自攻苦淬厲每夜分不寐發憤歌呼或至泣數行下崇禎癸酉舉於鄉四赴公車不第始就職性篤孝事親以色養居喪哀毀骨立鄉里以孝稱之公之祖患痺疾不能自轉側公朝夕扶持數年不倦公既與弟析產矣及中式謂其弟曰爾諸生無爲衣食累也吾尙能自給盡推所分田產以與之公既仕乞休杜門不接賓客日課子孫以身訓之嘗曰吾祖父以忠厚傳家甯利人勿取人利與己吾存此心以居官不敢忘爾曹或有居民上者其誌之有狂生醉登公門使酒嫚罵市人爲之不平公笑而止之曰庸何傷乎狂生聞之深自媿晚年益寡言笑正襟危坐御僕婢和平有法怒不形於色其初任故城令邑舊有丁二萬許

經兵火後所存十二三而額徵如故公編審兩月得實丁七千有奇而奸吏知公將調知豐縣稽畱不卽行公知之庭集邑民告之焚舊冊於庭吏不得爲奸眾感泣乃力請於督撫爲覆部得以實丁徵今四十年矣豐縣有錠狀之弊土豪與上官奸吏相結羅織殷實家串同句提必盡其人之家產而後止公自往見徐州守痛陳其弊得請告錠狀者數人公立斃之杖下公初至豐也閱囚見一囚病瘵將死項與手俱械繫足創不能行公疑之晚潛行入獄見獄門半閉有二人相耳語公益疑卽搜獄得一人詢之曰與某囚親因呼囚出乃所見病將死者問得其欲強姦不遂富戶遂誣其夫爲盜竟以賊論死狀公嚴鞫富戶并得獄吏受賄欲斃病囚

於獄公立釋病囚而論獄吏富戶如法有嫠婦撫幼子而饒於財  
伯欲強嫁之不從伯因密置人誣以姦公疑之方故以訊之鞭扑  
不施而情得伯與姦夫俱伏罪有兄弟爭田者直在弟而他吏直  
其兄訟不決公訊立判田與弟且以大義責之相持慟哭爲兄弟  
如初碭山令缺監生吳某引賊作亂城破公被擄攝碭山令夜入  
重圍出其不意掩捕之賊遁公惟繫渠魁妻子脅從者皆不問民  
遂安堵碭亂後民以叛逆交訟於上事繁而民擾公力爲申請發  
縣審理全活甚眾公督琉璃窯工價絲毫無減嚴稽總役而大工  
立辦督清江船政兼抽分則請增價使正身支領工食則實封堂  
給均差派法其權關稅也嚴絕耗羨以恤商困在任三年凡申文



告諭動靜語默皆記於冊作漕使五集凡數十卷公始至豐也庫吏張某陳金幣器具以進曰鋪墊常規也公怒杖而出之諸生某善屬文公季試拔第一一日生以百金令吏持爲公壽曰非敢以賄進見公布衣蔬食具此爲弟子束脯爾公卻之生強以屬吏吏匿取之公後知之責吏而疏生公任滿庫餘金數千兩吏白當歸公公不納獻之於朝公以李某謹愿舉爲庫吏終公之任李循謹守法無過夜有諸生數十人告某監生謀反公立呼監生訊之卽同眾至其家止眾人於外而公入親驗惟多積錢帛無反狀遂叱諸生去越十餘日眾復譁公召監生謂之曰汝壯有力可就武職遂爲徐州旗鼓官後以屢勦土寇有功授守備豐前令胡以錢



穀不清得重譴下獄公爲開除調停使脫然去其督清江船政也  
前任張已遷兩浙負庫金萬許張徬徨無措公曰第行吾爲公徐  
圖之三年得如額爲南城兵馬司指揮籍某御史家檢獲書疏數  
十通公思曰此尙可株連耶盡藏而火之徐州河決徵柳急豐縣  
課柳萬餘束期五日具吏白當責成里役公憮然曰弊有止乎乃  
集士民於庭語之曰河決徵柳甚急吏白當派里役夫吏肆科支  
民不堪矣西郊十里許有荒柳數十頃無主者刈之便今秋成已  
畢莊戶多牛車縣按車給值載柳自往交之甫四日而事集民不  
擾且自刈柳後其地成膏腴民享其利焉公自陽山之豐二鼓渡  
河中流遇賊舟數十飛奔上下舟人震恐公徐諭之曰吾豐縣知

縣也賊齊聲曰此清官不可犯遂散去公赴粵西過小孤風浪大作舟幾覆公默禱而風息公以病乞寓岳陽樓數月夜分夢中若有人呼公速去者再覺移城下而是夜樓火公修清江書院以課士供其飲食紙筆費歲儉則捐俸買穀數千石設三廠施粥貧民活無算乃其立碑頌於湖心亭公歿神色如平生端坐而逝崇祀於學宮公之歷官也長子浹成進士官於外編修君濤與其季弟潤皆幼故其本末皆得之於父執袁公李公與甘陵淮徐士大夫之來京師者或得之老僕劉方蓋不能無遺脫也然得之與人之誦益信矣哉

論曰世以端謹爲士君子守身之事而未可致用也過矣公生而

端謹其居官也一以端謹爲用而收其效以及後人昌黎有言曰  
根之厚者其實茂膏之沃者其光煜信哉斯言哉

右傳魏世倣撰

李君修庵諱允禎字貞甫其先自江西贛縣徙山東之德州數傳  
至逢時嘉靖中爲御史官至山西左布政使二子長洪洞知縣汝  
材次舉人汝棟汝棟以哭父卒是生煥煥生嗣美君之父也君生  
而篤孝祖患痺證轉側需人左右多不稱意得君乃安力學工文  
章中崇禎癸酉鄉試丁內外艱哀毀骨立遺田千畝悉推與其弟  
順治元年起家知故城地當舟車之衝軍興郵傳驛驛君一切按  
符以給貴客不得苛取有強直聲也丁舊二萬餘兵疫死徙過半

額徵不減君編審得見丁七千有奇具牒乞除舊額會調知豐縣  
吏胥遷延爲奸君鎖閉一室集眾焚舊冊於庭晝夜治文書竟得  
請而後行民去重累豐俗喜告訐豪民與奸吏通囊橐有睚眦輒  
控上官使所厚吏下其事逮繫株連事卽白輒破數家產君廉得  
其情甫視事有奸民通詞監司吏持符來索人君持不發吏出不  
遜語君怒杖之堂下立見監司言狀請自今越訴者盡予縣鞠監  
司素重君立發十數事按治具得誣罔杖殺劉某等數人縣中帖  
息初到官庫吏陳設有金銀物君愕然曰此何爲者對曰庫中例  
有羨餘君怒曰庫中秋毫皆官物若柰何以此餌我杖而斥之終  
君任不支一錢吏無敢乾沒者有富民某甲挑其僚壻某乙之妻



乙造門詈之甲因賂盜引乙乙不勝拷掠自誣服君至錄囚見一囚瘠甚手足俱被創心疑之暮微行見獄門半閉有二人切切闇中語君曰此必有異搜獄得外人詰之則曰某有親在獄來饋食耳命呼囚來則晝所見瘠而創者問之曰彼誠親也但嘗挑吾妻吾詈之絕不相往來是安肯食我君閱成案見他盜賊甚多乙獨布一匹歎曰知此布是誰物而可據殺人乎鞫甲具服搆盜誣引并賄獄吏斃乙闇中語者懼新令覆讞趣斃之也因釋乙而論甲及吏如法有妾婦富而子幼其夫之兄欲嫁之而不可乃謀於其黨使一人踰垣入掩獲之言於縣其人自承與婦姦婦號慟言爲伯氏所枉垣外卽伯氏家也君繫踰垣者遣婦與伯氏歸遲十餘

日不訊令吏給繫者曰彼婦與伯氏分財相睦矣且獨坐汝比訊呼伯氏至案前語良久命引去呼其人前叱之曰爾罪應死知之乎頃某言隔垣聞婦叫呼因捉獲是強姦律應斬趣下重囚獄其人惶急曰本無姦渠令某賄我爲之今乃陷我死令逮某至一訊而伏三人者俱論坐有兄弟爭田者直在弟而官常直其兄弟不服數訟不休君判田與弟而切責之曰柰何訟兄兄曰我亦久悔欲歸田與弟臨訟畏曲故不敢耳弟曰向因不直故訟今直矣願以田與兄相持慟哭卽爲兄弟如初河決徐州縣當致柳萬束期以五日吏請責里甲辦輸君曰是必擾民且懼後期嘗見某所有柳林數頃伐之可立辦也官僦牛車送之四日而畢事民寂不知

碭缺令國子生吳某作亂引賊破城君攝令勦賊出不意夜掩擊賊走之撫安居民自吳某外無所問全活若干家數日濟甯軍至聲言且屠城城中盡哭君曰無怖吾當自往卽具牛酒迎數十里外犒師言賊遁已久可不煩兵卽有事攝令者當之兵竟不至自碭破後民動相告以反君一不聽有言某監生盛作兵弩將以某日舉事君馳往視其家見積錢甚多兵刃數事皆缺鈍君曰是無反形若輩無妄言旣而言者不止君召某諭之曰汝以多藏見憎吾去將不免可去爲兵官自全其人竟以軍功顯其保全善良多此類也遷南城兵馬司指揮擢工部營繕司主事新作端門君督琉璃廠董作有勞晉一官有文綺名馬之 賜九年拙分清江浦



督造船船政百弊所叢君銳意剔除侵漁破冒之奸無所容工匠  
衛軍咸便安之關無無名之征隱漏者補稅而已不取罰鍰向之  
猾吏身無完衣在官三年凡所興革皆爲後法著漕使五集數十  
卷歲饑出穀數千石爲粥振民民立碑頌之既事有羨金數千悉  
表上諸朝歷虞衡屯田二司以郎中遷廣西左江道僉事甫行  
至岳州而病致仕家居又五年而卒君天姿英敏應機立決丰裁  
峻厲人不可干以私而用心樂易表裏洞然不爲崖異之行所至  
有惠愛人皆久而思之始公之去豐夜渡河遇劫賊君大聲曰我  
豐縣官也賊競言此清官勿犯遂解去江行過小孤大風晝晦舟  
如磨旋君出立船上祝曰李某生平作吏無私神其鑒之不然者



舟速覆祝畢天清風順瞬息百里寓岳陽樓數月忽夢中聞人言  
宜速去質明而行其夕樓燬於火州人至今傳以爲異君卒若干  
年有司祀之學宮子三人長浹芮城知縣次濤翰林院編修次潤  
廩生

贊曰余久客淮陰往來徐沛見榷關使者及諸守令率齷齪鮮能  
以風節自樹而後乃今知修庵君之賢君去今僅三十年跡其行  
事已爲古人悲夫吏治之日下也世言廉吏多矯飾若君之治行  
至於格凶暴通神明非至誠而能然哉余於編修爲後輩得悉君  
之生平採其大者著之家傳異日傳循吏者庶有徵焉

右傳潘耒撰

按是編擢官未任仍列原類李公應移卽署礙難覆刊正誤於此

方國棟

方國棟順天宛平人明大學士從哲從孫幼聰敏十歲能屬文順治二年舉人除蠡縣教諭遷國子監助教晉博士擢刑部主事歷員外郎中十六年出爲廣東按察使僉事分巡海北道值巨寇鄧耀盤踞海島中時時出沒剽掠國棟請於上官集兵三千分五路以進又慮賊之他逸也檄鄰道及安南各出兵分扼要害耀遂受擒招徠餘黨全活無算雷廉諸富人爲賊所誣株繫者眾國棟察其冤盡爲昭雪諸富人裒白金數千爲報國棟駭然曰吾憫若無辜耳奈何污我力卻不受遷山西甯武兵備參議以法飭武弁謝絕餽遺康熙六年裁缺十二年改分守蘇松常道地濱太湖隄岸

歲久傾圮乃躬率吏民併力修築又修沿海墩臺及吳淞劉河兩  
關區畫經費不以擾民伶人倚中朝貴人勢恣爲奸利有司折節  
下之與行釣禮國棟不爲少屈伶又以非法干請峻拒不可時大  
兵方征閩粵封書旁午國棟事事與民休息每遇急徵從容布算  
鎮之以靜芻蕘煖糧之需口儲以俟軍興賴以無乏而民間晏然  
若不知有兵事者十六年有採木之役親詣宜興深山中晝夜督  
視以勞遊疾歸遂卒民謳思不置二十二年立祠於虎邱山麓祀  
之

右 國史館本傳

康熙十六年冬分守蘇松常道參議方公以疾歿於位闔治聞者

自士大夫以下至於委巷老稚無不慟哭失聲及明年春喪行遮道號呼拜送者數十里不絕公子其樞旣免喪以事至吳舟過閫胥兩門父老爭扶攜往觀或太息泣下相告曰見公子猶見我公也其明年公子復至聚觀如初其泣下者亦如初嗟乎公何以得此於民哉蓋吳人入本朝以來甫脫兵火卽旱潦疾癘之災無歲不有十室九空蕭然愁歎而爲有司者不思覆露拊循之術方撓興大役以朘其生而摧其力獨公用清靜無事爲治順民之欲與之休息故輿頌悉歸於公子嘗論之吳人所患如病羸者然神耗氣衰雖峻補猶虞其不任況可益以苦寒刻削之劑乎是宜節其起居調其衣服飲食然後可以稍延公能得此意以治民民旣



翕然悅服而又惜其設施未竟也儻天假之齡俾得建牙開府於江淮之間以宣布 朝廷德化不當大有造於吾吳與然則公之歿也豈惟公之不幸直吳人之不幸已公諱國棟字干霄別自號艾賢先世居浙之德清後徙順天明太師文端公從哲從孫也六世祖允及高祖華曾祖天敘皆贈少師吏部尙書中極殿大學士祖希哲縣學生私謚恬節先生考士瀄以文端公廕歷官至饒州太守公讀書明敏過人十歲善屬文順治初與伯兄皆以諸生舉於鄉伯兄旣掇進士而公連不得志於禮闈遂授蠡縣教諭遷國子監助教晉博士丁饒州公艱服闋補故官遷刑部江南司主事歷雲南司員外郎福建司郎中出爲廣東按察司僉事分巡海北

道巨寇鄧耀盤踞海島中時時出沒剽掠爲雷廉患公請諸制府  
集兵三千分五路以行而躬總其節制繼又慮賊之他跳也急檄  
鄰道及安南國王各出兵分搃要害耀遂受禽招徠餘黨所全活  
數千人廉人爭感公德刻主於名宦祠生尸祝焉遷整飭甯武兵  
備參議久之以裁缺改分守蘇松常道公屢官監司率在兵戈又  
擾中更事多矣及莅蘇蘇居江浙舟車之衝視他道尤劇而又值  
王師有事於閩粵羽書旁午芻糗糧之需猝不及辦有司皆  
惴恐公素具成算從容指揮咸中冑歎軍興賴以無乏而民間晏  
然若不知有兵者未幾而採木之役起疾驅入宜興深山中晝夜  
督視以勞邁疾而跼踰三月歿是歲十一月某日也享年五十有

七公頽然長身問學淹雅工詩喜書而於弈尤入能品與人交不  
翕翕熱亦不落涼雖接布衣下士未嘗有疾言傲色歷官三十  
餘年補衣糲飯絕無聲色蒲飲之好約束胥吏往往皆重足立而  
撫視士民則藹然具有恩意尤耿介自守不爲禍福利害所搖終  
其身如一也雷廉諸富人被賊誣後先株連下獄公察其冤力爭  
於制府前悉脫其械而出之諸富人念無以報哀白金數千兩壽  
公公大駭曰吾憫若無辜耳若柰何以此污我卒卻不受中朝貴  
人遺幸伶入吳伶故吳中無賴子里人屏不齒者也至是怙勢恣  
爲奸利有司以貴人故爭折節下之至與揖讓行鈞禮公獨不少  
屈伶又以非法干請亦不聽或勸公盍稍委曲爲一官計乎卒峻

拒不可伶大怒去然亦不能毫毛有加於公也由此聲望益大重  
喪歸之次年卜葬於大興縣方家莊祖塋之次元配賈恭人前卒  
遂祔葬焉子男一人辰卽其樞例監生娶徐氏側室葉孺人出也  
女一人殤賈恭人出也其樞好學而有文所娶爲太僕卿武進徐  
君某女故數往還吳中其始至也實來徵銘且曰知公者莫子若  
也予惟前此請告十年適當公治吳時公嘗以微言動予曰何以  
教之子正色曰昔漢杜密家居每多所陳託而劉季林以閉門埽  
軌稱清高士頗爲密所譏評然黨事之興季林竟免使君將使某  
爲密乎抑甯爲季林也公笑而領之故其相知最深不可以不銘  
銘曰



鼎鼎鉅族文端基之碩儒循吏惟公繼之公未來吳吳人惶惶及公至止歌舞康莊仁以矜物廉以律躬活千人者後必有封吳人思公瞻望公子餘慶縣縣是續是似

右墓誌銘汪琬撰

分守蘇松常道參議方公諱國棟字干霄號艾賢以康熙十六年冬沒於位其政蹟在口碑其家世生平在公子其樞所述行略及翰林院編修汪公所作墓誌銘中其初仕也由舉人授蠡縣教諭遷國子監助教晉博士遷刑部江西司主事歷雲南司員外郎福建司郎中出爲廣東按察司僉事分巡海北道遷整飭甯武兵備參議裁缺改分守蘇松常道其在廣東也僉雷廉巨寇鄧耀而招

徠其餘黨白諸富人冤而卻其金其在甯武也以法飭武弁而盡  
謝絕其饋遺其光明磊落寬嚴有節所至如一彰彰在人耳目固  
無容復贅一辭矣至其在吳也正值閩粵用兵羽書旁午之際方  
是時大吏當軸者惟以能辦事爲貴不暇問民生疾苦有司承風  
旨朘削窮民皮骨幾盡使無人焉覆翼噢咻之勢窮力極揭竿斬  
木而起如明季之禍不難見也寇橫於外盜起於內又紀綱盡廢  
人不復知有廉恥天下事尙可爲哉公獨於干戈擾攘之中事事  
思與民休息每遇急徵從容布算鎮之以靜芻蕘糗糧之需卒藉  
以辦而民宴然嚴飭屬吏無般民生而摧其力自是郡縣稍稍知  
以百姓爲根本不敢盡力排擊剝割當義所不可生色峻拒雖臨

利害不肯委曲假借中朝貴人遺幸伶入吳枯勢縱恣大吏爭折  
節下之公獨不少屈綱維不至墁地者公爲之中流砥柱也公旣  
以仁愛培國本以廉恥維風俗一時精培克甘脂葷者或不以公  
爲然然卒無如公何公旣沒之二年逆臣投首四方漸次削平鷹  
揚貔貅之士奏功於朝皆以爲神器震而復甯者師武臣力也孰  
知賢者弭變於無形撫輯殘黎固結人心使腹內安堵而後將帥  
之臣得以成功於外譬之治病然披堅執銳從事疆場者治其標  
者也正己率屬潛消禍變者固其本者也本不固則外病未除而  
內病雜作雖有良醫豈能爲治然則公之毅然持正於舉世若狂  
之時安民生而挽頽俗以爲郡縣倡使封疆大臣無內顧之憂而

以次平定禍亂其功顧不大哉公之在位也隴其適待罪嘉定爲公屬吏得親炙其休光公不鄙其不肖而特嘉其樸拙時引掖獎勸之及隴其罷歸公爲扼腕太息方欲以閒散之身從公於政事之暇從容盡叩公之學且欲問公家相國文端公中朝故事以定千秋之疑案而公忽溘然棄世矣公子其樞旣葬公於順天府大興縣方家莊祖塋而以其行略墓誌示隴其謂隴其曾備員公之宇下且嘗蒙公獎歎能知公之心不可無一言以表之隴其學疎文陋豈能闡揚公盛德特嘗慷慨世變歎今之論治者皆爭其流而不知其源獨公能於嚴霜堅冰中噓以陽春消弭禍本可謂得其源者推其功實與頗牧之徒相表裏而人顧不知也隴其故不



復論其他而特表其卓然獨立於吳中而關天下安危者以備史官之採擇云

右墓表陸隴其撰

公諱國棟字干霄別自號艾賢其先浙之德清人後徙順天明太師文端公從哲於公爲從祖故公之六世祖允及高祖華曾祖天敘皆以文端貴贈如其官考亦以文端廕歷官太僕寺丞工部郎中入本朝遷饒州守未及任而卒公生而穎敏過人十歲善屬文十六補郡諸生順治乙酉與伯兄于光同舉於鄉伯兄成己丑進士而公連不得意於禮部試尋例授蠡縣教諭遷國子監助教逾年升博士丁饒州公艱服闋補原官遷刑部江南司主事歷雲

南司員外郎廂建司郎中決獄務寬恕多所平反每與尙書爭獄  
事必傅經義據律例尙書多屈意從之出爲廣東按察司僉事分  
巡海北道巨寇鄧耀踞海島時出沒剽掠爲雷廉患公請諸制府  
檄五路裨將會兵三千躬總之進逼賊巢公計賊窮蹙必跳而走  
預爲檄檄鄰壤左江道及安南國王勒兵防他逸耀果惶懼乞降  
乃散遣其眾賈脇從招餘黨所全活以千計雷廉富民被賊誣株  
屢繫獄者纍纍公爲白其冤破械出之富人裒白金數千兩壽公  
公駭曰吾憫若無辜耳若柰何以金污我卻不受雷廉人感公德  
生爲肖像祀焉遷山西布政司參議整飭甯武兵備甯武地當邊  
徼故瘠貧官府所需率取辦於商估吏卒因以旁緣侵漁於是行

旅不至公私交困公到官革易前弊屬吏洗手奉法商貨流通嘗  
攝雁平道雁平主給三邊兵餉先時監司多貪穢餉不時發又股  
減其數公悉更之出納亡毫髮染久之以裁缺改分守蘇松常道  
康熙十二年也蘇當江浙舟車之衝公甫至會用兵甌閩大軍數  
往來其地芻茭半糜之供責辦倉卒大吏督趣郡縣以集事爲能  
郡縣吏承望風旨益苛急繳繞不暇爲閭閻計公獨從容籌畫務  
寬民力閭左晏然而軍亦無乏興 詔遣滿洲蒙古兵數千駐防  
蘇時議築營舍於王府基公以謂兵民雜糅勢難久安且基爲僞  
吳張士誠宮阨明初嘗建府署其上官吏罹禍甚酷後遂爲禁地  
爭於中丞甚力乃改營南城隙地民以爲便善權寺在義興萬山

中寺僧與豪姓陳氏爭墓地久不決陳氏聚眾百餘人燔燒寺屋  
殺僧眾令以倡亂聞中丞議遣兵撲滅公曰陳氏爲墳墓計憤不  
顧難耳非謀反也急之則亂成自請單騎往馳詣其地縛首禍數  
人寘之法餘無所問事遂平甲寅以後三陲連歲用師度支苦不  
給 詔督撫以下吏計畫有可裕饒者許便宜條上公持論以爲  
古今生財之法不過開與節兩者議開於今日無可復加則當議  
節而節儉當自 朝廷始舊制歲市江南官布五萬匹僅以供宮  
府賚予宜可罷而歲省帑金三萬計中丞采其議上之 詔報可  
公性儉約歷官三十年補衣糲飯日設纔具鮭菜倡優聲伎裘馬  
珠玉玩好之需一無所嗜操胥史如束溼薪而拊循士民藹然具



有恩意吳俗健訟喜投訴告密公欲窒其流故訊贖填委或經月無所按問按亦務寬慈管不過廿凡法吏所爲關蹀械脰拶指諸治獄具或經歲不用與人交和易無町畦雖接卑下士未嘗疾言倨色然意所不可則嶄然不可以勢利敗中朝貴人遺幸伶入吳伶故吳中亡賴子里人屏不齒者至是怙勢恣爲奸利事有司以貴人故折節下之與鈞庭揖讓大吏亦往往假以優禮公獨不少屈伶以非法干請亦不聽伶大怒去然竟亦無如公何其特立如此江南需戰艦檄公採木義興山公督率吏士跋履叢篁峭阻深林窮壑之中以勞勩邁疾遂不起卒以康熙十六年丁巳十一月七日距其生明天啟辛酉得年五十又七娶賈氏前卒追封恭

人子男子一辰舉人娶都察院僉都御史武進徐公元琪女側室  
葉孺人出女子一蚤殤賁人出母張 封太恭人所之官必迎  
養官舍人以爲榮年八十餘後公若干年卒公子辰奉喪歸之次  
年營葬於順天府大興縣方家莊之祖塋初公喪百姓咨嗟罷市  
相與斂錢致奠醑以千數及喪歸爭設繁案路側輿柩不得行後  
三年公子以事至吳舟過閭胥兩門父老相扶攜往觀有泣下者  
又明年士民合詞請祀公名宦以爲未足報公又合詞請於臺立  
專祠虎邱之麓祀之嗚呼公何以得此於吳民哉憶公莅吳時蘅  
以部諸生辱下交嘗爲文壽公大略謂吳俗奢而民實貧譬如聲  
色剝奪之夫狀貌魁然肥也然元氣朘削外彊中乾醫者不察又

投之以金石之藥其患將有不可言者謂公宜噢咻而安養之於是乎救之以節儉載之以清靜吳疾自是有瘳乎公不鄙愚言其所以治吳大指如蘅所稱說嗚呼吏治當救火揚沸之日而公獨澠然濯之以清冷則其感人也易其入也逾深宜吳民之尸祝公者久而不忘也公子辰字其樞年少力學攻文章所交率知名士既操公行略乞銘於編修長洲汪公琬又請於知靈壽縣平湖陸公隴其表公墓復以傳屬蘅蘅以賤辭公子請益堅蘅復於公子曰古名臣功德足不朽者必件繫其歷官行事列之爲狀用牒考功太常議證牒史館請垂編錄而狀往往皆門生故吏爲之蘅請依古撰行狀一通令後世傳循吏者有所考公子曰諾乃采誌表

所書參以耳目所覩記稍加詮次俾存之家乘謹狀

右行狀邵長蘅撰





王天鑑

公諱天鑑字近微別號毅州爲人有才略足任大事順治二年舉於鄉明年登進士除知恩縣恩古貝州地界高唐東平閒明末爲羣盜藪嘗一歲七失守公甫下車寇突至一邑皆惶恐公開門坐城樓從容指揮如平時賊疑有伏引去乃治樓櫓濬隍塹爲門五爲樓二十八復按鄉鄙立寨十有九得步卒萬八千騎士三百堅城精卒屹然若雄鎮賊斂戢無敢犯恩境者都御史特疏聞於朝屬公得治兵當是時鄒滕閒榆林賊張甚濟以東諸盜倚爲聲援往往攻破城郭公廉得恩境賊渠姓字至夜仗馬箠叩門一一呼其名賊被衣起惶急不知所爲皆稽顙吐實願效死因盡得通

賊者禽斬之由是恩境以平每他郡邑警急兩臺輒檄公往公建  
旗鼓屢捷以聞賊嘗據曹縣都御史督諸道兵捕之公率所部爲  
前鋒冒矢石先登諸道兵踵其後遂復其城一日公追賊急陷重  
圍顧從騎纔數十會日暮矢且盡賊故久銜公見其騎少急馳之  
圍數匝公操短兵殊死戰手格殺三人賊稍潰乃馳去公在恩數  
年與賊大小五十餘戰多所斬獲賊覘其旗幟輒齧指遁賊平建  
育英書院課諸生招集流亡墾荒田千八百有奇循績大著撫按  
交章薦之七年大計舉卓異 賜衣一襲晉禮部儀制司主事以  
外艱歸服除補原官十一年 世祖章皇帝行藉田禮時掌故闕  
失公參酌古今各得其宜 命陪祀與宴蓋異數也轉祠祭司員

外郎是年秋典山東鄉試稱得人遷儀制司郎中提調會試未幾  
簡京官才優經濟者出爲監司大宗伯首推轂公擢陝西布政司  
左參議分守河西道至任與諸吏約曰側媚上官顛倒屬吏獵民  
枉法此不弧矛而盜不知死所者也公素長治兵乃按籍討軍實  
戒諸弁勿糜芻糗充私橐一時吏治軍政肅焉公剛介負才氣不  
習爲脂韋曲媚數以戇直忤上官意歲餘竟謝病歸先是用大宗  
伯薦未授河西時偶讀空同集手其卷卜遷轉地得慶陽亦是先  
王地城對東山不啻墳之句旣而果得河西至則葺不啻墓訪李  
獻吉之族周卹之至是歸絕跡公府搆數椽曰墨莊積書丹鉛其  
中公門人翰林侍讀蕭君惟豫出視畿輔學政按上谷公不與通



尺書既竣事蕭訝生徒無王氏子弟及詢公始知公禁弗與試人  
咸服其介焉家居二十五年物望益高康熙十三年戶部侍郎魏  
象樞薦於朝謂其智深勇沈近於聖賢之自反者公堅臥不起  
年六十卒於家公先世江甯縣人始祖政明洪武閒官宣府左衛  
正千戶遂占籍爲宣鎮人曾祖元春世襲千戶祖朝彥太學生父  
道舒萬全都司學生封承德郎禮部儀制司主事母劉氏贈  
安人子一袞太學生女子一公幼食貧用椁棺葬母常痛之終身  
病將革誠其子亦以椁棺斂袞號慟不得已椁而厚其槨嗚呼可  
謂至性純篤之君子已爰系之銘銘曰  
公之才略虎視龍驤公之信義皦日秋霜世未竟其施而僅見爲

循良嗚呼 朝廷非不知之柰公之龍變而退藏澼澼鳴泉鬱鬱  
高岡棲身椁棺母氏之傍

右墓誌銘李澄中撰

公姓王氏諱天鑑字近微別字毅州其先江甯縣人始祖政明洪  
武閒官宣府左衛正千戶遂占籍爲宣鎮人曾祖元春世襲千戶  
祖朝彥太學生父道舒萬全都司學生 封承德郎禮部儀制清  
吏司主事母劉氏 贈安人公生而清羸如不勝衣母置膝上口  
授孝經論語輒成誦爲諸生屢冠其儕偶順治二年舉順天鄉試  
明年舉禮部除知恩縣恩故貝州地居河北山東要衝明末爲盜  
藪寇至令長輒率居民空城去嘗一歲七失守公甫下車進耆老

國朝通志卷之二十一  
諭之曰往歲之失由人無固志耳賊何能爲自今勿復逃視令所  
向賊數萬奄至城下公方坐城樓從容指麾賊疑有伏解圍去於  
是治樓櫓浚壕塹爲門五爲樓二十有八又申約束嚴候望時巡  
徼浹旬守具大備公又曰賊所以得狂逞者由無以禦其外也乃  
按行鄉鄙舉古田役追胥之法立砦十有九礮鼓相聞旬日閒得  
步卒萬八千人騎士三百戰具亦備賊根株窟穴悉除自是無敢  
犯恩境者巡按御史特疏聞於朝巡撫都御史屬公得自治兵  
是時榆林賊未平濟西東兗諸賊所在竊發遙爲聲援公廉得縣  
境賊渠數輩乘夜馳至其鄉以馬筆叩戶呼其名甲乙無一誤者  
賊錯愕出不意皆拜堂下願效死因盡得其情實與嘗通賊者禽



誅之其發奸擿伏皆此類也他邑有寇警都御史輒檄公往賊聞其名至咋指相戒賊據曹縣都御史督諸道兵會勦公率所部爲前茅親冒矢石深入賊地諸軍繼之遂復其城一日追賊急陷重圍顧從者十數騎冰中矢且盡日暮賊大至合圍數重公殊死戰手殺傷數人潰圍出不失一騎馳至一村村人詢知爲公也駭曰適神祠中泥馬自汗公豈得神助乎視之信然公在恩數年與賊大小戰凡數百合馘俘招撫無算盜賊屏息其在行營也又嘗救趙氏諸婦女完其家室活孝廉耿某幼姪歸之不絕其世釋管永祥等冤獄他如招徠流亡復業以數千計墾荒田至千八百頃建育英書院俾諸生以時絃誦其中其貧而廢書者贍之一時循良



能吏無出公有紀錄者三疏薦者六生祠尸祝者五七年大計以卓異聞 賜袍服擢禮部儀制清吏司主事尋丁父艱服闋補原官十一年 世祖章皇帝舉行藉田禮時掌故闕失公參酌古今典章釐然有陪祀與宴之 命蓋異數也遷祠祭司員外郎是秋典山東省試得人最盛十二年晉儀制司郎中提調會試會 上諭簡京朝官才優經濟者出爲監司公在選中擢陝西布政使司左參議分守河西道公至河西與吏約曰側媚上官顛倒屬吏獵民枉法此不戈矛而盜不知死所者也吏治爲之肅然公固長治兵乃實按籍討軍實戒將弁勿以軍糈肥私橐軍容一變公持己剛介至是屏絕苞苴唯日飲北地水耳性慤直不善事上官年餘

堯謝病歸先是未有河西之命公一日讀空同集偶卜出處得慶陽亦是先王地城對東山不窳墳之句頃之果驗人以爲異至則葺不窳墓求獻吉之族周恤之歸田以後杜門不出長吏罕覩其面構數椽曰墨莊積書數千卷丹黃甲乙州次部居晨夕析疑義者惟胡君以溫所謂東甌先生者也公門人翰林侍讀蕭君惟豫出視畿輔學政按上谷公不與通旣竣事生徒無王氏子弟蕭謁公乃知公禁弗與試且曰師弟契闊數年訊寒溫一語足矣豈以子弟相累蕭君視畿輔學廉正爲 本朝第一亦公有以成之也門生或有餽遺卻弗受曰飭簞簋惜名節舉主食報不淺矣林臥二十五年始終一節物望益高康熙十三年戶部侍郎魏公象樞

薦於朝公一再辭竟不就居憂盡禮撫兩幼弟皆成立家居恤  
嫻黨贍宗族代畢婚嫁者甚眾魏公謂其有上馬殺賊下馬草露  
布之才有一介不取一介不與之守晚年涵養智深勇沈駸駸乎  
近於聖賢之自反者人以爲篤論公生以天啟壬戌六月初一日  
亥時卒以康熙二十年辛酉六月二十日子時得年六十配張氏  
封安人子一人袞太學生女子一人適張松年孫一人公虞明  
萬厯閒先太師公節鉞鎮宣雲與公之曾大父有通門之舊予雖  
未及見公然少聞鄉先生言長吏廉直有幹局者必首公又聞公  
辨賊方略甚具雖漢之尹趙無以過也而公里居亦時時爲人道  
予姓字彌畱之際屬胡先生洎弟錫言吾卽死必王子狀吾行嗟

乎公何以信予言至是哉公門人以文章功業知名當世者項背相望宜狀公以公易簣鄭重之語誼不可負也因不復辭件繫事跡冀備史氏采擇謹狀

右行狀王士禎撰





鮑開茂

元置行中書省於諸道又置行御史臺設平章參知政事御史大夫中丞等官皆視京師其權最重明洪武初尙沿其制後乃改爲布按二司然其權猶重布政使缺往往以尙書出掌之如黃忠宣之於交趾道是也厥後設巡撫又設總制以莅其上於是二司之權始輕 本朝因明之舊而臺諫屢以裁官爲請於時茂異之才退居林藪而不獲見用於時者多矣此吾於鮑公而不勝愾然太息也公諱開茂字夏生別字素垣濟南之長山人曾祖君恩祖爾祿父化龍性倜儻不殖生產公幼而穎異讀書目下數行於是使長子開芳治田而使公治書公發憤日均爲人子兄任其勞弟享

其逸可乎不能自致青雲以報吾父兄者非夫也研鍊鑽穴業以大就中明崇禎壬午鄉試世祖皇帝順治丙戌傳以漸榜賜同進士出身授瑞州府推官志存矜恤人稱明允江西初定學校未興臺使交薦以按察司僉事攝理通省學政奉 兪旨公感激

朝廷異數謂江西理學節義之鄉鹿洞鷺湖規條具在日進諸生講明而訓課之西江文教之興實自公始己丑湖南用兵袁州臨吉之間伏莽嘯聚所在蠶起庚寅遷湖西道布政使司參議至卽調兵食簡精銳申約束定賞罰廣閒謀據隄塞又示恩信以招徠之散其脅從卒用降人爲鄉導擒賊巢穴於是賊渠劉京就禽其黨皆鳥獸散而上游之路始通公上功幕府疏聞於 朝是役

也山坑之捷按釋擄掠婦女七十餘人顧里之捷按釋婦女一百六十餘人皆完其室家如更生焉大盜既平然後葺學宮勸開墾三郡汙萊悉成沃壤方次第舉行而公以內艱歸矣戊戌起家肇慶道副使兼攝瓊雷肇多獠人瓊多黎峒往往梗化聞公至相告曰是平湖西劇盜者皆帖帖毋敢犯法辛丑改陝西西甯道以父老將請侍養父不可乃泣涕受命尋宅外艱乙巳起補鄜延安經大盜蹂躪之後土曠民稀人不給於耕耕不給於賦賦稅日迫戶口流散公慨然曰明末劇寇亂中原皆延人也今此子邁可不思所以勞來而安輯之乎是非折畝不可乃作折畝議上之督撫具疏上請報可於是山川流民歸者數千家戊申有旨省方



面官遂奉裁歸而公亦倦游矣里居與諸遺老修香山洛社之會無復用世意周村巨鎮四方商賈走集公世家於此視錢刀若將挽焉終其身口不道計然之策卽此一事過人遠矣生以萬厯乙卯十二月十五日卒以康熙二十三年四月初九日享年七十階中憲大夫歷官陝西按察司副使元配周氏繼張氏 贈封皆恭人治行相望而撫育子女以克終公志則張恭人之功於鮑氏也子男子一人秉謙歲貢生候銓教諭子女子二人一適子兒啟汧一適益都趙漸孫女一人公之葬少司寇高公珩旣銘之矣後二十三年而予爲之表銘曰

猗公之才允文允武絃誦詩書折衝樽俎湖西誓師殲彼虓虎雕

陰分泉均茲稅畝九天雷電三春膏雨公之宏略建牙開府未竟厥施以篤餘祐

右墓表王士禎撰

RECEIVED  
K. I. N. E. H.

1944

賈壯

公諱壯字泰華別號止庵襄城人幼嗜學不事家人生產順治乙酉舉於鄉丙戌成進士授安慶府懷甯縣知縣懷甯故江淮之衝也號難治公至課農興學疏驛傳皆從宄蝟中舉之會江西金聲桓叛勢甚張所向無堅城將偪懷甯先遣賊持偽牌招降上下驚愕無措相視莫敢發一語公獨告當事者曰懷甯據上游爲江淮要衝係南北安危今賊以虛聲恐喝當卽倡大義斬其僞使以鼓勵人心糾眾固守待王師之至彼逆醜進不能取退不能守久將自生內變卽或奔突危急吾輩誦詩讀書所學何事豈甘讓余闕爲千古奇男子乎公但以僞使昇壯壯請以身任之後雖有變



不敢貽累公也是時公慷慨激烈髮上指勢不與戎俱生左右環聽者皆咋舌當事者亦爲感動從之公遂驅僞使斬於通衢碎其牌置守具晝夜嚴備分數道督芻精聲言禁旅北來又於險要設伏防其暗襲賊懼不敢近懷甯境事平以功首列薦剡壬辰內召授戶部主事督餉宣大監錢局公以餉多耗於營弁每給發必預以定數示士卒吏不得爲奸轉員外出督徐州糧庾革夙弊有治聲未幾升本部郎中丁父憂服闋補前職尋遷河東道兵備僉事會有忌者羅織懷甯前代事嗾其黨劾公有旨解任赴勘當是時公去懷甯已十年餘然士民素德公聞之握瓣香持燭分馳當道爲公鳴冤曰我賈父安有此一日積數千紙公至童叟男婦

迎於郊擁馬首至不得前謹呼聲震天地撫按兩院交章以聞  
上乃褫誣公者職命公候補公以前居父喪過哀有夙疾既  
遭讒又自念性素骨鯁終不能與時俯仰遂歸里闢小園搆夕佳  
軒左右置圖史耽玩其中暇則邀故舊遊山水有終焉之志適邊  
陲需才乃卽家起公爲榆林兵備僉事公力以疾辭不可遂抵任  
籌畫邊餉撝約領之法邊人便之二年以積勞卒於官年五十七  
公貌豐碩雄偉長七尺餘讀書不爲章句喜大略善料事處倉卒  
如平常未嘗震懾有詐僞者一見立辨尹懷甯日譚泰固山統兵  
南下州縣吏役苦供應繁難多逃匿官不能制公以軍法部署其  
民寂然不聞督催聲而事皆辦固山異之延見公嘆曰書生中乃

有此人當公之督庾徐州也徐故東南名勝地公於黃茅岡建韓  
蘇楊陳四賢祠立雲龍社集遠近名士會文公親爲品隲政暇輒  
攜榼登嘯雲亭與諸騷人唱詠有彭城偶錄學步集行世至今人  
猶想見其風流云

李來章曰余讀元史至余忠宣守安慶事未嘗不大其功嘉其節  
泣然流涕因以想見其爲人公於三百年後銅符墨綬出宰懷甯  
懷甯者安慶之首邑也雖與忠宣先後同官一地然卽官之職較  
之專閫重寄不及遠甚公獨能力排眾議碎僞牌斬僞使設伏置  
具固守孤城以忠義倡江淮牽制賊勢使不敢北噫誰謂古今人  
不相及哉

右傳李來章撰

四庫全書

卷一



國朝言行錄卷之五

五

王紫綬

王金章嘗從老儒劉文奇學劉家沒於水王爲置田園廬舍後病卒爲之當葬情禮甚備予見其哭師詩警句云門無司馬求書使室有黔婁正被髮陶九成載橋李願德玉葬其師新昌俞觀光事此近之矣

右池北偶談張維屏錄

王紫綬字金章一字蓼航河南祥符人順治三年進士官浙江糧儲道有知咫堂集

右聽松廬詩話張維屏撰

國朝文獻類考卷一百五

三

李允岳 王震生

李允岳字嵐如河南永城人順治丙戌進士授山東道御史有重計典禮隱逸諸疏當時稱爲碩畫出按廬鳳諸郡值流寇餘孽拒官軍以德威諭服之後督學江蘇崇古學正文體拔擢寒畯然竟以杜請託忤當軸左遷遂乞休同郡王震生字寅東睢州人順治壬辰進士歷官戶部主事總理通州糧儲釐剔積弊轉員外郎協審旗下事務有不可者與滿官持之必力升刑部郎中平反必謹未幾以江西提學僉事病免弟嘉生亦成進士時比諸萊陽二宋任建昌府推官有宦績

右傳查岐昌撰





南鼎甫

康熙二十六年月日渭南南毓涓以其世父鼎甫狀走二千里來告曰涓世父嘗備官於朝公清直諒爲世聞人不幸遠宦邊徼遭時大亂瀕於死者數矣冒潦溼犯霜露出九死一生幸而得歸歸而病且死死無三尺之孤昔曾王父廣川君行述於先王父司空王父年錄世父述之今世父平生行實湮沒弗彰責在小子四世兩門以姪狀叔悲哉世父歸自蜀年六十餘老矣涓一日從容請立後世父嗚咽流涕曰吾家四世伶仃在子惟吾在孫惟汝苟汝克舉孫使主吾後不斬先人祭祀足矣安望其他言未竟涕泗交頤下涓泣家人皆哭失聲涓遂不敢再請世父未病數言生平

心相知惟今國子祭酒王先生將來以墓道之銘累之世父歿涓  
以治命走京師而先生宅憂歸濟上非先生言世父目且不瞑予  
奉書泣下其忍不銘按狀南世之先自晉入秦世居渭南田市里  
正嘉閒瑞泉先生大吉姜泉先生逢吉兄弟皆進士起家講明橫  
渠之學姜泉生陽谷先生軒嘉靖癸丑進士由翰林歷官副使著  
書滿家陽谷先生有四子次憲仲萬厯甲戌進士官止棗強知縣  
是爲廣川公次師仲萬厯乙未進士歷官禮部尙書是爲宗伯公  
宗伯生居恆官生早卒卽君父也廣川生居益萬厯辛丑進士歷  
官工部尙書世稱二太先生君少孤撫於司空司空無子以君弟  
廷鈇爲嗣則涓之父也君幼而方嚴雖兒戲造次必整容七歲居

宗伯憂如巨人喪祭以禮八歲通經史日誦唐人詩八家古文爲  
文章有根柢年十五補縣庠生有聲崇禎己卯中副榜讀書北雍  
亡何丁甲申之變司空殉節廷鈇亦死君哭踊絕復甦風雨漂搖  
譙羽脩尾幾無室家順治丙戌中陝西鄉試受知益都孫文定公  
累上公車不第謁選人得柳州府推官時龍城尙阻聲教隨大軍  
駐桂林奉臺檄閱兵亡賴子詭冒尺籍坐糜軍食甚眾君令魚貫  
以進聞詰履貫年齒入伍月日率蒼黃無以應遂盡得實而汰之  
一軍驚服無敢譁者又奉檄攝昭平卻例金千餘弗受以六條厲  
學宮以五事諭百姓巡按御史田君歎曰南君三月昭平勝他人  
數載再攝平樂墾荒均徭如昭平之政大兵入龍城攝知府事首



布 朝廷威德明示 詔書以綏柔遠人之意粵兵驕橫民多去  
市井區深箐中君慷慨與將帥約盡破文武藩籬同心戮力爲  
國家奠南荒計於是流人漸集獠獠輸誠者二十餘部諸生崎嶇  
自歸者九十餘人柳僻在徼外訟或不兩造而以賄免君懲其弊  
不遣一役下屬邑至卽庭鞠立罷遣之囹圄一空報最爲諸郡第  
一稍遷同知河閒府怡然曰吾入粵親故送酒水上皆相視流涕  
罷酒訣去以爲此生不復相見在柳再病皆製襪今幸生還北渡  
洞庭初望不及此吾敢負丞哉其在河閒也直道事上閒有齟齬  
侃侃以去畱爭之不少貶入爲戶部浙江司員外郎遷禮部主客  
司郎中皆以廉幹聞會蜀撫請增設四道擢分巡松威道按察司

僉事龍安占陰平地松潘屏岷山之陰高山大谷番回雜處君推  
心置人腹中益申明約束郡縣守令緩賦稅省刑罰與民休息民  
戴之如私親尋署按察使事赴成都甫兩閱月而滇南告變僞檄  
至大吏集議君斷斷持之曰死耳敢污僞命以上辱 朝廷下辱  
家門哉賊知不可強遂聽解官賃居城南趾不達城市者七年先  
是君左足不良於行至是增劇吉都督孫略者君媼家爲謀橐篋  
車馬始歸秦歸日嘯詠芝山酒水之間自號六如老人癸亥冬十  
一月十九日方命酒無病而逝得年六十有六君內行修潔事必  
師古年十四迎田恭人於頻陽六禮皆如古不惑流俗葬司空及  
弟廷鈇於新市皆如禮孤兒幼女撫之如己出嫁嫁以時幼受經

郭先生伯固郭既歿教其子修羽爲諸生振羽授室生子其力行古道皆此類也渭南南氏關中之望人門不可梯接君生於富貴澹泊清儉其天性疏直不立城府當官剛勁不可撓折與人交初若孤峻難合久之更樂其坦易予在禮部與君同省署君固落落獨引予爲同志以蜀臬入 覲京師未至前數日夢君執手殷勤道契闊已而君至笑謂元白梁州之事無異也君善書多著述所著壽樂園集金臺玉壘岷江諸集如干卷藏諸家元配田氏天啟壬戌進士御宿公女勤儉嚴慎克相夫子累 封恭人生萬曆乙卯九月十七日卒康熙十九年庚申十一月二十一日得年亦六十有六以再從姪毓溥子士棻爲後毓溥志也銘曰

終南之陰河渭之陽石麟辟邪鬱鬱相望宗伯司空奕葉用光唯  
公耐之陟降在旁南山峩峩渭流湯湯公之流風山高水長

右墓誌銘王士禎撰



K320.49

1573312

2

中国科学院图书馆

匡厚者庸茂德未幾... 卷二十一 五

臣

157-840



21101000161369